

حكايله لر تۇپلمى

سېنىشتە



ايشانچ تۇره

۱۴۰۲ ھ.ش

www.ezgu.org

سېنښته

حكاية لرتؤپلمى

ايشانچ توره

۱۴۰۲

کتاب بېلگيلری

کتاب آتی: سېنشته

يازوچی: ايشانچ توره

نشرگه تيارلاوچی: محبوب الله توران

صفحه لرنی ترتيبگه سالووچی: محبوب الله توران

مقوا چيزووچی: اولنیش

چاپ ېېری:

نشر ېیلى: ۲۰۲۳/۱۴۰۲

چاپخانه:

تیراز:

اوشبو حكايه لريم تۇپلمىنى جاندىن عزيز سېويكىلى عمر يۇلداشىم زهرا جان گه بغيشله ديم.

ايشانچ نۇره

مندرجه‌لر

- ۱..... قرمزی پیراق
- ۱۴..... بلبل سیره‌مه‌گن کپچه
- ۲۵..... ایکی کوی آره‌سی
- ۳۲..... تورموش
- ۴۸..... قاره قوش
- ۵۸..... آغریق
- ۶۷..... آق و قیزیل
- ۸۵..... یرمیمنی ایزله‌یمن
- ۹۸..... اولماق آسان اېمس
- ۱۰۸..... بای حاجی
- ۱۲۱..... توی و عزا
- ۱۳۰..... قوش بقه‌تېره‌ک
- ۱۳۹..... کیمیا
- ۱۶۰..... قلمپیر
- ۱۶۸..... اوزیلگن ارقان
- ۱۸۱..... کۆزگو سینیقلىرى
- ۲۰۳..... بیر اوپگن برماقلىر
- ۲۱۴..... تهمت

۲۲۸ کتته کمدن نری قاضی نینگ باغی، قوشیق
۲۳۵ میمنه جان
۲۴۸ ایکی تقدیر
۲۶۱ ماوی بیراق آستیده
۲۷۱ قیمتگه توشگن محبت
۲۷۹ مامانینگ یادگاری
۲۸۹ آمازون
۳۰۸ قیزیل داغ
۳۱۵ معجزه
۳۲۳ اوشلمه گن آرزو
۳۳۹ نجات ایزلب
۳۴۶ ینگلیش منظره
۳۵۲ بارسه کپلمس
۳۶۳ آتسیز چقه لاق

سۆز باشى

قۇلىنگىزدهگى اوشبو رساله حكايله ر تۇپلمى دير. اوندە همەسى بۇليب ۳۲ حكايله سيغديريلگن. بو كتابنى ايشانچ تۇره جنابلرى حكايله لرى نينگ بيرينچى جلدى دېب حسابله يمىز.

بىزگه معلوم بۇلشيشچه، ايشانچ جنابلرى حاضرگه چه جمعاً ۸۳ ته حكايله يازيب، مجازي ترماقلىر ارقله لى اؤز مخلصلىرى خدمتنگه يبتكزيب بېرگن. كمينه اوشبو حكايله لرى تۇپلب، اولرنى املا جهتدن حاضرگى اؤزبېك-عرب يازوويگه ماسلب چيقيب و اولرنينگ تركيبيدهگى بعضى بير قيين سۆزلرگه لغتنامه لىر واسطه سيده ايضاح بېرديم. حكايله لرى نينگ برچه سيني بير كتابده تۇپله گنيمده كتاب حجمى اوشيب كېتر ابدى، بار حكايله لرى نيكي ياكه اوچ قىسمگه بۇليب نشر قىلشنى معقول دېب بيلديم. شونينگ اوچون هم حاضر استاد حكايله لرى نينگ بيرينچى جلدىنى حضورينگىزگه تقديم اېتماقده من. قالگنلىرى هم البته كه يقين وقتده خدمتنگىزگه يېتيب باره دى.

شو اۋرىنده استاد ايشانچ تۇره نينگ ايجادياتى و حكايله لرى حقيده ازگينه سۆزلب اۋتيشگه رخصت بېرگه يىسىز:

اۋزبېك تىلى دنيا نينگ باى تىللىرىدن سنه له دى. قوشنى اۋزبېكستانده چمه سى اۋتگن بير عصر دواميده مهم ادبى اثرلىر، تىلشناسلىك همده ادبىاتشناسلىك بۇيىچه اۋنلب مهم مركزلىر تاسيس اېتيليب فعاليت آلب بارماقده. اما، افغانستانده كۆپ يىللىك

اوروشلر، دولت‌نینگ اۋزبېك تىلى و مدىتېگه بې‌فرق يانده‌شگى سبب خلقىمىزنىڭ كته قسى سوادسىزلىگى، تىلىمىز بۇيىچە متخصصلر آزلىگى و سۇنگى يريم عصر مابىنىده قۇشنى مملكت اۋزبېكستان بىلن علمى-ادبى علاقه‌لر تائىلنمەگى باعث بو يورته هلى دىپىرلى اۋزبېك ادبى محىطى يره تىلمەگن. لېكن بو جريانده، سانى ايكى قۇل برماغىدن آشمسه هم تىلىمىزنىڭ بعضى بىر فدائى قلمكشلىرى اۋزبېك تىلىنىڭ اكادېمىك اۋرنىنى سقلب قالىشگه جان و دل بىلن محنت چىكىپ كېلگنلر. جملەدن، ايشانچ تۇره جنابلرىنى انه شو محنتكش ايجادكارلردن بىرى دېسك مبالغه قىلمەگن بۇلەمىز.

استاد حىياتىنىڭ كته قسىمىنى اۋزبېك تىلى و ادبىياتى ساحەسىده قلم تېرەتېش بىلن اۋتكزگن. او ذاتىنىڭ اۋزبېك تىلىده يازىلگن اثرلىرىنى كۇپ باره اۋقىگىمىز. ايشانچ تۇره جنابلرى بو يۇلده صادقانه و مسووليتلى ايتىلىش بىلن ادبىياتىمىزنىڭ يىڭى يۇنلىشى بۇيىچە تىلىمىزنىڭ باشقه محنتكشلىرى قطارىده يۇللاوچىلىك وظيفەسىنى بجرىب كېلماقده. استادنىڭ يازوولرى بىلن تىش كىشىلر بو ادعامىز ناتۇغرى اېمسلىگىنى البته كه تصدىقلەيدىلر.

استادىمىزنىڭ حكاىەلرى و نثرى ايجادى بايىده سۇزلنەدىگن گپ كم اېمس. لېكن قىسقه بىر شكله بىلگىنىمچە اوشبو تۇپلمەگى حكاىەلرنىڭ ايرىم خصوصىتلىرى تۇغرىسىده اشاره قىلىپ اۋتماقچىمىن:

بدىعىلىك: حكاىەلرنى اۋقىش جريانىده اۋقوۋچىنىڭ كۇزىگه تىشلنەدىگن بىرىنچى و اېنگ مھم نرسە سۇزلر و گپلرنىڭ بدىعى تىكىبى دىر. برچەمىزگە معلوم

که، افغانستان محیطیده اۋزبک تیلی نینگ نثرچیلیگی بۋیچە قانقرلی درجەده ایش بجریلیمە گنی اوچون کۋنگیلگە یاقەدیگن بدیعی نثری اثرلر جودە کم اوچرەیدی. لېکن ایشانچ تۋرە جنابلری بو کمچیلیکنی یخشی انگلەگنی باعث برچە اثرلرینی گۋزل ترکیبلر ایله تاتلی یرەتیشگە بار استعدادی و کوچی بیلن ایتیلگن.

اۋلمس سۋزلر: خلقیمیز آرسیده شوندهی سۋزلر بار که ایشیتیش یا که گپگە قۋشیب ایشلتیش بیلن انسانگە علیحده بیر روح بغیشلەیدی. افسوس که بوندهی سۋزلر هلیگە چە سۋزلیکلر ترکیبیده قید ایتیلیمە، پریشان حالده حیات کپچیرماقده. استادنینگ حکایه لری ترکیبیده بو قبیل سۋزلردن جودە کۋپ اوچرەب توره دی. تیلیمیزنینگ تبشە تبگمە گن و افغانستان محیطیگە خاص بۋلگن نایاب سۋزلرینی اۋلیمدن قوتقریش خصوصیده هم ایشانچ تۋرە جنابلری نینگ اثرلری اهمیت کسب ایتەدی.

قیشلاق حیاتی: اوشبو حکایه لرنینگ کتە قسمی قیشلاق حیاتی اساسیده تصویرلنگن. ملترنینگ تیل و عرف-عادتلرینی سقلشده قیشلاق آدملری اساسی رۋل اۋینه یدیلر. شونینگ اوچون هم ادبی اثرلر یرەتیش بۋیچە قیشلاق حیاتیگە مراجعە قیلیش جودە مهم دیر. یازووچیمیز بو مهم مسوولیتتی یخشی انگلەگن حالده حکایه لری نینگ کۋچیلیگیده قیشلاق یشاۋچیلری نینگ حیاتی نی اوستەلیک بیلن عکس ایتدیرگن.

خلق عرف-عادتلی: کۋپ زمانلردن بېری خلقیمیز آرسیده تیریک سقلنیب کبەلە یاتگن بیر قطار عرف-عادتلر و رسم-رسوملر اوشبو تۋپلمدەگی حکایه لر ترکیبیده اۋز اۋرنینی تاپگن. خلقیمیز مدنی حیاتی نینگ تورلی قیرەلری یخشی گینه پرداز بېریلیب گۋزل تصویرلنگن بۋلسە، نامعقول و انسانی حیاتیگە ضرر یبتکزووچی عادتلر و رسم-رسوملر قارەلنگن و آدملرنینگ یرەمس رسم و رسوملردن واز

كېچىشلىرى-يو، تورلى كۆرىنىشىدەگى خرافاتگە قرشى كورهش آلىب بارىشلىرى بۇيىچە ترغىب اېتىلگن.

قاره تقدىر: اوزاق يىللر دوامىدە اوروشلر و قان تۆكىشلر عاقبتىدە يوزهگه كېلگن يامان وضعيت و ملتىمىزگه روا كۆرىلگن ظلم و ستملر جريانيدەگى خلقىمىزنىنگ قاره تقدىرى اوشبو تۆپلمدەگى حكايلەر قهرمانلىرىنىنگ قىلمىشلىرى عكس اېتىدىلگن لوحه لردە روايت قىلىنگن. بو حكايلەر يالغىز حكايله ليگىچە قالمەي، خلقىمىز تارىخىنىنگ سۇنگى يىللر اوروشلىرى دۆردەگى كۆزگوسى صفتىدە هم رۇل اۋىنەيدى.

سۆزلىرىم آخريدە، حرمتلى استاد ايشانچ تۆره جنابلىرىنىنگ ايجادياتىگه برکه و اۋزلىرىگه چرچە مسلىك و تن ساغلىك آرزو اېتىش بىلن بيرگه، بوتون خلقىمىز و آينىقسە ادبيات شيدالرىنى اوشبو حكايلەرنى اۋقىب فايده لنىشگه دعوت اېتەمن.

حرمتلر ايله

محبوب الله توران - كابل

قرمزی پیراق

قرمى پىراق

«بۇدنه نى جايى يۇق، قىگە بارسە يىتپەلق!»

مقال

بويوك اتلىغ بىر انسان بار. او بىر پىتلىرى اۋز يورتىدە ھم، اۋزگە يورتدە ھم اۋزىنى ھمىشە غربتدە يىشب كېلەياتگن حس قىلردى. اۋز يورتىدە غربىلىك يامان بۇلركن، غربت اونىنگ سويكلرىنى اۋغىرگە سالىب يىنچگن، كېلچكلە تىب^۱ يوبارگن. ھىچ بىر بىرگە سىغمەگن بويوكنى اوچىنچى بىر غربت ديارى كوتەياتگندى گۇيا. او: «كېلگوسى وطن مېنگە سۇنگى قۇنىم^۲ بۇلەدى» -دېگن ايلىنچنى^۳ يورەگى نىنگ بىر چىتىگە توگىب قۇيدى.

بويوك نىنگ تقدىرى كۇپدن بېرى كېلەجك نىنگ خام ايلىگە باغلىنىپ قالگندى. او قارانغى كېلەجك بورچكلرىدن اۋزىگە مكان قىدىرشگە توتىنىپ^۴ كېلردى. نھايت يىلاوى^۵ اوزرە قرمىزى پىراق توشىرىلگن بىر مملكت بويوكنى اۋز بغرىگە آلەدىگن بۇلدى. يېرى كېنگ، سوو و ھواسى چۇنگ^۶ بو اۋلكە نىنگ تىك يىلاوى بىتىدە افرا (Aphra) برگى صلابت تۇكىب تورەدى. بىراغى اۋرتەسىگە توشىرىلگن تۇق قرمىز بۇياق كۇرر كۇزنى قووانتىرەدى؛ اچىگە سرور؛ كىشى نىنگ تىلىگە غرور؛ دلگە

^۱ كېلچك: اۋغىر، نرسەلرنى تويەدىگن، يىنچەدىگن ايدىش. كېلچكلەماق: اۋغىرگە سالىب يىنچماق.

^۲ قۇنىم: قۇنىش ياكە تورىش جايى؛ منزل؛ تىنىم، تىنچلىك.

^۳ ايلىنچ: بىتىشىش امىدى، كۇزلىگن درد-مقصد؛ امىدوارلىك.

^۴ توتىنماق: بىرار ايشنى بجرە باشلەماق، بىرار ايشگە كىرىشماق.

^۵ يىلاو: بىراق، توغ.

^۶ چۇنگ: كتە، اولكن؛ زۇر؛ كوچلى.

حالاتو بغيشلەيدى. سياستى جهان شمول، اقتصادى يوكسك؛ تېنگلىك نظامى برقرار، تۇق، باى بو ديار نىنگ قانونلرى يىخسى ايشلەيدى. بىراغى ماوي^۱ آسمان سرى مغرور هيلپيره ياتگن اولكه اساساً مهاجرلردن تشكيل تاپگن. بو توپراقتى بىر معناده هر خيل باسىم^۲ و سيقوودن اېزىلىب ادا بۇلگنلر؛ يورتیده سيغمه گنلر، وطن گدالر مملكتى دېسه هم بۇلەدى. تۇق قرمزى برگ توشيريلگن بىراق، اولوغوار يلاو مملكت نىنگ ملي رمزى، شكوه و قدرتى بېلگىسى دىر.

عجب بۇلدى. انه باقىنگ تقدير نىنگ ايشيگه، آرزو-اىستكلرى اوشهليب^۳، جناب بويوك تۇق قرمزى بىراق سالىنگن بىراقلى دياردن كۇز آچدى. به هيتت هوا كېمەسى^۴ بويوكنى عابلهسى بىلن مينگ-مينگ چقىرىم يۇل^۵ آشه اولوغوار مملكتگه كېلتىرىپ توشىردى... طبعىتى ساووق؛ قۇينى ايسىق وطنگه كېلىپ قۇنگنېگه ايشانگىسى كېلمەيدى. بو نا تىش ايزغىرىن و ساووق يورتده نيمه لرنى باشدن كېچىرىشى هلى قارانغى.

اېندى او، بۇياقلىرى تامىب تورگن تۇق قرمزى بىراق نىنگ سۇلىم^۶ هوا سىدن تۇيىب-تۇيىب نفس آلە ياتگن بۇلدى. بويوك اوچون «آرتده قالدى درد و غم، آرتە قالدى شۇر الم!». او قىزىل بىراقلى يورتى بىراغى نىنگ تنسيق^۷ توپراغىنى شكرانهلىك حقى اولە راق كۇزىگه سورتدى. بويوكنى قووناق^۸ آنلر چولغب^۱ آلدى. سېوينچ كۇز ياشلىرى

^۱ ماوي: تىنىق كوك، هوا رنگ.

^۲ ياسىم: اورغو.

^۳ اوشلماق: عملگه آشماق، رۇبابگه چىقماق.

^۴ كېمە: كشتى.

^۵ بىر چقىرىم يۇل: ۱،۰۶ كىلو مترگه تېنگ قديمگى اوزونلىك اولچاو بىرلىگى؛ بىر كىلو متر.

^۶ سۇلىم: ياقىملى و گۇزل، لۇپى، دۇندىق؛ بې غبار، صاف.

^۷ تنسيق: عموماً كم تاپيله دىگن، كم بۇلە دىگن، كم اوچره دىگن؛ ناياب؛ كم قىلىنه دىگن ياكه بىرر جايدە كم

بۇلە دىگن، لېكن سېويب بېيله دىگن.

^۸ قووناق: شاد، خورسند، قووانچە تۇلە.

ئېلە باش اېگىب، قىزمى بىراقنى اۋپىدى. بويوك نىنگ بو اۋلكە گە نىستاً اَلقىشلىرى مۇل، يىنگى-يىنگى تىلَكلىرى كورتكلەى باشلەيىدى. كون چىقرده بىقىب ۲ عمر كېچىرىش توگب، اېزىلگن كۈنگىل چىگىللىرى يازىلە كېتىدى.

اېتىدىن قرەسە، اونى قىنب كېلگن اۋسل ۳-قىلتىس ۴ نرسەلردن نشانە ھم يۇق بو يېرلردە. مقدس موھومات و آلە قۇقىرلر روھىنى كېمىرمەيىدى ۵. فكىرى، اعتقادى اوچون ھىچ كىم جزاگە تارتىلمەيىدى. بىر پىتىلرى دەشتلى يىنگرەب كېلگن، اېندىلىكدە اېسە، چۇغى انچە پىسەيىب، اۋچىب، كۇچسىزلەنىب قالگن چىركاۋ-كىلىسالردن آندە-ساندە قۇنغىراقلر تاووشى اېشىتىلەدى. نىشى سوغىرىب آلىنگن كلىسا راھىللىرى انچە رام اېتىلگن. اولر حاضرچە بې آزار. مقدس روح ھم عرش اعلى سىدىن يېرگە توشىرىلگن. كلىسالر عامەگە خىزمەت كۇرستىش ادارەلرېگە اېلنتىرىلگن...

او يشب كېلەياتگن يېردە چىنەكم ۶ دىنبايلىك گوركورەب يشنب بارەياتىر؛ ھمە نرسە انسان اوچون. بو يېرلىكلر جىتنى اۋز زمىنىدە قورىب قۇيگنلر. توزوك ۷-تۇرەلر ۸ بىر تېكىسىدە ايش كۇرەدى. برچەنىنگ ارمانى اوشلگن؛ اېزگو و امان-امان كونلر بو زمىنلردە طنطنە قىلەدى. ھمە نرسە بار، اما، غربت دردىگە درمان يۇق. او ايشىنى قىلىب بارەبوپەدى...

۱ چولنەماق: اېلنتىرىب، اطرافلې اۋرەماق، اطرافىگە اۋرەب قۇبماق، اۋرەب چىقماق؛ روھىتىنى، وجودىنى اېگللەماق، بند اېتماق، قمرەب آتماق.

۲ بىقماق: ۱. بىقىنىب، بېكىنىب ياتماق. ۲. پىستىرمە قۇيىب، پاىلې ياتماق.

۳ اۋسل: يرەمس، يامان؛ بې معنى.

۴ قلىتىس: خىلرلى، عاقىتى يامان؛ ناقولەى؛ علىحدە احتىياطكارلىك طلب قىلەدىگن، نازك.

۵ كېمىرماق: قىتىق نرسەنى تىش بىلن قىرىب، اوشەتىب مىدەلەماق؛ غچىماق؛ تەلەب قىينەماق، عذاب بېرماق.

۶ چىنەكم: حقىقى، اصل، چىن؛ چىندن.

۷ توزوك: قانون-قاعدەلر تۇپلمى؛ نظام.

۸ تۇرە: يوقارى طبقەگە منسوب كىشى؛ زادەگان، آق سويك؛ كتە عملدار، حاكم.

ھەر نرسەنىڭ بىر اماسى بار-دە! دومەلاق^۱ باشلردە قندەى اۋىلر ايزغىب^۲ يورگىدىن، ياووزلىك^۳ شىپەسىدىن^۴ ھەممە قطارى جناب ھەم بېخىر. ھە، تۇغرى! ھىچ كىمىنىڭ مېھسەگە كىرىپ بارىپ، اونىڭ اۋى-خىالىنى تىتىپ تېكىشىرىپ بۇلمەيدى-دە... ھەممە يېردە ياووزلىك بۇلگىنى سىنگرى قىزمى بىراق اۋلكەسىدە ھەم يۇق اېمىس. بويوك: «بو اۋلكە، بىر قۇلىنگگە بال توتقەزدى؛ يەنە بىر قۇلىنگگە آغو. اىستەسنگ بالىنى تىلە؛ اىستەسنگ آغوسىنى اېچىپ اۋل» -دېگن خلاصەگە كېلدى.

اېندى بىر يىل اۋتىپ اېدى. كۈزنى قىشتىرووچى، كۈزگى تۇق قىزمى يىراقلر جناب بويوكنى اۋزىگە يەنە-دە مەتون ايلەدى. يىراقنى كۈرىشدىن حىور-حىلوت آلەپىدى. جناب بويوك ھەر دايم كېچ قوياش باتىشدىن االدىن اويىدىن چىقىپ، اوتوبوسگە اۋتىرىپ، كۈركم باغ-راغلر سېر اېتىپ، تاماشا قىلىشگە عاشق. طبعىت آغوشىدە خىال سۈرىش اونىڭ اېرمىگىگە^۵ ايلەنىپ قالگن. او بىر عشق دردىگە مېتلا. جاندىن عزىز سېوگىلىسى يىراقلر بىلەن ھەر كۈنى بىر مەرتە دىدارلشەدى. الوان يىراقلر كۈركىنى^۶ توصىفلش و تصورىلشگە سۈز بېتمەيدى؛ تىل اېسە عاجزلىك قىلەدى. تۇلغەنە-تۇلغەنە آقەياتگن بىر دريا كتەگىنە شەھرنى قاق اېككىگە بۇلىپ قۇيگن. بو مەكان كتە يۇل بۇيىدە جايلىگن. ياتقىزىلگن تېمىر بۇىلپ، آرە-سىرە گور-گورلاوچى تېرىنلر اۋتىپ-قىتىپ تورىيدى. بېمىثال كۈركى ايلە يورەككە چۇغ سالەياتگن

^۱ دومەلاق: يومەلاق، گرد.

^۲ ايزغىماق: بىرار مەقسەدە كېزىپ يورماق؛ دەيدىماق؛ سىغىماق.

^۳ ياووزلىك: خۈنرېزلىك، جاھلىك.

^۴ شىپە: قولاققە چىلىنر-چىلىنمىس تاووش؛ كىمىسە ياكە نرسەنىڭ غىرە-شىرە، بىلىنر-بىلىنمىس قارەسى، افادەسى؛ بېلگى، علامەت.

^۵ اېرمك: وقتنى كۈنگىل چاغلىك بىلەن ياكە زېرىكمەى اۋتكىزىش اوچون خىزمەت قىلەدىگن نرسە، مشغولات؛

كۈنگىلگە تىلى بېرەدىگن، اۋوتەدىگن نرسە، كىمىسە؛ اۋونچاق، يوپىنچىق.

^۶ كۈرك: حۇن، چىراى، گۈزلىك.

آغاچلارنىڭ^۱ الوان يىراقلىرى رنگلىرىگە كۆز سالمەي بۇلەدىمى؟ اوستە قۇل طبعىتىگە تىشنا آيتمەي بۇلەدىمى؟ كۆزنى سوغارمەي بۇلەدىمى اۋزى؟ بو يېردەگى قىزى يىراقلىرى بۇلك جايلارنىكىدىن نېمەسى بىلەن دېر اجرھېلىب تورر اېدى، عجابىب!

كىچىك راق شېھر مەركىزىدە اوتوبوسلار تورەدىگن جاي بار. يۇلاوچىلار^۲ بىلەن شېھرىنى المىتىرىپ، اېستەگن تامان يۇل آلەدىلەر. اۋرىندىقلار^۳ اۋتىرىپ، اوتوبوس كوتوۋچىلار اياق يازىش اوچون اوياق-بوياققە سالسە-سالسە تېرەنەدىلەر. قارە تېمىر پىنجرەلر آلدىدە قۇيىلگن اۋرىندىقلار^۴ يىشىل، قىزىل، زىرىن كوزگى طرفە بىرگىلرگە تىكىلىپ اۋتىرىش نىڭ اۋزىگە گىشى^۵ بار. رنگىن يىراقلىرىگە قىنانلرى چەيىلگن تورلى-تومىن كېلەر^۶ اوچىپ قۇنماقدە اېدى. هوا مالايم، انچەگىنە ياقىملى. اېسە ياتگن يېل بىلەن سىلپ اۋتەدى... بىردىن بىرتىق-چىرتىق بولوتلر آسمان يوزىنى قاپلىب آلدى. بىر سىدرە^۷ سىيىلەب ياغىپ ھەم اۋتدى. شو تابدە، كۆكىنىڭ كون چىقىر تامانىدە، بىر دايە سىمان^۸ كەلك^۹ بۇزەرىپ چىقىدى. انە تماشاشا طبعىت اۋز كۆھلىگىنى^{۱۰} بىرەم قىلماقدە. كەلك رنگلىرى بو گل^{۱۱} انچەگىنە يارقىن پارلىب تاۋلەنىپ^{۱۲} تورىدى. راسە تىنىقلىگىدىن كەلك رنگلىرىنى گۈزل قىزىنىڭ اۋرىلگن ساچىلرىنى يېشىپ، ترەگندەي قىلىپ، يېتتى توتىمگە اجرەتىش مەمكىن اېدى. پروانەلر

^۱ آغاچ: درخت، چۆپ.

^۲ يۇلاوچى: مسافر؛ يۇلە كېتە ياتگن، اۋتىپ بارە ياتگن شىخس.

^۳ اۋرىندىق: اۋتىرىش اوچون مۇلجلانگن مەخسوس ماسلمە، ستۇل، چوكى.

^۴ گىشى: بىرار نرسەن آلىنەدىگن ذوق.

^۵ كېلەر: ايكى جفت اق، كول رنگ ياكە رنگە-رنگ قىنانلى نازك حىرات.

^۶ سىدرە: مرتە، كرە، بارە؛ عىن بىر پىتدە؛ معلوم مدتدە؛ قچانلردىر.

^۷ سىمان: سىنگرى، اۋخشەگن، كىي.

^۸ كەلك: ياي، كمان؛ آى كمان.

^۹ كۆھلىك: كۆرىنىشى ياقىملى؛ چىرايلى، خوشرۇي، گۈزل.

^{۱۰} گل: نوبت، اشغال اېتىلگن اۋرىن.

^{۱۱} تاۋلەنماق: جلۋەلنماق.



اۋزلىرىنىڭ شوخ قاناتلىرىنى انە شو كەمەلك بويىقلرىگە باتىرىپ، سۇنگ قنات نىڭلىرىنى درخت برىڭلىرى اوزرە سېپىپ، يايىپ قۇيىڭىندەى اېدى گۇيا.

كۇپ اۋتمەى، يۇقارى تاماندىن گور كىرە گنچە هواگە قارە توتون پوركب^۱ كېلەياتىڭ رېل، بېكت^۲ سرايچەسىدەگى ساكنلىكنى بوزدى. كەمەلك ھەم، قوبوق توتون آرتىدە بېكىنىپ آلدى. تېمىر يۇلدە تر-ترلەپ، سىلتەنىپ^۳ بارەياتىڭ رېل سېكىن اۋتىب بارماقە اېدى. جناب بويوك سنب قرەسە، رېل تىركەملرى^۴ بىر يوز اۋتىز تەگە يېتىدى. چۈزىلىپ كېتىڭ رېل اۋتىب بۇلگونچە كېلەكلەر ھەم كۇزدن غايب بۇلدى.

جناب بويوك افرا درختى آستىدە اۋتىرىپ، قىزىل برىڭلر تاماشاسىگە غرق. شو پىت بىر دانە قرمزى يىراق درختدن اوزىلىپ، بويوك نىڭ قوچاىگە سىپىرىلىپ توشدى. قىزىل يىراقنى قۇيىدىن آلدى-دە، قۇلىدە توتىڭچە اونگە تىكىلىپ قالدى. يىراق يوزىدە بىتىپ قۇيىلگن، يىراق، ھلى اۋقىلمەگن سىرلى يازوونى بىر-بىر كۇزدن كېچىرەدى. ھلى بېرى اوندن كۇز اوزگوسى يۇق. «اۋلىشگە وقت كۇپ؛ يىششگە پىت قىسقەھلىك قىلەدى. حىياتى، بارلىقنى انگلەگن، توشونگىنىڭ كويى يىشەگىنىڭ كېلە بېرەدى. منە شو قىزىل، ارغوان، يىشىل، قۇنغىر^۵، سىرىق، مامىش^۶، ماوي، ياسمن رنگلى يىراقلر حقى حرمتى، كويىگن عمرلرىم عوضىنى بېر اې طبعىت!» - دېگن تىلكلر اونىڭ مېيەسىدە چىقن بېتىدى.

^۱ پوركەماق: توتماق؛ پوفلەماق؛ سوو ياكە باشقە سوپوق نرسەنى كوچ بىلن ذرەلرگە آلىنتىرىپ ساچماق؛ ترقتماق.

^۲ بېكت: تۇختب دم آلىنەدىگن مخصوص جاي؛ منزل؛ اىستگاه.

^۳ سىلتنماق: كوچ بىلن كېسكىن تارتىلماق ياكە ايتىرىلماق.

^۴ تىركەمە: واگون.

^۵ قۇنغىر: قارە-سىرىق رنگلى، تۇق مللە؛ تۇق كول رنگ، قارەمتىر.

^۶ مامىش: مامىقەدى (پختەدەى)، آچىلگن، آق رنگ.

تون اۋزى نىنگ زر پلاسىنى^۱ تۇشەماقدە اېدى. يۇلار بۇيىدە اوستونلارگە اۋرتىلگن يارىتگىچلر^۲ شەرنى چىراغان قىلىپ تورىدى. چىراقلارنىنگ پارەشى تون پردەسىنى اچىپ تىشلەگن. كون بىلن اۋرتەسىدە فرق يۇق دېسە ھم بۇلەبېرەدى. اَپْاَق، كوپە-كوندوزگە اۋخشەيدى. يېرگە اىگنە توشسە كۇرىنەدى. اوتوبوسلر سرايچەسىدەگى چىراقلردن توشىپ تورگن نورلر افرا اياغچى نىنگ قىزى يىراقلرنى ينە-دە، سېر جلا ايلەگن. تېورەك-اطرافدەگى تۇرت-بېش قوتلى اوى دېرەلرېدن پىستگى منظرەنى مراق بىلن تماشا قىلىپ تورگنلر ھم كۇزگە ايلېنردى. اۋرىندىقدە اۋتىرگن جناب بويوك حىرتىدن چلغىب^۳، باشىنى كۇترىپ يان يېرىگە قرەب قۇيدى. شو پىت جناب بويوك الدېدە، كۇزىگە قارە كۇزلىك^۴ تقىب آلگن سېمىز بىر كىشى پىدا بۇلىپ قالدى. اېگنىدە كۇك كۇلىك، اياغىدە اېپسىز بوت، قۇلىدە قارە تۇرە اوشلەگن نا تىنىش آدم، ادابنى جايىگە قۇيماقچى بۇلىپ، اۋز تىلىدە «بون نوپى / bonne nuit» - دېپە سلام قىلدى. بويوك بىلن قلىن سۇرەشدى و باش ايرغىب^۵ قويوق ايلجەيدى. آدمگرچىلىك يوزەسىدن جناب بويوك ھم «تون ايدىن» - دېب بايەگى^۶ كىشىگە قۇل اوزەتدى. اسمى نامعلوم بو آدم نىنگ اىچىدە نىمەلر كېچە ياتگنى بىلىنمىس، يورىش-تورىشى عادى كۇچە آدملر سىنگرى، اپتىدن اۋىچن، بې جىرىم، كەسوقوم^۷، مدعاسىز كۇرىنەدى. بىر قرەسە، تىلمچىلىك^۱ قىلىپ يورووچى كۇچە

^۱ پلاس: قۇلدە ياكە ماشىندە تيارلەندىگن كتە جون شالچە، توكسىز گىلم؛ يېرگە تۇشلەدىگن بويوم.

^۲ يارىتگىچ: چىراق؛ گروپ.

^۳ چلغىماق: بىرار نرسەگە الحسب، اساسى ايش، موضوع و شو كىيلرنى اونوتماق ياكە اولردن چېتگە چىقماق؛ ادەشماق.

^۴ كۇزلىك: عىنك.

^۵ ايرغىتماق: اتماق، اولاقتىرماق؛ يوقارىگە تامان سىلكىماق، كۇترىپ تىشلەماق. باش ايرغىتماق؛ باشنى قىمىرلەتەپ قۇيماق.

^۶ بايەگى: بايە، ھلى صادر بۇلگن، بايە يوز بېرگن، كۇرىلگن، اېشىتىلگن؛ ھلىگى؛ اۋشە.

^۷ كەسوقوم: اۋزىنى كمتر، خاك سرتوتەدىگن؛ تارتىنچاق طبعىتى.

گدايىگە ھەم اۇخىش كېتەدى. ساچى قىرتىشلانغن، يلتىرەمە سۇپاق^۲ تقيير^۳ باش بىر كىشى اېدى؛ ساقاللرى ھەم تگىدن قىريب آلىنكىدن يلتىرەيدى؛ سۇل قولاغى اوزىك نىنگ كۇزى دېك قىليب تېشىلغن؛ بۇيى بلند؛ اېلكەلرى كېنگ، قۇللىرى اوزون؛ باش برماغى نىنگ تىرناغىدە كنجىددېك خالى بار. قارنى آسىليب راق تۇرەدى. تمەكىنى^۴ بورقېتىپ چېكىشى، شىرە كىف تورقى^۵ رزم ساليب قرەلسە بىر نرسەلرنى اېسگە سالردى.

- مرحت قىلېنگ، -دېدى شو كىشىگە جناب بويوك.

- رحمت، -دېدى ناتىش آدم اوز تىلىدە و نىمەنى دىر آيتماقچى بۇلىب لبلېرنى جفتلەدى. اونگچە:

- بىزگە بىرر گېنىگىز بارمى؟ -دېدى جناب بويوك.

- اېكى دانە سگرت بېرسىگىز، منە شو اېكى كىستنى بېرەمن، -دېدى اۇنگ قۇلىنى چۇنتىگىگە تىقەياتىب. جناب بويوك اۋىلەنىب راق، باشىنى قويى سالىنتىردى و بايەگى كىست تكلېف قىلغن آدمگە تىكىلدى. شو پىت بېكتلر آلىدىنى سورپرەياتغن كىچىك ماشىنە غورىللب كېلدى و قىزىق كېچەياتغن ملاقاتنى بوزغن بۇلدى. شاوو قىن تىنگىچ، ناتىش كىمسە قارە تۇرۇسسىدەگى اېكىتە كىستنى جناب بويوككە توتقۇزدى. جناب بويوك ھەم:

- سگرت سېندىن آىلنىسن، -دېپە قۇطى سىدن بىر جفت سگرتنى ناتىش آدمگە توتقۇزدى و ھلى آھارى^۶ كېتمەن رادىوكىستلرنى قۇلىگە آلىب، يوزىدەگى يازوونى

^۱ تىلمچىلىك: تىلنچىلىك، گدايگرلىك.

^۲ سۇپاق: يىسى و چۇزىق.

^۳ تقيير: ساچى، جونى، توكى يۇق؛ توكسىز.

^۴ تمەكى: تىناكى، چېكىملىك.

^۵ تورق: تىشى قىفە، اوضاع، وجات.

^۶ آھارى كېتمەن: پردازى بوزىلمەن، يىنگى، ايشلە تىلمەن.

اۋقىشىگە كىرىشىدى. نا تىنىش آدم كىستلرنى اخلاص يوزەسىدە بېرەياتىگنە اۋخىش:
 «بو كىستلر اريگولۇ، چىنەكم صنعت اثرى مشهور اميرىكەھلىك اشولەچى خانىم
 مَدونە و انگلستانلىك ادیل خانىمىنىڭ شاھ قۇشىقلىرىنى اۋزىدە جمعلەگن. بولر
 مېندىن سىزگە بىر ھىدىە. اويگە آلىب بارىنگ، جان قولاغى ایلە تىنگلىنگ.
 اۋزىنگىزنى بولر دىئاسىگە آلىب كىرىنگ و حىياتىنگىزىنگى مضمون و معنا كىسب
 اېتەدى. اېورىلەسىز^۱، دىئاگە قىتە توغىلگن بۇلەسىز دۇستىم!» -دېب تاكىدىلەدى و
 خىرلەشىب، يۇلىگە روانە بۇلدى. كوتىلمەگن تصادفى اوچرەشوو جايىدە توگەدى.

اقتام بۇىنىگە آسىلگنە اۋخىش تورگن مامىق^۲ و زرىن چىراقلر اوخلەمس
 تونىنگ داستانىنى حكاىە قىلىب تورگندەى. آدملىر ايشدىن قىتەياتىگن آنلر اېدى.
 ترانسپورتلر قىتاۋى قويوقلىشىدى. شو پىت سېكىزىنچى اوتوبوس غىر اېتىب بېكتىگە
 كېلىب قالدى. عادى كۇرىنىشلى جناب بويوك اوتوبوس زىنەلرىنى ھتلب^۳، بارىب
 اۋرىندىققە چۇكىدى. اوتوبوس كېسىشگن تۇرت يۇلنى كېچىب اۋز يۇلىدە
 كېتەياتىگندى. يۇلنىنگ ايكى ياققەسىدە تىزىلىب تورگن درختلر اۋشە توصىفگە
 سىغمىس قىرمىزى يىراققەلرگە بوركنگن. كۇزنى قووانتىروچى رنگىن برگلر
 كوچسىزلىكىدىن مەيىن تىترار اېدى.

يىگىرمە دىققە اېچىدە منزىلگە يىتىب آلگن جناب بويوك، اوتوبوسدىن توشىب،
 بېش-اۋن قدم ادىملىب، تۇرتىنچى قوتگە كۇترىلىب اويىگە كىرىب كېتىدى.
 بارەسالىب صنعت اثرى بۇلمىش ادیل و مَدونە خانىمىنىڭ ياقىمتاى كويلىرىنى

^۱ اېورىلماق: اېلنماق، اۋگىرىلماق، اۋزگىرماق؛ بىررر مقصدگە اېرىشىش اوچون يىلىب يوكورماق، حرىكت قىلماق.

^۲ مامىق: پختە، پختە رنگ؛ اق رنگ.

^۳ ھتلب: سكرەماق؛ قىدىملىب اوستىدىن اۋتماق؛ نرسە ياكە جايىنىڭ اوستىدىن قرىشە-قرىشە تامانىگە اېرىغىب

اۋتماق.

تىنگلەماقچى بۇلدى. او تىپ ريكاردى نىنگ اېشىكچەلرېنى موروت^۱ آچىب، كىستلردن بېرىنى تىقدى. بىردن قىامتنى اېسلتووچى غېر طىبعى، اۋتە قۇرقىنچلى موسىقەلرېنىگ وهىمەلى گولدوراس^۲ آوازلىرى ىنگرەدى. موسىقە شاوقىنىدن اوى نىنگ هواسى اۋزگردى. اوى دېوارلىرى، اېشىك و دېرەلردن بېر جنبشگە كىرىب، ولقان^۳ آتېلەياتگندەى بۇلدى. موسىقەدن دنيا توغب، آدملىر جان تلوسەسىدە اۋزلىرىنى جەنم اۋچاغىگە آتەياتگندەى روح حكمران اېدى خانەدە. كېتىدن انگلىس تىلىدە منە بو نجات قۇشىغى ىنگرەدى، ترەلەبېردى.

اۋشە قۇشۇق نىنگ اۋزبېكچە معناسى تخمىناً منە بوندەى:

نجات قۇشىغىدن كۈزلرېنگى آچ،
 حىيات بېر زندان دىر، سېن اوندە اسىر.
 جگرېنگى اۋزىنگ يېمسدن بورون،
 كېچىكىمسدن، شاشىل، اۋزىنگى اۋلدىر.
 دنيا فتنە-فساد باتقاغىگە^۴ غرق،
 او سېنى هم، يوتوب يوبارر آخراً!
 سېن-دە، بېر اۋلىكسن، آچون بېر تابوت،
 يېم بۇلىب كېتمسدن اۋزىنگى اۋلدىر.
 قوزغونلر^۵ اېتىنگى غجىب^۶ يېمسدن-آق،

^۱ موروت ~ موربت: ۱. آرام، استەگېنە. ۲. موروت: اسباب-اسكونە و ماشىنلرېنىگ بورەب اېشىگە سالەدىگن كلېتى، گۇتکە، پېچ.

^۲ گولدوراس (گولدىراس): گولدورەگن آواز؛ كوچلى؛ دواملى.

^۳ ولقان: تاغلردن آتلىب چىقەدىگن، اېرىب آقەدىگن آلاو؛ آتشفشان.

^۴ باتقاق: آياق باسىب بۆلمەيدىگن بۇش لای و شوندەى لای يىلن قاپلىگن يېر، ميدان.

^۵ قوزغون: قرغەسىمانلر عابىلەسىگە منسوب، هر قندەى نرسەنى هم بېيەبەرەدىگن، اۋلىمتىكخۇر اۋتراق قوش.

^۶ غجىماق: سويك، قتيق نان و شو كىيلرنى كېمىرىب يېماق؛ موجىماق؛ تىشلىب، چىنىب قتيق جراحت يىتكزماق.

اۈلكسەرل^۱ باشىنگى چىنمەى توروب،
توبن يششگە سېن محكوم بېنوا.
اۈلېشىنگدن آلدېن اۈزىنگى اۈلدىر!
سېنىگ اۈلېشىنگگە مېن بېر نجاتكار،
افلاس بو حياتدن اۈزىنگى قوتقار.
لعتى بو دنيا سېن اوچون بېر دار،
حكمت درختى مس، بېتىگى آزار.
قرمى پىراق دېك اوزىلېشىنگ بار!
بېر كاسە آغونى بېر نفس سىيقار!
بوندىن اۈزگە نجات سېرە تاپىلمس،
دنيا عذابىدن اۈزىنگى قوتقار!
سۈنگى لحظه بېتىدى كاسەنگى تۈلدىر،
اۈلېشىنگدن آلدېن اۈزىنگى اۈلدىر!

... و

بو دهستلى قۇشقىلرنى حياتىدە اېشىتىب كۈرمەگن جناب بويوك اېكى قۇلى بېلن باشىنى اوشلەگنچە اۈيگە تالدى. عنقانىگ اوروغى ھم تاپىلەياتگن قرمى بىراقلر يورتىدە، اۈلېم قۇشىغىنى تىنگلشنى ھوشى توگول خيالىگە ھم كېلتىرەلمەيدى. اۈلېب-اۈلېب آخىرى جناب بويوك، اۈلېشگە تشويق قىلووچىلر ھر تۈكسىدە آياق آستىدن چىقىب قالمسلىگىگە ھېچ قندەى كفالت يۇق دېگن فكرگە كېلدى. قرمى رنگدن باشقە ھم رنگلر بارلىگىگە يەنە بېر قتله ايشاندى. بېتتە حقيقت بار؛ بېتتە سۈز

^۱ اۈلكسە: اۈگن نرسە؛ اۈلېك؛ اۈلر حالتگە بېتىگن، اۈتە ضعيف، اۈلېمىتىك.

^۲ سىيقارماق: بېر سىمىرىشده اىچماق، نكى-توگىگەچە سىمىرماق.

شو كە: انسانگە حيات يا بال يېدىرر يا آغو اېچىرر. سۇنگى منزلگە باررنيىنگ
بوندىن اۇزگە يۇروغى يۇق!

بلبل سیره مه گن کبچه

بلبل سېرەمە گن كېچە

كتە حاولى. بىر ياغى باققە توتشگن، يەنە بىر تامانى قلىن اۋرىك، جىيىدە، يانغاق و توت درختلرگە قۇشلىپ كېتگن. حاولى نىنگ قاق اۋرتەسىدن سوو اقر، يازدە غوج-غوج درختلر يىراغىدن سايە-سلقىن ترهلىپ تورردى. كۈم-كۈك درختلر نىنگ شاخ-شېئەلرېدە ايلېنىپ قالگن قوباش نورلرى سېكىن-سېكىن برگلر ارسىدە يىشىنماقدە ابدى. بىر زوم اۋتىپ، يىراقلر ارسىدن صۇفە اوستىگە يلتىلېب توشىپ تورگن سرغىش قوباش تنگچەلرى كۈرىنمەى قالدى.

ارتىق عمكى ايوندە اسىقلىق^۱، ايلنەسىگە^۲ زر اۋرەلگن، پۈپكىلى قفسنى پستگە توشىردى-دە، خلتەچەسىدن پستە-بادام سالىنگن دان-دونى قفس كاسەچەسىگە سالىپ سىراقى قوشچەلرىنى بىر اوقتلتىرماقچى بۇلدى. قارنى آقىش، اوستى قۇنغىر و تۇق مللە رنگ بلبل اېسە، بىگىزدەى تومشىغىنى^۳ قفس ياغاچلرېگە اورىپ، يىتيرلەگنچە شتەلاق اتيب سېرەشگە توشدى. او قوشچەنىنگ شۇخ-شۇخ

^۱ اسىقلىق (اسىقلىك): اسىب قۇيىلگن، اسىلگن.

^۲ ايلنە: دايرە، دايرەھوي؛ تۈگرەك، گىدىرەك شكلىدەگى؛ تېورەك، اطراف.

^۳ تومشوق: حيوانلر باشى نىنگ آلد قسمى؛ آغىز، بورون تامان.

تاووشلاردىن ميرىقىب^۱ لذت آلرکن، بو گل اونى آلب بارىب، آفەياتگن اریق بۇيىدەگى اېگلىب تورگن آلمە درختىگە اېلىب قۇيدى. آرتىق عمكى شوندىن كېين سۇرىگە^۲ سالىنگن كۇرپەچە اوزرە يانباشلب، قىزمى چاينىگن كۇك چاينى قوبەياتىب، كۇپدىن بېرى كۇنگلىدە توگىب يورگن مەھم گېينى خاتىنى مەقتب خالەگە اېجەلب^۳، آيتىب توشىنتىردى:

– مەنە اۇغلىمىز آچىل شو پېشىقچىلىكدە راپە-راسە اۇن بىرنى تۇلدىرىب، اۇن اېكىگە اياق قۇيەدى... اېسلەيسىمى؟ بو حقدە اوو اوندە ھەم سېنگە گېيمىنى بىر اوجىنى چىقىرىب اېدىم شكىللى. مېن قۇشنىمىزنىنگ آى سولوو دېگن قىزىنى كۇز آستىگە آلب يورىمىن. قۇنى-قۇشنى، كتە-كىچىكلرنى چىلب^۴ شوگىنە آچىلنىنگ آياغىنى چىتىب، باشىنى اېكىتە قىلىب قۇيە قالەيلىك، نىمە دېيسن ھە خاتىن؟

– مىلى كو-يە آتەسى! بۇيىگە يېتمەگن قىزگە اۇنگ-سۇلىنى بىلمەگن ياش بالەنى اولىنتىرىب قۇيسك، گپ-سۇز بۇلمىس مىكىن؟ اېلنىنگ آغزىگە اېلەى قاپلب بۇمەيدى، اېل-يورئدە اودومگە^۵ اېلەنىب اولگورگن^۶ عادتگە آيرىملر يىخسى قرەشمەيدى. ذاتىمىزدە بۇمەگن اېشىگە قۇل اورمەپىمىزىمى اۇزى؟ تىغىن-ام اۇزىنگىز بىلەسىز آتە جانىسى.

^۱ ميرىقماق: نەھت درجەدە قانماق، قانېقماق، تۇيماق.

^۲ سۇرى: نرسە قۇيىش، يايىش اوچون قورىلگن تۇرت اياققە اۇرنەتېلگن تخته صۇفە؛ تاك، قاقاق و شو كېيلر چىرمە شووچى اۇسىملىكلرنى اۇستىرىش، كۇترىب قۇيىش اوچون شىپان شكىلدە، تېك ياكە قىيە قىلىب كۇترىلگن ماسلەمە، قورىلمە.

^۳ اېجەلماق ~ ھىجالەماق.

^۴ چىلەماق: چقىرماق، دعوت قىلماق.

^۵ اودوم: عموم تامانىدىن قبول قىلىنگن و عمل قىلىنەدىگن ترتىب؛ عادت، رسم.

^۶ اولگورماق: بىرار اېشنى بىرىشگە امكانىت و وقت تاپماق، موفىق بۇلماق، بىرە آلماق، اېرىشماق؛ بېرىلگن بىلىملرنى توشونىپ، اېگىلەب آلماق، اۇزلىتىرماق.

- آى سولوو ھەم سەككىزىنى تۇلدېرىپ تۇقۇزىگە كىردى ادەشمەسم. ۱يىگى يىرىم بىر بوتون دېگنلرى دېك، خىرلى ايشنى كېىنگە سورمەيلىك-دە، تۇىنى باشلب يوبارەيلىك آنەسى، -دېدى آرتىق عمكى خاتىنىگە و تۇى خىرجىلرىنى حسابدىن بىر-بىر اۇتكىزدى. كېرەكلىك آدملىر، آىنىقسە موللە بىر-بىر بىلن مصلحتىنى ھەم پىشىرىپ آلدى. موللە: «شريعىتگە ماس، دىنىمىزدە بار گپ، يىخسى ايشنى وقتىدە قىلماغىلىك عىن صوابدىر» -دېپە سىرپەيگن^۱ ماش-گورۇچ، ياغلىق و اوزون ساقالىنى سىقىمى اىلە سىرىپ قۇدى.

آرتىق عمكى اپرەتلەب تورىپ آىب بۇدەنلر و بلبلىدىن خىر آلماقچى بۇلىپ، برمىقلىرىنى پىشانەسىگە توتىپ كۇز قىرى سالىدى. قوياش يالقىنلرى تېگمەسىن، دېك قفس پۇشىنى قوبىراققە توشىرىپ قۇدى. يانغاق اېزىلگن اىدىشچە سوويدن قوش كاسەچەسىگە اوچ-تۇرت تامچى سوو تامىزدى. مزەنگ-راق بلبلى اۇنگ قناتىنى يايىپ، پىخلىرىنى چۇقىب، تومشىنى بىلن قناتلىرىنى تىرىشگنچە سىرىپ-سىرىپ قشىلەدى. شۇندە آچىل ھەم اۇىنىنى تشلب، قوش تماشاسىگە، آتەسىنىنگ يانىگە كېلىپ تورىپ آلدى. آچىل قفسنىنگ پاپوكلىرىنى^۲ سىلەياتىپ، لىللىرىنى چۇچەيتىرىپ، سىرەماقچى بۇلىپ، بلبلى اوازىنى گىرقىرگن بۇلدى-يو، بىراق، اۇخشتە آلمەدى. قوشچەگە تىكىلركن، حىرت اىلە آنەسىدىن سۇرەدى:

- آتە جان، بېچارە قوشچەنى نېگە قفسگە سالىدۇ؟ او سىقىلىپ زېرىكمەيدىمى؟ اېزىلىپ ادا بۇلەدى-كو بېچارە. آچىق ھواگە چىقالمسە دىققەنفس بۇلىپ، اۇزىنى قفسگە اورمەيدىمى؟ بلبلى آچىللىكىدە گۇل و گلزارگە اوچىپ-قۇنىپ، اۇىنب سىرەشنى ياقىتىرسە كېرەك! او ھەم اۇزىنى اۇز تۇدەلرى آرەسىدە كۇرىشنى

^۱ سىرىنماق: سىللىق يوزە، سىرت اوستىدە مانع سىز، تۇسىق سىز سورىلماق؛ سىرغىنماق، تايغىنماق.

^۲ پاپوك: نرسەلرگە بېزەك اوچون تىقەلەدىگن بىر باغلم تالە، پت، اىپ و شو كىيلر؛ غىجىم، شاكلە.

ئېستەيدى. اگر اونىنگ كوچى بۇلگندە اېدى آدملىرگە اۇخشىب بىزنى ھم قفسگە سالرمىدى؟

– ھە اۋغلىم، گېلرىنگ تۇغرى! ىرمك بۇلسىن اوچون شونداق قىلگنمەن-دە بالم. بو ىم بىر عشق اېكن، شو بىلن اوونىب دردىمنى چىقرەمن-دە. اولرنى اچىب قۇيورسم اوچىب كېتەدى-دە! حىاتدن سىقىلگن دىلردە، غم-قىغولرنى اونىتىش، طبعىتىم زنگ و كىرىنى ارنىتىش، يورەى چىگىلىنى يازىش، خفھلىگىمنى يويىش اوچون شو جانوارنىنگ كىرتەيگن^۱ كۇزلرىگە تىكىلىپ، جىرنگلەگن اوازىدن تىن آلەمن، توشىندىنگمى اۋغلىم؟ او انسان بۇلىپ توغىلمەگنىگە شكور قىلەبېرسىن! – ابروى بارىدە.

– توشوندىم-و، اۋزىمنى اونىنگ اۋرنىگە بىر قۇيب كۇردىم. يورەگىم بىتلەمەى^۲، ھاولىقىب، اۋپىققىمىدن اۋرنىمدە سكرەب توشتىم... قوشچەنى بىر قۇيبېرىپ يوبارەى دېب ھم اۋىلەدىم، سىزدن قۇرققىمىدن اورەسىز دېب شو ايشنى قىلمەدىم، آتە.

آرتىق باى اۋغىلچەسىنىنگ معنالى سۇراق و ملاحظەلرىدن اۋىگە چۇمدى. بىردن خىيالىنى اۋزى رېجەلب يورگن موضوعگە بوردى. فكىرىنى تۋىگە قرەتدى. بىر قارارگە كېلىپ، اچىلنى اويلنتىرماقچى بۇلىپ، تۋىنى اۋتكزەياتگن بۇلدى. اۋتمىشە شەھزادەلر اۋن اىكى ياشىدە پادشاھ بۇلگن اېكن. بىزنىنگ اچىل ھم شو ياشدە دېگن خىياللرگە باردى. تۋىگە تيارگرلىك باشلدى. ايتىلەياتگنلر ايتىلىپ، يساۋول^۳، بكاۋوللر^۱ شى، حاضر ناظر بۇلىشىدى.

^۱ كىرتەيماق: اۋيقوسىزلىك، ھارغىنلىك، چىراقلىك و شو كىبلر نىتىجەسىدە كىچرەيىپ، اىچىگە توشماق.

^۲ بىتلەماق: باتىنىب بىتمە-بىت كېلماق، رۇپەرە بۇلماق، بوزمە-بوز كېلىشگە جرئت قىلماق.

^۳ يساۋول: اۋرتە اسيا خانلىكلىرى دۇرىدە: يوقارى منصبدهگى عملدارلرگە خىزمەت قىلوۋچى قوراللى ساقچى، پاسبان.

ارتىق عمكى ايشلر سرانجام قىلىنگىدىن كۈنگلى تۇق بۇلىپ، سېوىكلى بلبلىدىن خىر ايش فكىرىدە قطار تۇرلر آسىقلىق درخت آستىگە بارىپ توردى. خودى اېگەسىنى تىنىگن دېك، قوشچەلر قۇشەلاق-قۇشەلاق سىرەى كېتىدى. بوندىن حضور آلگن ارتىق عمكى چۈنتىگىدىن قۇلرۇمالىنى چىقىرىپ، قفسلرنىنگ چىگىنى ارىتىپ آلدى. «آت-آوازەنگ بار، تۇىنى سرانجام قىل» -دېگن اۋى بىلن اندرمان^۲. كۇرىپ

قۇبىلگن تيارگرلىكلرنى بىر-بىر كۇزدن كېچىردى.

قۇشنى ولايتدىن اشولەچىلر، چالغۇچىلر چقىرىلدى. تۇىبېكەلر^۳ سرشتە كۇرىشگە توشدىلر. تۇىچىلر قۇشخانەلردە^۴ مېھمان كۇتە باشلىشىدى. قازانلر آسىلدى، قاوورداق و پالاو خان تۇرهلرنى دستورخانىلرگە تارتىش كېرەك.

«بو اىركىت^۵ ايشدىن اىرگنەمن^۶» -دېگن معنادە چقىرىق خطى يوبارلىگىنگە قرەمەى، قۇشنىلردن بىرى عرۇب تۇىگە كېلمەدى.

تشىقى حاولىدە كتە-كتە اۋچاقلردن قويوق توتونلر آسمانگە اۋرلەماقدە^۷ اېدى. قۇلىدە تۇپ اوشلەگن كويواو تۇره - آچىل، بو حىشتلى منظرەنى يقىندىن كۇرماقچى بۇلىپ، او ياق بو ياققە اۋىناقلىق اۋتىپ تورىدى. تۇىگە اېرتەراق كېلگن خاتىن-خلىچ، قرى-قرتىنگ اچىلنى كۇرىپ: «انە كويواو تۇره! منە كويواو تۇره!» -دېبە برماق

^۱ بكاوول: پادشاه، خان و لشكرلرگە اوقت تيارلش اوستىدىن نظارت آلىپ باروۋچى، حكمدارگە طعام تارتىشىدىن آلدىن اۋنى اول اۋزى تاتىپ كۇروۋچى منصبدار؛ باش آشپز؛ تۇى و بىرەم (ھىيت) مناسبتى بىلن اۋتكزىلەدېگن كورەش، پاىگە، اولاق (كۇپكىرى) كىى ماسبىقەلرنى باشقروۋچى.

^۲ اندرمان: بىرار ايشگە بېرىلماق، مشغول بۇلماق؛ قىزىقىپ كېتماق.

^۳ تۇىبېكەلر: تۇىنى باشقۇرەدىگن عىاللر، تۇى صاحبەلر.

^۴ قۇشخانە: مېھمانخانە؛ قراللر، خىدمتكارلر، قۇشچىلر اوچون بېلگىلنگن تورر جاي؛ سفردە قۇنىش، استقامت قىلىش اوچون بېلگىلنگن جاي، سراى.

^۵ اىركىت: افلاس، كىشى اىرگنەدىگن درجەدە كىر.

^۶ اىرگنماق: بىرگنماق، جىركنماق.

^۷ اۋرلەماق: يوقارىگە، تېپىلىككە تامان يورماق، يۇنلماق، چىقماق؛ كۇككە (آسمانگە) كۇتۇرلماق؛ يوقارىلەماق.

اۈچى قىلىپ اونى بىر-بىرلىرىگە كۆرستەياتىدى. بونى سېزىپ قالغن كويابو اويلىيىر كېتىدى. ھەر حالدا بو نرسە آچىل گە قىتىق باتدى. كۆچەدە ھم تېنگقورلردىن^۱ شونگە اۇخشاش گېلرنى اېشىتىگن كويابو بالە، اويتگە باتگىدىن اېچكىرى اويگە كىرىپ اايب، اوستىدىن اېشىكىنى تورمىك^۲ ياپىپ االدى، تشقىرىگە چىقمەى ياتەبېردى. كتەگىنە گنا ايش قىلىپ قۇيگن دېك اورتاقلرى، تېنگقورلرى سۇرەب كېلىشسە-دە، بۇى كۆرستمەدى او. ھلى تۇيدىن بىراولر يىپ، اېچىپ خورسند-خوش كېتىشسە، بىراق آچىل گېننگ تگىگە يىتەلمەيىدى. «تۇى آچىل خان نىنگ تۇى» -دېگن گې يان قىشلاقلرگچە دنگە^۳ بۇلىپ كېتىدى. ينگە، خالە، عمەسى اول-بول نرسلرنى آچىل گە احتمال توشونتىرگن بۇلسە باردىر.

السلە محل بۇلدى. اشلر ھم پىشىدى. تۇىگە چقىرىلگن قۇنىقلرنىنگ^۴ قۇللىرىگە اىلىق سوو سالىپ، سچاق^۵ توتىشەياتگن يىگىتلر تىزىلىشىپ تورىيدىلر. آش تارتىلدى. «آچىل باى نىنگ تۇيىدىن نشانە» اۇلەراق قند، مەيىز توگىلگن كۇك، قىزىل رۇمالچەلر ترقىتىلدى. قۇلر دعاگە آچىلدى. اېزگو تىلكلر بىلدىرىلدى. آش-اوقت بېرىشدىن سۇنگ كېچگە بارىپ، تون ساعت اۇن بىرلردە، گىس چىراقلرى نورى استىدە «اجابت-قبول» مراسىمى اۆتكزىلەدى، كويابو بىلن كېلىن چىمىلدىققە^۶ كىرىشەدى. آرزولر قولفى آچىلەياتگن انلر، حقىقى لڈت مىيدىن سىپقىرلەياتگن لحظەلر انە شو جايدە - چىمىلداقەدە بۇلەدى. آتە-آنە نىنگ آرزو-ارمانلرى

^۱ تېنگقور: ياش جەتدىن تېنگ ياكە اونچە فرق قىلمەيدىگن كىشىلر؛ بىرگە اوسىپ كتە بۇلگن اورتاقلر؛ تېنگداش، تېنگ-توش.

^۲ تورمىكەماق: قولفەماق؛ اۈرەب ياكە توگىپ باغلەماق؛ اېتىگىنى، بىرنى كۆتىرىپ، بېلگە باغلەماق، بر اورماق.

^۳ دنگە: غوغا، شادىانە؛ بىر قىچە عايلەر اۈرتەسىدە نوبت بىلن تيارلنگن، تيارلنەدىگن و ترقلەدىگن عمومى اوقت؛ شېرىكچىلىككە بىرار تىرىك مال ساتىپ اايب، سۇيىپ، گۇشتىنى اۇز ارا تقسىملش.

^۴ قۇنىق (قۇناق): مەھمان.

^۵ سچاق: ياغلىغ، دست پاك.

^۶ چىمىلدىق: گۇشنگە.

اوشەلەدى؛ انىقراغى چىمىلدىقە بىلبىل سىرەيدى. اۋنگچە ھلى وقت بار ابدى. اۋيىن-كولگى، رقص-تاماشە (تماشا)، شادىانەلر دوام اېتىپ تورىيدى... شادلىك اوستىگە شادلىك، قووناق اوستىگە قووناق قۇشيلەياتگندە، حاويلنى باشىگە كۇتريب بۇدنهلر و سىراقى بىلبىل سىرەب تورىيدى. قوشچەنىنگ ياقىملى اوازى كوياو بالەنىنگ خيالىنى اۋغىرلب قۇيدى. اچىل خان تورمكلب الگن اېشىك ارتىدن پردەنى كۇتريب، تىرقىشىدن مۇرەب، بىلبىگە كۇز تىكەياتگندى. بارىب قفسنى اوبىگە االىب كىرەى دېسە، آدمىلر كۇرىب قالەدى. اچىلنىنگ جان و دلى بىلبىدە. كۇچەدن اچىلنىنگ اۋرتاقلرى اونى اۋيىنگە چقىرىب تورىيدى. شاه تاختىدن توشىب تېنگقورلر ايلە قۇشلىب، اۋيىن قىلىشى غلطفى بىر ايش. اچىلنىنگ اويدن سىرە چىققىسى يۇق. او توى بۇلىشىنى يىخشى بىلسە-دە، نىمە بىلن باشلەنىب، نىمە بىلن توگشىگە كۇپ ھم عقلى يېتەبىرمەيدى. او شونچە كە: «چىمىلدىقە كوياو-كېلىن بىر سۇزىلىب قۇيەدى، باشىدن نۇق، مەيىز ساجىشەدى؛ قىي-چوو قىلىشىب بالەلر تېرىب ايشەدى، داستان توگەيدى، خلاص» -دېگن اۋىگە باردى... ھە دېمەى، قارانغى توشدى. الدىندە وكىل آتە توتىش، اجابت-قبول، ... تىغىن قولاققە شىوېرلنەدىگن گېلر بار. ھلى اياق باسدىلر، كىمپىر اۋلدى، اىينە توتىش، شىرت يىلەتىش، كېلىن سالامىر...؛ كېلىن ھىق-ھىق سېوينچ كۇز ياشلىرى قىلىب، «يۇق، چىمىلدىققە كىرمەيىم» -دېگن نازلىرى؛ ھلى الدىندە كوياونىنگ سېوگى اسمانىدە پرواز قىلىشى، كوياونى عشق توغولرى چولغىشى، محبت لالەسىدن بال تاتىماق لحظهلرى تورىيدى.

اۋكىنچلر^۲ بۇلسىن، نې تىل بىلن ايتىلسىن كە، اچىل خان دە ھلى بوندەى توغولر شكىللەنىب اولگورگى يۇق. مقصد دۇرىنى تېشماق، لۇت جامىنى سىپىقماق دېگن

^۱ مۇرەماق: بۇرەماق. مۇرەلەماق: تۇسۇق، تىرقىش، تېشىك ارقەلى قرەماق.

^۲ اۋكىنچ: نا مقبول، كۇنگىل سىز ايش، حادئە و اونى توزەتەب بۇلمىلىك توغوسى طفىلى يوز بېرەدېگن غمگىنلىك، خفەلىك؛ افسوسلىنىش، افسوس.

عالي بخت گۇدكلرگە بېرىلمەيدى.... وقت و زمانى اېمس-دە. حاوليدە فقطگينه كېلىن-كويونىنگ يقينلىرى قالگن. يار-يار، ناي-ناى ايتىشووولرى، كولگى-تاماشە بوتون حاولىنى شادلىككە بوركب تورىيدى.

قفسدە اسىلگن بۇدنه-يو، بلبل نىنگ تىنىمسىز سىرەشلىرى اوجىگە مىندى. توى قىزىمسدن بورون ارتىق عمكى بلبل قفسىنى موشىكلردن^۱ اسرەش مقصدىدە اوزون سوروق بىلن يىنە ايكى قولچ تېپەراققە اېلىب قۇيدى. سۇنگ توى ايشلىرى، مھمانلرنى كوزەتېب قۇيىش، كېلدى-كېتىدىلر بىلن قارىشىپ^۲ قالدى...

اسمان قارە چادىرىنى يايدي؛ حاولىگە اقشام چۇكىدى. بىرنە (ايوان)گە كويابو و كېلىن اوچون اۇتىرغىچ و اۋرىندىقلر كېتىرىپ قۇيىلدى. تېورەك-اطرافدە خاتىن-خلىچ، توى تاماشەسىگە كېلىشىگن بۇ قىزلر، بوروتى اېندى نىش اورىپ چىققن اۋغىل بالەلر. بو صحنەنى كۇرىپ تورگن جوان يىگىت-قىزلر بىر پىس بۇلسىن اۋز كىلەجكلرىنى مىيەلرىدە چىزىپ كۇرىشەياتگندەى كۇرىنىشردى. كوى و قۇشىق، چىلدىرمە نوالرى استىدە اچىل و آى سولوونى اپەلرى اعزازلب يسەلگن اۋرىندىقلرگە كېلتىرىپ قۇيىشىدى.

ياشىگە يىرەشە آى سولوونىنگ بۇيى پىستك كىنە، يوزلرى اقدن كېلگن، ساچلرى آرەسىدن زر پرچەلرى يىلتىللب كۇرىنر، بىلك و برماقلرىدەگى اوزوك و بىلك اوزوكلر اونگە اغىرلىك قىلىپ تورگندەى كۇرىنردى گۇيا. غلطى صحنە. كۇزىگە سورمە، ياناقلىرىگە غازە^۳ تارتىلگن بىر كۇرىنىشەدەگى آى سولوو بۇيداشرلردن كۇزىنى آلىب قاچر، تابارە اېگىلىب يېرگە كۇز سالىب تورردى. اويلىگىدىن آى سولوو باشىنى يېردن كۇترەآلمەى، گاه اېگىلىب، گاه سوزىلىپ قالەدى. كاكلچەلرىنىنگ بىر

^۱ موشىك (موشوك): پىشك.

^۲ قارىشماق: بىر-بىرىگە آرەلش، قۇشىلگن، بىرلشگن حالگە كېلماق؛ آرەلشىپ، قۇشىلىپ، بىر بۇلىپ كېتmaq.

^۳ غازە: سرخاب، لەلاب.

تەرەمى يوزىنى يايىپ تشلەگن. بعضيلر: «افسوس! گۇدكلرگە ظلم بۇلدى» - دېيىشردى.

آچىلنى بىر عمللب، كۇندىرىپ اويدن تشقريگە آلىب چىقىدىلر. ھلى بلاغت ياشىگە يېتمەگن كېلىنچك-نىنگ ياندىن آچىل خان تۇرە كىچكىنەگىنە بۇيىنى زۇرغە كۇتريب تورىدى. يوزى بوغداى رنگ، چتمە قاش، قاتمەدن كېلگن، گۇدەسى اۋن ياشدن بلندراقنى كۇرستەدى. اېگنىدە اېپكدن تۇقىلگن غراوى^۱ تۇن؛ باشىگە باستىرىپ اۋرەلگن اېپك سلە آغىرلىك قىلەياتگندى. چۇچەيگن لبلرىدە ھلى يىگىتلىكدن علامت يۇق. بېلى الوان شفتالى گل رۇمال بىلن بايلنگن. يەنە سېكىز، اۋن ياش قۇشسك باى نىنگ اۋغلى باى حقيقى كوياو تۇرەنىنگ اۋزگىنەسى بۇلەدى قالەدى. كېلىن كوياوگە كۇزگو توتىب، تاواقچەلردەگى شرىتنى يىلتىدىلر. عياللر تىلىدن ايتىم^۲، تېرمە^۳ تۇى قۇشلىقلىرى يىنگرەدى. كېلىن كوياولىك گشتىنى باشىدن كېچىرگن بالە-چقەلىك خانىملر و ايمچەلر يوزىگە اويتگە اۋخشەگن بىر حالت يوقوردى. اولر پىچىرلەشيب: «يېبى! بو بالەكىلر اۋزلىرىنى توتەلرمىكەن؟ ياتىش، تورىشلىرى قىنداق بۇلرکن، توبە اې!» - دېيە بىر-بىرلىگە جىلمەيىشردى. شو پىت كېلىن كوياونى اېچكىرى اويگە چىمىلدىققە آلىب كىرىشىدى. بۇلەجك اېر-خاتىلر قلىن قۇش^۴ بخمل كۇرپەچەلر اوستىدە يەنە بىر بار رسم و رسوم يوزەسىدن سوزىلىشتىرىلدى. كېچە ھم پىشەى دېب قالدى.

^۱ غراو: پايسى قتيق و بۇغىم-بۇغىم، اچى كاواك، قىمشگە اۋخشەگن اۋسىملىك؛ بمبوک.

^۲ ايتىم: قۇشيق، لېر و باشقەرلر؛ فولكلورىك موسىقە ژنرى.

^۳ تېرمە: سەرەلب-سەرەلب يىغىب، بىرلشتىرىب تشكىل اېتىلگن، توزىلگن.

تېرمە قۇشيق: فولكلورىك قۇشيق؛ بخشىلر قۇشىقلرىدە داستاندىن كېين، ايكىنچى اۋرىندە تورەدىگن، بند توزىلىشى اېركىن، اوچ قىتاردن ۱۰۰-۱۵۰ مصرەگەچە بۇلەدىگن فولكلور ژنرى؛ عوموماً خلق آغزەكى اىجادىگە منسوب، عادتە

تۇرت مصرەدن عبارت قۇشيق تورى.

^۴ قۇش: ايكىتە، بىر جفت؛ قۇشەلاق.

«كېلىن كوياونى»نى يالغىز قالدېرمىسلىك مقصدىدە قۇلىدە پېچاقچە آلىب، چىمىلدىق آرتىدە تونب^۱ چىققن ماما چىمىلدىقنى قىيە^۲ قىلىپ، بىر نرسەلرنى بىلماقچى بۇلىپ، بۇيىن چۇزدى. قرەسە كە ھىچ گپ بۇلگنى يۇق. جىملىك حكمران. چىمىلدىق آرتىدەگى ماما بىردن اۇرنىدن سېچىب^۳ توردى و سىنىق تاووشى بىلن: «يىبى، كېلىن كوياولر تۇپ و قۇغىرچاقلرنى^۴ بغيرلرگە باسىب، اوخلب قالىشىدى! خورەك آتىب، اوخلب قالىدىلر-كو!» بو كېچە بلبل سىرەمبىدى چاغى-دە» -دېگندەى قىلىپ، اىلجەيىب، تشقىرىدە كوتىب تورگن كويواو كېلىن آنەلرگە خبر يىتكزگن بۇلدى. كېلىن كوياونى بوندەى وقتندە اويغاتىش نا قۇلى اېدى...

شىروروك، كانادا

۲۰۱۵/۱۲/۳۰

^۱ تونەماق: بىرار جايدە توننى اويقو بىلن اۇتكزماق، كېچەسى ياتىب قالماق.

^۲ قىيە: بىر تامانى بلند، بىر تامانى پست بىر، قىيەلىك؛ تاغ ياكە تېپھلىك يان-بغرى؛ آغمە، ياتىق؛ قىيغاج آچىلگن نرسەنىنگ آرھلىغى، تىرقىشى. قىيەلەماق: قىيە حالدە يۇنلماق، قىيە قىلماق.

^۳ سېچىماق: كېسكىن حركت قىلىپ، بىرار كىمسە ياكە نرسەگە تشلنماق، اۇزىنى (يوقارىگە) آتماق؛ سكرەماق، اىرغىماق، تۇستىدن اۇرنىدن تورماق؛ اىرغىب توريب كېتماق.

^۴ قۇغىرچاق: اويىنچاق.

ویلون یاکه ایکی کوی آرہسی

ويلون

ياكه

ايكى كوى آرهسى

ياز. عادتده بر وقت اويغانهمن؛ بو گل نېگهدير اوخلب قاليمن، اويقونينگ بير تامچيسيني هم قالديرمهى، سۇنگ گچه سيميريمن^۱ شېكلى. يۇق، هلى ينه بير آز ميزغيگيم^۲ بار اېدى. شو پيت درختلر آرهسیدن آيينه آرقهلى اوستيمگه توشيب تورگن قوياش نينگ تنگدهى گينه ياليني مى ياكه اېرتەلب اېسه ياتگن پاريم گينه شمال مى، قالگن شيرين اويقونى آيب قاچدى. شمال نينگ قندهى دير تصويرلب بۇلمس ايلويزهك ناليشلرى، مونگلى^۳ تاووشى بوتون وجوديمنى چولغب آله يازدى. بو يېل نينگ اونىنى^۴ هم تيليني اېشيتيب گينه انگلب آيش ممكن؛ سۇز بيلن سيره

^۱ سيميرماق: ايچگه تارتيب ايچماق؛ چوقور نَس بيلن ايچگه يوتماق.

^۲ ميزغيش (ميزغىماق): آزگينه اوخله ماق، كوز ايلينتيرماق.

^۳ حزين، غمگين؛ ما بوس.

^۴ اون: تاووش، آواز.

توشونتىرىب بۇلمەيدى. يېل دېگنى اۋزىدن شونچەلىك قىغولى تاووش ترەتەدىمى؟ بو حالتدە تانگ قاتدىم اۋو. بونچەلىك تائۇرچن حزننى عمىم بۇيى تومەگن اېكىمن. قوياش بىر قوللاچ كۋترىلەي-كۋترىلەي دېگندە ينە آيينە آرتىدن پىراغىلر آرەلب يسەياتگن اۋشە مەيىن^۱ شىمال نىنگ مأيوس معنادار تاووشلىرى كوچەيە باردى. يىغره نىش سىمان^۲ نالىشلىر قندەي دىر آغىر ماتمنى اېسلەتر، الوداع كويىگە اۋخشىب كېتەدى. بولردن چۇقراق^۳ دېسىم يىنگلىشمەيىم. خودى آخىر زمان بۇلگن يىنگلىغ. بىلمەدەيم، كۆرىنمىس قندەي سحرلى برماقلىر، ماھر صنعت اوستەسى، بو شاه اثرنى كىمگە تقدىم قىلەياتگندى؟! بىلمەدەيم. قنى اېدى، موسىقەچى بىر استاد بۇلسە-بو، طبىعت نىنگ تىلىدن يىگرەياتگن اوشبو مودراق^۴ آھنگىنى نۇتەگە توشىرسە، قىتان-تسمەگە^۵ كۋچىرىب، مغزىنى چقىب-چقىب، بىر اېشىتىدىر بىر بىرسە اېدى، دىيىمىن اويقو ارەلش خىالىمدە. چىندىم بو بىر بۇلىق^۶ و توگىل^۷ موسىقە اثرى اېدى. بىر شەكار! صنعتچى طبىعت نىنگ شاه اثرى!

عالم جەھان معناسى بار بو كوى نىنگ. فقط آھنگىساز اېمس، اونى سۇزدە گودەلش اوچون نىچە، شوپنەھور، كافكا كىبى فىلسوف شاعر، يازوچى و متفكر ھم كېرەك اېدى اۋشە دم. شاعر ھم كىملىك قىلسە كېرەك، دىيىمىن نظرىمدە. حقىقتىن بو بىر غىمانمە كتە داستان! نوابى نىنگ بىتىگىدن اۋزگەسى اېپلەي آلمسە^۸ كېرەك. بو داستاننى «خىمسە» قىلىب يازىشگە حاجت بار، تفسىر قىلىش لازم، تلقىن اېتىب،

^۱ مەيىن: اىپ دېك ياقىملى؛ بومشاق و نازك، قۇلگە ملايم.

^۲ يىغره نىش سىمان: يىغىگە اۋخشەگن.

^۳ چۇق: كۆپ.

^۴ مودراق: حرىك سىز، تىنچ، اوخلەگن حالتلى؛ اويقو باسىب مودرەگن حالت.

^۵ قىتان (تسمە): كىت، پىتە.

^۶ بۇلىق: يىخشى اۋسگن، دوركون، تۇلىشگن؛ تۇلە، سېمىز؛ بۇرسىلداق، كۋچىب تورگن، تىقمەچاق.

^۷ توگىل: بىتگن، چلە بېرى يۇق، آخىرگە، پايانىگە بىتكىلگن؛ تۇلە-تۇكىس، بى كم و كاست؛ تۇلىق، بوتون.

^۸ اېپلەماق: عھدەلەماق، عھدەسىدن چىقماق؛ يۇل-عملىنى قىلماق، اېپنى قىلماق.

اونگە حاشيەلر آچىب، شرلر بېتىشگە ضرورت بار اېدى... قىسى اقليمدن قۇيىپ^۱، قى اولكەدن، نېمە خبر كېلتىرەياتىكندى بو تاتلى قورغور شمال...؟ مېن انگلەمەي توريمن. تۇيىب-تۇيىب گېلەشىب، جانىمگە قۇشە آلمەدېم اۋشە دەيدى يېل بېزگك نىنگ^۲ بېر چىمدىمنى. كان بۇلىب قالدىم-اھ... افسوس كان بۇلدىم!

درخت يىراقلىرى آرهسىدن آيوانگە توشگن، بلداغ دېك قوياش نىنگ ايسىققىنە يىللىغى^۳ مىنگلە يىمگە^۴ تېككچ، سېرگك تارتىب^۵ تۇلە اويقودن اويغانىب كېتىدىم. يك شنبە دم آيش كونى، نېمە قىيىتى؟ قۇى ينە بېر آز خيال سورەي دېدىم اۋزىمچە. سۇنگراق بېر تۇلغەنىب اۋرنىمدن تورماقچى بۇلدىم. قرەسم قوياش ايكى-اوج قولچ كۇترىلىدى. شمال نىنگ سۇراغلب يلەياتگن بايەگى مونگلى نغمە-يو، نالىشلىرى اۋچگن. ھمە ياقدە سو سېپگن دەي ساكىنلىك. اونىنگ اۋرنىنى ماشىنلرنىنگ غر-غورلىرى اېگللەگن. آدملىرنىنگ غلە-غاوورى، ھمىشەگى حيات. اۋرنىمدن توريب، آيواندىن كۇچەگە بۇىلب قرەدېم. درختلر آرهسىدن تۇقىز قوتلى اوبلر كۇزىمگە ايلىندى. بالەلرنىنگ قىي-چوو اۋيىنلىرى، قاجدى-قوودى اۋىنشە چاغى كۇچەنى تۇلدىرىب توريدى. بېر پس اۋتىب، كۇچە جىمىدى. بىز يشب تورگن تۇقىز قوتلى بنانىنگ يانىمىزدەگى دەھلىزدە قارە كىيىنگن نا تىنىش آدملىر كىرىب چىقەياتىر اېدى. اولىكنى آلىب كېتىشگە شى تورگن قارە ماشىن ھم كېلتىرىب قۇيىلگن.

معلوم بۇلدى كە، قدردان قۇشنىمىز تىمرە ماما وفات بۇلىدى. جان و جگر بۇلىب كېتىگن تېرگ كىمپىر بو ياروغ عالمىنى ترك اېتىدى. قۇنى-قۇشنى اۋز ارا «اې

^۱ قۇيماق: اۋتىرگن ياكە باتگن جايىدن تورماق، تىككە تورماق؛ كۇترىلماق؛ قۇزغىلماق.

^۲ بېزگك: وقتى-وقتى بىلان ايسىتمە چىقىرىب، قلىتيرىتەدىگن يوقوملى كىسلىك.

^۳ يىللىغ: نور، يالقىن، النگە.

^۴ مىنگلەي: پېشانە.

^۵ سېرگك تارتماق: تېز فھملەماق، درحال سېزماق؛ اۋتكىر ذھنلىك، سېزگىرلىك.

اتنىڭ! يىخشى بۇمبىتى! رحمتلى آدمى جانى اېدى، يىخشى انسان اېدى» - دېيىشە يانگندى.

بىز يشە ياتگن تۇقىز قوتدە بىر ارمن عايلەسى يىشب كېلدى. ھەمەسى اۋزبىكچەنى يىخشى بېلىشىردى. ارمن دېگن ات قالگن-دە، يۇقسە اۋزىمىزگە اۋخشىش ايناق^۱ بىر عايلە اېدى. بنادە گىلرنىنگ قالگن برچەسى محلى آدملىر.

تمرە ماما فرشتەدېك كىنە بۇلىب، خرە كدە اۋنگن-قنگنگە جىلمەيىب، كۈچەنى تاماشە قىلىپ اۋتىردى. حرمتلى، عزتلى قىيە^۲ اېدى. مراسم بۇلەدى، قۇشنىچىلىك، قۇل قاووشتىرگى مېن ھم پستگە توشدىم. قارە كىيىنگىلر تەرە مامانىنگ تابوتىنى سېكىن اىلب كېلىشىب، بېلگىلنگن جايگە قۇيىشىدى. يىغى-سىغىنى اېشىتمەدىم. ارمنلرنىنگ دفن مراسمى بىزنىكىگە سەھل اۋخشەمس راق اېكن. ايسىرىق^۳ توتىب چۇقىنە ياتگن راھب و راھبەلر ھم كۇرىنمەدى. اولر بىزگە اۋخشىب، «تىنگرىگە مەھمان بۇلسىن» -دېيە كون نىنگ ايكىنچى يىرىمىدە اۋلگن بۇلسە ھم مرحوملرنى شپە اىلب بارىب، كۇمىشمس اېكنلر. سېكىن گىنە كېكسە بىر كىشىدن سېبىنى سۇرەدىم. «اۋلىكلرنى بىر نېچە ساعت اىچىدە اىلب بارىب توپراققە قۇيىش تۇغرى ايش اېمس. تدقىقاتلرگە قرەگندە كۇپ اۋلىكلر قېردە تىرلىركن. قىينەلىب-قىينەلىب اۋلىشركن بېچارەلر؛ دكتورلر تامانىدن اۋلگنلىك تىشخىسى قۇيىلمەيدى... احتىياط بۇلىش كېرەك، احتىياط» -دېدى او پىچىردىب.

اۋلىك قۇيىلگن تىخت تېورەگىدە ھەمەسى بۇلىب اۋنتەچە كىشى يىغىلىشىدى. كۇكسىدە وىلون قىستىرىب بىر بىيگىت ھم اياق اوستىدە تورىبىدى. تەرە مامانىنگ تەذىھەسى مراسمىدە بىر ھم وىلون چەلىب، مونگلى كوى اجرا قىلدى كە، مبالغەسىز

^۱ اۋز ارا دۇستانە مناسىتدە؛ اھل.

^۲ قىيە: قرى (گن) كىشى؛ كېكسە، چال.

^۳ ايسىرىق: ايسىرىقداشلر عايلەسىگە منسوب كۇپ بىللىك ياووايى اۋت اۋسىملىك (تر كىيىدە الكويىدلر بۇلىب، خلق طبابتىدە شفا بىخش واسطە صفتىدە تورلى يۇللر بىلن (توتە تىب) فايدەلىنپ كېلىنەدى).

اېرتەلبكى باشىم اوزره اېسە ياتگن اۋشە مونگلى كۈي نىنگ اۋزگىنەسى اېدى. پردەلر نالىشى بىندە توكلرنى سىخ-سىخ قىلگودېك درجە بلندە پىدى. شو قدر آغىر، باسقى كۈي اجرا قىلىندى كە، گۇيا آسمان اېگىلىب بو كۈي قرشىسىدە باش اېگە ياتگندەي بىر فضا توغىلدى. حزين كويلر بوتون وجودىمنى كرخت^۱ قىلىپ يوباردى. يورەگىم اېزىلگىن كۈز ياشى قىلدىم. ويلون مېنىگ تىمدە تىتراق پىدا قىلگندى؛ حزين نوالر بىلن روھىمدەگى غم-قىغولر زنگى يوويلىپ تازەلە يازدى. يىغىلىشگنلر قىسقە-قىسقە قىغوداشلىك سۈزى آيتىشدىلر. سۇنگرە تىمە مامانىنگ خاطرەسى، حقى-حرمتى و روانى شاد بۇلسىن اوچون قىزىل ارمن شرابلردن اېچىلدى.

ارمن كىشىسى بۇلمىش مرحوم كمپىر سىكسان آلتى ياشگە كىرگن اېكن. اونىنگ قىيافەسى همان خاطرەمدە مجسم. بو انسان بۇيى كىچرە يىب، بېلى بو كىلىب راق، كۈزى خىرە كۈرەدىگن بۇلىب قالگن كمپىر اېدى. قوللرى نىنگ سىرتىدن بۇرتىب^۲ چىققن تامىرى كۇكرب تورر، موسىچەگە اۋخشب، دەلىز اېشىگىدە اۋرىندىقدە اۋترب، اۋتگن قىتگنلرنى تماشا قىلردى. هزل-ھوزىلى ھم بار اېدى.

خىرلشوو چاغى تىمە مامانى سۇنگى يۇلگە كوزە تىلر لحظەلردە يىنە ويلون اۋج پردەدە، ماتم كۈيى، ايرىلىق نالەسى؛ تىمە مامانىنگ اوشلمەي قالگن آرزو-آرمانلرى، حسرت و اۋكىنچلر ترەلىب تورردى. يىگىرمە دىققەگە يىتەر-يىتمىس تىمە مامەنى ويلون نوالرى بىلن كتە يۇلگە كوزە تىب قۇبىشىدى. مراسم آخرىگچە قۇلرىدە انجىل كۇترگن ترسا و راھەلردن ھىچ كىم كۇرىنمەدى... ويلون نىنگ مونگلى اونلرى ايكى قولاغىمدە منگو اۋرنە شىب قالىدى. ھنوز اۋشە مەيىن شىمال نىنگ نالىشلىرىگە اويغون ويلون مونگى قولاغىم آستىدە جىرنگ ساچىب كېلەدى. قىدەسن؟ يورەگىمنى اېزگن، روھىمنى قىشتىگن اې رحمىسىز ويلون! ساغىنچلرىم^۳

^۱ كرخت: حس-سېزگىسىز اولىك؛ كركت سىز، قاتىب قالگن؛ اېس-ھوشىنى يۇقانگن، ھوش سىز.

^۲ بۇرتماق: كۇترىلىپ چىقماق، تور تىب چىقىپ تورماق؛ قىزەرىب شىشماق، كۇكرە باشلەماق؛ اونماق.

^۳ ساغىنچ: ساغىنىش حس-تويغوسى.

ارداغیده منگو مکان آلدینگ-کو! مېن همان سېن بیلن یشه یمن. سېن هم
تاووشلرینگ ایچره یوق بولیب کپتگن مېنی هم اېسله یسن می هیچ...؟

شیربورگ - کانادا

۲۰/۱۲/۲۰۰۵

تورموش

تورموش

آستان بۈۋە قىشلاغىدە اۈزىگە تۇق آدمىلردن اېدى. او بىر قىز، اېكى بربستە^۱ اۈغىلنى دنياگە كېلتىردى. اېكى جريب سېر حاصل باغى، اوچ جريب سوو اېچر پېكالى^۲ و كىم قنچە دېمە يېرلىرى بۇلردى؛ ايش-كوچ، يىغىم-تېرىم و بوتون تىرىكچىلىگى اۈغىللىرى قۇلىدە. كتە درنغىلەنن حاولىدە اېكى اوى، بىر پسخانە، بىر ھم امارخانە سالىننن بۇلىب، بىرىدە آستان بۈۋە، ينە بىرىدە اېكى اۈغىل يشب كېلەدى. پسخانەدە اېسە قىزى منظر تورەدى. اوبلرنىننن قورىلگىنننن قىرق يىلدىن آشىب كېتگن، اوستى اۈيىلەى-اۈيىلەى، سوپكىلىرى سىنەى-سىنەى دېب تورىدى. اوبلر بىرندەسى نىننن تۇسىن^۳ و اوستونلرى قىيشە يىب^۴ سىنىشىگە تىار كۈرىنەدى. اكه-اوكە صمد و غفورلر كون بۇى ايش-يوموش بىلن بىنن، فقط تونەگنى گىنە كېچقورونلرى حاولىگە كىرىب كېلىشىردى. بۇىلرى اېكى متردىن آشر، يوزلرى

^۱ بربستە (بروستە): گۈدەلى، كېنگ يىرىنلى؛ تىك قامتلى، كېلىشگن، كۈركم.

^۲ پېكالى (پېكل): ارىق، يۇل كىبلر بىلن اجرە تىلگن كتە اېكىن مىدانى، پال، چېك.

^۳ تۇسىن: عمارت نىننن و ھر قندەى قورىلمە ياكە انشأات نىننن تامى، آرە ياپمەلرى، پالىگە كۈندەلنگ سالىننننن بھ قوت ياچاچ، تېمىر ياكە باشقە نرسە.

^۴ قىيشە يماق: اېگىلماق، بوكىلماق، آغماق، قىنغە يماق.

كتە-كتە، گودەسى اولكن كېلتىلى^۱ كىشلر اېدى. ياشلىرى قىرقدن اشكن اېسە-دە، ھلى بېرى اولنمەگنلر. كىم بىلەدى، بەھىيت كۆرېنىشلىرى احتمال اولنەالمسلىكلرىگە سبب بۇلگن دىر. قىشلاقداشلىر كتە-كتە كاوش كىيگنلىرى اوچون اولرگە تَرپىل، دېب نَنقە تاقىشىگنلر. ياستىق دەى-ياستىق دەى بېللىرى بۇلىب، بىر آغدرىش، بىر چاپىش و باغ قزىش ايشلىرىنى قىرەتېب تشلەشردى. بى آزار محنتكش انسانلر اېدىلر، ايتىشلىرىچە عمرلىرىنىگ كېكسەلىك پللسىدە حج ھم قىلىب كېلىشگن. اوقتلەنىشىگە اۋتە اۋچ^۲ آدملىر اېدى. صمد و غفورلرگە كنجد ياكە زغىر ياغىدن دملنگن بىر كرسان^۳ دُمبە پالاو بۇلسە بۇلدى، قارنىنى بېرگە تشلب، تاشبِقە دەى تېرس^۴ آغدرىلمەگونچە بېردىلر. تىرىكچىلىك، اوى-رۇزغارنىنگ قالگنى بىلن ايشلىرى بۇلمسدى. پالاونىنگ خېرىنى اېشىتسە بۇلدى، اۋز ايشلىرىنى قۇير، ابرتەلېدن بىراونىنگ حشرىگە بارىب، پالاونى بىب، ايشلب بېرىشنى جودە-جودە ياقتىرىشردى. تناول قىلگن پالاونى كۈچەلردە مقتشگە توشىب، «شو، بېگن پلۋونىنگ نىنگ ياغى تىرسگىنگچە اقمسە حسابمس» -دېب قۇيردى كېرىلىشىب اكە-اوكەلر. خالص، بىرى قۇيبىب، بىرى مقتب كېتردى.

آستان بۇوەنىنگ دولتخانەسىدە اېلگىرىگى مال-حال، تاووق، ايت و موشىكدن-دە، نشانە ھم قالماگنىگە كۇپ بىللر بۇلگن. بىر نېچە بىلدىن بىرى آستان بۇوەنىنگ كۈچەگە چىققىنىنى ھىچ كىم كۆرمەگن. دروازەسىنى بىراو تاقىلتگن ھم اېمس. اۋغىللىر اۋز دنىاسى بىلن، منظر بۇلسە پسخانەدە اېستلمەگن يازىق و يالغىزلىك اسىرى. ياشى بىگرمە آلتىدن اشگنىگە قرەمەى، حاولىدىن چىقمەگنىگە انچە بىللر

^۱ كېلتىلى: قامتلى، بىچىملى.

^۲ اۋچ: نھايتدە بېرىلگن، حرص قۇيگن.

^۳ كرسان (كارسان): ياغاچدن ايشلنگن كتە تاواق.

^۴ تېرس: تېسكرى، قرەمە-قرشى تامان؛ قارس.

بۇلگن. اكه-اوكه غفور و صمد، شونىنگ دېك منظر و آستان بۇوہ اۈزگہ سيارەدن كېلگن سيمان شو زيل حيات كېچرىب كېلماقده اېدى.

پسخانەدە گپ كۇپ، وضيەيت اۈزگچەراق. پسخانە، بىر گۈزل قىزىنىگ اچىق قىسمى، قىناق كۈز ياشلىرى-يو، اىچكى حسرت و آه و نالەلرى نىنگ دردخانەسى. بايقوشلر^۱ اىنىگە^۲ اۈخشش بو خانەدە منظرىنىگ سۈزلرىنى اېشىتەياتگن آدم يۇق. او انە شو تۇرت دېوار اىچىدە يىشىگە محكوم. كلفت بىر حاولى؛ تاملرنىنگ بالارلرى قىشەدە آلاو ياققىدن ھمە ياغى قارەيبىب كېتگن، قلىن كويە باسگن خانەدە تازە ھوادلن باشقە نرسە بار. او شوگىنە پسخانەدە يىشركن، تېرمولىب، بۇزەرىب اۈتيرىشدن اۈزگە چارەسى ھم، علاجى ھم يۇق. تازە ھواگە چىقماق، قوياش نىنگ بېمىت نورلردىن بەرە االىش اونگە نصيب اېتمەگن. «بو حاوليدە ھر كىم و ھمە نرسە نامحرمل!» -دېگن گپ قولاغىگە سىنگىب^۳ كېتگن. اۈيلردەگى كۈرىپە-ياستىق، گىلم، تۇشكلر بىر احوالدە. آستان بۇوہ منظرىنىگ اۈيىدن بتراق ياتاقدە زنگ باسىب، سىبىب، قىغىسىب يىشىگە اۈرگىنىب قالگن. منظرىنىگ اكهلرى اېسە كون بۇيى تشقىرىدە ايش-يوموش بىلن بند. عجب سىنەسن كىشى. منظرىنى «نظارت قىلەي» -دېب تېپەسىدە تورگن كىمسە يۇق. اياق-قۇلى اچىق بۇلگنى بىلن ذھنى قوفلاق. جىللە قورسە يازىلىب، يىرەلىب، حاولىگە چىقسە بۇلەدى-كو. ساىەسى اۈزىگە بېگانە قىزىنىگ اياغىنى كىشنىل^۴ تشلەگن نرسە شو بۇلمە غور عنعنە و اعتقاد. بو ياغىنى سۇرەسنگىز، غرىب احوال. منظر ايسلىقى، اووودە^۵ اوست-باشىدن او يلىب قىز اورتاقلرى بىلن قۇشىلىب، اۈيىن-كولگى قىلىشىگە-دە يورەگى بېتىلمەيدى. او اۈزىنى

^۱ بايقوش: باى اوغلى.

^۲ اين: اويە، مكان.

^۳ سىنگىماق: شىمىلماق، شىمىلىب ياكە سىزىب اىچكى قىتىگە اۈتماق؛ ھضم بۇلماق اۈزلىشماق؛ اۈرنەشيب قالماق.

^۴ كىشنى: تۇسىق، غاۋ؛ زىنجىر.

^۵ اووودە: يىرتىلگن، تۇزگن، دېدلە بۇلگن.

ھېچ ئابدن آتلىگن و لعنتلىگن يالغيز قىز حس قىلر، آتە-آنەنىنگ ايسىق قوچاغيدن مەر آلەمگن، بالەليگيدن بدنيدە ييرەب كېتىگن اۋكسىك و تنھاليك زھرىنى پنە-پنەلردە كۈزى ياشى قىلىپ چىقرەدى و شو بىلن بىر آز روحى تىنچ آلەدى. يېتىم قالگن قىز شو ياشگە يېتىپ ھم آدملر ارا عادىي مناسبتلر، قۇنى-قۇشنىلر ارا كىردى-چىقدى نىمەليگىنى بىلمەيدى. منظر آنەدن يېتىم قالگن قىز-دە. آنەسىز بالەنىنگ حياتى كېمتىك، ايچكى عالمى ويران، يوزى سامان بۇلركن. او تېورەك-اطرافدن مطلق اوزىلىپ قالگن. پيشىرىش، يوويش، تىكىش، بېچىش، كشتە-كۈنگرە... دېگنلر دېك، بريدن بېخبر. ينە عجب سىنەسن كىشى، ھېچ كىم منظرنى بو كويگە سالگنى يۇق. محيط تاثرى و آتەنىنگ انزوادە يشى بونگە سبب بۇلگن. آستان بۇوہ يېتىمىش آلتى ياشلردە اېدى چمەسى. قاتمەدن كېلگن، بۇيى بلند، قۇللىرى اوزون، منگلەيىدە تىرناق دېك نار خالى بار، تيشلرى نىنگ يىرمى توشىب بۇلگن. تورقىنى آفتاب آلگن و اونىققن^۱ بىر الەچە چاپان كىير، مللەگىنە سللەسىنى پىچ قۇيمەى اۋرر، ساقالى كىر آقرگن بىر كىشى اېدى. آستان بۇوہ زىقنە و قورومساقلىگى^۲ بىلن دانگ ترەنگن آدم. شو ياشگە كىرىپ مچىت اېشىگىنى كۈرگن كىشى اېمس.

لايى يالغىزلىك ايلە قارىلگن آستان بۇوہنىنگ طبيعىتى شو، كىچىكلىكدن فعلى شونداق بۇلگن اېكن. بو انتىقە ذات بىر عمر يالغىز يشىگە اۋرگىب قالگن، قوم-قىرىنداشرى بىلن يىخسى-يامان كونلرنى بەھم كۈرمەگن. اۋزىگە يىرەشە پول و دولتى بۇلە تورىب، تىرناغىنى سۈرگنلر سۈرتىگە كىردى. بايلىگىنى بىراوگە اېمس، حتا، اۋزىگە ھم روا كۈرمىسى. يىللر اۋتېب آستان بۇوہنىنگ اويىدن قارە توتون چىققىنىنى يقىن-اوزاق توگول، قۇنى-قۇشنىلر ھم اېسلىمەيدى. اونىنگ كۈچەگە

^۱ اونىقماق: بۇغىق قارە توسگە كىرماق.

^۲ قورومساق: صرف-خرجندن، چىقىمىدن قاچەديگن؛ زىقنە، خصىص.

چىقمەگىگە كۆپ زىيانلار بۇلگىن. آينىقسە، خاتىنى ئۆلگىدىن كېيىن تشقى عالمىدىن بوتونلەي اجرھىلىپ قالەدى. آدم سانىگە قۇشىب يورگىن ھىم خاتىنى ابدى. عىجبەدىم-عىجبىراق آدم ابدى آستان بۇو. ئۆزىگە يەشە پۇل و دولتى بۇلە تۇرىپ، بو كىشى جۇدەھىم زىقنە، درىستگىنە تېمىرنىنگ ايرتىغى ابدى.

منظر يشب كېلەياتگىن خانەگە قۇياش نورلىرى تېگىمىس، خانەنىنگ تېشىك-تېرىقىشلىرىگە سۇواق اورمەگىن، ئورگىمچىك اىن قۇرىپ آلگىن، كىلتە كلاسلىرىنىنگ ايزغىشى، قۇنغىز، قورت-قۇمىرىسقىلەرنىنگ بۇز قۇيگىن دەي يۇرتىب كىرىپ-چىقىشلىرى، ايلان بالەلىرىنىنگ تېپ اېتىپ بالاردىن توشگىنىنى كۇرگىن يات آدمنىنگ ئۆتەكەسى يارىلىشى ھىچ گپ اېمىس. اوىنىنگ پىخسەلىرىنى يامغىر يېمىرىپ كېتىگىن. شىمال قۇپسە تام مۇرىسىدىن چىنگ و توزان ارەلش پىخاللار اوىنىنگ اېچىگە اورەدى. خانەنىنگ بالارلىرى اللەقچان چۇكە باشلەگىن. قىشەيىب كېتىگىن ايشىكىنى غىقىللەتىپ، زۇرغە سۇرىپ اوىگە كىرىلەدى. خانەدە ياقىلگىن آلاودىن قالگىن توتون-كۇيەلەر، سىسىگىندىن بورقىپ دىماققە دارىيدى. اېسكىرگىن كىگىز تېورەگى بۇيلىپ، توفلىگىن ناس ھىدىدىن خانە قىقسىب كېتىگىن. اوى دېوارلىرى قارەيىب قالگىندىن ئۇچىق اىلكىن چىراغنى ھىم كۇرىپ بۇلمەيدى. آستان بۇو ئورگىمچىك دېك، نورەب بارەياتگىن ساووق و ساكن اويدە تۇرىپ يورىشىگە اورىنەدى. ياز بۇلىيدى ھىم كە، آستان بۇو سوغدىسىنى يىغىپ آلگىنىچە يۇق. يىغىر باسگىن بۇز كۇرىپەدىن سىندلىنىنگ بورچىكلرى بۇرتىب كۇرىنەدى. آستان بۇو انە شو يېر تۇلەگە ئۇخشەگىن خانەدە يونگى چىقبىراق تۇرگىن ياستىققە ئۇمگىنىنى¹ تىشلىپ ياتەدى. سوومى، نان مى كېرەك بۇلگىنىدە قىزى منظرنى يېر چىقىرىپ قۇيردى. آخىرى منظر چىركىنگىدىن، چىقىرسە ھىم آتەسىنىنگ آلدىگە بارمەياتگىن بۇلدى. آتەنىنگ كىرى، سىسىغى يېر ياققە تۇرسون اېگىنىدە كۇيلىك، بىلىدىن پىسىدە ايشتان قالمەگىن.

¹ ئۇمگىن: سىنە، كۇكس.

آتەنىنگ قۇرقىنچلى سېرەيىب قالگن تنەسىنى يۇل-يۇل، سىرىق رنگلى الەچە تۇن زۇرغە يايىپ تورىيدى. ناقۇلەلى وضعىت، قىزى آلدىدە اۇرنىدن تورسە اويت جايلىرى آچىلب قالەدى.

آستان بۇوەنىنگ دۇرىللەگن آوازى ھلى اۇشە-اۇشە. ھىر بىردە قارەيىب كېتىگىدن كاساودېك برماقلىرى بىلن بېتىنى قشېب، آرقەسىنى دېوارگە ايشقېب آرام آلەدى. اىچى توتقىب بىرار نرسە بېماقچى ياكە، اىچماقچى بۇلسە: «غفور آووووو غفور، صمد آوآآآووووو صمد!» -دېبلند تاووشدە چقىردى اۇغىللىرىنى. ھىچ كىمدن آواز چىقمس اېكن، غولدورەگنچە كىر باسگن يىنە اۇشە ياستىققە تىرسكلەيدى. آستان بۇوەنىنگ وفادار، آغىر كوچىگى و دۇرسىللەگن قارە موشىگى^۱ ھىم تۇرت يىل بورون بو اوينى ترك قىلىپ كېتىگن. بو حاويلدە قارە ماللىرىنگ تياغى تېگمەگىنگە ھىم كۇپ يىللر بۇلدى. آستان بۇوە قى احوالدە بۇلمەسىن شو اىكى كۇزىنى يشب تورگن اوينىنگ بالارلىرىدن اوزمەيدى-دە اوزمەيدى. شوندى قىلىپ، آستان بۇوە خودى سۇنگى امىدلرېگە قۇل اوزەتەياتگن كى تېپەگە قرەب- قرەب، كۇزلىرى قراقىب، چرچاق باسىب، اويقوگە گېتىگىنى بىلمەلى قالەدى.

كونلردن بىر كونى نىمە بۇلدى-يو، اوزاق قرىنداشى گل قودوقلىك مرتاض ارباب آستان بۇوەنىنگ اويىدە كۇرىنىپ قالەدىگن بۇلىپ قالدى. عجبلىرلى جايى يۇق؛ نىمە قىپتى، اوزاق-يىقىنلردن قرىنداشلر كىلەدى-دە، حال-احوال سۇرەشىب. بارىب- بارىب مرتاض اربابنىنگ آياغى بو اويدن اوزىلمەياتگن بۇلدى. باشلردە ارباب آستان بۇوەدن خىر آلماقچى بۇلىپ، او ياتگن خانەگە بىر-اىكى باش سوقدى ھىم. او قىشلاقدن بازار-اچار قىلگنى شېرگە كېلركن، ھىر گل مېوە-چېوە سالىغلىق بىر الوان رۇمال توگوننى منظرگە قالدېرىپ كېتەدى. اكە-اوكە سادە غفور و صمدلر مرتاض اربابنىنگ كېلىپ-كېتىشىگە عادى قرەيدىلر. آستان بۇوە اېسە، بو كېلىپ-

^۱ موشىك: پشك

كېتىشەن خېر ھەم بۇلمەي قالەدى. بېلگىدە ھەم بېر نرسە دېيىشى قىيىن. قىرىنداش نېنگ يوزى قىزىق بۇلەدى.

كون ايسىگن انلر اېدى. توشدە ھوا تفسىدىن آدملر سايە-سلقىنلرگە اۋزلرىنى الگنلر. نىس اۋنگلەي دېسنگ، ھېر اېتگنى شىمال نېنگ اۋزى يۇق. قىرىنداش كوتەياتگن دېك گل قودوقلىك مرتاض ارباب حاولى نېنگ كتە دروازەسىدىن شاشە-پىشە كىردى-دە، سىللەسى نېنگ پېچىنى تىشلەگنچە، منظر يشەياتگن پسخانە تامان يۇل آلدى. پىللەلرى توشە يازگن اېشېك نېنگ تىرقىشىنى قىيىللە تىب اچدى و اېچكرىگە كىردى. منظر اۋرنىدىن تورىب، اوى بورچەگىدىن سلام قىلدى. بېگانە اېركىنى حىياتىدە يقىندىن كۈرمەگن منظر يىكەلىك جانىگە تېككىدىن مى ھىجانىنى يشىرەلمەي، اۋزىنى مرتاض ارباب نېنگ قوچاغىگە آتدى. ارباب بېلىدىن قوچىب بىرگە باسدى.

- منظر، - دېدى ارباب بېر نرسەگە چىنقاق آھنگدە.

- سېنى بو كلف تىرۇموشدىن قوتقۇزەمەن؛ قىغۇرمە، ياروغ عالمگە آىب چىقەمەن. سېن ھەم انسان سەن. سېنىنگ ھەم اېرىنگ بۇلىشىگە حقىنگ بار.

- آتەم-كو مىلى، اكەلرىمدىن ھدىك سىرەيمەن^۱. بوندن بىتراق كونگە توشىب قالىشدىن قۇرقەمەن باي، - دېب، دغ-دغ تىترەي كېتدى منظر.

- منظر، - دېب پىس تاوۋوشدە، - آل-آل ساوغەلرنى بېكىت بېر ياققە، اكەلرىنگ بىلمەسىن تىغىن، دېدى.

ارباب نېنگ يورەگى گۈپ-گۈپ اورىب، تىزەلرى قىلتىرەشگە توشدى.

مرتاض ارباب قىرق بېش ياشلىرىدە. اېلكەلرى كېنگ-كېنگ، كورەگى يايىق، تەنە-تۈشى كېلىشىم اېركك. كۈزلرى بقرەيگن، كۈپنى كۈرگن خوش گېدان بېر آدم. اوچتە خاتىنى بار، بالە-چقەسى ھەم كۈپ... بو كون حاۋىلى خىلوت. سېوگى نېنگ

^۱ ھدىك سىرەماق: ھدىك آماق؛ خوف سىرەماق، قۇرقماق، چۇچىماق.

اچىلمەگن دفتىرى اۇقىلىشى كېرەك. مەھبەتنىڭ اىچىلمەگن شىرابى سېقىرىلىشى لازىم. مەرتاۋىنىڭ قوچاغىدە اېرىپ بارەياتىگن مەنظر بۇز قىز اېمىسى؟ بو ايشىنىڭ عەھدەسىدىن قەندەى چىقسىن؟

- مېنىڭ ھەم بختەم اچىلمەيگەن؛ مېن قاناتلىرى سىنگەن قوشنى بو توتقىنلىكەن سىز آزاد قىلەسىزمى؟ ايتىڭ، - دەدى مەنظر حەسلىرى قۇزغالگەن بىر كۆيدە كۆزلىرىدىن قىناق ياشلىرى دۈمەلەياتىب!!

- بىلەسەنمى مەنظر؟ بو مېن عشقىڭ گەداسى، بىر سۆزلى، مەرد مەرتاۋى بۇلەمەن، - دەدى مەنظرىنىڭ يىناغى، يوز و كۆزلىرى، ائشىن دوداقلرى-يو، اُپاق بۇيىنىنى چۇلپ-چۇلپ اۋپە تورىب.

- جىمىڭ، اويت بۇلەدى، - دەدى مەنظر، - اكەلىرىم بىلىپ قالەدى دەپ قۇرقەمەن. باشىمنى چاپمەى قۇيمەيدى.

- گەپ بىلىشەن اۋتېب كېتگەن؛ سېن ھەلى تەقىلمەگەن قىزىل مەنچاق سەن، تاپگەن گەدايىڭى قەبول قىل.

- كېيەن نىمە بۇلەدى؟ نىمە قىلەسىز سۇغىن^۱؟

- اۋشە األدىڭى كېچەلردەگى دەپك قىلىق^۲ اۋيەنەمىز-دە، نىمە قىلردىم. سادەگىنە مەنظرىم.

- بىلەسلەر اۋلدىرىشەدى، مېڭە تېگمەنگ... نرگە تورىڭ اويەلەمەن... قىلە بېرسە بىز بىغلەيمەن.

- اق بىلەگىڭى قۇلىمگە توتقۇز، قوچاغىڭدە اېرىپ كېتەى، مەنظر.

- بىشقە نرسە قىمەسىزمى؟

- يۇق، ھەمەسى يىخشى بۇلەدى...

^۱ سۇغىن: سۇنگرە، سۇنگ، كېيەن.

^۲ قىلىق: قىلىق.

و اېشىتنگلرى بۇيىچە، منظر مرتاض نىنگ شىرىن سۇزلىرى-يو، وعدەلر يگە شلقە توشىب، اونىنگ قۇينىگە اۇزىنى تشلەگن. مرتاض منظرنى بغرىگە باسگنچە، تۇغرى كېلگن جايىدن چۇلپىللە تىب اۋپە باشلەي بېرگن و اېستەگىنىنى قىلەبېرگن. اېچىنىتىرگن... لذتلى دىققەلر نالىشلىرى اۋجىگە مىنىب، اخ-واخلر كېتى اوزىلمەگن اېكن. شوندا منظر اكەلرىدن خواطر ائىب:

- تۇختىنگ-تۇختىنگ، تېگرەك-تاشگە بىر قرەب كېلەي، كون چىقمىسدىن ائىدىن يووينەي، - دېب سېكن حاوولى اۋرتەسىگە بارىب اطرافگە قولاق اسەدى. يورەگىدە شېبە قالمىسلىگى اوچون كتە دروازە نىنگ يانىگچە بارىب هم كېلدى. آتەسى ياتگن تاماندا همىشەگى دېك ساكنلىك.

منظر بۇلىق قىز، تۇلەدن كېلگن ياقىمتاي گىنە، ائاق سولوو دېسە سولوو. «آي مامە» دېك گۇزل. كۇكرەكلرى تۇلىشىب، اېكى مەسى شىرىنلىگىدن آتيلەي، دېب تورىدى. اۋشە كېچە مۇرىدن پاىلب تورگن قربان نىنگ تصورىلشېچە، پسخانگە كىرگن مرتاض، ھۇيىققىنېدن قۇللىرى بىلن منظر نىنگ بېلىدن قىتىق قوچىب اوى نىنگ تۇرىگە كۇترىب بارگن. بدنې مجنون تال دىك تىترە ياتگن منظر نىمەلر بۇلىشىنى كۇز ائىگە كېلتىرە آلمەي برماقلىرىنى ياناغىگە توتگنچە:

- ويى قۇرقەمن، بىر نرسە قىلەسىزىمى، - دېبە مرتاض نىنگ قۇينىدە راسە تلىسلىپدى. اۋلىگە راضىلىك بېرمىدى. مرتاض شوقى اشىب منظرنى اغنە تىب، خوب اۋىنشماققە كىرىشىدى. شوندا:

- ھىچ نرسە بۇلمەيدى قۇرقمە منظر آي. - دېدى مرتاض تېر باسگن يوزلىرىنى اېتگى بىلن اربتە ياتىب.

- تۇغرى آيتەسىزىمى؟ سۇزلىرىگە ايشانسم بۇلەدىمى؟ - دېدى منظر مرتاضگە اويتچن قرەب.

- ھە! سېن آيتگندەى بۇلەدى. بىتتە تايدى متل آيتسىم مىلى مى؟ - دېدى مرتاض
منظرىنىڭ ھىجىنىنى باسماقچى بۇلىپ.
- ھە، قولايىم سىزدە، آيتىنىڭ. تاپەلمەسم چى؟ - دېدى اۋزىنى ئىككى قولى بىلەن
قولايىم ئالگن منظر.
- تاپەلمەسنىڭ بۇنىنىڭدىن، آغزىنىڭدىن اوچتەدىن اۋپەمەن-دە.
- وىي! اونداغ دېمىڭ اويت بۇلەدى، - دېدى منظر.
- بۇمەسە يىخشىلىپ اېشىتىگىن تايدى متلىنى: «شىپ اېتدى، شىرغان كېتدى»، او
نېمەدىر جانىم؟
- اويتلى اېمىمى اۋزى؟
- يۇغ-ايى، اويتى بارمى؟!
- كېچە كېرەدى، كېيىن اېسدىن چىقەدى - توش اېمىمى؟
- يۇق، تاپالمەدىنىڭ منظر. - اېندى اۋپسىم مىلى مى؟
- قى يېرىمدىن؟
- اېنىڭ شىرىن جايىنىڭدىن.
- سېكىن مى، قىتىغىم بار اېدى.
- اممممفچچچچچچە! - قىلىدى مرتاض.
- قربان نىنىڭ گېلىرىگە قرەگندە، اۋشە كېچە مرتاض قەيىش^۱ برماقلىرى بىلەن
منظرىنىڭ كۈيلىگىنى آرەلب، سىرمەلەى، پشەلەى باشلىدى. شوندا:
- يالغىزلىك جانىمگە تېگدى، اۋزىمنى ائلىرىپ قۇيىمەن، -دېدى منظر، -
«چومچوق پىر اېتسە، يورەگىم شىر اېتەدى، قۇيمەدىز-دە» - دېدى منظر
مرتاض نىنىڭ قۇللىرىنى بۇنىدىن اوزگودەى بۇلىپ.

^۱ قەيىش: ۱. تسمە. ۲. خمىر اوقتىنىڭ بىر تۈرى.

مرتاض برماقلىرىنى منظرىنىڭ كۆكسىدىن قويىگە قرەب اۋرمەلەتتىدى^۱... سېوگى دفتىرىنى آچە باشلىدىلر.

شوندىن سۇنگ، مرتاض كېلەككە اۋخشىب، بال تەتىگن آرى دېك، آستان بۇوھىنىڭ اويىگە تېز-تېز اوچىب كېلەياتگن بۇلىيدى. ايكەلسى اېمىن-اېركىن دان ايشەياتگن بۇلىشىيدىلر. آستان بۇوھ، اكە-اوكە صمد و غفورلر ھمە نرسەدن بېخىر. آستان بۇوھىنىڭ بو نرسەلر حقىدە اۋىلشگە تابى ھم قالمەگن.

آرەدن بىر يىلچە وقت اۋتدى. منظر ايكى قت بۇلىب قالگن اېكن. باشى قارانغى كونلرىنى يىغلب-سىختب اۋتكزەدى. قارنىدەگىنى كتە كۈىلگى آستىدە قنچە يشىرمەسىن، بىر كون كۈز يارىشى كېرەك. جمعه كونى مرتاض حاويلگە كىرىب كېلىب، منظرىنىڭ قولايىگە بىر نىمەلرنى دىر شىوېرلەدى و آرقەسىگە قىتىب كېتىدى. انچە مدتدن بېرى مرتاضدن درك بۇلمەپىدى. منظرىنىڭ آى-كونى ھم يقىنلەشىب قالدى. ھلى بالەنى دنياگە كېلتىرىب كۇرمەگن بو خاتىن، جانىنى قۇيرگە جاي تاپمەپىدى. قونى-قۇشنىدىن بىر عملب يشىرىب كېلگىنى جانىگە آرە كىرگن. باردى، بىرار گپ-سۇز بۇلىب قالسە اوندىن بدتر شىرمندھلىك يۇق. «فلانچى نىنىڭ قىزى حرامى توغىدى» - دېگن گپ اۋلىم بىلن ب-بىر ابرار.

منظر بىر نرسە بىلگنگە اۋخشىب چەهارشنبە آقشامى رمال، بۇغچە-توگونلرىنى تىخلب^۲ تيارگرلىك كۇرىب قۇيدى. اېندى گۇل قودوققە مرتاضنى ايزلب بارمسە بۇلمەيدى خىياليدە... خىرىت اېرتەلب قارە سحرىدن مرتاض آستان بۇوھىنىڭ اويىدە پىدا بۇلدى. ايكەلسى سېكىن نخرەدن^۳ آشىب، جر ياقەلب يۇلگە توشدىلر. ھر تۇكىسىدە^۴

^۱ اۋرمەلەماق: يورماق، تىرمە شىش، سودرلماق.

^۲ تىخلەماق: بوكلب، تىخىگە سالىب قۇيماق؛ اوستمە-اوست تېرماق؛ قلىشىرماق.

^۳ نخرە: آشىب اۋتىش اوچون دېوار اۋيغى.

^۴ تۇكىس: مكمىل، بى كم و كاست؛ كېنگ-مۇل. بو بېردە حالت و وضىعت معناسىدە.

خوف-خطر بار. بۇيى يېتىگن قىزىنىگ يۇقالىپ قالىشى قىشلاق اوچون كىچىك گپ اېمس. يۇلدە منظر كۆز يارىشى هم ممكن ...

اۋشە كونى توشدە صمد و غفورلر هم حاويلدە پيدا بۇلىپ قالىشىدى. كپان- كپان دېك بېللىرى بىرنەگە تىركب قۇيىشىدى-يو:

- منظر منظر منظر، - دېب صمد چقىردى سېنگىلىسىنى. حاويلدىن هېچ قندەى آواز اېشىتىلمس اېكن خانەلرنى بىر-بىر قىدرىپ چىقدى. بارە سالىب آتەسىدن سۇرەدى منظرنى. اۋلىم تۇشگىدە ياتگن آتە زۇغە «يۇق» - دېگن معنادە باشىنى قىمىرلىتىدى. غفور هم بۇلگن واقەنى بىلماقچى بۇلىپ آتەسىدن ايجەلب سۇرەى كېتىدى. آستان بۇوہ بو گپلردن بېخبر بۇلگنى اوچون اۋغىللىرىگە «يۇق» معناسىدە آخرگى اىما- اىشارەنى قىلە آلدى. صمد اوکەسى غفورگە قرەب:

- آتم بېتاب، ملانى هېقىرىپ كېل اېندى، ياسىن توشىرسىن. جانى اوزىلەپىدى، - دېدى. شو آرەدە قىشلاقداش آقساقاللر هم بىغىلىپ كېلىشىدى. آستان بۇوہ كۆزلرىنى همان اوى بالارلىرىگە تىكىپ آخرگى نفسلرىنى آلەياتگندى. ياسىن توشىرىلدى. آستان بۇوہنىنگ اياقلىرى ساوىي باشلەدى. اما، كۆكرەك قفسىدە يورەگى تېپەپىدى. تۇپلنگن آقساقاللردن بىرى صمدگە قرەب:

- بار اوکە! يوگىرە سالىب شەردن كفنلىك آلىپ كېل، - دېدى.

دېسىنىب^۱ تورگن صمد قىپ-قىزىل تېرگە باتىپ:

- بولىم يۇق-دە، ملا اكه دېدى.

اوکەسى غفوردىن هم تاووش چىقمەدى. جانىنى تسلىم قىلەياتگن آستان بۇوہ كۆزلرىنى چىرت اچىپ بالارلرگە قرەب يەنە بىر اىشارە قىلگندەى بۇلدى و جانى اوزىلدى. بو وضعىتدن حىرتلنگنلر يىخشى انگلەمەدىلر اىما-اىشارەنى. اونگچە غلفور:

^۱ دېسىنىماق: سېسكىنماق، چۆچىپ توشماق؛ قىمىرلەماق، سىلكىنماق؛ قلىتيرەب قۇزغىلماق.

- «توريب تورينگلر بير-ايكى كۇرگنلريم بار ابدى، قرهى چى نيمه اېكن، - دېب تشقريگه چيقيب بير اوزون خاده آليب كېلدى-يو:

- آتم شو تېپەدەگى بلارلرگه بير نرسه يشيريب قۇيگن بۇليشى ممكن نظريمده» - دېدى و اوزون قۇللرينى يوقاريگه كۇتريب بلار ارەسىدە بير باغلم زر وراققه اۇرەلگن لۇتنى^۱ آليب اۇرتەگە تشلەدى. آستان بۇوھنينگ قارەيب كېتگن جسدى شلويرەب، ايجنى چيققن^۲ كير تۇشك اوستيدە همان ياتيبدى. اۇراغليق^۳ نرسەنى آچيب كۇريشدى. پولدن تشقري قۇش آلتين بيلك اوزوك، بير نېچەتە كوموش سيرغە، تنگەلر، قيمت بەها اوزوك و تقينچاقلر چيقدى اۇراغدن. ايسليقيسى چيقيب باتگن حاولى نورگە باتگندەى برچەنينگ كۇزيگە جنت بۇليب كۇرينەيپىدى.

تاپيلگن بير دستە پولدن كېين سسيب يانگن قارانغى اويگە ينە فيض كيرگندەى بۇلدى. «رحمتلى يخشى آدم ابدى...» - دېگن مرحوم شأنيگە ايليق سۇزلر ياغيلە باشلندى. صمد و غفورلرينگ آغزى قولاغيدە، يوزيگە قان يوگيردى. اېندى، بو پول نە فقط گۇر-چۇبگە يېتەدى. خامەكى حساب-كتابگە قرەگندە، بو پول آستان بۇوھنينگ إسقاتى^۴، شام آقشامى، اوچى، يېتتىسى، تۇقيزى، قيرق و ييل آشيدن هم آرتيب قالەدى... ايشلمەى ياتيب يېسە هم توگمەيدىگن دولت. كېچيكتيرمەى، آستان بۇوھنى توپراققه تاپشيريديلر....

«منظرنى مرتاض آليب قاچگن»، دېگن گپ قيشلاققە ترقهليب بۇلگندى. اونينگ هم آتە ميراثدن حقى بار. آرەدن انچە وقت اۇتگچ، مرتاض، منظر و اۇغيلچەسى شمایل آستان بۇوھنينگ فاتحەسيگە كېليش فكريدە اېديلر. بيران واقعه يوز بېرمىس ميكن؟ دېگن اۋى-انديشه بار اېچلريدە. اكەلرى قالەبېرسە، قيشلاق و اېنگ

^۱ لۇت: كتە مقداردهگى مبلغ.

^۲ ايجنى چيقتماق: پچقلەنيپ، اېزيب كېتماق، ايجق و يراق سيز حالگە كېلماق.

^۳ اۇراغليق: اۇرەب، بېركيتيب قۇييلگن: اۇرەلگن.

^۴ اسقاتماق: كېرەك بۇلماق، كونيگە يرهماق، ايش بېرماق.

مهمى شريعتچيلر اذن بېرىمىكىن؟ جواب يۇق. غفور و صمدنينگ اۋپكەلرى اېچىگە
اۋپريليب توشگن. شرمندھليك كتە فاجعه بيلن توگمەسە بۇلگنى... غفور و صمد
بو ياقده؛ مرتاض، منظر و شمايل او ياقده. بو توگوننى اېچيش نينگ بيتنه يۇلى بار.
او هم بۇلسە شريعت فتواسى...
(انچه بورون يازيلگن حكايه قيتە ايشلندى)

۰۱۵/۱۱/۲۰۰۷

شېربورگ، كانادا

قاره قوش

قارە قوش

(فنتاستىك حكاية - راوي/حكايةچى تىلپىن)

اېگىمدە^۱ تونىقراق كىيىم كىيىپ كۇچەگە چىقىدۇم. بولوتلار يىغلىشىگە توشكندەى بىردىن پتېر-پوتېر ياغە كېتىدى. ھەر نە اوزاققە چۈزىلمەى تىندى. كۇچەمىزدە كۇپچىب ياتىگن، ھىچ نرسەگە اۇخشمس توپراق نىنگ ياقىمتاى گىنە ھىدى بورنىمگە اورىلدى. بىرھەم ياقىملى ابدى كە خمارى توتىب ھنور اېسلەيمىن-ە، قنى اۋشە بالھلىك نىنگ مستانە دورى؟! خاطرەمدە خودى تمغە باسكندەى ياپىشىب آلگن. اۋشندىن بېرى بونداق ايسنى ھىدلەگىمچە يۇق. يىنە اۋشە توپراقلر ھىدىنى نصىب اېترمىكن، بىلمەدېم تەغىنم... بىرى بېر، كۇنگىل دېگنلرى اۋشە ياققە قرەب اىنتىلر، تلىپىنەبېرر، اۋرتنەبېرر اېكن-ە. شو تابدە اويگە كىرمەى، حاولىمىز يانيدەگى ميدانچەدە اياقلىرىم يازىلسىن دېبە بىر-اىكى قور^۲ اىلندىم. سۇنگ قۇشنىمىزنىنگ باغىگە كىرىپ، سلسلە باغلهگن غۇرە-داوچەلردىن اوزىب چۇنتىككە سالدىم. اۋرىك و كۇك سىلطانلردىن اوچ-تۇرتتەسىنى قىرسىلەتتېب پىدېم. آغزىمنى شۇر، ناردان تات قىتقىلب يوباردى. مزە دېگنى شو بۇلسە كېرەك دېيمىن. قىدەسن بالھلىك، قىدەسن اۋسىمىرلىك نىنگ اۋشە كونلرى!؟

^۱ اېگىن: كىشى تەنەسى نىنگ كىيىم كىيلەدېگن اوست قىسمى.

^۲ قور: دورە، گل، دىفە.

اويىمده من. كېچگە يقين بۇلەياتگندى. وقت نىنگ آرتىدن قمچىلىب قووه ياتگنگە كى، ساعت مىللىرى شاشىلىنچ بېشگە قرەب چاپە ياتگندى. اپرىل آيى نىنگ باشى، بهار نىنگ اۋرتەلىرى اېدى. هفتە نىنگ قىسى كونى اېكنى اېسىمده اېمس. اۋشە كېزلىرى جانلى طبيعت نىنگ طرفە بۇياقلىرى كۈزنى قووانتيره دى. جۇشقين حيات قوچاغىدە تىرىك جان زاد جنبشگە كىرگن انلر. اۋشە زمان قىزغىش، قۇنغىر^۱ توسلى ارى و بىنگ كلرنىنگ غونغىلله و پرىشلىرى؛ چىگىردە كلرنىنگ چىرىللىشى؛ يان قۇشنىلر حاو لىسدن بۇدنه لرنىنگ پىتىلىق آتېب سىرەشلىرى؛ تورلى-تومن رنگلى كپەل كلرنىنگ پىرىللب اوچىب-قۇنىشلىرى مېندە اۋزگچە بىر كىفیت توغدىرگنى هم شونده يگىنە اېسىمده. اۋشە كون باشقە كونلرگە سىرە اۋخشە مسده ي اېدى نظرىمده.

ىنە بىر يانده قارە توسلى چومالى لرنىنگ اوزون اېپگە اۋخشب اوزاق چۈزىلىب حركتلەنىشى، قدىمگى صلابتلى «اېپك يۇلى» كاروانىنى اېسگە سالردى. تومنات^۲ چوماليلر تىنىم بىلمس كاروان سىنگرى يۇل باسىشە دى، بىر تۇپى^۳ بارىشە پىدى، ىنە بىر سورىگى كېلىشە پىتدى. يوكلرىنى منزلىگە تىشىشدىن تۇختە مسده ي تويلىشە دى. كىم بىلسىن، بو سېر غىرت مخلوق نىمەلر بىلن اندرمان؟ بولرنىنگ تىلىنى كىم بىلسىن؟ ايشلىرى قنده ي باشلەنىب، قچان توگە پىدى؟ بو نرسە آدمزاد اوچون قارانغى - جومباق!^۴

مېن و ىنە اېكىتتە اۋرتاغىم اوچاولان بالاخانەگە توتش اوزونە توشگن صفە اوزره كۇرپە چەلر سالىب، درسنگ قىلىشىب ياتىشردىك. آندە-سانده بابام نىنگ: «باشىم

^۱ قۇنغىر: قارە-سرىق رنگلى، تۇق مللە.

^۲ تومنات: تومن نىنگ كۆپلىك شكلى؛ تورلى-تومن، هر خىل.

^۳ تۇپ: گروه، خىل، تۇپلم.

^۴ جومباق: معماً.

آرغرى پىدى، جىم بۇلىلر، كولگولرىنگ كۇمىر بۇلگورلر» -دېگن گپلىرىگە كىم قولاق
 آس سىن؟

كۆكلم نىنگ بې تىكرار آنلىرى اۋىين-كولگوگە قرەمەى، دقتىنى اۋغىرلەى بېرركن.
 شمال نىنگ مەىين اېسىشىدىن اۋىناقلەياتگن درخت يىراقلىرى سېكن سېلكىنىب تىترر؛
 باغ نىنگ بىر چىتىدە غاۋ اۋسگن قىمىچلر بىر-بىر تېرەنىب قۇيردى. آفتاب كون
 باترگە تامان آغماقدە اېدى. بابا قوياش نىنگ تېرەكلر يىراغلىرى آرەسىدىن تىنگچەدەى
 يېرگە توشىب تورگن، آلتىن رنگ يىل-يىل زىر نى نورلىرى كۇزدن غاىب بۇلدى، يىراقلر
 آرەسىدىن جىلمەىيشلىرى تىندى. غاۋ-غاۋ برگلر نىنگ شىتتىرلب تېرەنىشلىرى ھم
 ساكن تارتدى. يۇقارىدىن^۱ كۇترىلگن پارىم گىنە يىل آدم نىنگ بۇىنى، اىتى-باشىنى
 سىلر، گۇزلرنىنگ تۇزغاق ساچلىرىگە اۋخشىب، يوزلرگە يوماشقاق قىنە اورىلر اېدى.
 شو پىت قبلەدن سوزىب كېلەياتگن، بەھىيت اۋرەمە بولوتلر تامچىلب اۋتدى.
 كېتىدىن مامەقلدىراق بۇلىب ھوا گولدىرەدى؛ چقماق چقىلدى-دە، بىراق خىرىت
 يامغىرلرنى تۇكمەى اۋتدى. بايەگى^۲ تىزىلىب كېلەياتگن چوماليلر كاروانى
 حركتلەلمەى قالدى، اىن-اىنىگە^۳ كىرىب كېتىشىدى.

۲

ھلىىم ھوا تېپەدن باسىب تورگندەى؛ نېگەدىر كۇزىمنى كۇكدن اوزەلمەىىمن.
 خىيالگە بېرىلىب اۇققە تىكلىب قالدىم. نظرىمدە آدملرنىنگ آرزو-اىستك، اۋى و
 خىياللىرى انە شو اداقسىز ماوى آسمان بىتىدە اۋىىب يازىلگندەى. مېن اېسە شولرنى

^۱ يۇقارى: محلى شېۋەدە جنوبىگە ايتىلەدى.

^۲ بايەگى: اۋشە، آلدىنگى.

^۳ اىن: اوبە، ىشش جاي، مكان.



اۇقىشگه توتينه من گۇيا. حتا، مېنىڭ-ده، اۇمنچىم^۱ آسماندىن بۇزەرىب تورگندهى توييله يىدى خيالىمده؛ سر و سىنانگه^۲ قىزىقىشىم آرتە بەردى.

آدملر دايم بيرگه، آياق آستىگه قرەب يورىشگه عادتله نىب قالگنلر؛ كمدن-كىمى آسمانگه باقىشهدى. سۇنڭسىز كۇكده گپ كۇپ. عظيم كائىنات، انتھاسىز بارلىق!!! برى-بير سمانىڭ يشىرىن، عقل يېتمس سرلرى آلدیده كىشى عاجز قالىب، جوابسىز اۇى و خياللرى إېچىده جىمىب كېتەدى. گاهده آدملر بېردە كۇرگن اۇز كۇرگولېكلرى، مصىبت، كلفت، الملى اۇچىنى^۳ انه شو قۇلى يېتمس آسماندىن آلگودهى بۇلىشهدى. كۇم-كوك و بوغرىققن سېر بولوت آسمان، خيالىمچە، خودى كىشىلرنىڭ قرغىشىگه مبتلا بۇلگندهى.

همم آسماننى قرغەشگه توتگن. مېن هم إېچىمده قلەشىب ياتگن شۇر، اچىق ارەلش سۇزلرنى داد سالىب ساوورەى دېيىمىن-و، آسمان نىڭ بوجمه يگن^۴ يوزىده جاي قالمەگن. أفقغه چوقورراق كۇز قدهيمنى. ينه اۇشه حيرت. اما، يانيمدهگى چوماليلر اۇز إيش-يوموشىگه باشلشگن، نېگەدير ناتىنچلەنىب، تلىپاسگە توشگنلر. تىزىم-تىزىم بۇلىب آلىشىب يۇل باسه دىلر... آخرى قەياققە بارەدى بو مخلوق؟ - دېه اۇزىمگە سوال بېرەمن.

هوادە بولوتلر قان تلىشگندهى قرمى توس آلگن. جگر دېك تلغىر بولوتلر قچان دىر بېردە يوز بېرەجك كتە و دواملى بير خونرېزلىكلردن درك بېرىب تورە يېگن مثال كۇرىنىش بېرەدى. هە، كۇكده گپ كۇپ. اونده حيرتلىرى واقعه-حادثەلر مۇل-كۇل. آدمزاد انه اۇشلەرنى بىلىگىسى كېلەدى، اېمسىمى؟ شو محل، خيال قناتىدە چېكسىزلىك سرى اوچە باشلەيمنى، اوچەمن-و، چوقورراق اۇىلشگە بېرىلىب خياللرېم

^۱ اۇمنچ: آرزو، اميد.

^۲ سر و سىنات: تخيلات، سر و اسرار.

^۳ اۇچ: قصد، الم.

^۴ بوجمه يماق: اجين باسيب بوروشماق، قوجىرەب قوروقشەماق، جونجىكماق.

دالغەلىرى^۱، ايچرە شۇنغىب^۲ كېتەن... كۇپ اۋتمەى قويوق بولتلىر تگيدىن، آسمان نىنگ يىرتىق اېتەگى آستىدىن بىر تۇپ قارە قوش گەلسى شىدت بىلن مېن تامان اوچىب كېلەيپىدى. ايلس-ايلس^۳ اېسىمدە اۋشە منظرە. قارە قوشلر كۇرىنىشىدىن عادى قىرغەلرگە اۋخىش كېتەدى. بىراق قىرغەگە قرەگندە، اولر نىنگ گودەسى سەل كتەراق، تورقى قۇرقىنچلى و اۋتە ساووق، قناتلىرى قىلىچ كىي اوزون چۇزىنچاق. اولر يوكسكلىكدن اوچە ياتگندە، مۇلجىلگە^۴ تامان قويىلىپ بارەدى-دە، جونجىتر^۵ نەفسى ايلە اۋشە يىرنى اۋىدىرىگە كويدىرىپ، كۇمىردېك قارەيتىرىپ يوبارەدى. قارە قوشلر سايهسى تېككن پرچە-نرسە قورىي باشلەيدى.

۳

قارە قوشلر نىنگ شوم، ساووق و سەنقىب اوچىشلىرى قندەى دىر بختسىزلىكدن درك بېرىپ تورردى. بو نىمەسى؟ -دىب اولر نىنگ بوتون اوضاعى منظرەسىنى مىيەمدە گودەلنتىرىش، چىزىشگە اورىنەن. اېسدەلىكلرىم نىنگ بىر بورچىگىدە «قارە قوش» حقىدە، بالەلىگىمدە مامە جانىمدن اېشىتگنلىرىم بار اېدى. اما، اۋز كۇزىم بىلن كۇرگنلىرىم مېندە اۋزگچە ايز قالدىردى. بىر زوم اۋتمەى، هلىگى قارە قوشلر اوستىمدن گورىللب اوچىب اۋتدى. باشىم اوزرە ناخوش بىر ساووق هوا كۇلنكە سالگندەى بۇلدى. ھەمە ياق آغدر-تۇتتر بۇلىب اېورىلىپ كېتدى. شونداققىنە كۇز اۋنگىمدە تىمىرسكىلنە ياتگن^۶ آت مورچەلر غارىدە، كوتىلمەگن وضعىت توغىلدى. ھەمەسى سېرگك تارتىب قۇزغلان قىلىشگە بىل باغلب تورگنگە اۋخشەيپىدى.

^۱ دالغە: كوچلى موج، تۇلقىن.

^۲ شۇنغىماق: باتىب كېتماق، چۇمماق.

^۳ ايلس-ايلس: ايلە-ايلە، غىرە-شىرە؛ بىلىنر-بىلىنمس درجەدە.

^۴ مۇلجىل: رېچە، ھدف، مقصد.

^۵ جونجىماق: ساووقدن قلىتېرەماق، بو كچە يماق.

^۶ تىمىرسكىلەماق: پىسىلب ياكە تىتكىلب قىدىرماق، اخترماق.

آت مورچەلر نىنگ تېلىسلب^۱، تېغىز^۲ قۇزغاللىشلىرى اېتىدىن، كتە بىر فاجعە يوز بېرگنگە اۇخشىب كېتىدى. اوزاققە چۈزىلە ياتگن قارە كونلردن درك بېرىدى.

شو پىتىگچە چوماليلر بىر يۈنھلىشده^۳ بارىب قىتە ياتگن بۇلسەلر، قارە قوشلر شىرپەسىدىن سۇنگ، بىرى توم-ترەقى بۇلىشىب كېتىدى. اۋرنىمدن تورىب بىر-ايگى قىدىرىمە. قۇللىمنى پىشانەمگە توتىب آسمانگە تىكىلەمن، قارە قوشلر ايزىنى قىدىرىمە، تېورە-تاشگە كۇز سالەمن. ھلى بېرى بوندىب ناخوش قىغولى كىفىتگە توشمە گندىم.

ىنە قارە قوشلرنىنگ اىگىنچى نوبت ھجومكارانە سوزىلىب اوچىشىگە كۇزىم اېلىندى. بو گلگىسى اۋتە خوفلى اېدى. دنىيانى لىزگە سالردەى كوچگە اېگە مخلوق. بوتون بىر يورتى جوجىتىب قۇيەدىگن درجەدە. بولرنى اورىب، قىرىب ادا قىلىب بۇلمسە كېرەك، دنىيانىنگ ھم كوچى بىتمس، دېگن اۋى-فەرگە بارەمن.

بو ياووز قوشلر، اېندى گل اچىب بىراق يايىب، داوچەلەگن ىم-يشىل درختلرنى كويدىرىب، اېكن-تېكىن، گلزار و چمنلرنى قورىتىب قۇيدى. شوندىن كېىن، اىچىمدەگى اضطراب تابارە كوچەيىب باردى. بوندىن قۇزغالگن چوماليلر ىنە-دە، ناتىنچلندىلر. اولر حقىدە كۇپراق اۋىلەى كېتىدىم. مورچەلەرگە يقىنلىشىدىم... چوماليلر اياغىم آستىدە قالىب، ىنچىلىب كېتمەسىن اوچون اولرنىنگ غارىگە ياووقلىشماقدن تىيىندىم^۴. نظرىمدە، بوگل چوماليلر كېسكىن كۇپەيگندەى بۇلدى. ھە، اولر حددن تشقىرى تۇزىشىب غارلىرىدىن تشقىرگە اتىلىب چىقىشىدى، بىر بلانى باشلەگودەى اېدى.

^۱ تىلىسپەماق (تولسەماق): جان تەشەش؛ اۋلىم اىدىدەگى بېزائتەلىك.

^۲ تېغىز: بىر-بىرىگە جودە يقىن جايلىشگن؛ آرھلىغى قىسقە، زىچ، يقىن.

^۳ يۈنھلىش: بىرەر تامانگە قرەب يۈل آلماق؛ يورماق، جۇنەماق؛ قرەماق، قرەتىلماق.

^۴ تىيىنماق: سقلىنماق.

آسمانگە يەنە تېكىلەي، دېب تۇرىپ اېدىم كە، دەشتلى اوچىپ كېلەياتىن اۋشە قارە قوشلر كۆركم بىر باغنى نشانگە آلىب، بىر پىسە كۆمىرگە آيلتتېرىپ قۇيدى. نېمە؟ اولر باغ-راگگە دشمن ميلر؟ -دېب، سۇراق بېردىم اۋزىمگە. قارە قوشلرنىن گىلگمە-گىل قۇرقىنچلى اوچىشلرى دوام اېتەياتىدى. اولر يەنە نېمەنى بوزىش و ويران قىلىشگە چاغلەنىشەدى^۱ اېكن؟ -دېب اۋىلب قالدىم. قارە قوشلر نوبتەدى اوچىشلىرىدە ئمرگە كېلگن اېكىنزارلرنى پىخان^۲ اېتىشنى مۇلجىلگە آلەياتىدى.

آه! نې تىل بىلن اېتەي كە، اېندى، حاصلگە باشاقلب، حاصلگە تۇلە اېكىنزارلرنى ياندىرىپ، كولگە آيلتتېرىپ بۇلدى. قارە قوشلرنىن گىلگمە قىلىپ اوچىشلرى تىن آلەمى تۇرىدى. ياووز قوشلر، بو نوبت كۆم-كۆك سووگە تۇلىپ تورگن مصفا كۆل، حوزلرنى بارلەشىپ^۳ تۇرىشىدى. اولر قناتلرى اوچىنى، تۇلىپ تورگن حيات سوويگە تېگىزىكلر، حياتبخش سوولر بىردن قانگە آيلنەدى. قارە قوشلرنىن گىلگمە-كېت اوچىشى آدملرنىن گىلگمە عاڧى حياتىنى ايزدن چىقىرىپ يوبارە باشلەپىدى. بختسىزلىك كېلتىرووچى قارە قوشلرنى اېل-يورت باشىدن اوزاقلشتىرىشگە انسان كوچى يېتمەي تۇرىدى. ارادەسىزلىك قىلمسەلر اولرگە قرشى يالغىزگىنە چوماليلر بس كېلە آلىشى مەكەن. شو تابدە، كۆنگىلىمدە توغىلگن اۋى-خىاللرنى گېپىرەي دېسەم تىلېم سۇزگە بارمەپىدى. توشىمى؟ -دېسەم، كوپپە كوندوز. دانگ قاتىب، يا پىرىم-اې! - دېبەن.

آياق اوستىدە تۇرىپ قالدىم. قارە قوشلرنىن گىلگمە دەشتلى پروازى اۋكسىدى. ساووق لحظەلر تىندى چمەسى. هر نە باشىمىزدن دفع بۇلدى اولر، -دېب تورگندىم. بىر پىت اېنى سىبىرگن يىنگىلغ شىوئىللەگن آواز قولاقلىرىمنى يىلب اۋتدى. بىردن اۋتېرىپ آلدىم. كىچىك لىگىمدە اۋرگىلگن اېرىم-سىرىملرنى قىلىپ، بىر نرسەلرنى

^۱ چاغلنماق: قصد قىلماق، ارادەلى.

^۲ پىخان قىلماق: يۇق قىلماق، اۋلدىرماق، جانىنى آلماق.

^۳ بارلەماق: نشانگە آلماق، باللاهماق (شېوهدە).

اۋقىدېم. اۋزىمنى الدەگنىمنى بېلىپ توريپ من. چونكە، معنالىرىنى بېلىمىدىن، مېن ايتماقچى بۇلگن بو سۇزلىرى بېلىن جانلى حيات و تىرىك طبعيت اۋرتەسىدە هېچ قندەى علاقه، اويغونلىك يۇق. شو قدر مدەش كە، عادىي خلق تىلىدە اۋزىگىنە بۇرتىش بېلىن گېپىرىلسە، بو منظرە قىامت ياكە آخر زمانگە مېنگزەلەدى. اۋىلرېم بېلىن الىشىپ توريپ من...

نخواتكى، اش-پش دېگونچە دنيا توگب قالسە-يە؟ شو زمان، گلەسىدىن اجرەلگن بېتتە قارە قوش پست كېنە دېوارگە كېلىپ قۇنەدى. كۇرىنىشدىن او سان-سانقىسىز چوماللىرىنى بېر-بېر تېرىپ بېماقچى دەى، شى بۇلىپ توريپىدى. بونى پىقەگن ات مورچەلرېنىگ حركتى تېز لەشىپ كېتدى.

عجبىدىن-عجب! بونى قرەنگ كە، قارە قوشلردن بېرى چوماللىرگە دارىمىدىن^۱، كېلە سالىپ، بېتتە-بېتتە سلماقلەنىپ يوررېكن بېش-التى متر نىراقدە، بېر-ايگى قغ-قغ قىلدى-دە، سىنن تورگن رادىو قرشىسىدە توريپ ادى. بونى كۇرىپ حىرتگە چۇمدىم. اېى نېمە بۇلدى، يا پېرى، دېدىم. دېوار اوستىگە قۇبىلگن رادىونىنگ موروتىنى^۲ كاساودەى قارەبىب كېتگن پىنجەلرى بېلىن شتتەلب، اۋتكىر تومشوغى بېلىن چۇقىدى. سىلتاولەنىپ رادىو موروتى بورھىلىپ كېتدى، ايتىپ تورگن رادىو تۇستىن اۋچىپ قالدى. «انقلاب!» دېگن سۇز قولاقلىمگە ساووق چەلىندى اۋشندە. ايزىدىن «انقلاب» موسىقەسى ىنگرەى كېتدى. چوماللىرىنىگ قۇزغالىشى شىدتلدى. كېتى كۇرىنمەياتگن قۇزغالان نىنگ ساووق كۇلكەسى اوزاققە تارنەياتگندەى ادى. اۋشندە، اىلك اېشىتگىنىم قۇرقىنچلى «انقلاب!» كويى بۇلدى. بو كوي قندەى دېر تىنچىمىس واقە-حادتەلرنى توغىشىنى انگلە تىب توريپىدى.

^۱ دارىماق: باسماق، سىنگىماق؛ يقىنلىشماق، كۇرىنماق.

^۲ موروت: اسباب-اسكونە و ماشىنلرېنىگ بورەب ايشگە سالەدىگن كلىتى، گۇتكە، پېچ.

يىنگرەياتىگن كوى باشىمدن خىيالىمنى اوچىردى. اۋىلشگە كوچىم بېتمەى جايىمدە قاتىب قالدىم... بوندىن بترى آلدىندە، نې-نې كۈز كۈرىب، قولاق اېشىتمەگن نرسە ھلى آلدىندە. قارە قوشلرنىنگ مطلق... حكمران كونلرى ھلى اېلگرىدە، اېلگرىدە دېيىمىن.

كۈزىمنى آچسىم تىغىن خىيالگە بېرىلىيىمىن اېكن. بىر قىتىم وقت اېچىدە شونچە واقعه-حادثە و منظرەلر بېرىن-سىرىن كۈز اۋنگىمدن اۋتىدى. منە اۋشە دملرنى ايتىب بېرگىم كېلىب، بىلگن و بىلمەگنلر بىلن بۈلىشىدىم. يوز بىلگە تېنگ بېرگىنە مىزغىش حاصلەسى شولر بۈلدى.

شىرپوروك - كانادا

۲۰۱۱/۵/۷

آغرىق

آغرىق

اېلمراد قندوز ولايتى نىنگ «اۈزبېك قىشلاق» دېگن چېككە قىشلاغلرېدن بېرىدە
 يشەيدى. بالە جان عايلەنىنگ آتەسى. اۈرتە حال گىنە، قارە مال و بېر نېچىتە قۇي،
 اېچكىلرى بېلن اندرمان. تياقلىرگە عشقىنى قويگن انسان. اويىدە آقلىق، سوت،
 قىماق و قتىغى سېراب. اوچ-تۇرت جىرىب بېرى ھم بار، قۇلى گل باغبان؛ او بېر
 بېلن گېلشەياتگن آدملىردن اېدى. او كۇپراق اېكىن-تېكىن قىلىب بالە-چقەسىنى
 باقىب كېلەدى. اېلمراد بالەلىگىنى يالچىتمەگن. مكتىدن قاچىش عادىتىنى چىقىرىپ،
 اۈقىش نىنگ بېلىدن چاپگن؛ سوادى چلە قالىب كېتگن؛ يازوولرنى بېر عملب
 اۈقىي آلەدى-يو، خط بېتىشىگە برماقلىرى يىخسى قاووشمەيدى. لېكن بلاگە اۈخشب
 جغرافىەنى سوودەى بىلەدى؛ سوو قىلىب اىچگن دېسە ھم بۇلەبېرەدى. كىم،
 قىسى قارەدە نېچە دولت بار؟ نفوسى قنچە؟ -دېب سۇرەسە؛ جوابى نقد. قىسى دېر
 يورتدن ات توتسنگىز درآو قۇشنىلرېگچە، تاغ، كۇرفز^۱، كۇل، بۇغاز^۲ و دريالرى، بېر
 اوستى و بېر استى بايلىكلرى-يو، تاغ و تاشلرېگچە بېش قۇلدەى بىلەدى،
 ىنگلىشمسدىن ايتىب بېرە آلەدى.

^۱ كۇرفز: دېنگىز ياكە كۇل نىنگ قوروقلىك اېچكىرىسىگە كىرگن قىسمى؛ قۇلتىق.

^۲ بۇغاز: ۱. قارىندە بالەسى بار، حاملەدار. ۲. ايكى سوو حوزەسىنى توتىشتىرووچى تار سوو يۇلى.

اۋزبىك قىشلاققه حاضرگچه برق بارمه گن. تلویزیون یۇق، آنه دن قالگن بیئته گینه تورقى كېتگن اېسكى رادیوسى بار اېلمرادنینگ؛ رادیونینگ یانیدن سیره جیلدیرمه^۱، دلەگچه چىقسه هم رادیو سننه تیب یوریشی اونگه عادت. دايم تینگلب یوریشدن کیفلنه دیگن بۇلیب قالگن. دنیا ینگیلیکلرینی برچه دن آلدین اېلمراد اېشیتگن بۇله دی، خبرلرینگ کانی شونده. ايریم قىشلاقداشلىرى هزللشيب، اونى «بىبىسى» دېب چقىرىشه دی. اېلمراد سېر غیرت؛ چاپان کییب، بېلینی قستیق تنغیب^۲ باغلب یوره دی دايم. ناوچه دن^۳ کېلگن، بیققى برماق. اییه گیده^۴ سهل چندیغی^۵ بار. قیره بورنى یاشلیغیده بیقیلیب سینگنی باعث منقهراق گپیره دی. کولچه یوزلی، قاشلىرى قلین، غاو، سینیق کیپرېکلری چتیشگنراق، قیسیق کۈزلى ایچیگه تارتگن کۈرینیشده، چۈککئراق، قۇللىرى اوزون-اوزون، طومارچه تاقیسینی باشیگه یریم قیسیق قوندیریب کییه دی. دۈریلله گن تاووشی بار، سۈزلرگه آهنگ قۇشيب، بۇرۇرۇر ایتیب، سلماقله نیب^۶ گپیره دی.

دنیا بۇلیب، قیرغین کسلیک ترقلدى، -دېگن ساووق خبرلر کون آشه باله لب بارماقده اېدی. عادى اھالی -توشینمه گنیدن بۇلسه کېرەك- باسیق، وهیمه سیز ایش-یوموشلىرى بیلن بند، لبلرینی چۈچه یتیریب، «توشونمه سک، بیلمه سک بو نرسه لرنی» -دېب قۇییشه دی. اېلمراد بو خبرنی اېشیتگچ، قولاغینی رادیودن اۋزمه دی. اېشیتگن، بیلگنلرینی قىشلاقداشلىرىگه بیتکزیب توره دی. آلیس قىشلاقلرگچه یتیب اولگورگن کرونا خبریگه هم بیر آى بۇلیب قالدی. اېلمراد هم

^۱ جیلدیرماق: اوزاقلشتیرماق، بیراقلشتیرماق.

^۲ تنغیماق: محکم سقیب، اۋرەب، ایلتیریب، بیچیلمه دیدگن قیلیب باغله ماق؛ چندیماق.

^۳ ناوچه: بوی بلند، دراز، اوزون.

^۴ اییه ک: پستکی غغ،

^۵ چندیق: بیتگن یره نینگ اوزنی، ایزی.

^۶ سلماقله ماق: وزمینلیک بیلن، دانه-دانه قیلیب گپیرماق، سۈزله ماق؛ شاشمسدن بیرته-بیرته قدم تشله ماق، سبکین

باشقەرلەر قاتارى پروا قىلەيدى. «چېت ابلدن كېم بېزىنىڭ چن قىشلاغىمىزگە كېلىپ اۆتيرىيتى؟ كرونان بېغمىمىز شىكر» -دېب اېنەغەنېن يورەدى او. ادملر ارسىدە اوزون قولاق گېلر زۇرەبگندن زۇرەيماقده. اېلمرادنىڭ تىرىكچىلىكندن قۇلى بۇشەمەيدى؛ بىراوگە ايشى يۇق؛ غىبىت قىلىشگە وقتى بارمى دېسىز.

كۆچەدن، «جنازەگە خىر اوووا...وو» -دېگن جىرچىنىڭ قىچقىرىغى قۇلاغىگە چلىندى. «يا تىنگىم، تىنچلىك بۇلسىن» -دېب بوتون دقتىنى بايەگى تاووشگە قرەتدى. انىقلىق بىلىپ اَلگىچ، «اې رحمتلى! يىخى كىشى اېدى؛ ادم ذاتى بىر كون كېلر، بىر كون كېتركن بونىادن» -دېبە چوقور اھ چېكىدى-دە، قۇلىنى يوزىگە تارتىپ اَمىن قىلىپ قۇيدى.

اېلمراد اوويىگە كېلىپ، تازە كىملىرىنى اېگنىگە اىلىپ، يان قىشلاققە جنازە اۇقىگىنى كېتدى. قىشلاققە يېتىپ بارسە مُردەنى جنازە ميدانگە اَلېب بارەياتگن اېكىلر. ئواب يېتىسەن قىلىپ بىر زوم تابوتنى اېلكەسىگە اَلدى. جنازە اۇقىشگە شىلەنىشىدىلر. تابوتنى يېرگە قۇيدىلر. قىشلاقداشلر امام ارقەسىدە صفلەنىشىپ تىزىلىشىدى، اىكى يوز كىشى بىغىلگندى چمەسى؛ اوچ صفدن اَشدى ادملر. اېندى امام نىت باشلپ اېدى كە، اېلمرادنىڭ سۇل تامانىدە تورگن اۋرتە ياشلى بىر كىشى يېلكەسىدن كېتىمە-كېتىق تۇرت مرتە كېتىمە-كېتىت چوچكىردى^۱. اېلمراد بوندىن چۇچىب توشدى؛ يورەگىگە اَلمەى، جنازە نمازىدە تورە بېردى. اما، جھلى چىققن امام ارقەسىگە تىسرىلىپ^۲، اچىق بىلن قاشلىرىنى توگىب، خۇمرەيگنچە^۳ قرەب قۇيدى. جنازە اۇقىب بۇلىنىچ، اېلمراد قىرستانگە بارىشگە وقت تاپمەدى. اۋز ايش و كوچىگە توتىنگىنى اوويىگە قىتە بېردى.

^۱ چوچكىرماق: عكسە اورماق.

^۲ تىسرىلماق: ارقەگە قىرىلماق؛ چېكىنىشگە مجبور بۇلماق.

^۳ خۇمرەيماق: قاواغىنى سالىپ تىكىلماق، يامان كۆز بىلن قرەماق.

ھوا تومنىلى، بۇغىق. اطرافگە يېتتى جۈنجىتەياتگن ساووق چۇككن. ياغمير ارەلش يگە-يرىم قار اوچقونلەپىدى. آلە قرغەلرنىنگ تېرەكلر شاخىگە قۇنىب، قغىللىشى مونگلى كىفیت توغدىرەدى كىشىدە. ھە دېمەى، ایزغىرىن قىش سېپىنى يايەدى. اېلمراد ماللرىنى اۋىلب بېدە، پېچن، ساماننى غملىش پىدە. اۋتگن يىلى ماللرىگە پېم-خىشك يېتكزە آلەگنىدن ايرىملرى اۋىلب كېتدگندى. سوت، قىتىق اوچون ھم ساغىن سىگىرلىرىگە قرەب تورىشى كېرەك.

قىشلاقداشلىر شام نمازىنى اۋقىش اوچون مسجدگە تامان شاشىلەياتگندى. اېلمراد سەھل اۋلىنراق بارىب مالا امام و جماعە بىلن كرۈنا حقىدە سۈزلەشىب تورر اېدى. اوزاقدن قرەگندە بىران سودا اوستىدە تارتىشەياتگندەى تويىلەدى ايتىلەياتگن گپ-سۈزلر. قۇلىدەگى عىساسىنى مسجد دېوارىگە تەيب قۇيركن، شىویردب تسىبىح اۋگىرىب تورگن مالا امام:

- اېلمراد! -دېدى يۇغان آوازده، -عقلىنگىنى بېدىنگىمى بد بخت؟ نىمەلرنى كېپرەپىسن اۋزىنگچە؟

- تىنچلەنىنگ مالا اكه، مېن فقط رادىودن داکترلر سۈزلەگن گپلرنى توشىنتىردىم خلققە، باشقە نرسە دېگىم يۇق. بونىنگ نىمەسى يامان مالا اكه؟

- يىغىشتىر بو بۇلمەگور گپلرىنگىنى. اۋزى درد بېرەدى، اۋزى توزەتەدى، اۋزى امانتىنى آلەدى. باشقەسى پوچ گپلر، بىلدىنگىمى اېلمراد؟ -دېدى مالا غضب بىلن تىكلركن.

- شو گپلر نېچە يىلدىن بېرى ايتىب كېلىنەدى، -دېدى اېلمراد تاماغىنى قىرىب. لېكن كسل بۇلسە ھمە داکترگە چاپەدى. اۋلىنگى اۋقىتىش، دم سالىشلىر انچە

^۱ پېچن: حيوانلرگە اذوقە بۇلەدىگن اۋت؛ اۋرىب قورىتىلگن اۋت؛ خىشك.
^۲ پى: بىرار مقصدنى عملگە اشىرىش قۇلىدەگى حرەكت، اورىنىش، قصد.

كەمەيب كېتدى. مثلاً: اۋزىزىز ھەم نېچە مرتە بارگىسىز كۆزىزىز، كۆزىزىز بىلەن كۆرگىنىز تەقەبىر.

- خدادان قۇرۇق، گىنى شۇدگارگە بورمە اېلمراد. مېن بارگن بۇلسم شرعى ايش بوزەسىدن بارگىنىز؛ امر معروف قىلگىنىز، خدایى سىگە چقىرگىدىز...
- مېن داکترلرگە ايشانە مەن مالا اكه؛ دارى-درمانگە ھەم؛ سىز اۋزىز بىلەسىز بو گېلەنى.

- استغفرالله، استغفرالله، استغفرالله، -دېيە اېلمرادنى كايىب^۱ قۇيدى مالا، -سېن ايماننى بېلىنى سىندىرمە او بالە! خدانىنگ غضبىگە اوچرەسىز. بولر كرونا-مورونا اېمس؛ كافرلرنىنگ حىلە-نېرنگى گە اوچمە تەغىن^۲.

- مېن كوف و شوفلرگە ايشانەمى قۇيگىنىمگە كۆپ بىللر بۇلدى مالا اكه، -دېدى اېلمراد ارەنگ قۇلىنى چېككەسىگە توتىب، اۋىچن^۳ بىر حالتدە.

- بو گېنىگ بىلەن باشقە مۇمىن مسلمانلرنىنگ ايمانىگە سوو قويماقچى مىسن؟ گېمنى يخشىلىب اېشتىب آل او بالە! بو كرونا دېگىنى مسلمانلرنى اۋشلمەيدى. بېش وقت نمازىنى اۋقىگىنى يېتتى مىنگ فرشتە قناتى استىگە آلەدى. كرونا كافرلەنى توتەدى؛ بو گېمىگە ايشانە بېر.

قىشلاقداشلىر جماعە بۇلىشىب اۋشە كونى شام نمازىنى اۋقىب آلىشىدى. اوزون سورەلردن اۋقىب، دعالرگە باشلىشدىن آلدىن مالا نماز خوانلرگە قرەتە:

او ملت! مېن سىزگە آيتە مەن ماسكى، پاسكى تاقمە يە. بولر شيطاننىنگ ايشى. بو نېمە؟ اېشك بورنىگە خلتە تەققىندەدى بىر گپ اېمس مى؟ استغفرالله دېنگ، يارىم!

^۱ كايىماق: تەبىئە لاۋچى گپ، سۆز آيتماق، تەبىئە بېرماق، اورىشىب قويماق.

^۲ تەغىن: بونىنگ اوستىگە، بوندىن تىشقىرى، اوستىگە-اوستك؛ يەنە، قىتەدن.

^۳ اۋىچن: اۋى بىلەن بىند بۇلگىن، اۋىگە چۇمگىن.

خونىك^۱ كۇرىنەدى اخير. بعضى بىر روايتگە كۆرە مكرهەم دىر بو عمل، شيطان ايشى دىر، -دېدى بوريا اوستيده اياقلىرىنى كېرگنچە. بىر هفته اؤتمسدىن «مالانى هم كرنا اوشلبدى» -دېگن خبر ترقلدى قيشلاقده. اېلمراد بۇلسە «تەنم تۇكولگودەى بۇلىب آغرىيدى؛ سويكلريم زيرقيرهيدى. تاماغم قوروقشيلب، يۇتل اۋپكەمنى ايچىمدن سوغوريب آلەياتگندەى» -دېيە آغرىنىب گپيره باشلەدى. اېلمراد شو حالىگە قرەمەى، اېرتە بروقت توريب بامداد نمازىنى اۋقىشگە مسجدگە باردى. قرەسە هيچ كيم كۇرىنمەيپدى. بامداد نمازىنى اۋقىگچ، شاشىلىب اويگە كېلدى. اويده گيلرگە سېزديرمەى اۋزىنى قرەنتىن اېتدى. «قوخ، قوخ، قوخ! بىراز زكاممن، اۋتېب كېتەدى، وهيمە قيمەيلە» -دېب خاتىنىگە توشونتيريش قىلدى.

اېلمراد اۋن بېش كون قتيق رزىمدە قرەنتىندە قالدى. نيمە قىلىم اېكن؟ -دېب تورىيدى. يازده قىزىق قوياشده تابلىنگن پيازلىرى ميبهسىگە اوردى^۲. پياز بېيشگە كىرىشدى، سويوق اوقتلىر بىلن يېگنى غرچىللەگن قىزىل پياز بۇلدى. كونيگە بېش- آلتى محل قىزىل پيازنى باسيب يېبەبېردى. سۇنگ يشب تورگن اوىنىنگ دېرەزەسىنى لنگ آچىب تشلەدى. سلقىن هوا خانەنى تازەلب تورىيدى. سويوق اوقت، يېگوليك، ايچكيليكلرنى اېشىك آرقەسىدن آلىب توردى. راديو موروتىنى ايلنتىرگنى ايلنتىرگن. كرنا بۇيىچە ينگىليكلرنى متصل تىنگلب بارەدى. اېلمراد توشىنىب يېتدى كە، كرنادان امان قالىشنىنگ بىردن-بىر چارەسى اۋزىگە ايشانىش، كسلىككە تسليم بۇلمسلىك دىر. نماز-نيازىنى اوزمسدىن اۋقىب تورىيدى. طهارت آلىب، اياق-قۇللىرىنى صابونلب يووهدى و كېلىب قران تلاوتىگە اۋتيرهدى.

^۱ خونىك (خونوك): كۇرىنىشى ياقىمسىز؛ كۇرىمسىز، چىرايلى اېمس، ناخوش، جىركنچ.
^۲ ميبهسىگە اوردى؛ اېسىگە كېلدى.

خدادان امانلىك سۇرەب التجا قىلەدى. ملانىنگ گېلرىگە قولاق آسمىدن قۇللىرىنى
ويروسىگە قرشى سىنتايىزر/الكول بىلن تازەلب توريشىگە اهمىت قرەتدى.

اېلمراد اۋن بېش كون دېگندە آياقە توريب آلدى. قۇنى-قۇشنى، اوزاقدن
سۇرەگنلرگە قندەى توزەلگنى تۇغرىسىدە معلومات بېرەيپىدى. او:

«اۋلمسلىك اوچون كۇنار شيرەسىدن هم يېب توردىم؛ همەسىدن كۇرە يم قىزىل
پياز كروناگە قرشى قلقان بۇلىب، مېنگە قىتە جان عطا قىلدى، ايچىمنى تازەلەدى
پياز. تاماغىمىنىڭ يۇلىنى بۇشتىدى؛ كۇزلىرىمدن ياش آقىزىب، كۇكرەگىمنى
يومشتىدى؛ هر كون بىر كتە قىزىل پيازنى قپە ايكيگە بۇلىب طاقچەدە يانيمگە
قۇيدىم، قىزىل پياز ويروسلىرى خانەدن قويوب چىقردى دېب اۋىلەيمىن» -دېدى
سۇرەگنلرگە.

اېلمراد اۋزىگە كېلدى. عايلەسى، بالە-چقەسى، مال-حالىگە خودى اولگى دېك
قرەى بېردى. رادىوسى قۇلىدن توشگىنچە يۇق. «اۋزىبىك قىشلاق» دە اېلمرادىنىڭ
دانغى چىقدى،^۱ ابرۇيى آشدى. قىشلاق آق ساقالى بۇلىش، آدملىرىنىڭ گپ و
سۇزىگە قولاق آسىش اونىڭ ذمەسىگە توشدى.

خبر كېلدى. قزاسى توتىب كرونادن ملا امامىنىڭ جانى اوزىلگنىمىش. ايشلر
آغىرلىشىدى. اونىڭ گۇر و چۇپى هم اېلمرادىنىڭ بۇنىدە. مسجدگە يىنگى پېشناماز
تاپىشنى هم اېلمراد عھدەلىشى لازم. «اۋزىبىك قىشلاق» دە كرونادن بيتتە اۋلىب،
اۋنتە ساغەيگنى رسماً قيد قىلىندى. اېلمراد «بالەلرىمىزگە رحىمى كېلىب بىزنى
تىنگرى اۋزى يارلەقەدى^۲»، دېب خورسند. او كرونالە قرشى واكسىن آلىشىگە نوبت
كوتىب تورييدى.

^۱ دانغى (دانغى) چىقدى: شەرتى، داوروغى چىقدى.

^۲ يارلەقەماق: قۇلۇب-قۇتۇلماق، مدد بېرماق.

نېمە بۇلمسە ھەم ھايات بېر بېردە تۇختب قالمەيدى اپکن. او «خداگە شکر! منە واکسىنلر چىقدى؛ اۇلگنلر اۇلب، ساغەيگنلر ھايات قوچاغىگە قىتماقدەلر...» دېگن خالاصەگە كېلدى.

اپلمراد ساغليغىنى تۇلە تىكلەدى. ابندى اپلمراد كوزەك^۱ انارلىرى، سې-سېرىق خوشبۇى بۇلىق بېھىلىرى، خوازده آسىقلىغ تايىبى اوزوم و مەيىزلىرىنى، بادام، يانغاق، پخالگە اۇرەلگن قاوون و ترووزلرنى؛ سوت-قتىق، سوزمە^۲، سىرىاغلرنى بازارگە آلب چىقىب پوللشنى رېجەلشتىرەيپدى. بۇل ياقەسىدە دوكانچەسى ھەم بار. فقط ساتىش رخصت اپتېلىسە بۇلدى. بوياغى...

۲۰۱۱

تورانتو، كانادە

^۱ كوزەك: كوز، خزان.

^۲ سوزمە: سورپ خلتەگە سالىب، آسىب قۇيىلگن قىتىق نىنگ زردابى سىزگچ حاصل بۇلگن سوت محصولاتى.

آق و قىزىل

اق و قيزيل

شېھر آدمگە سىغمەي تۇلىپ تاشگن، ايگنە تىلشگە بۇش جاي نىنگ اۋزى يۇق. جنراتورلردە تىرىللە تىب دېزل ياقەياتگن ايشخانەلر، اوستە خانەلر و آشخانەلردن تۇلغەنىپ كۇككە كۇتريلەياتگن قوبوق بوغ^۱ و توتونلر شېھر فضاسىنى خىرەلە تىب، تومن حاصل قىلگن. باشكېنت. شېھرىنگ تۇرت تېورەگى تاغلر بىلن اۋرەلگن. شمالدن جنوبگە ياستنە^۲ توشگن تاغ شېھرىنى كون چىقر و كون باتر قىلىپ ايگىگە بۇلىپ قۇيگن. تاغلر ارا ياقەلب اونچە كتە بۇلمەگن بىر دريا اۋتەدى. باشكېنت مقامىگە اېگە اوشبو محىط هواسى افلاسلىگى بىلن مشھور. بو جاي نىنگ شوندىە قاق اۋرتەسىدن اۋتەدىگن دريا فقطگىنە قىشە سوو كۇرەدى؛ باشقە محللر چىقديخانە، يانىدن اۋتسە سىيدىك هىدېدن بورون بىتگودەي بۇلەدى. بلچىقلر اۋرەمىدن^۳ ايرماقلىب^۴ اۋتەدىگن سوولردە خاتىن-خالچ اۋتېرىپ اىلب شال-شلتە،

^۱ بوغ: سوپوقلىك ياكە قتيق جىملرنىنگ گاز سىمان حالتى.

^۲ ياستىماق: اياق-قۇلنى اوزە تىب، ياتگن ياكە اۋتېرگن خالده اۋزىنى اېركىن توتماق؛ يىلىنماق؛ بېرىنگ معلوم سطحىنى قايلىب، اېگىلب ياتماق، چۈزىلىب يايىلىب ياتماق.

^۳ اۋرەم: اۋرەلگن خالده كېلتىرىلگن، اۋرەب قۇيىلگن؛ اۋرەلگن نرسەنىنگ بىر قوتى؛ بىرار نىمەلر بىلن اۋرەلگن، آرھلىقەدە بۇلگن جاي.

^۴ ايرماق: بىرلىشىپ، كتە دريا حاصل قىلوچى هر بىر ايرىم كىچىك دريا؛ درياچە.

كۆرپە-تۆشك، كىر-مىرلرینی يويىشەدى. باشكېنت، كتە كېنت تاغلىرى نىنگ بېتىدە آدملىرىمى-جىمىدە بىر كوندە سىنچ^۱، گوۋەلە^۲ باشپنە اوپلر قورىب آلىشگن. توبندە^۳ - شەرنىنگ كۆركم و آباد جايلىرىدە باى و بدولتلىرى شەسە؛ تاغ بىغرى تېپەلردە اېسە چىغايلىر^۴، كىمبىللىر كون كۆرىشەدى. تاغلىردن اونچە اوزاق بۆلمەگن بېردە پايتخت ارگىنى اولكن چىنار و يىشلى ارچە-ناجولر اۋرەب تورىشەدى. حىشمىلى بنالر، قطار كېتىگن يانمە-يان سرائى و ماركېتلىر، دوكان و مغازەلر شەرنى زىمانوى لىشگىدىن درك بېرىب تورىدى. بنا-بو خىيانلر ياقەلرىدە يم-يشىل ناچو درختلىرى شەركە كۆرك و صلابت بىغىشلىب تورەدى. پسە، شەردە، نانى ياققە باتگن بايلر؛ مىنسىدارلر؛ تېپەدە اېسە اۋشە اطراف، قىشلاق و شەرلردن چىقىب كېلگن، باشپنەسىز كون كېچىرىب، اېندى اۋز امانت اويىگە اېگە بۆلگن كىمبىللىر عمر اۋتكىزىشەدى. فرقى شوندى كە، پىستەگىلر تۇق و معمور شەشەدىلر، تاغ يوزىدەگى قىشاقلىرگە «آچ قولاغىم - تىنچ قولاغىم»، بۆلسە بۆلدى.

يخىسى-يامان كونلر پسەدە هم تېپەدە اۋتېب بارماقدە... كتك سىمان انه شو اويلردن كۆككە اۋرلەياتگن نىمجان توتونلر خودى اۋچ الهياتگن كىبى ارگ سرائىنى هجومگە توتگندەدى. كۆرىنىشدىن تاغ بېتىدەگى بو اويلر شەرنىنگ افتى-انگارىنى بوزىب يوبارگن. كىم قنچە شەردارلر بو اويلرنى بوزىشگە هم كىرىشەدى، بىراق فايدە قىلمەيدى. چىغايلىر تىش-تىرناغلىرى بىلن تىرىشىب قىرشىلىك كۆرسەتىب كېلىدلىر. «آچ بچەغردن قاچ بچەغر^۵»، دېگن مقال عىنأ شولر حىياتىگە تۇغرى

^۱ سىنچ: بنا و انشائاتلر دېۋارى نىنگ تىگلىك ياغاچ بىلن سراۋى اۋرتەسىگە قەدلىگن ياغاچلر؛ عمارت نىنگ، دېۋار نىنگ شو قىسمى اوچون باپ ياغاچ.

^۲ گوۋەلە: لايدن قولدە يىلگن، آفتابدە قورىتىلگن، تگى يىسى چۈزىنچاق قورىلىش مادەسى.

^۳ توبن: ۱. قوبى، پست. ۲. موقى، خىللىرى، صفتى و شو كىبىلر جەتدىن قوبى درجەلى؛ پست، ارزىمس؛ حىيات، اخلاق نقتەلى نظرىدىن يامان، يرمەس.

^۴ چىغاي: مهاجر، اۋز يورتىدىن آيرىلگن؛ قىشلاقلىردن شەركە كۈچىب كېلگن.

^۵ بچەغر: نفرت، غضب بىلن قىتىق كايىشنى، ناراضىلىكنى افادەلەيدى.

كېلەدى. سووچىلر قىشىن-يازىن مَشكىلنى تۇلدىرىپ اويىمە-اوى سوو تەشىب آلىپ بارمىسەلر، بو يېردە هم معالى يىشىدن نشانە تاپمەيسىز. شو مسكىنلردن تورىپ، شېھرنى بېمىلال تماشا قىلسە بۇلەدى. آيتىلگن تاغ يان بغيرلر يە گوگردىنىنگ قُطُيىسىگە اۇخشب زىچ قوربىلگن اويلردن قىيەلب، آقېب توشەياتگن اخلت،^۱ سىيدىك، چىقىندىلر انقىب^۲ دماققە اورەدى... گداى بارمس، مېھمان كۇرمىس بو اويلر بىر قرەشده شېھردەگى غوغا، هر خىل دعوا-يو، دنگنەلردن فارغ يشەياتگندەى توپولەدى. يۇق، اوندهى اېمس... چىقىندىلر شېھر اربىقلر يىنى بۇتقەگە^۳ تۇلدىرىپ يوبارگن، بو منظرە انسان كۇنگىلىنى بوزىپ، غىشلىتمەى قۇيمەيدى. اوستىگە ياغىن قويىپ بېرسە بارمى، كئافتلر قۇزىب^۴، اربىقلر حرىكتگە توشىپ كېتەدى. حرىكتگە توشەدى اېمس، تىقىلىپ تاشەدى هم، اسپلت يۇللىرىگچە لالە زار قىلىپ تشلەيدى. امنىت سىزلىك، يېتىشماوچىلىك^۵ كىلىك قىلەياتگندەى شېھرگە بىر كېلىپ-كېتىش مېيەنى ققشستەدى...

شېھر كۇچەلرى بۇبىل-اېنلېب^۶ يورركن كىشى سودا رستەلرى، ماركېتلر، تجارىتخانەلر، توارلردن^۷ لىق تۇلە دوكانلر كۇزگە تشلنەدى. مغازەلر آلدى-يو، يۇل بۇيلرىدە يايىمە بازار قىزىگندىن قىزىگن. ساتووچىلر يىنىنگ: «منە لېلام بۇلدى! سى كو بى كو! آپ قال!» -دېگن بلند قىچقىرىقلرى شېھرگە شاوقىن سالماقە. اېشك ارابەلردە، يېرلردە سېد تۇلدىرىپ هۇل-قورىق مېو-چېو ساتووچىلر يىنىنگ هېقىرىشلىرى-يو، لېلامى فروشلر يىنىنگ تاماق يىرتىپ بقىرىشلىرى شېھرنى شاشىلتىرگندەى. ازدحام ارا بىر-

^۱ اخلت: سوپورىندى و تشلندىقلر، سوپورىش-سىدىرىش نىتىجەسىدە تۇپلنگن افلاس نرسەلر.

^۲ انقىماق: ترقلىماق، گوركىرەب تورماق (هيد حقىدە).

^۳ بۇتقە: طعاملر قالدىغى؛ افلاسلىك.

^۴ قۇزىماق: قۇزغەماق.

^۵ يېتىشماوچىلىك: كىچىلىك، نقصان، تىقىلىك.

^۶ اېنلەماق: اېنىنى اۇلجەماق؛ سطحىنى، يوزەسىنى قابىلەماق.

^۷ توار: كالا، جنس.

بېرىگە سورتىلىپ، تورتىلىپ حرکتلەنە ياتىنلار بېزارىلر^۱ ھم اورچىب^۲ كېتىن. خاتىن- قىزلەرگە تېگىنىپ، سورتىلىپ شەھوت حرصىنى قاندىرگۈچىلر-دە، بار دېگن گپ قولقلەرگە چەلىنىپ تۇرەدى. شەھردە تىرتىب سىزلىكلرنى كېلتىرىپ چىقىرىش عادت حال. خاتىن-خلىچگە بو شەھردە يورىش آسان اېمس. بېزارىلر منگو-كېلە پۇچاغىنى اورچىب^۳ يۇلككە اولاقىتىرركن^۴، خاتىن-قىزلرنىنگ اۇتىب-قىتىشى بې ملال اېمس. تايىب بىقىلىشەدى. ايشخانە-اشخانەلرنىنگ كىر سوولرى غرىبلە تىب، دنگ تۇلە ارىقە سېلىپ تشلەنر؛ موز قىماق^۵، كۇكتلر سلقىن سووى^۶ تيارلش ماشىنلردىن توشەدىگن سوولر افلاس ارىقلرنى سەسىتىپ يوبارگن. ايت اېگەسىنى تەنىمس بو تۇزىب كېتىن كېنتدە چۇنتك كېسەرلرنىنگ^۷ ھم آشىغى آلچى تورگن. اۇز ايشىنى قىلىپ، اولوشىنى^۸ آلىپ تۇرەدىلر. اۇغىرلىكنى بو بېردە اۇتە رواجلنگن بىر كسب سەسە ھم بۇلەدى.

۲

كېچەگىدە اېسىمدە؛ بەھارنىنگ سۇنگى آىى اېدى. كون اىسىگن چاغ، اویدە زېرىكىب نىمە قىلرمنى بىلمەى، دىققە نەفسلىكدن^۹ اىچىم تارلىك قىلىپ كۇچەگە

^۱ بېزارىلر: ناچۇبە خط حرکتلرى بىلن اجتماعى ترتىبىنى، كۇپچىلىكنىنگ تىنچلىگىنى بوزووپىلر، ھەمەنى بېزار قىلووچىلر؛ آتە بېزارلر.

^۲ اورچىماق: كۇپە يماق؛ كۇپل نسل يوزەگە كېلتىرماق.

^۳ ارچىماق: ارچىماق؛ پۇستىنى آماق، شىلماق.

^۴ اولاقىتىرماق: اوزاققە آتماق، تشلەماق؛ چىپىتىرماق.

^۵ موز قىماق: آىسكرىم.

^۶ كۇكت: اۇسىب تورگن اۇت-اۇلن؛ اۇت-اۇسىملىك، آش كۇك، سىزى. كۇكتلر سلقىن سووى: مېوہ سووى، آب

مېوہ.

^۷ چۇنتك كېسەر: كىسەبۇر، اۇغرى.

^۸ اولوش: حصە، بۇلك.

^۹ دىققە نەفس: زېرىكىش ياكە بې طاقتلىكدن نەفس نىنگ سىقىلىشى؛ بۇغىق؛ باسىلىپ، بۇغىلىپ، سىقىلىپ ياتگن.

چیقیدیم. سگریتلر نینگ كېتى اوزيلمەيدى. هاووريمنى^۱ باسئشگه باشقه نيمه هم قیلردیم؟ مثبت راق فایدھلى ایشلرگه قۇل بارمەيدى. كون راسه ايسيب باشلەگن پلله. بىردن هوا آينيدى^۲، قيسقه گينه ياغيب بېردى. همان كۇچەدە توريمىن. اوييمگه قيتمەدیم، اىستر-اىستەمس سروپسگه مينيب، بىر شەرلب كېلەى دېدیم اۇزيمچە. قرەسم كتە گوجوم شەر كۇزيمگه اۇزگچە منظره كسب اېتگن:

اوج كون آلدینگی مۇل ياغيشدن، شەر شلبا^۳. مۇترلر كۇچەلر نینگ افلاس سوويگه باتگنچە اۇمگن بېرىب، مسافر كشليك قىلىب، سوو سچرە تيب قتنشماقده. شىپتير ارەلش، بلچيق سوولر تاشيب، شەر يۇلكلر نى يايب تشلەگن. يۇلاوچيلر نىپە سىنى تورگنچە، بور نىنى اوشلب ناچار يۇليگه دوام اېتەدیلر. بىر «بالاسى بۇلمسە شودگارده قویروق نيله سين؟!». بونى قرەنگ، تۇقىز آى سوو كۇرمەگن دريانینگ ايگى تامانيدە يېرلشگن شەردە قۇل باله كېمەلر دنگ قىران سوو اوزره تينمەى سوزەيدى. سووسيز شەردە كېمە نيمە قىلسين؟ -دېيىم كۇزلريمگه ايشانمەى. يۇلاوچيلر سركنى كېسب اۇتیشلرى كېرەك-كو! ارا بەدن كېمە يسب پول تاپەياتگن كراكشلرگه مزە. چقان بالەلر آدملرنى يۇل نینگ او بېتىدن بو بېتىگه آلب اۇتیش حسايگه جرق-جرق پول قازانماقدهلر. ايش-يوموش بىلن شەرگه چيققن كيشى بىر مفصل حمام آلمسە اوييگه كېرە آلمەيدى. اوست-باشىنى يوويش آرتيقچە تشويش. شو احوالده كيشيلر يىللر-و، آيلر، هفتەلب، كونل امنيت سيزليك، مينگ درد و عذابدن ناتينچلر، آغير يشب كېلەدیلر؛ خودى، مستلردەى گرەنگ بىر قيافەدە اضطراب، تشويش بىلن حيات كېچيريشەدى. همەدن يامانى اۇزىنى پارتلەتيشەدى،

^۱ هاوور: ايسقلىكدن كۇتريلگن كوچليك، يىنگيل بوغ، حرارت، تفت.

^۲ آينماق: رنگ-توسى، صفتىنى يۇقاتماق، ايسكىرماق؛ اۇنگماق؛ بوزىلماق؛ صاف حالتى يامان تامانگه اۇزگرماق.

^۳ شلبا: سووده ايويب كېتگن، جيققە هۇل؛ شيلتە.

خودكۇش ھجوملىرى شەھردە دېيرلى ھر كون بېداد قىلىپ كېلەدى... تام معناده قوتقو^۱ حکمران.

۳

تقاعدگە چىققن قدم بابا خاتىنى چمن خالە، كېنجە اۇغلى بەھادر و ايگىتە نېورەسى بىلن اوزون ايللردن بويان شەھرىنىگ بىر چىتىدە يشب كېلەدىلر. بىر سيگرى، ايگىتە قۇيى، بېشتە تاووق و بىتتە خۇرانى حولىدە باقىب كون كۇرەدى. حاولى آرەدن دېوار تارتىلىپ ايگىگە بۇلىنگن. بىر ياغىدە مال-حالى، اوىنىگ كتھراق بۇلگىدە اۇزلىرى يشەشەدى. حولىدە تورلى-تومن گۇللر رنگ تۇكىب، كۇرك ساچىب تورەدى. اۇرتەدە كتھگىنە گىلاس درختى قد راستلېب تورىدى. سېر حاصل آلەمە، ناك، اۇرىك^۲، شفتالو، زىرەنە، بېھى آغاچلىرى گۇلگە بوركنگنچە^۳ جلوهلىنىپ تورىدى. گۇللر آرەلب اېسەياتگن سلقىن شمال اېپار^۴ ترەدى...

قدم بابا و چمن خالەلرنيگ اۇغلى بەھادر عسكرلىككە كېتگن، خذمتدن بۇشب ترخىص آلىب، اتە-آنەسى قاشىگە قىتېشىگە بارى-يۇغى اوچ آى و نېچە كون قالگن. اېرتەلب ساعت اۇنلر چمەسى اېشىك تقلالەدى. قدم بابا «-كىم بو؟» دېب دروازە آرتىدن بلندراق تاووش چىقىرىپ تۇنغىللەدى^۵.

- آوازىنگدن اۇرگىلەى بىرەمن، آچمەيسن مى اېشىكنى؟! -دېب جواب قىتردى. قدم بابا درواز پللهلرېنى كېنگ آچركن:

^۱ قوتقو (قوتغو): يامان ايشگە، يۇلگە اونداوچى، آياقلىنتىرووچى دعوت.

^۲ اۇرىك: زردالو.

^۳ بوركنماق: بىرر نرسە بىلن بېكىنماق، قاپىنماق ياكە قاپلنماق.

^۴ اېپار: بعضى حيوانلرنيگ، اساساً سىبىردە يشەيدىگن بىر خىل كىيىكنىگ جنسى بېزىدن آلىنەدىگن خوشبۇى مادە؛

شو مادەنىنگ و عموماً خوشبۇى نرسەنىگ ھىدى؛ مُشك.

^۵ تۇنغىللەماق: اۇز-اۇزىچە غۇنغىللىب، توشونىب بۇلمەيدىگن قىلىپ، غودورلېب گىپرماق؛ پۇنغىللەماق؛ ناراضىلىك

آھنگى بىلن قۇرس گىپرماق.

- اېى سن مى سن اۋرتاق، كۈزلرېمگە ايشانگېم كېلمە يېتى. قېسى شىمال اوچىردى سېنى بو ياققە؟ كۇرر كونىم بار اېكن، - قولاج اچىب قوچاقلشدىلر. قوبوق حال- احوال سۇرەشدىلر، - كىر اوىگە جۇرە، خوش كېلىب سن، - دېدى و خوش قرشىلەدى. بېرەم تاغە بېتابلىگى و كرونا باعث چمەسى بىر يىلدىن بېرى بو ياقلرگە قارەسىنى سالگنى يۇق. قىردان برادىردىن خبر اَلگن ھم يۇق اېدى. اېسكى دۇستلرنىنگ اىچىكىب^۱ ساغىنىشلىرى يوزەگە چىقدى. كۇرپەچەلر ياستەنر كىلر صحت قورە باشلەدىلر. تۇيىب گېرىب، يورەك زىگىنى كېتكىزىشگە نىمە يېتسىن؟! قىدم بابا دۇستى بېرەم تاغە اىكۇلان بىر پىالە اېرتەلبكى چاى اوستىدە او ياق بو ياقىن صحتلرنى يىنگى- يىنگى موضوعلر بىلن قىزىتە يېدى. گېنى اوزاقدن باشلەماقچى بۇلىب قىدم بابا:

- «بىر كېپ سن- دە اۋرتاق، عمرگە وفا يۇق، درىلشېب كۇنگىل چىگىلىنى بېچە يىلىك^۲، دم غنىمت» - دېدى دۇستى بېرەمگە يوزلەنىب. چمن خالە اېسە جىز- بىزگە تىارگرلىك كۇرىشگە توتىنر كىن، دسترخوان يازدى. اۋن دىققە اىچىدە بىقىنىدىن بىر تىنگچە سىرى كېتىگن كىتەكان سىرىق چاىنكىدە چاى دىلمب، اېسكى جۇرەلرگە تارتدى و توشگى تاماققە^۳ اورىنە كېتىدى. قىردان دۇستلر اوزاق- يىقىندىن سۇرەشېب حسرتشلىماق دەدىلر. توروش- توروشلرى نىنگ اېنى- بۇيىدىن سۇز اچىب، ابدان^۴ گېلىشە يېدىلر. گېنى سىقىب سووېنى چىقىردىلر چمەسى. جانلى صحت قورىشگە نىمە يېتسىن؟! اىتېب توگەمس درد و حسرتلر يورەكلرىدە قلەشېب ياتگن اېدى- دە.

^۱ اىچىكماق: كوچلى درجە دە كۇرىشىش، يېتىشى اشتىقايىدە بۇلماق، مشتاق بۇلماق؛ ائە- ائە ساغىنىب كىل بۇلماق (بالەلر حقىدە).

^۲ كۇنگىل چىگىل (چىگىل) نى بىچماق: يورەك اغيرىغىنى، اووشىغىنى ترقىتماق؛ كۇنگىل غىشىنى كېتكىزماق.

^۳ توشگى تاماغى: توش طعامى.

^۴ ابدان (اېدىن): راسە؛ بە تمام، بوتونلەى، مكىل صورتدە؛ جودە، جودە ھم؛ خۇپ.

قدم بابا اوزون بۇيلىك، قاتمەدن كېلگن، قيرە بورون، كېكىرتكى بۇرتىب چىققن راق، قاشلىرى اېگىك، چتتىق، چۈزىنچاق باشى بار، قاق سويك، قىرغەلىرى سىنھىلېب تورر، يوزلىرىدە چرچاق و ھارغىنلىك^۱ قلقىب تورر، قارنى اىچىگە تارتىب كېتگن آدم اېدى. شاشىب سۈزلەيدى، گىپىرگىنچە «ر» حرفى تىلگە توتقىش بېرمەيدى. ھەر نېچەدە يېلكەلرېنى بىر-بىر قاقىب قۇيەدى. جىكك كىنە^۲، اىجىر^۳ قدم بابا انچەدن بېرى اىچىدە يىغىلېب، اۋرھىلېب ياتگن آغرىقلىرىنى توكىب سالماقچى بۇلدىمى ياكە بىر نرسەدن كۈنگلى خىرە تارتگندىمى بىردن توتقەيىب كېتدى و اىچىدە گىلرېنى بىر-بىر توكىب سالدى:

- مېنگە قرە دۈستېم بېرەم! يوزلىرىمگە تۇر يوگورىب، تىشلىرىم توكىلە باشلەگنىگە انچە بۇلدى. ناتىنچلىك بېلىمنى بوكىب، رۇزغار سويگىمنى اقرتيردى - بىلەسن. مە ياشىم ائتمىش اوچدن نرىگە بارەيپىدى. قىرق بىر ياشىمدن بېرى بىر لحظە بۇلسىن تىن آلىب، آسودە اويقى يوزىنى كۇرمەگنمەن. انقلاب!!! فقط اورىش، اورىش، اورىش و قان توكىش! نىمە، بىز خلق اورىش و اۋلىش اوچون دىناگە كېلگنمىزمى، - دېب باشىدن قارەكۈل كلاھىنى يولقىب^۴ آلىب، بار كوچى بىلن بېرگە اوردى، - شو يىم حىياتىمى، اۋرگىلەمى يرەتگندىن بو نىمە كون اخىر؟! قىسى گناھىمىز اوچون قانگە باتىب يشەيلىك؟ - دېبە بىر چوقور آه تارتىب، آغزىنى يومىب، خۇرسىنگىنچە^۵ بورنىنى تارتىب قۇيدى و بىنگلرى بىلن كۇزلىرىنى ايشقەلەگن^۶ بۇلىب، حلقەلنگن

^۱ ھارغىنلىك: ھارىگن، چرچەگن حالت؛ ھارگىن اېكنلىك.

^۲ جىكك: جئەسى كىچىك، اىخچم.

^۳ اىجىر: آياق-قۇلى تېز، تېز حرەكەت قىلە آلەدىگن؛ اىپچىل، چقان.

^۴ يولقىماق: تارتقىب اوزىب آلماق، سىلېت تارتماق، يولېب تشلەماق، يولماق.

^۵ خۇرسىنماق: بىرار غم، تشوېش و شو كىبىلر طفىلى آغىر نىس چىقوماق؛ اوف اورماق.

^۶ ايشقەلەماق: اىكى نرسەنى بىر-بىرىگە سوركەماق؛ قۇل بىلن قىتىق باسىب سىلەماق، اېزماق

ياشنى اريتدى. چوقور آه تارتىپ بورىشيق^۱، تېرلپ تورگن يىلتىراق يوزىگە قۇل تارتىپ قۇيدى.

بىرەم تاغە ايسە بۇيچن^۲، يوزىلىرى اىچكرىگە چۇككن، سەھل تۇلەدن كېلگنراق، تۇشلى^۳، گودھلى، كۇزلىگى نىنگ^۴ تېپەسىدن تىكىلىپ قرەيدى، شوندىن كۇزلىرى خىرەلشگىنىنى يىلسە بۇلەدى. بىر آز بوكچە يىگن^۵، اجىن باسىپ كېتكن يوزلىرى بۇزەرىب تورر؛ پېشانەسى تىرىشگن^۶ آققىنە آدم. هر دايم ساقالىنى قىرتىشلب^۷ يورەدى. اېرن-قرن^۸ جان قولاغى بىلن حقيقى اورتاغى نىنگ سۇزلىرىنى تىنگلپ تورگن بىرەم تاغە تاماغىنى قاقىب، يۇتەلىپ خىرىللەگن تاووشىنى صافلەدى:

– كۇنگلىنگ بوزىلىپ، بىزاوتە بۇلە بىرەمە دۇستىم قدم، حق آيتەسن بىلىپ تورىمىن، نىمە ھم قىلە آلردىك، كۇپنى باشىگە كېلگن سودا اېكن؟! –دېب يورەگىنى كۇترگن بۇلدى. «تقدىرنى تدبىر قىلىپ بۇلمەيدى»؛ قاچىپ قوتىلە آلەيمىز، برى بىر يازىلگنى بۇلەدى، دېب تصدىق معناسىدە باش ايرغىتىپ قۇيدى. قدم بابا:

– شونەدى دېيسن-و، يېتىم، يېسىر، گۇدك، چال، كىمپىرلر، اۇق و بىمدن قانىگە قاوريلىپ اۇلە بېرسە، آز اېمس، كۇپ اېمس قىرق يىلدىن آشەراقدىر كە احوالىمىز شو! قارە بخت آدمىلر اېكنمىز برادر. نظرىمدە بىر آغىز آچگن، آذوقەسى انسانلر اېتى بۇلىپ قالدى-يو، سىرە تۇيمەيدى زمىن آدمىلر گۇشتىدن؛ مىنگ-مىنگ بىگناھ

^۱ بوروشىق: اجىن باسگن، بوروشگن؛ سووى قاچىپ قالگن، بوجمە يىگن؛ بورمە، قت.

^۲ بۇيچن: بۇلى، قدى بلند؛ بۇيدار، ناوچە.

^۳ تۇشلى: تۇشى، كۇكرەگى بۇلگن.

^۴ كۇزلىك: عىنك.

^۵ بوكچە يماق: بىلكەلرى چىقىرىپ، كۇكرەگىنى اىچىگە آلىپ اېنگىسماق؛ بىلىنى، كۇكرەگىنى كۇترە آلەمى اېنكەيىب

قالماق، قدى اېگىلماق.

^۶ تىرىشگن: اجىن باسگن.

^۷ قىرتىشلەماق: يىخىلىپ، تاب-تازە قىلىپ قىرماق؛ بە تمام، سىرە قالدېرمەمى، نك-توگى بىلن يۇق قىلماق.

^۸ اېرن-قىرن: تانگدىن انچە كېين، بە فرصت، اېنەغەنەن.

انسانلارنى ئىچىگە تارتىپ كېتىشى-كېتىشى. بو نېمە كۇرگوليك؟! كونى كېچە مەچىتىگە باردىم، تومنا تاملر تۇپلەنىشىگن اېدى. جماعت نمازىنى اۇقىشىدن بورون ملا وعظ قىلدى منبردن توريب.

- نېمە لر دېدى موللە؟ - سۇرەدى بېرەم.

- نېمە دېردى؛ «الله يۇلېدە جھاد قىلىنغىز، پارتلەتىنغىز، منە جنت اېشىكلرى شەرلرېمىزگە كېلىپ قالدى. نرىكى دىيادە سىزنى الله نىنگ مكافاتى كوتەدى. پېتىمىشتە دن حور و غلمان خذمتىنغىزدە بۇلەدى...» - دېگن گېلرنى ايتىپ، برچەنىنگ حسياتىنى قۇزغىب يىغلتدى. مېن اېسە حيران قالدىم، مىنگ يىللردن بېرى آتە-بابامىز مسلمان كېلگنلر خداگە شكر. مونداق گېلرنى بىز اېشىتمە گنمىز... نماز-نيازىمىزنى قىلىپ يورگن عادى بندەلرى بۇلگنمىز، -حىرتى اشىب، كۇزلرى چىققودېك بۇلىپ، غضبلە گىرىپ بېردى.

- توبە-توبە، اۇزى اسرەسىن بونقەلردن. بوندن بېش بدترىنى اېشىتسىنگ بىزىنىنگ محلەگە كېل اۇرتاق. نېمەسىنى اېتەسن؟ اويىمىز كويدى دۇستىم قدم، -دېب اېدى كە، قدم بابا دردداشى نىنگ سۇزىنى آغزىدى يولدى. گپ-گپگە اولەنىپ، توگەمسدن داستان كېيتىدن قىغولى داستان باشلەنىپ كېتەپىدى.

چمن خالە صفەچەنىنگ بىر چېتىدە اۇزىنى اېلىپ، قىمىر اېتمەى، جىم، قولاق سالىپ اۇتيرر، لېلرېنى سەهل-پل قىمىرلەتىپ قۇيردى. چمن خالەنىنگ دردى قۇزىب دۇرىللەگن تاووش چىقىرىپ يوم-يوم يىغلەپىدى. خالەنىنگ كۇرگن-كېچىرگنلرى بولرنىكىدن هم اۇتىپ كېتىگنە اۇخشەيدى. باشىگە توشگن اولىم-بېتىم، ماتم و مصىبتلرىدن كۇزلرى نىنگ تېگرەسى كۇكرىپ، اىچكرىگە چۇككن... ايكى سۇزىدن بىرى اۇغلى بهادرنى اۇپلتىرىش بۇلىپ قالگن. يەنە شوندن گپ باشلرمىكن دېسە، يۇق، باشقە نرسەدن گپ اچدى خالە. چمن خالە بىردن گپگە قۇشىلىپ، اۇتگن تون

كۈرگن توشىنى گېرە كېتدى. درد و الملىرى اېسىگە توشىپ، سۈزى نىنگ اداغىدە «يازىق!»^۱ اېكن شۇر پېشانم، -دېب قۇيدى.

تېلىنگ اغزىنگدە تېرەنىشگە توشدى خاتىن بىر نرسە دېماقچىمىسن؟ قنى گېر چى آنەسى، -دېبە خاتىنىگە سۈز بېردى قدم بابا. خالە، كۈرگن توشىنى منە بوندەى حكايە قىلدى:

- ايشانە بېرىنگ چال! مېن كۈرگن توش هر دايم اۈنگىدن كېلگن، -دېدى-دە، اوچمە-اوچ بۇلىپ تورگن آياق كىيمىنى ايرىم^۲ سنب، ياقەسىگە «توف-توف» لەگنچە كاووش پاليرىنى تۇغرىلىپ قۇيدى، -توش كۇرىمىن اېكن، توشىمدە حاووليمىزنى تۇلدىرگنچە برگ يازىپ تورگن ايلچە درختىمىز اياق بۇلىپ قىيغاس^۳ گللهگن مىش. حاووليمىز تۇلە قىزىل گلگە بوركنگن مىش. تۇلىن آى يالقىنلىرگە^۴ چەيلىگن گللىر بىرم اۈزگچە توس آلگن كە، ايتىپ ادا قىلە آلەمەسىز. چىرايىدن بغرى دىلنىگىز اچىلىپ، كۈزىز قوونب^۵ كېتەدى. قرەب، تېلمورىب اولرنىنگ الوان، قىزغىمتىر^۶ رنغلىرىدن تۇيمەسىز. كون اۈرتە اېمش، نېگەدىر كۈزلىرىمگە غلطفى راق كۈرىنەپىتى غاۈ گللهگن ايلچە درختىمىز. نىمە حكمت؟ -دېبە يقىندىن تىكىلەمن چىچكلىب كېتىگن ايلچە درختىگە. نى كۈز بىلن كۈرەى كە، ايلچە درختى نىنگ

^۱ يازىق: ۱. گناە. ۲. يايلىگن، اچىلگن، تۇشلىگن، كېنگ، اېنلى، يايىق. بو يېردە بخت سىز، يامان، قارەبخت معنادە يورىتىلگن.

^۲ ايرىم: بىرار مقصد، نېت بىلن قىلىنگن خرافى تىدىر (مثلاً، تۇيدىن يىخشى نېت بىلن بىرار نرسە اىب كېتىش؛ درد-بالانى قىتەرىش، زبان-زحمتدن، كۈز نېگىشدىن سقلش اوچون بىرار نرسەنى باشدىن اوگىرىپ تىشلش و باشقەلر).

^۳ قىيغاس: همەسى برابرگە، ياپپەسىگە، شىغە؛ عىنى، اوچى؛ جدې روشدە، قىتىق؛ شاوقىن-سورون، چوواس.

^۴ يالقىن: يانە ياتگن نرسەدن كۈترىلووچى النگە؛ ياروغ، ياغدو، شعلە، نور.

^۵ قوونەماق: خورسند، شاد كىفېتدە بۇلماق.

^۶ قىزغىمتىر: قىزغىش.

تنەسىدىن يوقارىگە قرەب اللە قىسى قارە قلىن چىگىرتكە^۱ سىمانلر اۋرمەلب بارماقدە. سان-سناقسىز قاپ-قارە چىگىرتكە سىمانلر اش-پش دېگونچە اَباق شوگىنە تۇپ-تۇپ بۇلىب اچىلگن درخت گۇللىرىنى يېب، يلمب تشلەدى. اَلچە درختىمىز يالانچالەنىب غرىب گىنە احوالگە توشىب قالدى. بىر پسدە كۇركى يولىنگن اَلچە اعاچى كاساودەى قارەيىب كېتىدى. قۇلىمگە سوپورگى اَلىب، ھى-ھى لب، زار قالگور سەسىق قارە حشراتلرنى قوويب سالەى، دېب تشلنەمن، فايدە قىلمەيىتى. اۋازىم بارىچە «ياردم قىلىلر!» دېب قىچقىرەمن. ھىچ كىم دادىمگە يېتمەيدى. بولر قندەى مخلوق، دېب قۇرقىب دغ-دغ تىترەيمن. اَلچە درختىمىز توگول حاويلىمىزگچە تۇلىب كېتىدى. نىمە دېگنىمنى اۋزىم يىخشى توشىنىب تورىبىمىن. جىن اورگور چاللىم نېگە اېشىتمەيدى؟ -دېبە اۋزىمگە سوال بېرەمن. تورىنگ چال! -دېب جانىم بارىچە بقىرەمن. چال قولاغىمگە «شىطانلەيپسن اَنەسى، تۇغرى يات»، -دېگن سۇز اېشتىلدى. بدنىم جونجىكىب، اويغانىب، سۇنگ اۋنگلەنىب قرەسم توشىم اېكن. «استغفرالله!»، اۋزىنگ اسرە تنگىرىم! -دېب جايىمگە اوزەلە توشدىم. يورەگىم تۇلىب يىغلەدىم. اۋنگىرىم^۲ بىلن كۇز ياشلرىمنى اريتدىم. اېرتە تورىب خدا يۇلىگە، دېبە ايس چىقىردىم و قوشنىلرگە ترقتىم.

۴

چمن خالەنىنگ بو توشى قدم و بېرەملر تاغەلرنى اۋىلنتىرىب قۇيدى. «ياپىرىم اى! بىر بلا بۇلمەسىن تىغىن» -دېگن خواطرلى گىلر خالەنىنگ اىچىدن اۋتەيپىدى. تىلىدن لاپ اېتىب چىقب كېتىشىگە سەھل قالدى. قدم بابا و بېرەم تاغەلرنىنگ قىسەسى ھلى بېرى توگەمەيدى... اولر اىكى يىلچە دىققەنفس بۇلىب، دردلرنى يازە اَلمەى

^۱ چىگىرتكە: تۇغرى قناتلىلر توركومىگە منسوب، قىشلاق خۇجھلىك اېكىنلىرگە ضرر كېلتىرووچى حشرات؛ بلاخۇر، باسقىنچى.

^۲ اۋنگىر: ۱. تۇن و چاپان نىنگ تىزەدن پىستىقى قىسمى. ۲. اۋىلگن، چوقور جاي؛ اۋىق.

يورگنلری باعث خودی مال بازارگه توشیب، سودالشیه یاتگنلرگه اؤخشب، هواگه قؤل سیلته شیب نوبتی بیلن گپ قاتماقدلر اېدی.

قویاش قیزیب کېله بیدی. ساعت توشدن کپین ایکی اېدی چمه سی. بیردن تیوی (تلویزون) برنامه سی تۆخته تیلیب، قوقیسدن^۱ ژورنالیست نینگ «شاشیلینچ خبر!» - دېگن اعلانلری تلویزون پرده سیده کوریندی. کپیتیدن اېسه:

- «حرمتلی وطنداشلر، بوگون ساعت ایکیده خدا و خلقیمیز دشمنلری قیز باله لر مکتیپده اولکن پارتلش صادر قیلیب کته فاجعه یره تدیلر. بو مدھش واقعه ده یورتیمیز نینگ کېلگوسی مېوه لری بؤلْمیش تۇقسانگه یقین ۱۶-۸ یاشگچه بؤلگن معصوم قیز باله لریمیز قربان بؤلدیلر. خبر تفصیلاتینی کپینگ کورستولرده اعلان قیله میز. صبرلی بؤلینگیز، تۆزیم^۲ بېرسین!» - دېیلدی مرکز تیوی ده.

بو خبرنی اېشیتب تورگن قدم بابا، بیرم تاغه و چمن خاله لر اونچه لر باشده عجب سینمه دی. سؤنگ بیر مونچه اؤتیب، «هر کونگی گپ، بیتمس-توگه مس داستان» دېیشیب، هیجاندن ایاق-قؤللری ساوویب، دانگ قاتیب قالدیلر. تلویزون پرده سیده کۆز کوریب، قولاق اېشیتمه گن دهشتلی منظره: یاش گینه مکتب قیزلری نینگ قؤللری بیر یاقده ساچیلیب یاتییدی، آیاقلری باشقه یاقده؛ اؤپکه، یوره ک، جگر، ساچ، کۆزلر، کاووش، مکتب قورال-انجاملری هر تامان تیتیلب کپتگن؛ و اېنگ دهشتلی سی قیزگینه لر نینگ ساچیلیب کپتگن تنه اعضالری، درختلرگه ایلینگن، وحشتلی بیر منظره...

۵

بۆلېب اؤتگن وضعیتدن چمن خاله نینگ گپیریشگه تیلی بارمه ی قالدی. آرهدن بیر کون اؤتدی. بیرم هلی یم شو یېرده دؤستی نینگ اوییده. ینه غم و غصه، درد و

^۱ قوقیسدن: هیچ کوتیلمه گنده؛ بېخواستدن، تۇستدن.

^۲ تۆزیم: کیشی نینگ قینچیلیک، کلفت، آغریق و شو کبیلرگه چیدم قابلیتی؛ چیدم، برداش.

حال قىلىنماقەدە اېدى. صحبت اوجىدن سەھل پىسە يىرکن، چىن خالە بىر پىيالە چاينى ھوپلەب تۇرىب:

- آتەسى! نىمە قىلەسىز اېسكى المىرنى تازەلەب، بەھادىرنى اۋىلىنگ بەھادىرنى! عمرگە وفا يۇق. كۆرەپىسىز امانت يىشب كېلماقەدەمىز. بەھادىرنىنگ ياشى اۋتۇزدن آشەى دەپ قالدى. بېش كۈنىم بارمى يۇقىمى، آرزو-ارمانىمنى گۇرگە آلىپ كېتەمىمى؟ بىلمەدەم. شۇنى آياغىنى چىتمەپىسىزىمى اېندى؟ بالىمىنىنگ تۇيىنى كۇرىب قالەى مېنەم آنە بۇلىب، -دېدى خالە.

شۇندىن سۇنگ صحبت چىن خالەنىنگ دەنگلىرىگە كۇچدى. آلدىندىن گېلەشىب يۇرىلگىن اۋىلنتىرىش مسالەسى تېزلىشەياتگىن بۇلدى...

قوتلۇغ نىگارنى كۇز تىگىگە آلىپ قۇيگىن چىن خالە اونى كېلىن قىلىشىگە اېندى عقلى پىتگىندەى. راضىلىكلردىن سۇنگ قودھلىك اېپلىرى باغلىدى. كېلىشىۋولر بىرلەياتگىن بۇلدى. اېندى بو ياغى تۇيگە تىردى. بەھادىر و نىگارلىرىنگ غايانە اونشتىرىش ايش و ماسملىرى بىتدى. يەنە بىر ھەفتەدىن كېيىن بەھادىر جىبەھدىن-عسكىرچىكىلدىن تۇيى اۋتۇزىشىگە كېلەدىگىن بۇلدى. آتە-آنە اىنتىقلىك بىلەن اۋغلى بەھادىرنى كوتەياتىرلر اېدى. عسكىرچىلىكىدىن بۇشمەدى، ماسمىگە قىتتەشىش نىنگىن علاجى بۇلمەدى.

قوتلۇق نىگار و بەھادىرلر مجازى تىرماقلىر آرقلى بىر-بىرى بىلەن يازىشىب، گېلەشىب، سېۋىگى-مىھبەت خىيالىنى سۇرماقەدە. بولر ھلى جانلى دەدارگە اېرىشە آلمەگىلر. خط و خىر، يازىشمەلر بۇلىب تۇرە بېردى. غىنەنى تۇسىقلىر سىب سېۋىگى شىرتىدىن قانىقىش يۇق... بەھادىر آتە-آنەسى، يقىنلىرى بىرىدە. ايككى ھەفتە اۋتەدى كېتەدى. بو ياغى، كۇرىب قۇيىلگىن تىارگرلىكلر آرتىدىن نوبەت ايككى قىلنى توتىشتىرىش، شادىانە كېچە، اۋيىن-كولگىلر لە تۇيىنى آمان-اېسان اۋتۇزىش.

حاويلى بىرنەسى ھەر تور بېزەكلەر ايله يەتتە قۇيىلدى. كويانو كېلىننىڭ يېقىنلىرى تۈپلەنىشكەن. تۇي بىلەن باغلىق مەركە - قۇناقلىرىگە ئاش تارتىش، ساوغەلەر بىلەن سېلىش و باشقە مەراسىم - بىجا كېلتىرىلدى.

تۇي اوجىدە. چىراق نورلىرى ائستىدە ايككى كۈنگىلنىڭ قاووشىش انلىرى اېدى. ھەممە شاد و خورسند. كوي-قۇشلىق، ياشلىرىنىڭ مىستانە كولىگى ساجىب، رقصىگە توشىشلىرى يورەك زىنگىنى يويىب كېتەيپدى. بىرچەنىڭ دوداقلرى كولىگى مەزەسىگە چەيلىگەن سىمان. حاويلى اىچىدە كەتە-كىچىك يوزدىن ئاشىق تۇيچىلەر، مەھمانلەر ھازىر و ناظر اېدىلەر. يىنگى كېلىن و كويانوگە اىلىق سۇزلەر، تىلك-اىستىكلەر ايتىلەيپدى. كېلىننىڭ آتە-آنەسى، قەدىم بابا، چەن خالەلەر نىگار و بەھادرلرنى اۈرتەگە ائلب اېسىدەلىككە عەكس آلەيپدىلەر. قەدىم بابا لېلىرىنى جەفتلەپ:

«اېككى قەدىرغاچكە اېزگو تىلك تىلەيمەن. فرزندلرىمىزنىڭ رىزقى بوت،¹ دىستىرخوانى تۇكىن بۇلىسىن، آمىن... عەمىرلىرى اوزون بۇلىسىن خدائىم» -دېدى. چەن خالە سېۋىنچى اېچىگە سىغمەي بەھادر و نىگارنى بىرىگە آلب، يوزلرىدىن چولپ-چولب اۋپدى.

سۇزلەر ايتەر-ايتىلمەس بەھادر و نىگارلەر تورگەن ايوان ائستىدە گەرمىللەگەن مەھش پارتلىش يوز بېردى. اۋيىن-كولىگى بىردىگە عزا-ماتىمگە ائلىندى قالدى. كېلىنلرنىڭ يىرىدىن كۇپى نابود بۇلىشىدى چەمەسى. قىامت قۇپدى دېپە و بىرىنگە. بىغىب، تېرىب آردەي احوال اېمىدى. يانىب تورگەن چىراقلەر اۋچدى. تۇيخانەنى قاپ-قارە تون چولغەدى. جانىنى ائلب قاچىگەنلەر بۇلگەندىر... بىراو-بىراونىڭ غىمىدە اېمىدى. عىن دەمە شەرىنىڭ باشقە نەقتەلرىدە، ولايتلەر و بوتون يورئدە قىچەدىن قىچە پارتلىش بۇلەياتىگەن، كىم قىچە انسانلەر قانى يېرنى قىپ-قىزىل قىلىپ تىشلەياتىگەن يالغىز اۈزىگە عىان. بىر قرەگەندە بو اۋلىمىستان يورئدە عاددى واقەگە ائلەنىپ قالگەن

¹ بوت: تۇلىق، ھىچ قەدەي كەچىلىگى يۇق؛ بېكەم و كاست؛ يېترلى؛ تاامىن اېتىلگەن.

شوندەى ماتم كونلرگە، ملهم بۇلگوچى ھېچ كيم قالمەگنى شو دەشتلى پارتلشدن عيان بۇلدى ابدى. امان قالگنلر جان ھاووچلب قاچاقده ابدلر...
 اوچ كون اوتىب قىرستان سرى يۇل الدېم. گۇر اوستىگە گۇرلر قزىلب، مزارستان كېنگەيب، قىرلر كۇپەيب كېنگن. قىرلر اوستىدە تىكىلگن قىزىل توغلىرىنىڭ^۱ ھىلىپىرەشىدن ساووققىنە تاووش ىنگرەياتگندەى گۇيا. رزم سالىب قولاق اسگنلر خودى مەيىن ىنقىراق، آه و نالە، داد و فرىادلرنى اېشىتىشەياتگندەى. قىرلردەگىلر نظرىمدە گۇردن باش كۇترىب تورگن كى. زمىن اوستىدەگى رنج و عقوبت ىر اوستىدەگىسىدن كم اېمس.

قرەسم سۇل تامانىمدە قطار كېنگن ىنگى قىرلر تورىدى. ھە، تۇغرى تاپىب كېلەمن اېكن... اۋشە-اۋشە مەكتب قىرلرلى مزارى... اېسىزگىنە قىزەلاقرلىنىڭ قىرلرلى اوزرە قىزىل يىلاولر^۲ تىنمىسىز ھىلىپىرەيبىدى. تۇقسانگە يقىن ياش گىنە قىزلر، بالەلر ياپەسىگە^۳ ھلاك بۇلگنلر... ىر زوم سكوت قىلدىم. آياق اوستىدە تېورەككە كۇز سالەمن. ىورەگىم تۇلىب ىيغەلى دېسم كۇز ياشىم كېلمەيدى. اېچىمدە سوال اوستىگە سوال. قنى سۇراقلىرىمگە جواب؟ بو قىزەلاقرلىنىڭ قاتللىرى كىم؟ اۋلگن گۇدكلردن سۇرەسم جىملىك. ساكن، ساووق قىر اىستىدن جواب كېلمەيدى. باشىمنى چىنگىلەگنچە كۇز اوزمىسدىن كۇككە اوزاق تېرىمىلەمن^۴. يولدوزلرلىنىڭ تونلرلى تىنمەى جىمىرلىشى^۵-ىو، آنە زمىنگە قرەب تورىب جىلمەيشلرلى^۶ حسابگە آلىنمىسە، او ياقدىن ھم ىعىنى اسماندن جواب يۇق... چېكىسىز كاىينات و ماوى

^۱ توغ: بىراق، عەلم، يىلاو.

^۲ يىلاو: بىراق، توغ.

^۳ ياپەسىگە: ھەمسى ىر يۇلە، ھەمسى ىردن؛ بوتونلەى.

^۴ تېرىمىلماق: كۇز اوزمىسدىن اوزاق قرەب قالماق، تىكىلماق؛ امىد بىلن، ىررر اېچكى حسىيات بىلن باقماق.

^۵ جىمىرەلماق: مىدە تۇلقىنلر بىلن قاپلىنماق، موج اورماق؛ مىلتىلېب كۇرىنماق، جلوه قىلماق.

^۶ جىلمەيماق: تېسىم قىلماق.

آسمان هم يېتيم باله كىي يالغيز تشلب كېتىلگندەي گۇيا. زمين آتلميش بارلىق نېنگ سۇلېم بغرىده بيزمى فقط تنھا؟! دېيىمن اېچىمدە. باشقە سيارەلردە هم قارە كونلر بارمى، يۇقمى؟! او هم حاضرچە بيزگە قارانغى. شونيسى معلوم كە، يېردە بختلى يشە يانگن بار! بختلى يشمە يانگنلر اېسە سان-سناقسىز.

شوندەي قىلىب، نگار و بهادرلر نېنگ تۇيى، آرزو-ارمانلرى، سېوگى-محبت چۇغلىرى منگو اۇچدى. يىنگى اوى قوريلمەي-ياق، توبنگە چۇكىب كېتدى. آرزو-اېستكلر قارە چىگىرتكەلر باسگن اليچھلى حاولىنى اېمس، قېرستاننى بېزە تيب قۇيدى. اولر بختنى قوچماق اوچون دىياگە كېلىشگندى؛ قارە كونلر و قېرستاننى ساغىنىش اوچون اېمس.

(قەيتە ايشلنگن ورنىتى)

۲۰۲۱/۶/۲۰

تورانئو، كانادا

يرمىمنى ايزله يمن

يرمىمنى ايزله يمن

كېلىنگ باشدە ۋزىمنى تىنىشتىرەي. مېن دوكتور ھولكر سىنىشتە بۇلەمن. حياتىم نىنگ شوگىنە يشىل فصلىدە، يقىن-يقىندە باشدن كېچىرگنلر يمن نىنگ بىر قىتىمىنى^۱، بىر شىنگىلىنى^۲ حكاية قىلىپ بېرەيىن؛ دردلر يمنى بىر يازغىرەيىن، دېدىم. بو گېلرنى اويىمدن، ايش خانەمدن، يقىنلر يمن، دوستلر يمن دورەسىدە تورىب گىرەياتكىم يۇق. ۋتە آغىر فضا آستىدە، ساووق، جودەيىم جومباقلى، ساكن و قۇرقىنچلى بىر مكاندن تورىب، اىچ درد يمنى سىز بىلن بۇلىشەيىم.

اېر-خاتىن اىكىمىز ھم دوكتور بۇلىپ شفاخانەدە ايشلەيىمىز. قىش آلدى ھوانىنگ كېسكىن ۋزگرىشدن كسللرنىنگ سانى آرتىب بارماقە اېدى. شفاخانەمىزدە، دوكتور يېتىشمسلىگى بىلىنىپ تورەدى. معاينە خانەمىزگە؛ حتى كە، اويىمىزگە ھم كسللر كېلىشى نىنگ كېتى اريمەيىدى. ايش ساعتلر يمن كۆپەيگن آنلر اېدى. دوكتور تېمور سىنىشتە نىنگ ايشى ۋتە آغىر، او جراحلىك قىلەدى. مېن اېسە بالەلر دوكتورى من. انترېت صحىفەلر ينى آرەلب، جھان ايوانى طبابتىدە يوزە بېرەياتگن ينگى ليكلر، واقە-حادثةلرنى ۋقىب بارەمن. «كويد-۱۹» دېگن بلا دنيا

^۱ قىتىم: بىرار نەنىنگ بىر قتلگن قسى؛ كىچىك بىر قسىم، آزگىنە.

^۲ شىنگىل: اوزوم باشى نىنگ بىر قنچە دانەدن عبارت شاخچەسى؛ بىرار نرسەدن قسىم، آزگىنە، بىر آز.

يىڭى ليكلرى نىنگ باشىدە. عامهوي يېتكىرمەلرنى بند قىلىپ توريىدى. مجازى تىرماقلردە قرەمە-قرشى معلوماتلر بارگن سىرى تۇلقىنلىنىپ، تۇر يايە باشلەگن بىر پىت اېدى. چىندىن دىنيا بۇيىل بو وىروس يىشىن تېزلىگىدە ترقه لىب بارماقدە اېدى. بىز اوويدە عايىلە بىغرىدە اېدىك. اېندى ادىملر آرەسىدە: «اۋلت ترقه باشلىتى، وىروس ختايدىن^۲ كېلىتى اېمىش! اوزاق-يىقىنلردە انسانلر توتدەى تۇكىلىب اۋلەياتگنمىش»- دېگن دوو-دوو گېلر يورە باشلەگن كېزلر اېدى. دوكتورلر اللەقچان مسألەنى توشىنىپ، مەممانىنگ تگىگە يېتگنلر. عادى ادىملر آرەسىدە قۇرقوو اورچىگن، وهىمە قۇزغالان سالماقدە. كىم دىر اوندەى، كىم دىر بوندەى دېشەدى. اىكىمىز هم اوويمىزدە چقىرىلمەگن قارە مېمان گىپىنى بىلگنلر يىمىزگە تىەنىب داستان قىلدىك...

شفاخانه دن قۇنعىراق قىلىشىدى، اىرىم جواب قىلرکن دقت بىلن اېشىتدىك... كىسلخانىمىزدە يوقىملى، خوفلى كىسلىك كون ترتىبىگە چىققىنىنى خبر قىلىشىدى. ضرور چارە-تدبىرلر كۇرىش كېرەكلىگى ھمدە اېرتەگە علمى مجلس بارلىگىنى ايتىپ، بر وقتراق ايشگە كېلىشىمىزنى سۇرەشدى سىم قاققن تامان^۳.

اېرتەسى غىز اېتىب باردىك شفاخانه گە. علمى كىمىسىوندىە موضوع تېورەگىدە گىپىرىلدى... كون بۇيى كىسل كۇرەمىز. نظرىمدە چىق-چىقلىق تورگن ساعت مىللىرى چىرچاقدن زۇرغە سودرەلەياتگندەى گۇيا. اۋشە كونى هوا ساووق، آسمان اوزرە قاپ-قارە قلىن^۴ بولوتلر سوزەياتگندى. قوياش نىنگ آندە-ساندە بۇزرىشىدىن فايده يۇق. اىنجىق ھوانىنگ طعمى قاقچىب، تومشىغى آسىلەنىپ، كون ابدان ساووى

^۱ اۋلت: آدم و حيوانلردە اۋلت تىپاقچەسى قۇزغىتە دىگن اۋتكىر يوقوملى كىسلىك؛ كۇپلپ ياكە ياپتەسىگە اۋلىمگە سىب بۇلە دىگن كىسلىك، مثلاً، وبا.

^۲ ختاى: چىن مملكتى.

^۳ سىم قاقماق: قۇنعىراق قىلماق، بىراوگە زنگ، تىلفون قىلماق.

^۴ قلىن: كۇندەلىك اۋلچمى كىتە؛ بىر-بىرىگە جودە يقىن جايلىگن، زىچ، تىغىز؛ توتش خالتى، قويقۇ؛ كۇپ، مۇل.

باشلەنگن پېتلر اېدى. تېرىكچىلىك آدملىرى تىن آلىشگە مجال بېرمەپىدى. دەلىزەدە بېتابلنگلرنىنىڭ ياقىمىسىز اينىراق تاووشى اېشىتىلەدى. بالەكى لرنىنگ قىي-چوو آوازى، خاتىن-خىلچىنىڭ غاۋور-غورور گېلىشىسى ساكنلىكىنى بوزىب يوبارگن. كىسلىكىدىن ھەم كۇرە كىمىللىك، ناچارلىك بېمارلر يوزلرېگە قلقىب چىققىنى بېلىنىب تورىدى. خىيالىمدە كىسلر: «دوكتور آپە! اول قارنىمنى تۇغىزىنىڭ، كېىن كىسلىمىزنى دولانگ» -دېيە ياتگندەى. يورەگىم غىش تارتەدى بو منظرەنى كۇرىب. اىچ بوروغ، تاشمە^۲، توماۋ^۳ اوشلەنگن كىسلر كۇپراق كۇزگە چىلنەدى. قۇلىدە ياش بالەسى، كلتە-كلتە يۇتلە ياتگن خاتىنلر صفى اوزون. اىسىغى چىقىب، نفس آلىشى قىيىنلىشگن بېمارلر ھەم كۇپەيە بارماقەدە اېدى. بوتون ولايتدە اولىم اۋز كۇلنكەسىنى سالىب تورىدى، آدملىر آرەسىدە تىلفاتلر بار...

ايشدەمىز، انچەگچە قالدېك شفاخانەدە اۋشە كونى. ايش ساعىتلرېمىز آشگن، خىدمت قىلىب تورىمىز ھەر حالەدە. بىر ھەفتەگە بارمەى وضعىت كېسكىنلىشىدى. احتىياپ چارەلرېنى كوچە تېرىگن بىر رژىمدە كون بۇى كىسل كۇرەمىز. كىسلر: «دوكتور آپە نىسخە يازىب بېرىدىنىگىز، اېندى دار-درمان پولىنى قېردن قىلەلىك؟!» -دېگنچە بېزەيىب، دادلب بۇزرىشەدى. قوباش باتىشگە بىر ساعىتچە بار اېدى ھلى. بۇساغە ھىتل، تشقىرېگە چىقىشىم بىلن شەردە تونىكە^۴ اىدىشلردە اىسرىق توتەتىب، پول تاپە ياتگن بالەلرگە كۇزىم اىلىندى. عىجب بىر حال! تۇقىز-اۋن ياشلر چمەسى يوپون كىيىنگن بىر بالە كېلە سالىب، توتب تورگن اىسىرىغىنى تېگرەمدن اىلنتىرىب،

^۱ اىچ بوروغ: يۇغان اىچكىنىڭ يىللىغلىنىشىدىن عبارت آغىر يوقوملى كىسلىك؛ يورەك بوروغ.

^۲ تاشمە: تشقى تائىر ياكە اىچكى سىبلر نىتىجەسىدە بىدندە، شىلىق پردەلر پىدا بۇلەدىگن خال-خال داغلىر، پوقكچەلر، چىقىقلر.

^۳ توماۋ: ساواقاتىش، الرژى طفىلى بورون شىلىق پردەسىنىڭ يىللىغلىنىشى و بونىنگ نىتىجەسىدە بوروندن سوو آقىش كىسلىگى؛ رېزىش.

^۴ تونىكە: ھلى، مېتل تورلرېدىن بىرى.

«خدا يۇلىگە بېرىنگ بىر نېمە، ايسىرىق مىنگ دردگە دوا، اسپند بلا بند» -دېگنچە مېنگە تامان قۇلىنى چۇزىب تورىدى. تنگە-تونگە اوزىش ايلىنجىدە باشقە ايسىرىقچىلر ھم ياپىرلىشىپ^۱: «مېنى آدمىم، بو مېنى آدمىم نرى تور» -دېپە بىر-بىرى نىنگ كۇكىسدىن سورىشردى. بالەلردن بىر-ايكىتەسى: "منە بو یم ماسك، ماسكنى قۇچقارى مېندە-كو! آلىنگ-اي، آلىب قالىنگ كروناندىن اسرەيدى سىزنى؛ آنم يىنگى تىكىتە، كرونانى تومشىغىدىن آسمەى قۇيمەيدى» -دېپە قىچقىرىب تورىشىدى. حالدىن تايگن^۲ درجەدە چرچەگنمن. ايشدىن اوبگە قىتىشىم كېرەك اېدى.

كىچ پىت ساعىت سگىزگە يقىن مېن تورموش اۋرتاغىم دوكتور سېنىشتە بىلن خىرلەشىپ، اوبىمگە قىتىپ كېلدىم. دوكتور نوبىتچى بۇلىپ شفاخانهدە قالدىلر. قەياققە قولاق آسمىگ يىنە اۋشە-اۋشە «كرونا»، «ختاى وىروسى» -دېگن گپ-سۇزلر تىللردە داستان. كتە-كىچىك نىنگ آغزىدە شو گپ. كىشىلر تلوزىيون قرشىسىدە ياتىپ آلىپ، بوتون دىئاندىن خبر تىنگلەشر، اېشىتگنلىرىنى باشقەلر بىلن بۇلىشر، بو خبر تۇغرى، او ناتۇغرى دېگن تارتىشولى گپلر راسە قىزىگن بىر پىت. كىمدىر قۇرقىب ھىمە قىلسە، يىنە كىمدىر «اسرەسە بلا يۇق، اسرەمسە پناە يۇق!» دېشىردى. ھمە ھدىك سىرەب يشەيدى. آدم اۋز سايەسىدىن قاچەياتگن كونلر كېلدى باشلرگە...

اېرتەسى شاشىلىنچ شفاخانهگە كېلدىم. ايشخانەمگە قىرىلەيپكن اېدىم ھم كە، جانىم جىمىرلەپ، سېسكەنىپ كېتىدىم. عمرىمدە بىرىنچى بار تابوت كۆرىشىم اېدى. اينىقسە ايكىتە اۋلىكنى بىر پىتدە شفاخانەدىن آلىپ كېتىشلىرىنى كۆرىپ، بوتون وجودىمنى قوتوغو^۳ چولغىب آلدى؛ قۇرقوۋگە توشدىم. بوندەى يوقوملى كىسلىك آدم

^۱ ياپىرلىشماق: كۆپلىشىپ، گلە بۇلىپ كېلىپ باسماق؛ ھجوم قىلماق؛ كۆپلىشىپ كېلىپ توشماق، يايىلىپ ترقلماق.

^۲ حالدىن تاىماق: تىنكە-مدارى، سىللەسى قورىپ، اۋلر حالتگە بىتماق.

^۳ قوتوغو: قىتىق؛ نېرىگە، بىرەر نرسەنىنگ تېگىشى، قىتىقلىشى طفىلى يوزەگە كېلەدىگن عىبى سېزگى.

تئلّمەيدى اېمسمى؟! غفلتدە قالدېنگىمى اونىنگ توزاغىگە ايلىنىپ، تايىب يىقىلەسن. اۇنگلەيشىنىگ آسان كېچمەيدى... سۇنگ كېچ بۇلەدى كېين.

اويىمىزدە اېدىك، همان كوچەيتىرىلگن بىر رژىمدە ايشلب كېلماقدەمىز. بىر ھفتە اوتر-اۋتمس اېرىم دوكتور سېنىشتە اۋزىنىگ بېتابلىگىنى آيتدى مېنگە. يورەگىم شوو اۋتېب، رنگ و قوتىم اوچىب، قۇرقىب كېتىدىم، يۇغ ابى؛ كۈرىنىشىنگىز يىخى آتەسى، -دېدىم ايشانقىرەب^۱. و دراۋ آلە سالىب ايسىغىنى اۋلچەدېم، قرەسم ترما متر ۳۹ درجەنى كۇرستەپىدى. اىچىمگە شېهە يوغورىب، ھېجان بوتون بدنمنى چولغب آلدى. ايسىتمەلبسىز اۋتېب كېتەدى، دېپە بىر پىالە موزدەى سوو كېلتىرىب، پراستامول اىچىردىم. نې كۇرگولېك! قېسى تىل بىلن آيتەى كە، كۇپ اۋتمەى شېهەلرىم حقىقتگە آيلندى. ھە، قورىب كېتگور كرونا، ھە كرونا! تىست قىلىب انىقلەدىك بو آتى اۋچگورنى. دوكتورىمىزنى اوشلدى اېكن كرونا. اېر-خاتىن ايكى دوكتور بىر بۇلىشىب، درحال قۇشىمچە احتياط چارەلرىنى كۇرە باشلەدىك. دوكتور سېنىشتە كېچىكتىرمىسدىن قرنتىن رژىمىگە اۋتدى. قوياش تېگەدىگن بر ھوا بىر خانەدە جاي سالىب، سوپوقلىك بېرەبېردىم. كۇكتلر، زېرە، دارچىن، جىنىسىنگ، زعفران، زنجبىل، ايسپرک، شىرىن مېيە^۲، لېمو، قلمپىر، انگىز^۳، مرچ، رىحان، عسل، قاو، يلىپىز^۴ و جايىگچە غملەدىك. اوزلوكسىز پرھىزانە آش-قتىغ بىتكىزىب توردىم كسلگە؛ كېتىنى اوزمىسدىن دارى-درمانلرنى بېرىشنى ھم زۇرەيتىردىم. نىمە قىلىسم ھم تاثير قىلمەپىدى. اېرىم ايسىتمەدىن دىر-دىر تىتر اېدى، يىخى بۇلگنى اۋرنىدە

^۱ ايشانقىرەب: بىر از ايشانىب، ايشانگندەى بۇلىب.

^۲ شىرىن مېيە: دوكتلر عايلەسىگە منسوب، ايلدىزى صناعت و طبىياتدە ايشلەتېلەدىگن كۇپ يىللىك اۋسىملىك؛ قىزىل مېيە.

^۳ انگىز (انغۇزە): ھىدى سەسىق تاغ اۋسىملىگى، دارى اوچون ايشلەتېلەدىگن گىيە.

^۴ يلىپىز: طبىيات، عطارلىك و اذىق-اوقت صناعىتدە ايشلەتېلەدىگن، سەبرگ خوشبۇى كۇپ يىللىك اۋتسىمان اۋسىملىك.

كون ساينن آغىرلشە باردى. بوتون عايله ميزنى اضطراب اۋز شكنجه سىگە آلگن آغرىقلى دملرگە قارىلگنمىز. آتە-آنەلر يىمىزگە خبر قىلىشگە كېچىكدىك؛ اولر قىشلاق، آلسىدە تورىشەدى. بالەلرنى محافظتى كتە ايش بۇلدى مېنگە. شفاخانه بارەيمى، بالە-چقەگە قرەيمى؟ بىر جانىم بىلن قى ياققە چاپرىمنى بىلمەي قالگنمن...

تۇرت قېتلى اوپلردن بىرىدە يشەيمىز. وضعيتدن گمانلنگن قۇنى-قۇشنى بىزدن چىركنە باشلشدى. همه نفرت آرەلش شېهەلنىب قرەشەدى بىزگە. قۇلیمىزنى كۇكسىمىزدە توتىب معاملە قىلەمىز. محلە داش، قۇنى-قۇشنىلر يىمىز مېندن آينىقسە دوكتور تېمور سېنىشتەدن شفا تاپگنلر. هر بىرى نىنگ دردېگە درمان بۇلگنمىز. باسقىلىك بىلن وضعيتنى كىتروول قىلىشىمگە قرەمەي، قۇشنىلر يىمىز «بولرنى كرونا اوشلە گنمىش...! كۇچسىنلر، دپ بۇلىشىسېن بولە!» -دېب يورىشىدى. اولر نىنگ «چىقسىنلە، كۇچسىنلە، بو بىردن كېتىشىسېن بولر! شوم اياغ اېكنلە! بۇمەسە...» - دېگن دغدغەلرى اۋجىگە مىنگن. آغىر بىر احوالده تۇشكده مىخلنىب ياتگن اېرىم دوكتور سېنىشتە نىنگ دردى زۇرەيدى. كرونا كسل نىنگ مغدىرىنى قىيە باشلەدى. قۇشنىلر نىنگ مشمشەسى يره اوستىگە گزەك بۇلىب توشدى. اطرافدە گى احوالنى كۇرىب-بىلىب تورگن دوكتور نىنگ يوره گى چۇكدى. «بولر كۇچمەسە، كۇرىبە- تۇشگىنى كۇچەگە آتەمىز» -دېگن پۇپسەلر يىنگرەب تورىدى. باشىمىزگە خۇدئ آسمان قېپىشگن دەي گۇيا. كۇكدن لعنت يامغىرلىرى تىنمەي قويىلە ياتگن سىنگرى بىر حالت حكمران اېدى.

... خىرىت. وضعيتدن خبر تاپگن چېت اېل تشكىلاتلرى بىزگە ياردەم قۇلىنى چۇزىشىدى. شاشىلىنىچ چارە-تدبىرلر كۇرە باشلەدىلر. آذىق-اۋقتىمىزنى يېتكىزىب تورىشىدى. دارىلر و كېرەكلى چارەلر هم مھيا بۇلدى. حتى، اويىمىزگە جھازلر آلىب كېلىب، اكسىجن بىلن هم تامينلشدى. «اۋزىنگىزنى باي بېرىمىگ دوكتور، بىنگىل

كېچەدى، حياتگە اميدوار بۇلىنكلر» - دېب كۇنگلىمىزنى كۇتريشدى كون باتردن كېلىشگن مېرھبانلىك تشكىلاتىگە علاقه دار شىخصلر. دوكتور تېمور سېنىشتە گېرىشگە تىلى ايلنمەيدى. اونگە هوا يېتمەيدى. اۋزىم انگلىسچەلب سۇراقلرىگە جواب بېرىپ تورىمىن. ايسىغى توشىپ، كۇتريلىپ تورەدى. دوكتور سېنىشتەنى ۴۰ درجە تنە ايسىقلىگى قاوجىرەتېب بارەياتىر اېدى... اويمىزده كرونا كىترولدن چىقدى. وىروسنى قى يېردن يوقتىرگىنى بىلمەيمىز. كېتمە-كېت دارى بېردىم، بىر پس اۋتېب، ايسىغى ۲ درجە توشدى. بىر اۋزىگە كېلىپ: «اچىمده كېچەياتگن جريانلرنى گېرىشدىن عاجزمن هولكر. حياتده اېنگ آغىر آغىر قىرنا آغىغى بۇلسە كېرەك. اېت و سويگىمى قىيمەلهگىچدن اۋتگزهياتگندېك، تىمدە درد توبەمن» دېيە اېزىلىپ گېردى دوكتور... اۋزىمنى زۇرغە توتىپ تورىمىن.

مېن حمایه چارهلرینی كۇرىپ، یریم كاسە سوپوق آش اچىرەى دېب الدیگە كىردىم. دوكتور سېنىشتەنىگ كۇزلىرى جىققە ياشگە تۇلدى. دردلرینی تىلى اېمس قرەشلىرى آیتەيپىدى. اونىنگ محبتلى كۇزلىرى سۇنىق^۱، اۋتە سۇلغىن^۲، اچىگە نورەب بارەياتگن دەى. كۇزلىرى اچىق ياشگە تۇلگن دوكتور سېنىشتە «هولكر! نخت كه مېن بو ياروق عالمى ترك اېتسم، نخت مىنگ بىر چىچك آرزو-اميدلریمنى گۇرگە آلیب كېتسم، نخت!!» دېدى مایوس آھنگدە مېنگە قرەب. اچىمده يىغلب، دردىمنى زۇرغە يوتىپ تورىمىن. كۇنگلىگە مدار بۇلەيىن، دېب تىلى بېردىم. بالەلرېنگىز ساغىندى، تېزلىكدە نصیب بۇلسە گل دەى بۇلەسىز. ینە ھمیشەگىدېك جان و جگرلریمىز، دۇستلر و اۋرتاقلرېنگىز بىلن تۇپلەنىشىپ، يىخسى كونلرنى خوش قرشیلەيمىز، دېب يوپتماقچى^۳ بۇلدىم.

^۱ سۇنىق: اۋچىق، سېنىققن، سۇلغىن؛ حرارتى، قۇرى كېتگن؛ بۇغىق، حزىن.

^۲ سۇلغىن: سۇلىق؛ اۋزىنى الدىرگن، سېنىققن، رنگى كېتگن، قوتى اۋچگن.

^۳ يوپتماق: يىغلىشدىن تۇختىماق؛ آووتماق؛ قىغو-المىنى يېنگىللىتىشگە اورىنماق، تىسكىن بېرماق.

اويىمىدەن... سۇنگ مېن قازان-تباقلرنى يووهى، دېب آشاخانهگه باردىم. بىر و كۇك جاي بېرمەپىدى. خانەمگە كىرىپ آلدىم. ناچارلىكدن يورهگىم تۇلىب يىغلهدىم؛ كىملىگىم كېلدى. قۇلىمدن ھىچ نرسە كېلمەياتكىنمىن اوكسىندىم. وضعىتگە داش بېرەلمەى، سېزدىرمىسدىن اوينى ترك اېتدىم. آچىق ھوادە بىر پس آيلندىم، سۇنگ اويىمگە قىتىپ كېلدىم، خانەمگە كىرىپ، يەنە تۇيىب-تۇيىب كۇز ياشى قىلدىم. اويىمىز انجالملرى تىلگە كىرگندەى، بىر ناخوشلىكدن درك بېرىپ توريىدى نظرىمدە. خانەلر ھواسى بۇغىق و آغىردن آغىر؛ ساكنلىك چۇككن. بويوم-انجالمىمىز نوحە قورىپ، عزا توتەدىگندەى گۇيا. اۇلىم دېرژەدن تىشلىرىنى شقىردەتتېب توريىدى. حيات آيرىلىق كويىنى چلەياتگن مثال. دوكتور سىنىشتەنىنگ كۇنگلى چۇكمەسىن دېيە، يوزلرىمگە تۇر يايگن مصىبت شرىپلرىنى يىشېرىشگە اورىنەن. ھلى دوچ كېلمەگنىم قارە كونلر مېنى سۇراققە توتەياتىر اېدى. كېلەجك مېنگە ھلى قىدەسن...؟ دېيەياتگندەى. بو جمعىتلردە اينىقسە يتىم بالەلى خاتىن ذاتى بختىلى يشب كېتىشى ممكن بۇلمەگن ايشلردن اېسمى؟! يامان كون كېلمەسىن، دېيىم. اگر بىر كار-حال يوز بېرسە بارمى... قدر و قىمىتىم سىنىب تمام بۇلەن. بلكە كىمگە دىر كېرەك بۇلرمن، ھە كېرەك! كېرەكمن فقط اېرككلرنىنگ قوچاغىنى ايسىتىش، لحظهلىك شەھوتىنى قاندىرىش اوچون، اېرمك اوچون كېرەكمن... يتىم بالەلرىم چى؟... قالگن عمرىم مېنى خودى شىكنجەگە سالەياتگندەى. خياللىرىم، ھلى بولر حلوا! -دېدى مېنگە... دردلرىمنى اىچىمگە يوتەن... «اۇلىب-اۇلىب تىرىلەن» دېگنلرى شو بۇلسە كېرەك. دوكتورنىنگ جانى مېنىنگ اىچىمدە. بو جان اىچىمدە ساويمەسىن دېيىم؛ بو جان كۇز اۇنگىمدە بەتمام اوزىلىشدىن قۇرقەن... مېنى امىدسىزلىكدن باشقە نرسە اۇزىگە يۇلتەپىدى. اۇزىنگن باشقە ھىچ كىم سېنى اېشىتمەپدى؛ نە چارە قىلەيىن! آسمان بلند بىر قىتىق. اېنگ آغىر باتگنى ھم انە شو يالغىزلىك اېدى مېن اوچون.

اویقیم قاچکن، قیغوگه قاریلیب یاتیبمن، توز تاتگیم کبلمه یدی. باله لریننگ ایزی-
 چوولری ایچ و بغیریمنی ایزیب بارماقده. تالیققیمدن بیر پیت کوزیم میزغیدی.
 توش کوریممن. توشیمده باله لیک قوچاغیگه آتیلیمن. الغاق-دالغاق توشلر توفانی
 ایچره الجیره یله یمن، تلپسه لنه من. کییم-کپچکلریم، کورپه-یاستیقلر بیلن آلیشه من.
 «باشیتمه ییسیزی؟ شونچه چقیره من نپگه تاووشینگیز چیقمه یدی آتہسی! قؤلرینی
 بؤنیمگه یاستیق قیلگن دوکتوریمدن درک یوق. قاره باسدی... ابی ابی؛ وادریغ!
 کورینمس قاره قؤلر حاصلدار درختنی ییقیب، ایلگیمده گی قیپ-قیزیل آلمہنی»
 یولقیب کبتدی. اویقیمنی نریگه سوریب، اورنیمدن سپچیب توردیم. قره سم یانیمده
 هیچ کییم یوق. یاستیغیم نینگ یریمی بؤش. یاپیریم ای! دپبه یاقه اوشله دیم. ینه
 توشلریم نینگ دوامی اسیمگه کبله باشله دی. آپه-سینگیلریم، بؤداش دوگانلر ایله
 «یشین-یشین»، «خاله-خاله» اؤینه ماقدہ اېکنمیز توشیمده. یخشی کورگن
 قؤغیرچاغلریم بیلن مستانه اؤینه ییممن. باله لیک سلطنتی اوستیده حکمران من.
 «باله لیگیم پاشالیگیم» -دېگنلریدېک. توشیمده بېخواستدن قؤغیرچاغیم قنی؟! کییم
 آلدی قؤغیرچاغیمنی؟! -دېب داووشیم باریچه قیچقیریممن؛ تاماغیم یرتیلگودېک
 بقیریممن اېکن بیلسم. باله لریم بیلن اویده یالغیزمن، یالغیز.

عمر یؤلداشیم بیر هفته دن بویان شفاخانه ده یاتقیز یلگن. باله لریننگ نان و آشینى
 بېرگنی اویگه کبله من و ینه شفاخانه گه باره من. یالغیزلتمه ی، کوز قاره بؤلیب
 توریممن. کپینگى پیتلری نفس آلیشى ینه-ده اؤته آغیرلشدی. ماسلمه یاردمیده
 قیننلیب نفس آله دی. شو بوگون وقتلى راق اویگه کبتیب قالدیم. تورر جاییمیز
 بناگه قره ب قیریلرکنمن، باله لریم دېرزه لر دن چوویللیشیب، کوزلری مؤلتیره ب ییغلب
 توریددی. اویگه کیریب درآو دېرزه لر نی آچیب هوا المشتیردیم. باله لریمنی اوتتدیم،
 ییدیردیم و ایچیردیم. اولر آتہسینی ازآنچه ساغینگنلر. مېن اېسه آتہنگیز بوگون،

اېرتە كېلەدى قىلىپ، گۇدكلرنى يوپىتىرەمن. شو ذىل تون بۇلىپ، كون بۇلىپ عمر اۋتەياتىر اېدى.

كونلرى گرەنگىسىب تالىققىمىم باعث توندىن هم اۋسانگنمن^۱. تون دېگىنى مېن اوچون يالمانغىز البستى. تون بۇلە بېرسە يورەگىم بېزىللەى بېرەدى. كوندە معنا كۇپ اېكن. هر قلەى ماما قوياش يوزىنگە جىلمەبەدى؛ كۇچە بالەلرىنىنگ شۇخ-شۇخ اۋيىن قىراق تاووشلرى دردىنگى اَلەياتگندەى... كاشكى قوياش باتمسە، تون بۇلمسە، دېيىمن ايچىمدە. كۇنگلىم بىر قىلگە اَسىغلىق. دوكتوردىن خىر اَلِش اوچون اَرە-سىرەدە شفاخانە بىلن باغلەنىب تورىيىمن. تونلر همان مېنى اېتىمنى قىيمەلب قىناققە اَلِيب تورىيدى. تانگ سحر اويغانىب كېتىدىم. دېرەلردن كۇچە بۇلىپ تونگولەمن^۲... دوكتور سېنشتەنىنگ صلابت تۇكىب تورگن بۇيىگە كۇزىم توشرمى دېيىمن. يەنە كىچ بۇلىپ قالدى. مېنى اېزەياتگن اَنلر يقىنلشماقدە...

... قندەى اوخلب قالگنىمنى بىلمەيىمن. تون يىرىم اويغانىب كېتىدىم. كۇچە ياغدوسىنىنگ يلىغى پردە اَرتىدىن اۋىگە توشىب تورىيدى. يەنە مېنى قارە باسگن اېكن، اَغىر توردىم جاىيىمدن، تېبرەنگىم كېلمەدى. قرشىمدە كتە اَيْنە مأيوس قرەب تورىيتدى. كۇزگو اَلدىدە تورىب اَلدىم. ايچكى كېچىنمەلرىم اَيْنە يوزىگە بىردن بلقىب چىقدى. تۇزغاق ساچلرىمنى ترەشگە حالىم بۇلەدى. اَنم و بالەلرىم بىلن قېرىستاندە تورىيىمىز. قېرگە قارە ساچلرىمنى يايىب اېگىلەى دېدىم و، وجودىمنى وهشت، قۇرقوو چولغىب اَلدى. بو منظرەنى يەنە دە كۇرىشگە جرأتىم سىندى. بۇيىم برابر كۇزگوگە مُشتىمنى سالدىم. اَيْنە چىل-پىرچىن بۇلىپ تۇكىلىپ توشدى. اَرتكە تىسىرىلدىم. قرەسم دوكتور سېنشتە ياتگن تخت تۇشك بۇم-بۇش. يالغىز اۋزىمىن ... تشقرىنىنگ بىر قَتىم يالقىنى دېرە تىرقىشىدىن دېوارگە اَسىلگن دوكتورنىنگ

^۱ اۋسانماق: تالىقماق؛ تالىب بىمار بۇلماق.

^۲ تونگولماق: تىكىلىپ قرەلماق، حىرت بىلن باقماق.

تصويريگە توشىب توريىدى. كۆركم عكس شيشە آرتيدن صلابتلە پارلب يىدى. كولىچلرى ايچيگە چۇغ سالدى. دېوارده گى دوكتورنىنگ عكسنى آلب بغريمگە باسدىم و ھۇنگرەب-ھۇنگرەب يىغلەدېم. مېن بيلن دوكتورنى اجرە تيب تورگن سيمان شيشەنى آلب تشلەدېم. صورتگە تيرموليب آوازىم بارىچە يىغلەدېم. كۆزلىرىمدن آقن دوو-دوو ياشلر دوكتور صورتىنى ھۇل قىليب يوباردى. اچىق كۆز ياشلريم كولىب تورگن لبلرى نىنگ سېوگى عمانىگە غايانە قۇشلىب كېتدى. يوريب، آيلەنىب، توننى تانگگە اولب چىقدىم...

قوياش اېندى نور ساچە باشلەگندەى. آغىر وضعىتگە قرەمەى، آدملىر تيرىكچلىك اراپەسىنى تېرەتەى دېب شەر تامان حركتلنماقدە. كۇچەدە قىسى دېر بالەنىنگ: «آلب قالىنگ! يىرىك-يىرىك خانەگى، مزەلى سېمىز تاووق غلەسى فقط مېندە! مېندە!!» -دېگن قىچقىرىغى اينگرە يىدى. ايرتەلبكى چايگە چاغلنىشگە مجبورمىز. آتەلىرى سىز بالەلريم آوقتلىگىسى كېلمەيدى سىرە. بىر پىت اۇغلىم: «آنە-آنە! تىلفوندا «دوكتور ھولكر سىنئىتەنى چقىر دېيتى كىم دىر» -دېدى. يا پىرىم، دىپە يوگىرە سالىب گۇشكىنى قولايغىمگە توتدېم؛ سالاملىشىب، جواب قىلدىم تىلفوندا. تىنىش آواز شفاخانە رىيسى اېدى. «تقدىر اېكن؛ سىز اېندى شفاخانەگە كېلىب اۇتىرمىنگ، علاجى يۇق. بالەلرىنگىزگە باش بۇلىنگ، سىزگە تۇزىم بېرسىن؛ صبرىلى بۇلىنگ. دوكتورنى قۇلدن بىي...ر...دىك!» -دېگن يىغى ارەلش آواز مېنى تىرىكلەيىن اۇلدىردى. اۋشە پىت او اېمس، مېن اېدىم تابوتدە ياتگن. بۇغزىم يىغىگە تۇلىب. اخخخخخخ! وادرىغ! ياستىغىم يىرىم بۇلدى؛ بختىمدن ايرىلدىمى ھلى؟! اېندى يىرمىنى قىدن ايزلب تاپەمن، دېگنچە چوقور آه چېككىم اېسىمدە... مە ارەدن بىر يىل اۋتەى دېب قالدى. سىزگە تىنىشتىرگىم اۋشە دوكتور ھولكر سىنئىتە بۇلەمن، مە يانىمدە بىر قىز، ايكى اۇغلىم و آنە جانىم توريشىدى. ھوا ساويى باشلە يىدى. بىر-ايكى ساعتلردن كېىن قوياش اققە باش قۇيەدى.

اوييميزگه قيتيشگه ناچارمیز. بيز شو لحظه دوكتور تېمور سېنښته نېنگ سۈنگگي منزل و منگو مکانی اوزره کۈزله تۈله ياش اياق اوستيده توربېمیز. دیدار قیامتگه قالدی، بو بارسه کېلمس جایگه اوچته باله منی یتکلب کېلایم. تۈرتاولشېب قېرنی قوچاقله ییمیز؛ بیغله ییمیز، قېردن تاووش کیلمه یدی. باله لریم نېنگ «آته جان!!!» - دېگن آوازینی هیچ کیم اېشیتمه یدی اېندی. غریب سېنښته میزدن درک یوق. اونینگ مزاریگه اوشاق تاشلر اېمس، یوره گیم نېنگ قۈری، درد و غمینی یاغدی رماقده من. الوداع دېمن دوکتوریم! الوداع!!!

شولرنی سیزگه حکایه قیلیب بیررکنمن، سښته م قېرنی یالغیز قالدیریب کېتیشگه مجبورمن اېندی. میلی مېن درېدر بۈله ی، یشگه محکوم من. سېن اېسه منگو آرام آل دوکتوریم!

اۈقېگن نېنگیز حکایه نی مېن انه شو منزلدن، قېرستاندن توریب، کۈز یاشگه کۈمیلگن حالتده سیزگه گېیریب بېردیم. خاتین لعنتلنگن بیر جمعیتده مېنی نیمه لر کوتماقده بیلمه یمن. بیراق اۈزیمنی قاره قره شلرگه قېران قیلمسلیککه تیریشیب کوره شه من. باله لریم حقى حرمتیگه مېن جوابگرم، فقط مین. سۈزیم نېنگ سۈنگگیده بیز کۈرگن داغنی سیز کۈرمنگ... دېبه برچه گه اېنگ اېزگو تیلکلر تیلب، خیرلشه من. خدمتگار نېنگیز، دوکتور تېمور سېنښته نېنگ نامراد هولکری

اۇلماق آسان اېمس

اۋلماق آسان اېمىس

تۇرت خاتىن آلىب، كېيىنگىسىگە اويلىنەن، دېب تورگن آلتىمىش بېش ياشلى ساپە- ساغ ظاھر آبە، قۇقىسىدىن كىسل بۇلىب قالدى. باى-بەدولت، كېلىشگن آدم نىنگ ساغى ھم كىسل-بىمارى ھم مابادا اۋلىب قالسە، اۋلىگى ھم قدرلى بۇلركن. ظاھر ابە نىنگ احوالى كون ساىين آغىرلشە باردى. داكتىر، اېمچىلىك بېتمەگنى دېك، ملا، پالچى، قاقىمچى و بخشىلرنىنگ كېتى اوزىلمەياتگن بۇلىب بۇلدى. ايسىرىقلر توتىلدى. ايس چىقىرىلدى. ايسىق-ساووق، اچىق-چوچوك آش-قتىق بېدىرىلر. ايسىتمەسىنى توشىرىش اوچون منگلەبىگە ھۇل رۇمال قۇلدى. ظاھر ابە ايسىتمەنىنگ زۇرىدىن الجىرەماقدە ابدى...

بىر ھفتە اۋتدى، اۋنگلنمەپىدى. صدقەلر اولشدى، اېل دعاسىنى آلىش اوچون اولكن داش قازانلردە خىرات آشى پىرىشماقچى بۇلىشىدى. لنگىلەگن اۋچاقلر اوستىدە آسىلگن قازانلر بىقىرلەپىدى. ارباب، ياش اولوغلر كىسل نىنگ تېگرەسىدە «ىرەتگن نىنگ حكىمى؛ دردىنى بېرگن دواسىنى ھم بېرەدى.» -دېيىشىب يورەك كۋترىب، كۋنگىل آلىشەپىدىلر. ظاھر ابە سۇزدن قالە يازدى. امىدىنى اوزگنلر بۇلدى. كۋپ اۋتمەى، بىمارنىنگ كۋزى آچىقلىگىدە اونىنگ مال و مۇلكى اوستىدەگى دعوالر ھم باشلىنىب كېتدى. اۋغلى يۇق ظاھر ابە قىزدن ھم قىيىلگندى. خاتىنلرى نىنگ اۋز

ارا مېشمەلەرى بارگن سىرى زۇرە يماقده اېدى. كونداشلارنىڭ بىر-بىرىگە ايمەمەي تاش ايتىشلىرى اوجىگە آلە يېدى. ساغلىغى چۇكىب، توشككە ميخلىنىپ قالگن زاهر ابەنىڭ بىلگنلىرى ايچىدە. تيشىنى گز-گزلتەدى-يو، فايدەسى يۇق. زاهر باينىڭ ايچىدن: «اخ نيمە قىلەي؟! بو مېكە جىنلارنىڭ اېندى تابىنى آلالمەيمىن- ھ!» -دېگن كېچىنمەلر اۋتە ياتگنى كۇزلردىن بىلىنىپ تورردى. لبلردىن ھمىشەگى دېك سۇكىنچ سۇزلر گۈللەمە يېدى. چېرتىب-چېرتىب ساوورەى دېسە، تاووشى چىقمە يېدى. زاهر ابەنىڭ قانى قىنىب، غضبى تاشىب، تيشلىرىنى زۇرغە غىچىرلنەدى و اوستوندى اسیلگن قىزىل قىمچىگە تىكىلەدى، نې قىلسىن كە غىشت قاليدىن كۇچگن. «ھىچ بۇمەسە قىمچىنى آلىب يانىمگە قۇيىلە برکە تاپگورلر» - دېگوليك گېنى تىلدىن تشقىرگە چىقرە آلەمەى، كۇزىگە ياش قىلقدى.

ابەنى دوركون-دوركون اويلر و دُر دوران خياللىرى آلىس-آلىسلرگە آلىب كېتدى. اۋتمىشىنىڭ قىرق بىللىك حيات داستانىنى سۇلغىن باقىشلىرى ايتە ياتىب تورىدى. يىڭسىز چاپان كىيىب، ياغاچ ارابە مېنىب، يارسە-كىمىسگە روانە بۇلىشىنى خيالدىن بىر-بىر اۋتكزە كېتدى. قىلگىندىن قىلمەگنلىرى ھلى كۇپ؛ مۇل مارقالى كونلرى بېلىدىن چاپىلگن دېك گۇيا. اولرنى بىر-بىر ايتىب توگتەشگە نە وقت بار، نە كوچ. دىردى نەفسى ايلە اۋرەلىب، پارتىب تشقىرگە ايتىلگودېك...

زاهر ابە سىنىق كىيىرىكلرىنى ياپماقچى بۇلدى-يو، مدارى يېتمەى، كۇزلردىن اچىق و ساووق ياشلىرى يوزلرگە دومەلب توشدى. اۋلىم بىلن آلىشە ياتگن كسل غىرتى جۇشىب، اۋرنىدىن تورەى، دېب قۇزغالىدى؛ بىراق كوچى يېتمەى، يىنە ناچار اۋنگ تامانىگە يانباشلە يېدى. ھوشىدەمى، اوخلە يېدىمى، بىلىب بۇلمىدى.

سەھل قىمىرلېب كۇزىنى اچدى. شوندىگىنە كۇز اۋنگىدە بىر قارە قۇنغىز تۇپ يىسب، جان-جەھدى بىلن اونى پستلىكدن تېپەگە آلىب چىقىشگە تىرىشە ياتگندى. رزم سالىب قرەسە، اوستەكار قۇنغىز مەھارت بىلن اۋزىدىن بىگىرمە برابر كتە راق قىلىپ

تۈكۈس يەسەن كاپتاكنى^۱ منزىگە يېتكۈزمەي قۇيغىسى يۇق. قۇنغىز اۈز قۇلى بىلن پېشىتىپ يەسەن دومەلاق تۇپنى سەھل سىلجىتىپ، جايدىن آزگىنە جىلدېرەدى-دە^۲، آغىرلىك قىلىمى توتىپ تورە آلمەگچ، اوستىگە اغەن ب توشەدى. بو وضىعت ظاھر ابةنىنگ كۈز اۈنگىدە كۇپ بارە تكررارلندى. شو تاپدە او باسىب اۈتگن يۇللىرى و كېچىرگن عمرىنى شو منظرەگە قىاسلەن بۇلسە عجبىمس. تىغىن اوياغىنى اۈزى بىلەدى.

كسل نىنگ جان كوړىرلى تېزراق توزەلىپ كېتسىن اوچون شفا سۇرەب، خدا يۇلىدە بىر جانلىق ھەم سۇيىشەدى. قارىلر كېلىشىپ، قىزىل بخمل كۇرپەچە اوستىدە، قرآن آچىشىپ، باش تېرەتىپ، تاماغىنى قىرگنچە تالوت قىلىش بىلن بندلر. بىر سىدرە ختم توگەگچ، قارىلر اياق يازىشدى. ماللر كۇپراق تۇيدە حرمت قازانىشەدى. قېتىشىپ يەنە تالوتگە توتىندىلر.

قىشلاققە خىرات آشىگە خبر ترقىتىلگن. محللەنىنگ كۈزگە كۇرىنگن آق ساقال، كۇك ساقاللىرى كىرىپ كېلەبېردى. مەھمانلر آداب بىلن كۇرپەچەلر اوستىدە اۈتېرىش، بىر-بىرلىگە باش اىرغىب، كۈز سوزىپ سكوت سقلەشر و ھر نېچەدە «اې يرەتگن اېگم اۈزىنگگە شكر!» -دېيە قۇللىرى بىلن ساقاللىرىنى معنالى توتىمىل قۇيىشردى.

بىر آز اۈتېپ، دسترخوان تۇشلىدى. اول قارىلر نىنگ قۇلىگە سوو سالىنىپ، آرئىشىگە چاچىقلر توتقىزىلدى. يۇل-يۇل شال دسترخواندە بۇسىلەن بوغداى نائلرى اوشتىلدى^۳. كتە-كتە تېنگلردە دماغى قىتتىقلەياتگن پاللو تورە تارتىلدى. سۇنگ چىنى كاسەلردە بوغى تاۈلەنىپ ترەلەياتگن قۇى گۇشتىدىن كاسەلردە شۇروە كېلتىرىلدى. ابةنى كۇرىشگە كېلگنلر شۇروەنى مزەلتگنچە، شۇرپە-شۇرپە اىچىپ،

^۱ كاپتاك: تۇپ؛ دومەلاق اۈرەم، اىرغىب آتېلەدىگن نرسە.

^۲ جىلدېرەماق: آز مقداردە آقماق، مىلتىرەب توشماق؛ آزگىنە حركتگە توشماق.

^۳ اوشتماق: بۇلك-بۇلك قىلىپ سىندىرماق، مېدە بۇلكلرگە بۇلماق، اجرەتماق، سىندىرماق؛ اورماق، اورىپ پرچەلەماق؛ بىرىك پولىنى شو قىمتدەگى مېدە پولىلر بىلن اۈبىر باش قىلماق، مېدەلەماق.

ياغلىق قينه اېتىنى بېيشه ياتير اېدى. سويگىنى چىنب، ايلگىنى قولى كېيگه قاقىب لوقه-لوقه يوتىشردى؛ سۇنگ لب و لونجىنى يلتيره تىب، قولى نىنگ ياغىنى ساقاللىرىگه ايشقب، گلمه-گلىگه فاتحه گه قۇل كۇتوردىلر. آخرده ختم پولىنى آلىشىب، تورنه قطار بۇلىشىب ظاهر ابه نىكىدن چىقىشب كېتىدىلر. ملا حسين هم كېنىگى ختم وقتىنى انىقب، ربحه لب آرتگه قىتهدى...

نيمه بۇلدى-يو، اوزاق ياتىب قالگن كسل نىنگ يانىگه كېلىب، كۇنگلىنى كۇتورووچىلر هم باره-باره سېرگىشردى^۱. بېمار دَره نغىلله گن حاويلده، ساكن اوى نىنگ بىر چىتىده يالغىزلىك دردىدن تنهسى بېمىرلىگندهى ايچىگه نورهب تۇكىله باره پىدى. اگر اۇشه ساغلىگىده باقىب قۇيگن ايغير ايتىلرى^۲، قفسلرده گى قۇشه-قۇشه ككلىكلرى، غوجوم درختلرده تىزىب آسىلگن سىراقى بۇدنه لرى بۇلمسه، ابه نىنگ ايچى ترسه يارىلىب شو ساعتى اوزىلىشى تورگن گپ. هر نه انه شولر كېنىگه سوريب تورىدى. ظاهر ابه خانه ده، اوى بالارلىرىگه تىكىله-تىكله اۋساندى، سناقلى قالگن نفسلرىدن بېزدى^۳. بو ياروق عالمده اۋپكە سېگه جايله ياتگن مصفا بىر يوتوم هوا بۇدنه لنگن قۇرغاشىن مىده لرى دېك تاماغىنى قىرىب چىقه پىدى. شولر هم بېتمهى قالدېگن پىتلر بۇلىب تورىدى. توشىنىب بۇلمس درد. ظاهر ابه آره-سىره گېگه كېلىب غودىرده پىدى. ابه آخرى:

— جايىمنى اوو انه اۇشه چارپايه دن، — اولىگه كۇز اشاره سى قىلىب، كېين تىلى بىلن آيتدى، — سالىب بېرسه يلر بۇلمه پىدى مى؟ — دېدى خاتىنلىرىگه قرهب. كسل باقىشدىن چرچه گن خاتىنلىرى كۇرىنىش بېرمه پىدى. بىرگنه عايشه خاله مېنغىللهى-مېنغىللهى:

^۱ سېرگىماق: آزه يماق، كم بۇلماق.

^۲ ايغير ايت: آنكه اۋخشه گن ناوچه ايت. ايغير: اورغاچى آت، بىيه.

^۳ بېزماق: زده، بېزار بۇلماق؛ جانيگه تېگماق.

«اوزىلمەيدىمى ۋىلگور! جانىم غىقىلداغىمگە^۱ تىقىلدى، كىل بۇمەى ھر بلا بۇگور» دېيە اىستر-اىستەمس، اېرىگە ۋىرىك درختى آستىدەگى سۇرى اوزرە جاي تۇشەدى. اېندى، كىلنى چىركىتگە آلىب بارىپ ياتقىزەى دېسە، بىر ۋىزى اېپلە آلمەيدى. گودەلى آدمنى سودرەب بارىشى عىال اوچون آسان اېمس. كونداشلرنى چقىرىپ، ياردم آلەى دېسە، غرورى، خۇرمەچەسىگە^۲ سىغمەيدى. بىر اىكى كايىب، اېرىگە سۇكتىرەى دېسە، كىلنىنگ تىلى آىلنمەى تورىيدى. قۇنى-قۇشنىلردن كۇمك آلەى دېسە، بىرى ۋىزى اىش-يوموشلرى بىلن كېتىشگن. عايشە خالەنىنگ اىچىدن «ۋىلىب كېتگور، تېكىنخۇر قارىلر كېلىشمەيدىمى شو پىت؟ منەوى گۇرمە-گۇر بۇلگورنى اوزەتىب قۇيىشگە قنى ابدى ياردم قىلىشسە!»-دېگن ۋى اۇتماقە. كونداشلر بىر-بىرىدن قالىشمىلىك معناسىدە، ناچار تاووش چىقرمىسدىن، شىغىلەشىب قۇلمە-قۇل قىلىشىب ظاھر اېننى كۇرپەچەسى بىلن بىر عملىب، تىشقىرگە سودرەى-سودرەى، سۇرىگە آلىب بارىپ ياتقىزىشدى. اېه بىر آغىرلشەدى، بىر ۋىزىگە كېلەدى. عايشە خالە «تېشىب چىقسىن»-دېگندەى قىلىپ، بىر پىپالە كۇك چانىنى اېرىگە ھوپلندى و كېتىپ قالدى.

بىر ياقە باغنىنگ اوزومى اوزىلىپ، مەيىزغالگە ۋىتقىزىلگن. يىنە بىر ياقە پامەدىرلر پىشىپ، مېوھلر حاصلگە كېلىپ، تۇكىن-ساچىن. بىغىب آلىشگە آدم يۇق. ظاھر اېه بايەگى قارە قۇنغىزنى اېسلەدى. خىياليدە قۇنغىز بار كوچىنى اىشگە سالىپ، ھمان تۇپنى مقصد سىرى آلىب بارىشگە تىرىشەياتگندى. ظاھر اېه نىمەگە اېسلەدى اېكن؟ كۇرر كۇزگە قىزىق و غلطى بىر منظرە. بو نىمە؟ ظاھر اېه اىچىدە ۋىتمىشىنى، تورموشى و ىشب تورگن حىياتىنى، بار وجودىنى انە شو تىنىم بىلمىس قۇنغىزگە مېنگزەتدىمى؟ ياكە... ۋىزىگە عىان.

^۱ غىقىلداق ~ ھىقىلداق: بۇغىز، تاماق، بۇيىننىنگ آلد قىسمى. ھىقىلداغىگە كېلماق: ۋىلر خالەگە كېلماق، ۋىلگودەى

قىيىنەلىپ كېتماق.

^۲ خۇرمەچەسىگە سىغمەيدى: غىرتىگە تېگەدى، يامانى كېلەدى، غرورى رخصت بېرمەيدى.

يۇق. ھەر كېمىنىڭ حيات چىراغى بىر تور اۋچەدى. يىخشىلر اۋلسە جمعيت كېمىتىك^۱ بۇلەدى. بىراو اۋلمسە حياتنىڭ معناسى يۇقالەدى.

اۋكىنچلر چولغەگن ظاهر ابە آسمان قدر يوك آستىدە اۋتە تاثيرلى آه چېكىدى، بىر چوقور نفس آلىب، «وادرىغ دنيا!» -دېماقچى بۇلدى-دە، اولگورە آلمەى، كۈزلرى منگو يومىلىب، منگو اويقىگە كېتىدى...

«گۈرگە! نە او ياق بۇلدى، نە بوياق» -دېب تورگن عايشە خالە بو وضعىتىنى سىرتدن كوزەتەب تورركن، «بىردن اېبىيى اويىم كويدى، بىرگىنەم اېدى؛ باقرمانىم، تاقرمانىم، توترمانىم كېتىدى. اېسىز تۇرەمدن اجرەلدىم. وايبى وايبى ويى!» - دېگنچە قىچقىرىب يىغلەى باشلەدى. اوچلە كونداش ھم خودى كوتەب تورگندەى، شو كويى^۲ آيرىلىق و ماتم ايتىملرىنى ايتە كېتىدىلر. قۇنى-قۇشنى، يقىن-اوزاقلر خبر آلگنى كېلىشىدى.

قوياش كون باترگە آغەياتگن پەيت، آفتاب قىزىب تورىدى. ضرور بۇلمسە كۈچەگە چىقرەدى ھوا اېمس. آدملر قاپ-قارە تېرگە باتىب، كون كېچىرىشىدى. خۇم و كۈزلەر تۇلە ساووق قىنە سوو، اېچگنى اېچگن. سايە-سلىقنىلردە بىر چىرىم^۳ اويقى آلەى دېب يانباشلەگن آدمنىڭ سىللەسى قورىگىندىن^۴، تورىشگە مدارى يۇق. كىشى اۋلگندە بوتون احوال و وضعيت اۋزگرەدى... آدملر: «مرحوم خداگە مېھمان بۇلسىن» -دېب جنازەنى اېرتەراق توپراققە تاپشىرىش پىيدە. اۋلىكىنى اوى اېچكرىسىگە آلىب كىردىلر. عايشە خالە اېرىنىڭ جىغىنى آق سوپ^۵ بىلن باغلىشگە

^۱ كېمىتىك: بىر نرسەنىڭ اوچگن، سىنگن، كېرتىلگن، بوزىلگن، نورەگن جايى؛ يېتىشمەيدگن، تۇلمەى قالگن جاي؛ يېتىشماوچىلىك، كەچىلىك، نقصان.

^۲ شو كويى: شو طرزەدە، شوندىەى، شو خىل.

^۳ چىرىم: آز مدتلى، آزگىنە، قىسقىقە فاصلە.

^۴ سىللەسى قورىماق: كوچ-قوتى كېتماق، نھایتدە چرچەماق، تىنكە-مدارى قالمىلىك؛ يامان، ناچار احوالگە توشماق.

^۵ سوپ (سورپ): سىدىرغە اېپ گزلمە و اوندىن تىكىلگن كىيىم.

شاشىلدى. كوناڭلار ھم حاضر و ناظر توريشر، كېرەك بۇلسە عايشە خالەگە ياردەم قۇلىنى چۈزىشماقچى اولر. شو كېز كتە خاتىنى ابرى نىنگ يوزىدن ياپىنچىقنى موربت كۇتريب، بسم الله... دېب جىغىنى باغلهماقچى اېدى-يم كە، مرحوم نىنگ آغزىدن، تيشلر يگە كىيگىزىلگن قطار آلتىنلر لاووللب كۇزگە تىشلندى. چۇغدهى يره قلب تورگن طلا تيشلرنىنگ يلتيره ب تاوله نيشيدن اۋلىك خودى كولگى ساجيب، تيريكلر كىي گۇزل و جاذبه دار بۇلىب كۇزلرگە كۇرىنركن. سريق شيطان اۋلىكنى ھم چىرايلى قىلىب يوباريشىنى شو زمان يىخسى انگلسە بۇلردى.

عايشە خالە ابرى نىنگ يوزىگە سېكىن گىنە قىلىب آق پردەنى ياپدى-دە، سوغرىلىب، تشقريگە چىقدى. سەھل اۋتمەى، اوچى سىنىق قىچىنى آلىب كېلىب، مرحوم نىنگ تيشلريدن آلتىنلرنى اجرە تيب آلىشگە كىرىشىدى. قىچى ايش بېرمىس اېكن، كوناڭشى اوچلى راق يىچاقچەنى، اوچىنچى كوناڭ اېسە، آمبورنى آلىب كېلدى. تۇرتىنچىسى اينگىچكە تېمىر قازىقنى كېلتىرىپ، تيشلرنى سوغورىب آلىشگە دارىشىدى. اوچ كوناڭ خزىنە اوستىگە چۇككن بۇلىشىپ، اۋتيز اېكتە تيشدن بىرىن-كېتىن طاللارنى اجرە تيب آلمسە قۇيماقچى اېمس. آلدىنگى قطار تيشلرگە قۇندىرىلگن طاللردن بېش-آلتىتەسىنى آسانراق كۇچىرىب آلىشىدى. اۋلىك نىنگ آغزىنى كتە راق آچىب، كلك تيشىگە دارىب اېدىلر ھم كە، نې كۇز بىلن كۇرىشىپ، ظاهر اېننىگ كۇزلرى شقە آچىلىب كېتىدى. تنەسىگە قان يوگورگندەى بۇلدى. شو پىت كوناڭلار داد و واى كۇتريشىدى.

اۋلىك تىرىلىشى يىخسى نرسە اېمس، بو قوم اۋرتەسىدە نحس، شوملىك بېلگىسى سنەلەدى. اونى ينە حياتگە قىترىشدىن كۇرە، مېغىدە^۱ كۇمىشنى افضل بىلىشەدى. بولرگە كۇرە «اگر شوندى قىلىنمىسە، بولردە بار اوروغ-ايمانغى، بالە-چقەسى بىلن

^۱ مېغىدە: بىلىنر-بىلىنمىس.

قىرىلىپ كېتىشى مەمكىن» - دېگەن ايرىم^۱ بار. ھە دېمەى كۇپچىلىك تۇپلانىشىدى؛ اوزاق-يىقىنلردەگى قوم و قرىنداش، تانىش-بىلىش، يار و برادرلرگە خىر كېتىگن. مونچە آلتىنى قارە يېرگە كۇمىب يوبارىشگە كۇزلىرى قىيمەى تورىدى. جنازەگە كېلگنلر نىمە قىلرىنى بىلمەى حىران. كىم دىر اۇلىكنى كۇرگنى اىچكرىگە كىردى. قرەسە كە، كونداشلىر غلە-غاوور تلىشماقده اېدى. مرحومنىنگ كۇزلىرى چىندن ھم آچىق، تىشلىرىدن سىزىب چىقەياتگن قانلر قاتىب قالگن. پېشانەسىگە كفتنى قۇيىب باقسە، تنە ساويگن، اوى دېوارلرىدن «اۇلىش آسان اېمس؛ ىشش اوندن-دە آغىر يوموش» - دېگن حكىم جىرنگلب تورگندى گۇيا.

۲۰۰۷/۱۱/۱۴

تورانئو، كانادا

^۱ ايرىم (Irm): بىرار مقصد، نىت بىلن قىلىنگن خرافى تىدىر. ايرىم قىلماق: بىران-بىر فلاكت، زىان-زىمتگە يۇلىقمىسلىك ياكە اونىنگ آلىش چارەسىنى قىلماق، قىدىرماق؛ ايرىم طرزىدە بىرار نرسە قىلماق.

بای حاجی

باى حاجى

اۋر^۱، آغزى چوۋەلىق، يورەگى تار، ايچ قيسدى بىر آدم. ايورسىب^۲ گپىرىشلىرى غشىنگگە تېگەدى. فعلى آغىر باى بوبە بىلن تىل تاپىش آسان اېمس. اونگە يىرىم گپ كمىلىك، بىر گپ اېسە كۈپلىك قىلەدى. چھارك گپنى تاپىب گپىرىش مھارتى بۇلسىن كىشىدە. چھارك گپنى تاپگندە-يىم اوياق بوياغىنى قىچىلىش كېرەك. بىر قھرى قۇزىسە^۳ نار توبەدېك گولدىرەب لقىلەگنى لقىلەگن. بىراونى آلدېگە يۇلتەمەيدى. حاجى لرنىنگ اېنگ بېمزهسى.

باى حاجى كون آشە سېمىرىگندىن سېمىرى بېردى. تىزەلرى ايشقلىگنىدىن^۴ يورە آلمەى قالدى. آياقلىرى مسحىگە سىغمەى قالدى. اېگىلىب قرەسە-يىم آياغى آستىنى كۈرە آلمەيدىگن بۇلدى. بارىب-بارىب آخرى طھارت آلىشگە ھم يىرمەى قالدى. آش-آوقتىنى كۈكرەگىگە قۇيىب يېيدىگن بۇلدى باى حاجى؛ بعضاً آش تۇلە تاواقنى قارنىگە مېندىرىب تورىب يېيشگە توشەدى... «عزت آو! عزت!! آفتابەگە طھارت

^۱ اۋر: ۱. اۋجر، جاھل. ۲. جرلىك، چوقورلىك؛ اۋرە؛ تېپەلىك، بىلدلىك، يوقارى.

^۲ ايورسىماق: ۱. مېدە-مېدە ايشلر بىلن اۋارە بۇلماق، ايمىللىب ايشلەماق، غىمىللىب يورماق. ۲. سوپورىلمەى-سېدىرىلمەى، يېغىشتىرىلمەى، بې ترتىب حالگە كېلماق، كىر، چىنگ و شو كىيلر بىلن قاپلنماق.

^۳ قۇزىماق: قۇزغەماق.

^۴ ايشقەلەماق: ايككى نرسەنى بىر-بىرىگە سوركەماق؛ قۇل بىلن قتتىق باسىب سىلەماق، اېزماق.

سووی آلیب کبلیگن» -دبب چقریشلر-و، ایشتان باغی اوچلرینی توتملب، بیر نرسه نی چاتیگه سیقیب توریب، کبسک بیلن آریتیشلری ارمان بؤلیمب قالدی. آیتگودبک دیندار کیشی؛ بیر عمر نماز-نیازینی ترک قیلمه گنگه سبمیزلیک پند بپرکن. اوهوووو! هر کون بپش محل دومه لب توریش نینگ اؤزی بؤلهدیمی؟ مچیتگه باریش قیگه؟ حاولیسیدن تشقریگه چیقیشی آغیر ایش... رۇزه گه بیرگینه هفته قالب ابدی. بای حاجی نینگ فکر و ذکرینی رۇزه بند ایتگن. علیحده تیارگرلیک کؤریب قویه دی. قازان-تاواق، گفگیرلر نینگ جره نگ-جورونگیدن؛ اؤچاقده چرس-چورس آلاو یانیشن مزه قیلهدی. هر دایم حاجی نینگ حاولیسیده اوقتلر نینگ زؤری پیشر، بونی قیشلاقداش لر بیلشردی. رۇزه گه اخلاصی بلند. همه گناهلری یوویلیب کبته یاتگن موسوم. بای حاجی نینگ عمرینی چاغ آیله گن^۱ کونلردیر بوکونلر. ایشیتیه ی بیریب-ایشیتیه ی بیریب، ملالرنینگ گپیدن قولاقلری وعظدن لبق توله. اونینگ بیلشچیچه نریگی دنیا ثوابلری خرمان-خرمان؛ شیلدیره گن جیلغهلرده^۲ یوزینی چه ییب، جنت نینگ آقر سوو، چمن-چمن اؤتلاقلریده قوشده ی یینگیل اوچیب، حور و غلمانلر قؤینیده تین آلیب یوریش بیردن-بیر ایستگی. بای حاجی منگو ناز و نعمتلر کانیکه چؤکسه؛ یبگنی آلدیده، ییمه گنی آرتیده بؤلش ینگلیغ خیاللرنی کشته لب آیتیب بپرش بائیده اوستهلر نینگ-اوسته سی. فقط ملا آیتگنلرینی قیلسه بؤلدی. بو یوریلگنلرنی بجرسه بارمی، ابدی عیش و عشرت ایشیگی آچیلهدی... حاجی اوچون اولرگه یبتمه ی، ابریشمه ی، اؤلیب کبیتش ارمان. شو دملرده رۇزه دن باشقه سی بای حاجی نینگ ایچیگه سیغمه دیدی. سبمیزلیک سبب قنارده ی تره نگ قاتگن. اپندی رۇزه نی نیمه قیلسین؟ توته ی دبسه بیر عذاب، توتمه سه باشقه عذاب.

^۱ چاغ آیله ماق: خورسند قیلماق، وقتینی خوش آیله ماق.

^۲ جیلغه: تاغ و تاغ یانبغریدن آقیب توشه دیدگن کیچیک سای؛ ییلغه.

طبيعىتى تېرىق^۱ حاجى نىنگ خىالى كۈچىب، مېيەسىگە چىماق چىقىلگن دېك بېزاوتەلندى. بېلىنمەدى كە مزەسى بۆلمەى قالگىدىن مى ياكە مال و مۇلكى نىنگ حساب-كتايدىن مى، اېدى بو احوال؟ يلتىراق كلەسىنى اوشلەگنچە بىر جام موزدەى سوونى باشىگە كۈتردى. هر توگول هاوورى^۲ باسىلدى. «اېى اۈزىنگە شكر!» - دېب تىنچلندى بىر از. خاتىنى حاجى بى بى اۈپكەسىنى چىنگللب «ىنە بىر بالارنى ويسشگە^۳ توشمەسىن تەىن» - دېپە ياقە اوشلب توره بېردى. هر نه فكرىگە كېلگن نرسەلر توتەمەى، لاپە اۈچدى. آلاو آىب كېتسە بارمى.. ؟. باى حاجى اۈدەغىلب^۴ خاتىنىنى:

- سېنى آىتەمن خاتىن! بو ياققە كېل، گىيىم بار سېنگە! - دېب چقىردى.
- تىنچلىكىمى آتەسى، آىتىنگ قولاغىم سىزگە؟ - دېدى خاتىنى و اطاعتكارانە كېلىپ يانىگە چۈككە توشدى.

- رۇزنى دېيىم، رۇزەگە كم قالدى، بونى يىخشى بىلەسن-ه! - بىر تۇلغەنىب، قارىنىنى قشيدى، - تيارگرلىك كۈرىب بارە بېرگىن. فرشتەلر، ارواحلر يارلەقب^۵ سحرلىككە توره مىز نصىب بۇلسە! ھمە نرسە بېترلىمى؟ كم-كېتىگ يۇقمى؟
آىتگنلرېم حاضر بۇسىن!

- بىر ھفتە گچە خدا پاشا، بىر نرسە بۇلر حاجى جان.
- اېسىنگگە سالىب قۇبەى دېدىم-دە!
- بېتابسىز، اوندىن كۇرە ساغلىگىزى اۈىلنگ. تەئىز شۇرپەىب، بېرگە يايىلىب باراتدى. قىمىرلەى آلمەىپسىز حاجى، قارىنىنى اۈبلمسەىز بۇلەدى.

^۱ طبعىتى تېرىق: بىرار نرسەدىن رنجىگن، خفە؛ كىفى بوزوق.

^۲ هاوور: حرارت، تفت، اىسقىلىك تائىرى.

^۳ وېسەماق: اعتبارگە لايىق بۆلمەگن، كېرەكسىز، بې معنى گېلرنى گىبىرماق.

^۴ اۈدەغىلەماق: بلند آواز بىلن داغ اورماق، تەھدىد ياكە پۇيسە قىلماق.

^۵ يارلەقبەماق: قۇللب-قۇتلەماق، مدد بېرماق؛ عفو اېتماق، كېچىرماق، گناھىدىن اۈتماق.

- حدىنگدن آشمە! يخشىلب افطارلىككە تيارگرلىكنى باشلەي بېرگىن ھېلىدن. ^۱ ^۲ ^۳ ^۴ ^۵ ^۶ ^۷ ^۸ ^۹ ^{۱۰} ^{۱۱} ^{۱۲} ^{۱۳} ^{۱۴} ^{۱۵} ^{۱۶} ^{۱۷} ^{۱۸} ^{۱۹} ^{۲۰} ^{۲۱} ^{۲۲} ^{۲۳} ^{۲۴} ^{۲۵} ^{۲۶} ^{۲۷} ^{۲۸} ^{۲۹} ^{۳۰} ^{۳۱} ^{۳۲} ^{۳۳} ^{۳۴} ^{۳۵} ^{۳۶} ^{۳۷} ^{۳۸} ^{۳۹} ^{۴۰} ^{۴۱} ^{۴۲} ^{۴۳} ^{۴۴} ^{۴۵} ^{۴۶} ^{۴۷} ^{۴۸} ^{۴۹} ^{۵۰} ^{۵۱} ^{۵۲} ^{۵۳} ^{۵۴} ^{۵۵} ^{۵۶} ^{۵۷} ^{۵۸} ^{۵۹} ^{۶۰} ^{۶۱} ^{۶۲} ^{۶۳} ^{۶۴} ^{۶۵} ^{۶۶} ^{۶۷} ^{۶۸} ^{۶۹} ^{۷۰} ^{۷۱} ^{۷۲} ^{۷۳} ^{۷۴} ^{۷۵} ^{۷۶} ^{۷۷} ^{۷۸} ^{۷۹} ^{۸۰} ^{۸۱} ^{۸۲} ^{۸۳} ^{۸۴} ^{۸۵} ^{۸۶} ^{۸۷} ^{۸۸} ^{۸۹} ^{۹۰} ^{۹۱} ^{۹۲} ^{۹۳} ^{۹۴} ^{۹۵} ^{۹۶} ^{۹۷} ^{۹۸} ^{۹۹} ^{۱۰۰} ^{۱۰۱} ^{۱۰۲} ^{۱۰۳} ^{۱۰۴} ^{۱۰۵} ^{۱۰۶} ^{۱۰۷} ^{۱۰۸} ^{۱۰۹} ^{۱۱۰} ^{۱۱۱} ^{۱۱۲} ^{۱۱۳} ^{۱۱۴} ^{۱۱۵} ^{۱۱۶} ^{۱۱۷} ^{۱۱۸} ^{۱۱۹} ^{۱۲۰} ^{۱۲۱} ^{۱۲۲} ^{۱۲۳} ^{۱۲۴} ^{۱۲۵} ^{۱۲۶} ^{۱۲۷} ^{۱۲۸} ^{۱۲۹} ^{۱۳۰} ^{۱۳۱} ^{۱۳۲} ^{۱۳۳} ^{۱۳۴} ^{۱۳۵} ^{۱۳۶} ^{۱۳۷} ^{۱۳۸} ^{۱۳۹} ^{۱۴۰} ^{۱۴۱} ^{۱۴۲} ^{۱۴۳} ^{۱۴۴} ^{۱۴۵} ^{۱۴۶} ^{۱۴۷} ^{۱۴۸} ^{۱۴۹} ^{۱۵۰} ^{۱۵۱} ^{۱۵۲} ^{۱۵۳} ^{۱۵۴} ^{۱۵۵} ^{۱۵۶} ^{۱۵۷} ^{۱۵۸} ^{۱۵۹} ^{۱۶۰} ^{۱۶۱} ^{۱۶۲} ^{۱۶۳} ^{۱۶۴} ^{۱۶۵} ^{۱۶۶} ^{۱۶۷} ^{۱۶۸} ^{۱۶۹} ^{۱۷۰} ^{۱۷۱} ^{۱۷۲} ^{۱۷۳} ^{۱۷۴} ^{۱۷۵} ^{۱۷۶} ^{۱۷۷} ^{۱۷۸} ^{۱۷۹} ^{۱۸۰} ^{۱۸۱} ^{۱۸۲} ^{۱۸۳} ^{۱۸۴} ^{۱۸۵} ^{۱۸۶} ^{۱۸۷} ^{۱۸۸} ^{۱۸۹} ^{۱۹۰} ^{۱۹۱} ^{۱۹۲} ^{۱۹۳} ^{۱۹۴} ^{۱۹۵} ^{۱۹۶} ^{۱۹۷} ^{۱۹۸} ^{۱۹۹} ^{۲۰۰} ^{۲۰۱} ^{۲۰۲} ^{۲۰۳} ^{۲۰۴} ^{۲۰۵} ^{۲۰۶} ^{۲۰۷} ^{۲۰۸} ^{۲۰۹} ^{۲۱۰} ^{۲۱۱} ^{۲۱۲} ^{۲۱۳} ^{۲۱۴} ^{۲۱۵} ^{۲۱۶} ^{۲۱۷} ^{۲۱۸} ^{۲۱۹} ^{۲۲۰} ^{۲۲۱} ^{۲۲۲} ^{۲۲۳} ^{۲۲۴} ^{۲۲۵} ^{۲۲۶} ^{۲۲۷} ^{۲۲۸} ^{۲۲۹} ^{۲۳۰} ^{۲۳۱} ^{۲۳۲} ^{۲۳۳} ^{۲۳۴} ^{۲۳۵} ^{۲۳۶} ^{۲۳۷} ^{۲۳۸} ^{۲۳۹} ^{۲۴۰} ^{۲۴۱} ^{۲۴۲} ^{۲۴۳} ^{۲۴۴} ^{۲۴۵} ^{۲۴۶} ^{۲۴۷} ^{۲۴۸} ^{۲۴۹} ^{۲۵۰} ^{۲۵۱} ^{۲۵۲} ^{۲۵۳} ^{۲۵۴} ^{۲۵۵} ^{۲۵۶} ^{۲۵۷} ^{۲۵۸} ^{۲۵۹} ^{۲۶۰} ^{۲۶۱} ^{۲۶۲} ^{۲۶۳} ^{۲۶۴} ^{۲۶۵} ^{۲۶۶} ^{۲۶۷} ^{۲۶۸} ^{۲۶۹} ^{۲۷۰} ^{۲۷۱} ^{۲۷۲} ^{۲۷۳} ^{۲۷۴} ^{۲۷۵} ^{۲۷۶} ^{۲۷۷} ^{۲۷۸} ^{۲۷۹} ^{۲۸۰} ^{۲۸۱} ^{۲۸۲} ^{۲۸۳} ^{۲۸۴} ^{۲۸۵} ^{۲۸۶} ^{۲۸۷} ^{۲۸۸} ^{۲۸۹} ^{۲۹۰} ^{۲۹۱} ^{۲۹۲} ^{۲۹۳} ^{۲۹۴} ^{۲۹۵} ^{۲۹۶} ^{۲۹۷} ^{۲۹۸} ^{۲۹۹} ^{۳۰۰} ^{۳۰۱} ^{۳۰۲} ^{۳۰۳} ^{۳۰۴} ^{۳۰۵} ^{۳۰۶} ^{۳۰۷} ^{۳۰۸} ^{۳۰۹} ^{۳۱۰} ^{۳۱۱} ^{۳۱۲} ^{۳۱۳} ^{۳۱۴} ^{۳۱۵} ^{۳۱۶} ^{۳۱۷} ^{۳۱۸} ^{۳۱۹} ^{۳۲۰} ^{۳۲۱} ^{۳۲۲} ^{۳۲۳} ^{۳۲۴} ^{۳۲۵} ^{۳۲۶} ^{۳۲۷} ^{۳۲۸} ^{۳۲۹} ^{۳۳۰} ^{۳۳۱} ^{۳۳۲} ^{۳۳۳} ^{۳۳۴} ^{۳۳۵} ^{۳۳۶} ^{۳۳۷} ^{۳۳۸} ^{۳۳۹} ^{۳۴۰} ^{۳۴۱} ^{۳۴۲} ^{۳۴۳} ^{۳۴۴} ^{۳۴۵} ^{۳۴۶} ^{۳۴۷} ^{۳۴۸} ^{۳۴۹} ^{۳۵۰} ^{۳۵۱} ^{۳۵۲} ^{۳۵۳} ^{۳۵۴} ^{۳۵۵} ^{۳۵۶} ^{۳۵۷} ^{۳۵۸} ^{۳۵۹} ^{۳۶۰} ^{۳۶۱} ^{۳۶۲} ^{۳۶۳} ^{۳۶۴} ^{۳۶۵} ^{۳۶۶} ^{۳۶۷} ^{۳۶۸} ^{۳۶۹} ^{۳۷۰} ^{۳۷۱} ^{۳۷۲} ^{۳۷۳} ^{۳۷۴} ^{۳۷۵} ^{۳۷۶} ^{۳۷۷} ^{۳۷۸} ^{۳۷۹} ^{۳۸۰} ^{۳۸۱} ^{۳۸۲} ^{۳۸۳} ^{۳۸۴} ^{۳۸۵} ^{۳۸۶} ^{۳۸۷} ^{۳۸۸} ^{۳۸۹} ^{۳۹۰} ^{۳۹۱} ^{۳۹۲} ^{۳۹۳} ^{۳۹۴} ^{۳۹۵} ^{۳۹۶} ^{۳۹۷} ^{۳۹۸} ^{۳۹۹} ^{۴۰۰} ^{۴۰۱} ^{۴۰۲} ^{۴۰۳} ^{۴۰۴} ^{۴۰۵} ^{۴۰۶} ^{۴۰۷} ^{۴۰۸} ^{۴۰۹} ^{۴۱۰} ^{۴۱۱} ^{۴۱۲} ^{۴۱۳} ^{۴۱۴} ^{۴۱۵} ^{۴۱۶} ^{۴۱۷} ^{۴۱۸} ^{۴۱۹} ^{۴۲۰} ^{۴۲۱} ^{۴۲۲} ^{۴۲۳} ^{۴۲۴} ^{۴۲۵} ^{۴۲۶} ^{۴۲۷} ^{۴۲۸} ^{۴۲۹} ^{۴۳۰} ^{۴۳۱} ^{۴۳۲} ^{۴۳۳} ^{۴۳۴} ^{۴۳۵} ^{۴۳۶} ^{۴۳۷} ^{۴۳۸} ^{۴۳۹} ^{۴۴۰} ^{۴۴۱} ^{۴۴۲} ^{۴۴۳} ^{۴۴۴} ^{۴۴۵} ^{۴۴۶} ^{۴۴۷} ^{۴۴۸} ^{۴۴۹} ^{۴۵۰} ^{۴۵۱} ^{۴۵۲} ^{۴۵۳} ^{۴۵۴} ^{۴۵۵} ^{۴۵۶} ^{۴۵۷} ^{۴۵۸} ^{۴۵۹} ^{۴۶۰} ^{۴۶۱} ^{۴۶۲} ^{۴۶۳} ^{۴۶۴} ^{۴۶۵} ^{۴۶۶} ^{۴۶۷} ^{۴۶۸} ^{۴۶۹} ^{۴۷۰} ^{۴۷۱} ^{۴۷۲} ^{۴۷۳} ^{۴۷۴} ^{۴۷۵} ^{۴۷۶} ^{۴۷۷} ^{۴۷۸} ^{۴۷۹} ^{۴۸۰} ^{۴۸۱} ^{۴۸۲} ^{۴۸۳} ^{۴۸۴} ^{۴۸۵} ^{۴۸۶} ^{۴۸۷} ^{۴۸۸} ^{۴۸۹} ^{۴۹۰} ^{۴۹۱} ^{۴۹۲} ^{۴۹۳} ^{۴۹۴} ^{۴۹۵} ^{۴۹۶} ^{۴۹۷} ^{۴۹۸} ^{۴۹۹} ^{۵۰۰} ^{۵۰۱} ^{۵۰۲} ^{۵۰۳} ^{۵۰۴} ^{۵۰۵} ^{۵۰۶} ^{۵۰۷} ^{۵۰۸} ^{۵۰۹} ^{۵۱۰} ^{۵۱۱} ^{۵۱۲} ^{۵۱۳} ^{۵۱۴} ^{۵۱۵} ^{۵۱۶} ^{۵۱۷} ^{۵۱۸} ^{۵۱۹} ^{۵۲۰} ^{۵۲۱} ^{۵۲۲} ^{۵۲۳} ^{۵۲۴} ^{۵۲۵} ^{۵۲۶} ^{۵۲۷} ^{۵۲۸} ^{۵۲۹} ^{۵۳۰} ^{۵۳۱} ^{۵۳۲} ^{۵۳۳} ^{۵۳۴} ^{۵۳۵} ^{۵۳۶} ^{۵۳۷} ^{۵۳۸} ^{۵۳۹} ^{۵۴۰} ^{۵۴۱} ^{۵۴۲} ^{۵۴۳} ^{۵۴۴} ^{۵۴۵} ^{۵۴۶} ^{۵۴۷} ^{۵۴۸} ^{۵۴۹} ^{۵۵۰} ^{۵۵۱} ^{۵۵۲} ^{۵۵۳} ^{۵۵۴} ^{۵۵۵} ^{۵۵۶} ^{۵۵۷} ^{۵۵۸} ^{۵۵۹} ^{۵۶۰} ^{۵۶۱} ^{۵۶۲} ^{۵۶۳} ^{۵۶۴} ^{۵۶۵} ^{۵۶۶} ^{۵۶۷} ^{۵۶۸} ^{۵۶۹} ^{۵۷۰} ^{۵۷۱} ^{۵۷۲} ^{۵۷۳} ^{۵۷۴} ^{۵۷۵} ^{۵۷۶} ^{۵۷۷} ^{۵۷۸} ^{۵۷۹} ^{۵۸۰} ^{۵۸۱} ^{۵۸۲} ^{۵۸۳} ^{۵۸۴} ^{۵۸۵} ^{۵۸۶} ^{۵۸۷} ^{۵۸۸} ^{۵۸۹} ^{۵۹۰} ^{۵۹۱} ^{۵۹۲} ^{۵۹۳} ^{۵۹۴} ^{۵۹۵} ^{۵۹۶} ^{۵۹۷} ^{۵۹۸} ^{۵۹۹} ^{۶۰۰} ^{۶۰۱} ^{۶۰۲} ^{۶۰۳} ^{۶۰۴} ^{۶۰۵} ^{۶۰۶} ^{۶۰۷} ^{۶۰۸} ^{۶۰۹} ^{۶۱۰} ^{۶۱۱} ^{۶۱۲} ^{۶۱۳} ^{۶۱۴} ^{۶۱۵} ^{۶۱۶} ^{۶۱۷} ^{۶۱۸} ^{۶۱۹} ^{۶۲۰} ^{۶۲۱} ^{۶۲۲} ^{۶۲۳} ^{۶۲۴} ^{۶۲۵} ^{۶۲۶} ^{۶۲۷} ^{۶۲۸} ^{۶۲۹} ^{۶۳۰} ^{۶۳۱} ^{۶۳۲} ^{۶۳۳} ^{۶۳۴} ^{۶۳۵} ^{۶۳۶} ^{۶۳۷} ^{۶۳۸} ^{۶۳۹} ^{۶۴۰} ^{۶۴۱} ^{۶۴۲} ^{۶۴۳} ^{۶۴۴} ^{۶۴۵} ^{۶۴۶} ^{۶۴۷} ^{۶۴۸} ^{۶۴۹} ^{۶۵۰} ^{۶۵۱} ^{۶۵۲} ^{۶۵۳} ^{۶۵۴} ^{۶۵۵} ^{۶۵۶} ^{۶۵۷} ^{۶۵۸} ^{۶۵۹} ^{۶۶۰} ^{۶۶۱} ^{۶۶۲} ^{۶۶۳} ^{۶۶۴} ^{۶۶۵} ^{۶۶۶} ^{۶۶۷} ^{۶۶۸} ^{۶۶۹} ^{۶۷۰} ^{۶۷۱} ^{۶۷۲} ^{۶۷۳} ^{۶۷۴} ^{۶۷۵} ^{۶۷۶} ^{۶۷۷} ^{۶۷۸} ^{۶۷۹} ^{۶۸۰} ^{۶۸۱} ^{۶۸۲} ^{۶۸۳} ^{۶۸۴} ^{۶۸۵} ^{۶۸۶} ^{۶۸۷} ^{۶۸۸} ^{۶۸۹} ^{۶۹۰} ^{۶۹۱} ^{۶۹۲} ^{۶۹۳} ^{۶۹۴} ^{۶۹۵} ^{۶۹۶} ^{۶۹۷} ^{۶۹۸} ^{۶۹۹} ^{۷۰۰} ^{۷۰۱} ^{۷۰۲} ^{۷۰۳} ^{۷۰۴} ^{۷۰۵} ^{۷۰۶} ^{۷۰۷} ^{۷۰۸} ^{۷۰۹} ^{۷۱۰} ^{۷۱۱} ^{۷۱۲} ^{۷۱۳} ^{۷۱۴} ^{۷۱۵} ^{۷۱۶} ^{۷۱۷} ^{۷۱۸} ^{۷۱۹} ^{۷۲۰} ^{۷۲۱} ^{۷۲۲} ^{۷۲۳} ^{۷۲۴} ^{۷۲۵} ^{۷۲۶} ^{۷۲۷} ^{۷۲۸} ^{۷۲۹} ^{۷۳۰} ^{۷۳۱} ^{۷۳۲} ^{۷۳۳} ^{۷۳۴} ^{۷۳۵} ^{۷۳۶} ^{۷۳۷} ^{۷۳۸} ^{۷۳۹} ^{۷۴۰} ^{۷۴۱} ^{۷۴۲} ^{۷۴۳} ^{۷۴۴} ^{۷۴۵} ^{۷۴۶} ^{۷۴۷} ^{۷۴۸} ^{۷۴۹} ^{۷۵۰} ^{۷۵۱} ^{۷۵۲} ^{۷۵۳} ^{۷۵۴} ^{۷۵۵} ^{۷۵۶} ^{۷۵۷} ^{۷۵۸} ^{۷۵۹} ^{۷۶۰} ^{۷۶۱} ^{۷۶۲} ^{۷۶۳} ^{۷۶۴} ^{۷۶۵} ^{۷۶۶} ^{۷۶۷} ^{۷۶۸} ^{۷۶۹} ^{۷۷۰} ^{۷۷۱} ^{۷۷۲} ^{۷۷۳} ^{۷۷۴} ^{۷۷۵} ^{۷۷۶} ^{۷۷۷} ^{۷۷۸} ^{۷۷۹} ^{۷۸۰} ^{۷۸۱} ^{۷۸۲} ^{۷۸۳} ^{۷۸۴} ^{۷۸۵} ^{۷۸۶} ^{۷۸۷} ^{۷۸۸} ^{۷۸۹} ^{۷۹۰} ^{۷۹۱} ^{۷۹۲} ^{۷۹۳} ^{۷۹۴} ^{۷۹۵} ^{۷۹۶} ^{۷۹۷} ^{۷۹۸} ^{۷۹۹} ^{۸۰۰} ^{۸۰۱} ^{۸۰۲} ^{۸۰۳} ^{۸۰۴} ^{۸۰۵} ^{۸۰۶} ^{۸۰۷} ^{۸۰۸} ^{۸۰۹} ^{۸۱۰} ^{۸۱۱} ^{۸۱۲} ^{۸۱۳} ^{۸۱۴} ^{۸۱۵} ^{۸۱۶} ^{۸۱۷} ^{۸۱۸} ^{۸۱۹} ^{۸۲۰} ^{۸۲۱} ^{۸۲۲} ^{۸۲۳} ^{۸۲۴} ^{۸۲۵} ^{۸۲۶} ^{۸۲۷} ^{۸۲۸} ^{۸۲۹} ^{۸۳۰} ^{۸۳۱} ^{۸۳۲} ^{۸۳۳} ^{۸۳۴} ^{۸۳۵} ^{۸۳۶} ^{۸۳۷} ^{۸۳۸} ^{۸۳۹} ^{۸۴۰} ^{۸۴۱} ^{۸۴۲} ^{۸۴۳} ^{۸۴۴} ^{۸۴۵} ^{۸۴۶} ^{۸۴۷} ^{۸۴۸} ^{۸۴۹} ^{۸۵۰} ^{۸۵۱} ^{۸۵۲} ^{۸۵۳} ^{۸۵۴} ^{۸۵۵} ^{۸۵۶} ^{۸۵۷} ^{۸۵۸} ^{۸۵۹} ^{۸۶۰} ^{۸۶۱} ^{۸۶۲} ^{۸۶۳} ^{۸۶۴} ^{۸۶۵} ^{۸۶۶} ^{۸۶۷} ^{۸۶۸} ^{۸۶۹} ^{۸۷۰} ^{۸۷۱} ^{۸۷۲} ^{۸۷۳} ^{۸۷۴} ^{۸۷۵} ^{۸۷۶} ^{۸۷۷} ^{۸۷۸} ^{۸۷۹} ^{۸۸۰} ^{۸۸۱} ^{۸۸۲} ^{۸۸۳} ^{۸۸۴} ^{۸۸۵} ^{۸۸۶} ^{۸۸۷} ^{۸۸۸} ^{۸۸۹} ^{۸۹۰} ^{۸۹۱} ^{۸۹۲} ^{۸۹۳} ^{۸۹۴} ^{۸۹۵} ^{۸۹۶} ^{۸۹۷} ^{۸۹۸} ^{۸۹۹} ^{۹۰۰} ^{۹۰۱} ^{۹۰۲} ^{۹۰۳} ^{۹۰۴} ^{۹۰۵} ^{۹۰۶} ^{۹۰۷} ^{۹۰۸} ^{۹۰۹} ^{۹۱۰} ^{۹۱۱} ^{۹۱۲} ^{۹۱۳} ^{۹۱۴} ^{۹۱۵} ^{۹۱۶} ^{۹۱۷} ^{۹۱۸} ^{۹۱۹} ^{۹۲۰} ^{۹۲۱} ^{۹۲۲} ^{۹۲۳} ^{۹۲۴} ^{۹۲۵} ^{۹۲۶} ^{۹۲۷} ^{۹۲۸} ^{۹۲۹} ^{۹۳۰} ^{۹۳۱} ^{۹۳۲} ^{۹۳۳} ^{۹۳۴} ^{۹۳۵} ^{۹۳۶} ^{۹۳۷} ^{۹۳۸} ^{۹۳۹} ^{۹۴۰} ^{۹۴۱} ^{۹۴۲} ^{۹۴۳} ^{۹۴۴} ^{۹۴۵} ^{۹۴۶} ^{۹۴۷} ^{۹۴۸} ^{۹۴۹} ^{۹۵۰} ^{۹۵۱} ^{۹۵۲} ^{۹۵۳} ^{۹۵۴} ^{۹۵۵} ^{۹۵۶} ^{۹۵۷} ^{۹۵۸} ^{۹۵۹} ^{۹۶۰} ^{۹۶۱} ^{۹۶۲} ^{۹۶۳} ^{۹۶۴} ^{۹۶۵} ^{۹۶۶} ^{۹۶۷} ^{۹۶۸} ^{۹۶۹} ^{۹۷۰} ^{۹۷۱} ^{۹۷۲} ^{۹۷۳} ^{۹۷۴} ^{۹۷۵} ^{۹۷۶} ^{۹۷۷} ^{۹۷۸} ^{۹۷۹} ^{۹۸۰} ^{۹۸۱} ^{۹۸۲} ^{۹۸۳} ^{۹۸۴} ^{۹۸۵} ^{۹۸۶} ^{۹۸۷} ^{۹۸۸} ^{۹۸۹} ^{۹۹۰} ^{۹۹۱} ^{۹۹۲} ^{۹۹۳} ^{۹۹۴} ^{۹۹۵} ^{۹۹۶} ^{۹۹۷} ^{۹۹۸} ^{۹۹۹} ^{۱۰۰۰}

- بۇلەدى آتە جانىسى، ھەمەسى بوت، ^۳ ايشيم شو. اورينيب-سورينيب شولر بيلن بندمن. اچيغيز يمان بيله من. باله-چقه لر چيقب كېتىشگن؛ بار-يۇغى ايكي كيشيميز. اوييميزده باريني پيشيريپ دسترخوانگە تارتمەن...؛ مېنى كۇپراق باشقە نرسە اويگە تالديرەدى، -دېدى حاجى بى بى ابريگە تېرمولىب.

- نېمە او؟ -بۇغيق آوازده غۇنغىللهدى باي حاجى.
 - يان قۇشنىمىزنى، مە صالحنى آيتەن-دە. سېر جملغە، ياش بالەلرى كۇپ. آيدە بېر مرتە-يىم قارە قازانى قىنمەيدى شولرنى. باله-چقه لرلى بيلن تاپگن-توتگنى بېر تيشلم نان، او ھم يا بۇلگنى يا بۇلمەگنى، تاپگنى. شو قوروق ناننى يىم بېر جام سووگە باتيريپ يا يېگەى يا يېمەگەى. ھېچ نرسەسى يۇق شو بېچەرلەرنى. آدمنى رحىمى كېلەدى... حاجى دولتيسزدن شولرگە يىم بېرىپ تورسك خدا راضى بۇل

مزهنگ حاجى لردن. اونچە-مونچەگە كۈندىرىپ بۇلمەيدى، انايى لردن^۱ اېمس؛ مال و دولتىنى ھم قۇلى قىسىقلىكدن تاپدى. آدمى ليكدن باشقە ھمە نرسەسى بار. يىخىلىك نىنگ كۈچەسىدن ھم اۋتمەگن؛ كۈنگلى قارە، «اۋزىم بۇلەى» - دېگووچىلردن. باى حاجى قاپ-قارە تومن قورشايودە يشەيدى. ايچىگە چىراق ياقسنگ ھم يارىشمەيدى.

باى حاجى نىنگ يوزى يەپلاق، كللەسى كتە، دۈنگ پىشانە، منگلەيى يلىتيرەب تورگىچ، ساقالى دىنگ، آلد تىشلىرىدن ايكتەسى توشگن. كۈزلى قىسىق، تىلى زەر، سۇكانغىچ. سىللەسىنى پىچ قۇيمەى اۋرەيدى. سۇزلىرى چىنب گىپرەدى؛ غودوردەب گىپرەدى؛ دېگنلىرى ھم توشونىك سىز. سېمىزلىكدن تۇرت بورچك بۇلىب قالگن. ساغ كونلىرى عىساگە تىەنىب زۇرغە ادىملەيدى. بىر كون اۋتدى، اېرتەسى: - ايسىغىم اشىب بارەپىتى خاتىن! - ايلكىس^۲ ايسىتمە وجودىنى چولغىب آلدى، - دارى-درمانىنگ يۇقىمى؟ اخ! يانىب بارەپىمن؟! - دېدى باى.

خاتىنى درحال رۇمانلى ھۇل قىلىپ، پىشانەسىگە باسىب توردى. حاجى ايسىتمە ارەلش الجىرەيلەى باشلەدى. خاتىنى ايچىرگى بېردى؛ تاماغى آغرىگندى، دېب آچىق تاش بىلن باسدى، ايسىرىق كويدىردى. يىرىم پىالە شۇر سونى آغزىگە قويدى. شوندىن سۇنگ باى حاجى آوازى تىنىب، اويقىگە كېتدى. چمەسى ايكتى ساعت اوخلەدى. تېرلەدىمى، نەقىسى قىسدىمى اويقىدن اويغانىب كېتدى. تېورەك-تاشگە كۇز يوگورتىردى. قرەسە خاتىنى يۇق. «اې خدا! اۋلىب، نېتىب قامەسم يىنە. فرشتەلر، ارواحلر حقى اۋزىنگ اسرە!» - دېدى و اوزلە توشدى.

حاجى بى بى آشخانەدن بۇشب، باى حاجى ياتگن اويگە باش سوقدى. يىخسى يىم كە وقتىدە كېلدى. يۇق اېسە حاجى بابلب ساوورىب سۇكردى. خاتىنى حاجى نىنگ

^۱ انايى: اۋز ايشىگە پختە اېمس، بىراونىنگ سۇزىگە لققە اوچەدىگن؛ سادە، گۈل.

^۲ ايلكىس: بىردن، شرتتە؛ كوتىلمەگندە، تۇستىدن، بېخواستىدن.

يانىگە اۇتېرىپ نەفسىنى راستلەماقچى بۇلدى و اۋپكەسىنى توتىپ قۇشنى نېنگ كىگە بىر كاسە اوقت اولشگىنىنى ايتدى. اېشىتگىچ، حاجى غضب آتېگە مېندى:

- اېى سېن خاتىن، نېمەلرنى دېيەپسەن؟ -قوخ-قوخ يۇتەلىب، باشىنى سېلەى توريب، بىر كاسە ساووقىنە سوونى شىقە ايچدى، -قىسى زماندە يشەيپسەن اۋزى؟ ثواب تۇرەنېنگ تگى تېشىلگىنىگە انچە-مونچە بۇلدى. غريب-غُربا، دېيە بېرسىنگ باشىنگ اَقريب كېتەدى. «رحم قىلمە يېتىمگە...» دېگن گپ بار. اولرگە خدا بېرسىن، دېب كېتەبېر، ايشىنگ بۇلمەسىن، اۋزىنگى بېل، بو نصحيتىمنى قولايغىنگە قويىب آل، خۇبمى؟! گېمنى توشوندىنگمى ياكە قىتەدن ايجەلب ايتەيمى؟

حاجى بى بى اوليگە الگ-جَلنگ بىر نرسە دېرىنى بېلمەى قالدى. كېين بىر خۇرسىنىب، مېنگ يورەكنى بىر يورەك قىلىب اغيز آچدى: -مونچە تاش بغير بۇمىنگ. ايچىزدە انسانيت اولگىنىگە كۇپ يىللر بۇلدى. خودى، كۇكرەگىنگىزدە يورەك اېمس، تاشنى كۇتريب الگندەى گېپرەسىز، قارنىز تۇيسە ھم كۇزىز تۇيمەى كېتىدى، -دېدى.

- انسانىتنى كۇرسىنگ عربستانگە بار. كعبە الله نېنگ تېگرەسىدە تماشانى كۇرەبېر. يېتتى مرتە حج قىلىب، كۇپ نرسەلرنى كۇزىم بېلن كۇردىم. باشقە جايلرنى-كو، گېپرەمەسم ھم بۇلەدى. اول اۋشەلرنى جزالەسىن يرەنگن اېگم. شونچە يمان بۇلدىمى؟ مېندن ھم كۇرە يمانلر كۇپ... تۇشكە ياتىبىدى، دېب كۇپ تېلىنگىگە اېرك¹ بېرەبېرمە! سېنى بورەشگن كوچىم يېتەدى. سۇزىمدن چىقمە. بو دنيادە يىخىلىك قىلمە اېكن! شو ياشگە كىرىب، آدملىر بېلن ارەلەشىب، آخرى شو خلاصەگە كېلدىم خاتىن.

¹ اېرك: اختيار، ميل؛ يۇل قۇيماق.

- باشقەرلەر نېمە بۇلسە بۇلىشىسىن، حاجى؛ بىز اونداق بۇلمەيلىك، بالە جان خلقىمىز، بىغرى كېنگ بۇلىپ كېلگىمىز، -دېدى حاجى بى بى اېرىگە عىبسىنمەي^۱، اۇگىت قىلگن بۇلىپ گپ قاتدى.

كونىنىگ مدارى اوزىلىپ، چرچىپ بارەياتىر اېدى. سۇنگى خىرە نورلرىنى بىغىب آلەياتگندى. اطرافنى سكوت چولغەدى، كۇچە ھەم تىن آلەياتگندى. قوباش نىنگ يىللىغى سۇنىپ بۇلدى. حىشمتلى خانەدە باى حاجى ھاردىغىنى يازىپ، آياقلىرىنى بىر- بىرىگە مىنگىتىرىپ آلگندى. آياق اوستىدە اۇرگمچىك دەى دېوارگە ترمەشىپ^۲ تورگندى. كۇزىنى اېشىكىدن اوزركن، قارەتىر^۳ باسىپ، تويقوسدن^۴ تابى قاجىب قالدى. دېوارگە سويەنىپ تورركن، باى سۇل^۵ قۇلىنى عىساگە اوزەتەمن، دېدى-يو، كوچى بېتمەى يىقىلدى. دراو شاشە-پىشە^۶ كېلىپ، خاتىنى اېرىنىنگ يوزىگە ساووق سوو اوردى، باشىنى ياستىققە جايلىتىردى. سرىمساق نىنگ بىر دانەسىنى ارچىپ، سووونى ماموققە سىقىپ، بورنىگە توتىپ توردى. بىر ياغى سىتىلگن راق بېلىغىچى^۷ بىلن بېلىپى كېتدى. كۇپ اۇتمەى، قرىنداش-اوروغ، قۇنى- قۇشنىلر ياپىرىلىشىپ^۸ كېلىشىدى. بىرگەلەشىپ، باى حاجىنى تېزلىك بىلن داكتىرگە آلىپ باردىلر.

^۱ عىبسىنماق: بىر آز عىلنماق.

^۲ ترمىشماق (تىرمىشماق): محكم بايشىپ، چىرمەشىپ، يوقارى كۇترىلماق، يوقارىگە چىقماق؛ محكم اوشلەماق، بايشماق.

^۳ قارەتىر (قارەمتىر): قارەگە مايل، آچ قارە، سل قارە.

^۴ تويقوسدن: بېخواستىن، قۇقسىپىدن، كوتىلمەگندە.

^۵ سۇل: چپ.

^۶ شاشە-پىشە: شاشىلىغىچ روشدە، شاشىگن حالدە.

^۷ بېلىغىچ: بېلىپىدەىگن نرسە؛ پكە، باد پكە.

^۸ ياپىرىلىشىماق: كۇپلەشىپ، گلە بۇلىپ كېلىپ باسماق؛ ھجوم قىلماق، كۇپلەشىپ كېلىپ توشماق.

كسلنى بىرگەلىككە كۆتۈرۈش، داكتىرلىق مەنەن خانەسىگە ئالىب بارىشىدى.
 اېگىنىگە اق چاپانىنى ايلرکن دوكتور:

- نىمە بۇلدى باى حاجى؟ -دقت بىلن قۇل تامىرىنى اوشلەى تورىب، اۋلچەگىچنى شىلەى^۱ باشلەدى، -قان باسىمىزنگىز بلند؛ قندىنگىز هم يوقارى؛ يورەك اورىشلىرىنگىز ناساز؛ اىسىغىنگىز هم بلند، دېدى داكتىر و جايدە دارىلردن اىكى تابلت اىچىردى و چوقور-چوقور نفس آلىشگە بووردى. باى حاجى هوشلى- هوش سىز حالتدە بىر قرەب، تىغىن كۆزلىرى يومىلدى. حاجى داكتىرگە بارىشنى خوش كۆرمىسى. «يۇق!» -دېيىشگە تىلى آىلنمەى، اېمچى^۲ كۆرىگىدە^۳، تخت اوستىدە ياتىدى ناچار.

شوندن كېىن حاجى بۇبەنىنگ كۆزلىرى آچىلىب اۋزىگە كېلە باشلەدى. او اىسىتمە ارەلش دلىنى يازدى:

- رۇزە آلدىدن شونقە بۇلگىنم يخشى بۇلمەدى داكتىر جان، پلەكت. يىغمبر ياشىمدەمن. بىر كون هم رۇزەم قۇلدىن كېتمەگن. شوندن كېىن آيتىنگ رۇزە توتەيمى، يۇقىمى؟ اۋلىب كېتمەى تىغىن.

- مېن علم بىلن شغللەنمەن حاجى بۇبە. اۋقىنگىلرىمنى آدملىرگە تطبىق قىلەمن. انسانلرنىنگ دردىنى آلەمن. رۇزە حقىدە بىر نرسە دېبە آلمەيمىن سىزگە. يخشىسى، سىز كېچ پىت ساعت بېش-آلتىدن تا اېرتەل ساعت تۇقىزگچە هېچ نرسە يېمەسنگىز، اىچمەسنگىز توزوك بۇلەدى. اما آزگىنەدن اىسىق سوپوقلىك اىچەسنگىز فايدەلى... وزىنگىزنى كمەيتىرىنگ. انسان گودەسىنىنگ ىرمىدن كۇپىنى سوو تشكىل قىلەدى. سوو يېتمسە تنە سۇلىيدى. بدنن سوو قاقمىسلىگى كېرەك باى بۇبە.

^۱ شىلماق: اجرەتماق.

^۲ اېمچى: اېملاچى طبىب، همشېرە.

^۳ كۆرىگىدە: شكلىدە، قىافەسىدە.

- ابى توبە قىلدىم اي! بو قنداق گېدى، اپندى اېشىتىشىم! يره تگن اېگم رۇزەنى چىقرگندە، شو سىز ايتگن تامانىنى حسابگە ائلمەگن اېكندە، قۇيىنگ ابى. بىلمەدەم سىزگە ايشانەيمى، خداگەمى؟ اۋرتەدە آخرت بار داكتەر جان. بو گۇر عذابى، قېرىنىگ قىسىشى، منكر-نكر، دۇزخ، ايلان-چيانگە بېم بۇلىشدىن قۇرقەمەن داكتەر صاحب. اجازە بېرىنگ رۇزەمنى توتەي... اۋلىسم اۋلە قالەي، يۇق بۇمەيدى، داكتەر جان بۇمەيدى توتەسم!

- مىلى، بو سىزىنىگ شىخى ايشىنگىز، توتگىنگىز كېلسە توتىنگىز. بىراق، شو مېن ايتگن پىللەردە بىر نرسە بېمەنگىز يىخى بۇلەدى. بونى ساغلىغىگىز اوچون ايتەمەن. كېچەلرى اش قازان دم االىشى كېرەك. مېيە فعالىتى اسان كېچىسىن، قان هم اۋز مرامىدە^۱ اىلىنىن، خوشمى؟

باى حاجى اۋزىنى بىراز يىخى حسن قىلرکن، داكتەر بىلن مسالە تەلشگىسى كېلىب، گېنى چۇزەبېردى. داكتەر كسل بىلن اوزاق سۇزلەشىب اۋتېرىشگە وقتى بارمى؟ گېنى قىسقە قىلىب قۇيدى. و آخرگى سۇزىنى مەنە بو جملەلر بىلن توتگىدى:

- ساپە-ساغ بۇلىب كېتەسىز، تۈزلەسىز، -دوكتور قولى بىلن كسلنىنگ پېشانەسىنى سىلەياتىب، -اۋزىگە قرەنگ، همەسى يىخى بۇلەدى. اۋزىگە تۇق انسان اېكنسىز، مثبت اۋىلنگ. دنيا كۇرگن، كۇپ نرسەدن خبردار انسان اېكنسىز و يىخىلىك قىلىشدىن تارتىمنىگ. مېيەنگىزنى اېزگو ايشلر قىلىب، اذوقلتىرىنگ.

- گېزەدە جان بار داكتەر صاحب. -يوشەگن بۇلىب، دوكتورنىنگ ايتگىنىنى تصدىقلەي كېتدى، -چىندەم بونى قرەنگ، افطارلىكدە بىر بۇكىب بېسك، اوچ ساعت اوخلر-اوخلەمس، يەنە زمبىل^۲ دېك قىلىب قارىنىنى تۇلدىرسك. اېرتە تانگدن كېچىگچە اۋن التى ساعت اچ و قىنجىر تېپە تشلب ياتىب الىشدىن اۋزگە نېمە ايش

^۱ مرام: بىر ايش، فعالىت ياكە جرياننىگ معيارى اولچاۋى؛ معيار.

^۲ زمبىل: زمبر، غلتك.

بار؟ باشقە نېمە ھەم قىلردىك؟ خدانىڭ ايتگىنىنى قىلىپ يشەي بېرەمىز... بىزگە قالسە بو دنيا مەھەم اېمىس، آخرت-نرگى دنيانى اۋىلب يشەلرېنگ، -دېب اۋرگتېشىگن بىزگە...

حاجى اويگە كېلدى، يەنە اغىرلشدى. ايسىتمەسى بلند، الجىرەب تورىدى. اېرتەسى رۇزە. باي حاجى ھنوز ھەم رۇزە توتىش فكىرىدە تيارگرلىك كۇرىب قۇيگن. خيالى نېنگ بىر چىتىدە «گۇزل حيات، بختيار كونلر، يارىغ عالم، بې مانت حيات بخش قوياش استىدە اېمىس؛ قارە يېرنېنگ تگىدە» -اونىڭچە. يورەگى حيات اوچون اېمىس؛ نرگى دنيا اوچون تېپەدى. نېمە قىلسە ھەم جنت نعمتلرېدن بې نصيب كېتمەسىن.

اېرتەگە رۇزە. كۇنگىلدەگى دېك دسترخوان بېزەتېلىشىنى اىستەيدى حاجى. اېرتەسى شام نمازىگە بارىشنى آرزو قىلدى، علاجى يۇق-دە. دسترخوان اوستىدە يۇق نرسە نېنگ اۋزى يۇق. حاجى رۇزە نېتى قىلدى. بىلك باشىنى تورىب، غىرتگە مېنىب، «اونچە-مونچە كىسلىككە قۇل اوشلتمەيمىن»، -دېگن اۋى بىلن رنغا-رنىڭ يېگولېك و اىچگولېكلردن تناول قىلە باشلەدى. قاورىلگن قۇزى گۇشتى-يو، بېقىردەگن شۇرە، دىلمە، كىباب و پىلاولردن بابلب توشىردى. شىرىن-شېرت سولردن باسىب اىچدى...

اىكى قوتلى اويده سلقىن شمال اېسىب تورىدى. بىراق، قۇشنىسى نېنگ اويده اېسە جىم-جىت ساكنلىك. گۇيا بىر ياققە كۇچىب كېتگندەى اولر. چىراق سىز اويده ناچار، آقشامدن آچ-نھار ياتگن قۇشنى نېنگ حالى نې كېچدى اېكن؟ ھىچ كىم بىر نرسە بىلمەيدى. حاجى بى بى خىر و صدقە اولشەى دېسە، اېرىدن قۇرقەدى. يشىرىب، بوسىب بۇلسە ھەم بو آقشام يەنە بىر تىباق آش-اوقت اېلتماقچى ھەر نە...

حاجى بى بى اېرى نىنگ بو كىبى اوقتلانېشىدىن جدى خواطرلندى. «ترسه يارلىب، اۇلىب كېتمەسىن يىنە» -دېگن اۇيگە ھم باردى. «بونىنگ اۇلىگى ھم تىرىگى عذاب» -دېدى لىلرى پىچىرلپ.

- آتەسى، سىزنى آیتەمن! ھلى سحرگە يىم تورەسىز يىنە. يېتر، بۇلدى قىلىنگ پىيشىنى، -دېدى خاتىنى.

- شو كاسەدەگى ساووق سوونى آلىب بېر خاتىن. خدا قبول قىلسە باشىمىزگە ئوابلر ياغىلەدى يا نصىب. سحرلىكنى ھم غىملب قۇيگىن. بو اولوغ كونلردە يىخشى نىت قىلىش يىخشى، بىلدىنگى خاتىن دېركن، -تمشەنىب^۱، اۋرنىدن جىلگىسى^۲ كېلمەدى، ياتەپردى.

حاجى بۇبە ايكى قېت كۇرپەچەدە اۋتېرر، سېمىز ياستىققە يىناشلر اېكن، اويىشگن آياقلىرىنى يازىشگە اوزەتدى. قۇلىگە قىزىل گۇل شفتالو رۇمالىنى آلىب قارە تېرنى آرىتدى. او آخرگى لقمەلرنى تاماغىدن اۋتكىزىب، لب و لونجىنى سچاق بىلن آرىتىب قۇيدى. اۋنغە يىسىزلىنگىدىن^۳ تورماقچى بۇلىب، حركت قىلدى-دە، بىراق اۋرنىدن تورە آلمەدى. خاتىنى قۇلتىقلىب، سوپ^۴، يان اويگە آلىب بارە ياتگندى. ھىسىرە گىچە^۵ خاتىنى نىنگ قۇلىدن بۇشب، اوى نىنگ بىر چىتىگە آغەن ب توشدى. تقىر-توقور بۇلىب، اوى بورچىگىدە امانت قۇيىلگن تاواق اشى ھم بىرگە ساچىلىب كېتدى. اچىغى چىقىب، «آشلر بو بىرەدە نىمە قىلەدى؟ لعنتى قىنجىق!! شونداغ كوندە اوست-باشىمنى رسوا قىلدىنگ» -دېدى باى حاجى.

^۱ تىمشىماق؛ تاتگىسى كىلىب، لب-لونجىنى قىمىرلىتماق؛ لىلرنى آچمەى چىنەماق.

^۲ جىلماق؛ جايدىن قۇزغىلماق، سىلجىماق، سورىلماق.

^۳ اۋنغە يىسىزلىتماق؛ اۋنغە يىسىز حالگە توشماق، خجالت تارتماق.

^۴ سوپەماق؛ بىرار بىرىدن توتىب، كۇترىب مدد بېرماق، ياردەم بېرماق؛ قۇللەماق.

^۵ ھىسىرەماق؛ يوگورىش، آغىر يوگ كۇترىش، هوا يىتىشمىلىگى، ھىجانلىنىش و شو كىبلر طفىلى تېز-تېز، آغىر

نفس الماق؛ ھىلاسلەماق، ھىسىللەماق.

^۶ قىنجىق؛ فاحشە، بوزوق خاتىنگە نىسبەتاً ايشلەتيلەدىگن حقارت سۇزى.

حاجى بى بى قۇشنى سىگە آلىب بارىب بېرماقچى بۇلگن آشنى - سېزدىرمىسدىن
اېرىنى چلغىتىدى. اۇنگلەنىب تورماقچى بۇلگن حاجى تىزەلنگن جايدە گورس اېتىب
تغىن يىقىلدى...

- اې خدايىم نىمە بۇلدى سىزگە حاجى، اۇزىزنى توتىنگ! - دېدى خاتىنى.
حاجى نىنگ بوتون تنەسىنى ساووقلىك چىرىمب آلدى. «نىمە بۇلدى اۇزى، حاجىمدىن
اجرەلدىم؟!» - دېيە قىچقىردى حاجى بېكە. قۇلى يىلن اېرىنىنگ يوزلىرىنى بىر قىتە
سىرمەلب¹ نىمە بۇلدى سىزگە، اۇزىزنى اوشلنگ»، آتەسى، دېدى، اۋپكەسى تۇلىب
يىغلب يوباردى.

بىراق، باى حاجى بۇبەنىنگ تىلى سۇزگە كېلمەى، كۇزلىرى آچىق قالدى...

(قىتە ايشلنگن ورىنتى)

مى آيى، ۲۰۰۱

تاشكېنت

¹ سىرمەلەماق: آخترماق، قۇلنى يوگوتىرماق، سىلەماق.

توى و عزا

تۇى و عزا

ياغمير ياغيب، يېر كوپچىب^۱، ميسه لرينىڭ قولاغيدىن قوياش قىتىلب تارته باشلەگن كونلر ابدى. ايليق شمال چىڭ-تۇزانگە ايله نىب كېتىدى. بىر چقىرىم نەرىدە قويون كۇككە اۇرلب، خودى اۇشە تېورە كدەگى اۇتلب يورگن قارە ماللرنى دمارىگە تارتىب يوبارگندەى بۇلدى. سەھل اۇتېب قوم ياغدى، گىبذلى تاملر اوستىگە قوملر نىڭ سېپىلب ياغە ياتگنى اېشىتىلدى. ايزىدىن داوول^۲ كۇترىلب، سوو بۇشەگن چېلكلرنى^۳ جىرنگ-جورونگە تىب، اغدەرىب تشلەدى. قسىر-قوسور اېشىكلر بىر-بىرىگە اورىلدى، اچىلب ياپىلدى. اېشىكلر ترەقىلەشىدىن بىر-ايكى آينه ھم سىنىب توشدى... خىرىت بىر پەسدىن كېىن ماما قوياش جىلمە يىب^۴ قۇيدى. ھر توگول^۵ تېورە ككە سلقىن ترەلىب، كۇنگىل چىگىلى يازىلگودەى ھوا بۇلدى. طبعىت

^۱ كۇچىماق: شىشماق، بۇرتماق، شىشىب كۇترىلماق؛ يېتىلماق.

^۲ داوول: ۱. وىرانلىك كېلتىرووچى كوچلى بۇران. ۲. اۇچىلر، تۇپچى قاراووللر ياكە حربىلر اوچون مۇلجىلنگن، تېرىدىن ياكە فۇلاددىن يىلگن مخصوص ناغارە (ناغارە قاقماق، چلماق). ۳. قىتىق، دەشتلى آواز چىقماق، گومبورلەماق؛ بانگ اورماق.

^۳ چىلك: اساساً سوپوقلىكلرنى سقلىش، تشىش اوچون خذمت قىلەدىگن، سلندىر شكىللى، باى سىمان بندلى ايدىش؛ پقىر.

^۴ جىلمە يماق: تېسىم قىلماق.

^۵ توگول: رقم، نوع، تور (ھر توگول: ھر خىل)؛ نرسە، كىمسەنى گىنە اېمس، بلکہ؛ او ياقدە تورسىن، حتا.

اينجىقلىكلرى^۱ تۇى بىلن باغلىق خورسندچىلىككە تائىر قىلمەدى. قودەلر اۋرتەسىدە انچەدن بېرى كېنگشلىگن تۇى آخرى اۋتەدىگن بۇلدى. «كېلر جمعهگە»، دېب انىقلشيب قۇيدىلر. يان شەردن كېلن توشىرىلەدى. شەرلر ارا قودە-اندەلشو بۇلەدى. گپ سېوگى بىلن مرادبىكلرنىنگ تۇى حقىدە! ...

۲

«قرىسى بار اوىنىنگ پرىسى بار» -دېگن مقالگە بېرەم بى بىنى اۋرنك دېسە بۇلەدى. تۇقسان اوچ ياشنىنگ اچىق-چوچوك مېوھلرېنى يېگن بى بى، اوغىل-قىزلىرى، نېرە-يو چېرە، قۇنى-قۇشنىلرى تامانىدن اعزازدە. تۇىنى سېمىز دعالر بوركشگە نېمە يېتىدى؟ اۋنگلرىدە خېرلى ايش توريىدى. كتە-كىچىك خذمتدە. اودومگە كۇرە تۇى-تماشا كونلردە تېرگ ياشلى قىرىلەردن اق فاتحه اىلب قالىش بو عايلە اوچون اېزگولىك سنەلەدى. بېرەم بى بى مەيىزدېككىنە سرغەيىب توريىدى. اېتى سويگىگە يايشىب، يوزلىرى چۇكىب، بېلى بو كچەيىب قالگن. تۇرلب كېتگن يوزلرېگە قول سونركن، كۇكىمتير تامىرلىرى يقال كۇزگە تىشلىنېب تورەدى. غاو اجين آرەلەگن يوزلرېدن مىنگ بىر واقعه-حادثة سۇزلب تورگندەى گۇيا. نې-نې اق و قارە كونلر باشدن كېچىرگىگە آپاق ساچلىرى، سۇلغىن كۇزلىرى-يو قۇلى كفىدەگى اېنلەمە-بۇيلەمە^۲ توشگن چىزىقلر تانىغ^۳. بېرەم ماما قولاقلىرى آغىرلىشگن اېسە-دە كۇزلىرى بىر آز كۇرە آلەدى. سۇزلىرى چىنېب گېرسە-دە نېمە دېگىنىنى توشونىش اونچەلىك قىين اېمس. «ش» تاووشىنى تىنىق ایتە آلەمى، قارىشتىرىب «ھردمگە سوکور» -دېدى. اىچكرىگە تارتگن قباقلرى آرتىدن ينە ايكى سوزوك

^۱ اينجىق: اونچە-مونچەنى ياقتمەيدىگن، ايتىگنكە كۇنەوېرمەيدىگن؛ سېرخرخش؛ تشووش-خرخشى كۇپ؛

مشتقى؛ اۋزگرتىرووچى، بىر خىلدە تورمەيدىگن.

^۲ اېنلەمە-بۇيلەمە: افقى و عمودى، اېندن و بۇيدن باشلنگن. اېنلەمە-بۇيلەمە چىزىقلر: متقاطع خطلر، بىر-بىرىنى

كېسووچى چىزىقلر.

^۳ تانىغ (تانيق): شاھد، گواه.

كۆزى دقتنى جلب قىلەدى. سەھل كەم بىر عصرلىك حىيات مەنە شو ماوي شىشەلەر آرتىدىن كېنگ عالمگە معنالى باقىب تورگندەى. تىلى نىنگ اوچىدە: «ھەى انسانلەر اۆتكىنچى حىياتنى غنىمت توتىنگ؛ غم-قىغوگە اېشىك اچمىنگ، بو بېش كون دنىيادە مەھمانمىز. قووناق ىشىنگ، بىر-بىرىنگىزنى خفە قىلمىنگ» جملەلرى تىقىلب كىلەدى-دە نىمە قىلسىن بلند تاووشدە بۇر-بۇر آتە آلمەدى...

۳

بو خاندانگە كېلىن توشورلىشى كېرەك. تۇيگە تيارگرلىكلەر اللە قچان باشلەنىب كېتىگن. وقتىدە مەراسمگە چارلاو-چقىرىقلەر قىلىنگن. آيتىلە يانگن بېرلەر آيتىلگن، مەھمانلەر بىرىن-كېتىن كىرىب كېلە پىدىلەر. بېكەلەر باشىدە تاغارە، دسترخوان كۆترگن خاتىنلەرنى كوتىب آلىشماقەدە. اېر ككلەر ھەم نرى-بېرىدىن كېلە تورگن آتلىق مەھمانلەرنى خوش قارشىلمەماقەدە. «اۆتىنگ-اۆتىنگ، اچىكرىگە، تۇرگە اۆتىنگ» عبارەلەرى تىلدن توشمە پىدى. تۇيدە تۇپلەنىشىگن قىز-بالەلەرنىنگ قىقىر-قىقىر كولىگىلەرى جىرنگ ساچە ياتىر. «كېنىگى تۇى سېنىكى كىمىيا!؛ يۇق سېنىنگى غىبەر، يۇق-يۇق سېنىنگى گلبھار...» -دېيە بىر-بىرلەرنى تورتىب، خاخە-خاخە كولىگى كولىگن. بوندەى اۇيىن-كولىگىلەرى تۇيگە غلىحدە فىض غىشلب تورماقەدە. تۇى بۇلسە شونداق بۇلسىن-دە!

باشلەرى آچىق، ساچاغى^۱ قويموچى^۲ اوستىدە تۇلغەنە ياتگن قىزلەر ىسن-توسن، بېزەنىشلەر بىلەن آوارە. آھھەھە! بۇى قىزلەرنىنگ مستانە تاولەنىشلەرى بىگىتچەلەرنىنگ يورەگىنى سوغىرىب آلەى دېيە پىدى. ھىجاندىن: «اۆلەى، اۇرگىلەى، داد-آه كۆزلەرنىنگىن!!!!» -دېيىشگە قنى تىل؟ چىلدىرەملەر^۳ تاووشى آستىدە «ناى-ناى» آيتىب، اۇيىنگە توشىشلەرى تۇيىنى تابارە قىزىتماقەدە اېدى. بۇيىنلەرىدە لاويللەگن

^۱ ساچاغ: باغىچ، قىتەك.

^۲ قويموچ: گۆدەنىنگ بېل بىلەن دومغزە اۇرتەسىدەگى ارقە قسىمى.

^۳ چىلدىرەمە: ياغاچ گۆدشگە تېرى قاپلەب ىسلگن، چېرتىب چلئەندىگن موسىقە اسبابى؛ دايرە، چىرىمىندە، دىف.

مونچاقلر، قولاقلردە يلتیراق سیرغەلرینینگ جرنگی-یو، برماقلردەگی اوزوكلر، بیلک اوزوكلر یانیب تورر، تیرناقلر قیپ-قیزیل قویوق قیلیب بۇیلگن. قۇل كفلریدەگی قیزیل-قۇنغیر توسلی خینه ییگیتلر كۇزینی اؤینتمە ی قۇیمەیدی. خاتین-قیزلرینینگ قیزیل-یشیل، رنگمە-رنگ کییملری تۇیخانەدە چمن آچگن کبی. توی دېسە - توی! هههه!!! دایرەلرینینگ گیزدەلە-گیزدانگ صداسیدن تۇیخانەگە کولگی-شادلیک یاغیلیب توریدی. شۇخ-شنگ کیینگن قیزلر بیرگە لشیب:

«کېلین کېلر یار-یار!» -قۇشیغینی آیتیشە یاتگندی. کیتیدن کستلردە: «تۇبانە قیلینگ»، «اۇلنگ-اۇلنگ»، سۇغین «چیمیلدیغینگ چپ-چینار»، «زلیخا جان جیگی-جیگی»، ایزیدن «مریم جان» قۇشیقلىرى ینگرەماقدە. قۇشیق کیتیدن قۇشیق.

کېچگە باریب، قیزیقچیلر شلایلنیک^۱ آیتیشەدیلر، سازندە و قۇشیقچیلر کوی اجرا آلیب، نوا قیلیشەدی. بولر هلی باشلمەسی همە قالگنی آلدیندە، ینه اوچ-تۇرت ساعتدن سۇنگ باشلنیب کبتهدی بری. قۇشنی حاویلیدە بخشی^۲ سنەتیش هم رېجەلشتیریلگن...

۴

بیرەم بی بی نی آق کیینتیریب، آیواندە اۋریندیقدە قویاشگە قرەتیب اۋتقیزیب قۇیدیلىر. «سیزی یاشینگیز نصیب قیسین» -دېهە سو یونگنیدن خاتین-قیزلر مامانی بیر-بیر قوچاقلب قۇییشەدی. بیرەم مامانینگ یورەگی تۇلیب بیر نرسەدن خواطرلنگندە ی ابدی. مییه سیدە: «یورە ییم بېزاوتە، شاد کونلر یزنی تارتیب آمەسەلە، دېب قۇرقەمن. اطرافنی یاووز، قارە شرپەلر اۋرەب آلگن...» کبی گپلرنی تیارلب آلیب، آیتە ی دېب توریدی. تیل بیلن اېمس، آخری ایکی تامچی کۇز یاشی بیلن

^۱ شلایلنیک: قیزیقچیلیک، هزل قیلیش، طنز آیتیش. شلایلن: قیزیقچی، هزلکش آدم، طنزگوی.

^۲ بخشی: خلق قۇشیقلىرى و داستانلرینی یاددن کویلاوچی شاعر، آقین. آقین: قازان و قیرغیزلردە دېهەگۇی شاعر، کویچی و خلق شاعریگە آقین دېییلەدی.

دېدى قۇيدى... مامانىنگ تېورەگىدە نېورەلرى كېلكسىمان ايلنەدىلر. ماما بۇلسە، بوندە شادىانە و قووناق انلرنى كۇرەياتىب، تېورەككە شىرىن گىنە جىلمەيىب قۇيەدى بعضاً.

۵

كتە حاويلينى سر انجام^۱ قىلىب قۇيىشىدى. اىچكىرى حاويلى سوو سېيىب سوپوريلدى. درز كېتىب نورەى دېب تورگن اغىلخانە^۲ دېوارىگە قىزىل گىلملر توتىلدى. تاووقلرنى هم يىغىب-تۇپلپ اولكن سوت سېت^۳ استىگە سالىشىدى. حاويلىنىنگ اۇرتەسىدە سىرىق سماوار قىلقىلىب قىنەپىدى. قطار كېتىگن بىرندەلىك اويلر دېوارىگە پردەلر اسىغىلىق. كېلىن و كويو يشەيدىگن خانەدە سۇزەنلر^۴ توتىلدى و علىحده اعتبار بىلن بېزەتيلدى. كىك-كىك^۵ تۇق قىزىل بۇغجامە بىلن چىمىلدىق يسەدىلر. خاتىن-خىلج، تۇى آلدى ايشلرگە بېرىلگنچە اورىنىشەدى. شىشىرىقلر، شىرىنلىكلر يىشىرىلىب تيارلنماقده، دستورخوانلر ناز-نعمتگە تۇلە.

تشفىرى حاولى-دە تازەلەب قۇيىلگن. تشقى حاويلىنىنگ بىر چىتىدە اۇچاقلر قزىلىب، كتە-كتە قازانلردە پلاو دىلىنىب، سناقلى ساعىلردن سۇنگ اېلگە آش تارتىلىشى كېرەك. قۇيلر هم سۇيىلىب، اېتلر تۇزلىنىب، تاغىرەلرگە اۋسىب-اۋسىب تىلخندى^۶. قۇچقارنىنگ يورەك، بويرەك، جىگر، تىلاقلرى قویروققە قاووريلدى. ايدىشلردە

^۱ سرانجام: همه نرسه ترتیبگه سالینگن، جای-جاییده، به ترتیب؛ آریسته، آزاده، ساریشته.

^۲ اغیلخانە (اغیل): او حیوانلرنى سقلش و باقىش اوچون قوریلگن مخصوص بنا؛ مالخانە، قماو.

^۳ سېت: سید.

^۴ سۇزەنە: سیدىرىغە گزلمەگە گۇل تىكىب تيارلنگن، دېوارگە اسىلەدیگن بېزەك بوپومى؛ گۇل كۇرپە.

^۵ كىك: ۱. نرسە يوزەسىگە ایشلنگن، توشىرىلگن تۇرت بورچك. ۲. بىر سطحده گى كىچىك-كىچىك بۇلمەلر،

اويلەر، تېشىكلرنىنگ بىرى. ۳. قوشلر، تاووقلر ياكە باشقە جانوارلر تورىشى اوچون مخصوص ایشلنگن قوریلمە؛ خانە، اويچە.

^۶ تىلخەماق: بولك، تىخىگە سالیب قۇيماق؛ بولك، تىخىگە سالیب جاپلەماق؛ اوستمە-اوست تېرماق، اوستمە-اوست

قۇيىب جاپلەماق؛ قىلشتىرماق.

جوازخانەدن كنجەد ياغى ھەم كېلتىرىپ قۇيىلدى. يىياز، سىزى لىر تۇغۇر بۇلىنگن. آشپىز اۇزىنىنگ ساجىققە اۇرەلگن كىتەكان كىكىرىنى بېچىپ، آشنى باشلەماقچى...

۶

كون اۇرتە كېلگن-كېتىلگەكە آش تارتىلدى. جۇرار يىگىتلەر عزت بجا كېلتىرىپ، آش بېپ چىققىلارنىنگ ياغلىق قۇللىرىگە صابون توتىپ، ايسىق سوو سالماقەدە. يىگىتچەلەر قۇل آرېتىشگە سۇچاق توتىپ قرەشماقەلەر. آشدىن بۇشەگىلەر ساجەلە سالىنگن تۇي رۇمالچەلرىنى چۇنتىكلرىگە سالىپ اويلرىگە روانە بۇلىشەپىكىندى. ايككى ساعىتگە يېتمەي اوزاقدىن كېلگىلەر ترقەلىشىدى... يقىنلەر اېسە، تانگ ائگونچە تۇي ايشلىرى بىلەن بىند بۇلىشەدى... بزم باشلىنىپ تانگ ائگونچە دوام اېتەدى ھلى. بىقىر-بىقىر قىنەياتىگن سماواردن كېيتى اوزىلمىسدىن چاي دىملىنىپ مېھمانلارگە تارتىلماقەدە. لىكايچەلەرگە^۱ نۇقل، چاكيلتلەر سالىپ قۇيىلگن. قالىنلەر اوستىدە يانباشلەر يانگىلردىن اېرىملىرى قورىللىتگىنچە چىلىملىرىنى توتەتەپ، خمارلرىنى يازماقەدە اېدى.

۷

قوياش اېندى-اېندى باتەي دەپ تورىدى. اطراف قىي-چوو بۇلىپ كېتىدى. بالەلرنىنگ تىللىرى اوچىدە «كېلىن كېلىدى» بۇلىپ قالدى. آدملىر گورە كۇترىلىپ، كوچەگە چىقىشىدى. قرەسەلەر گۇلپۇش قىلىنگن مۇتردە كېلىن-كوياونى االىپ كېلىشەپىدى. اولرنى تۇيچىلەر كوتىپ االىشىدى. دىف-دايرەلەر يىنگراغى ااستىدە كېلىن-كوياونى كۇچەدىن حاويلىگە االىپ كىرىشىدى. سىتىنگ^۲ يىگىتلەر سوينچى^۳ االىش مەناسىدە سلە توتىپ يۇل تۇسدىلەر. كىملىرىدەر كېلىن-كوياونىنگ اياقلىرى ااستىگە ياغىن ياققىندەي قىلىپ سوو سېپىشىدى.

^۱ لىكايچە: تۇگرەك شىكلىدە، يىسى، قىرغاقى كۇترىلگن مېدە چىنى ايدىش؛ شىرىنى دانى.

^۲ سىتىنگ: پرداز-اندازگە، كىيىنىشگە زەب بېرگن؛ اۇزىگە خاص غرورگە اېگە كىشى؛ كاكە.

^۳ سوينچى: سېويتىرووچى ھىدىە. (سوينچى - مېمىنە شېوھسىگە خاص)

شو پەيت قوتلۇغ آيە^۱ شاشىلىگنچە يۇگىرە سالىب: «سېزنى آيتەمن، سېزنى آيتەمن»
 -دېيە برماقلىرى بىلەن اېرىنى تورتدى.
 - نىمە گپ خاتىن؟ -دېدى اېنغەنن قىافەدە سلطان باى.
 - اېيى! نىمە بۇلردى؟ مامە كۇز يۇمدىلر.
 - نىمە دېيسن خاتىن؟ -حىرت ايله تىكىلدى اېرى.
 - آنە يىز اۇلدىلر.
 - اۋپكەنگنى باس! باشقە گېيىنگ يۇقىمى سېنى، ساغ اېدىلر كو!؟
 - اۋلەي يالغان آيتىسم. يورىنگ-يورىنگ بو ياغىنى يىغىب آلەيلىك اېندى.
 كېلىن-كوياودن آلدىن اېر-خاتىن بىرەم بى بى ياتىن خانەگە باش سالدىلر. نې كۇز
 بىلەن كۇرىشىسەن كە تۇستىن مامانىنگ ياتىن جايىدە جانى اوزىلگن. اۋغلى
 آنەسىنىنگ يوزلرگە كۇزىنى سورتىب، «راضى كېتىن بۇلىنگ آنە جان» دېدى و
 تىسرىلىپ ارقەگە قېتىدى. شوندىن سۇنگ تۇيخانەدە غلطى فضا پيدا بۇلدى. بىر
 ياقدە جۇشقىن تاماشا، بزم و خورسندچىلىك، بىر ياقدە ماما عالمىن كۇز يۇمگن. بو
 وضعىتدە سلطان باى بىر نىمە قىلىشى كېرەك. تۇى، عزا بىر كونگە كېلىپ قالسە
 قىيىن بۇلركن. سلطان باى برماقلىرىنى چىككەسىگە توتركن بىر زوم خيالگە چۇمدى.
 «سېنگە آيتەمن خاتىن، آنەنىنگ اۋلىمىنى اېرتەگچە هېچ كىمگە آيتمە!
 توشوندىنگمى؟» -دېدى- يو تۇى ايشلرى بىلەن قارىشىب كېتىدى...

كېلىن-كوياونى موسىقە صدالرى آستىدە آلىب كېلىپ سوزىلتىرىپ قۇيىشىدى. قوتلاو
 سۇزلرى، «كېلىن سلام» بۇلدى و «سلام-سلام» قىلىشلىر دوام اېتىدى. تىلكلر
 بىلدىرىلدى. ساز، كوى و قۇشلىقلر اۋجىدە. ياش-قىزلر، بالەلر رقص، اۋيىن-

^۱ آيە: آنە، آيى.

كولگىلرگه غرق. ايمى-جيميدە^۱ قىزمى چاينكلرگه عرق^۲ ھم سالىنىپ، ايجىلماقده. بزم و تماشاشا تانگ آتگونچە چۈزىلدى. اپرتەلب، حاولى بۇشب قالدى.

۱۰

كېكسەلر، آقساقاللر يىغىلىشىدى. اوزاق-يىقىنگە جنازه خبرى كېتىدى. كفنلىك سرشته قىلىنگن اېكن. گۈر قىزىشگە بورىلدى. ساعت بىر اطرافىدە جنازه اۇقىلدى. كتە يۈلگە كوزەتتە قۇيىشىدىلر. تېرگ ياشلى اولوغ ماما - مرحوم بىرەم بى بىنى توپراققە تاپشورىلدى. تۈى آرىشى بىلن شو حاولىدە فاتحە اۋتكىزىش مراسىمى باشلىنىدى... مرادبېك و سېوگىلر بىر ھفتە اۋتتە، مامانىنگ مزارىگە بارىپ احترام معناسىدە يوكوندىلر^۳ و قۇللرىدەگى بىر-بىر قاودە^۴ گۈلى مزارىگە قۇيىشىدى. «اېندى خىر، تىنچ ياتەبېرىنگ ماماگىنەم» -دېيە الوداع سۈزلرىنى آيتتەرتگە قىتدىلر.

۲۰۱۵/۹/۱۵

توراننو - كانادا

^۱ ايمى-جيميدە: نرىدن-بېرى، بىراو بىلىپ، بىراو بىلمەگن طرزده؛ ايلق-ايسىغىدە، فرصتى قۇلدن بېرمەي؛ داوروق سالمىدن، ھمەگە كۈز-كۈز قىلمىدن، بىنگ ايجىدە.

^۲ عرق: شراب؛ سوو بىلن وينا آره لشمەسىدن عبارت ايجىملىك.

^۳ يوكونماق: تعظيم قىلماق؛ اۋتتەبىر مراجعت قىلماق، التجا قىلماق، يالوارماق.

^۴ بىر قاودە: بىر باغلم، بىر دستە، بىر توتەم.

قوش بقه تبره ک

قۇش بىقە تېرەك^۱

ياز آيلرى، عىنى پىشپىقچىلىك پىتى. يىغىم-تېرىمگە شاشىلەياتگن كونلر اېدى. آدملر اۈز باغلىرىگە كۈچىب بارىب، كپەدەمى، چىلەدەمى، تۇرت دېوار اوستىگە بالار قۇيىب، پاخال سالىبمى، ياكە اۈتاو^۲ قورىبمى يىشب كېلەياتىر اېدى. ايش-يوموشلر يىدن چرچە گنلر يولدوزلى ساكن كېچەلر آغوشىدە تامىرلر يىدن آغرىقلىرىنى قوۋەياتىب، تىن آلىشردى. انسان طبيعىت يىلن اويقىش^۳، ھماھنگ نفس آلەدى... آغىر و قاپ قارە ياپىنگن تون زىل^۴ محنتىدن تالىققن كىشىلر تنەسىدن ھاردىقلىرىنى سۇرىب آلەياتگندە. گۈدەلر يىدە يىغىلىب قالگن چرچاقلىرى تۇكىلگىچ، تانگ آقرمەى تورىب، جانزاد يىنە ھمىشەلىك ايشلرىنى بجرىشگە آتلەيشەدى. ايشگە قارىلىب، ايش يىلن تىنمەى آلىشىب يشەياتگن انلر اېدى اۈشە دملر.

مىرزا باى انچە يىللر بورون ايشگە كىرگن، اونىنگ ايش جايى بالە-چقەلرى يىشب تورگن يىردن بىر آز اوزاقراقدە. او چمەسى قىرق چقىرىمچەلىك^۵ يۇل باسىب،

^۱ بىقە تېرەك: تېرە كلرنىنگ تروە قەيلىب (ھەر تامانگە يايلىب) اۈسەدىگن، تالداشلرگە منسوب تورى، قطار تېرەك.

^۲ اۈتاو: كىگىز كىيى بىنگىل كىيلردن يىلگن كۈچمە اوى، تورر جاي.

^۳ اويقىش: بىر-بىرىگە نھايىتدە يقىن، اۈخشش؛ ماس، مانند، اويغون، كىي؛ يرەشگن.

^۴ زىل: يىردن اوزىب بۇلمە يىدىگن درجەدە آغىر؛ كىشىگە آغىر باتەدىگن، آغىر تېگەدىگن.

^۵ چقىرىم: مەترىك اۈلچاۋ سىستىمى قىبول قىلىپىنگونگە قدر قۇللنگن، ۱،۰۶ كىلو مەترگە تېنگ قدىمگى اوزونلىك اۈلچاۋ

بىرلىگى؛ بىر كىلو مەتر.

ولايت مركزىگە بارىپ، او يېردە بىر آى، بىر يېرىم آى ايشلىب، خاتىن-بالەسىدىن خبر آلگنى اتيگى^۱ اوچ كونگە رخصت سۈرەب كېلەدى. سوو تۈلىپ آفەياتگن اريقدن كېچىپ اويگە كىرلەدى. ميرزا باى اوى ايوانىگە سايە ساليپ تورگن توت درخت آستىگە كېلىپ چۈكىلدى. حال-احوال سۈرەشەياتىپ، سېر مغز كۈرپەچەدە تىرسكلەدى. انچەدن بېرى آتەسىنى ساغىنگن بالەلر چوغورلەشىپ، تېوەرگىنى اۋرەب بۇينىگە آسىلدىلر. آتە قۇل اوزەتىپ يان چۈنتىگىدىن، قارە كۈزلرگە آتب آلگن مەيىز و شۇر قندلرېنى اولشدى...

بىر قىتىم هوا يۇق كە آغىر دىملىكنى^۲ يارىپ، سلقىن گىنە يېل ترەتسە. درخت شاخەلرېنىنگ قىمىرلىشگە مجالى يۇق. قوباش تفتىدىن بورموشىپ غىچىملنگن يىراقلر يازىلە آلەمى قىينەلىپ تورىدى؛ لېكن چىدەسە بۇلەدى. بىر يوتىم هوا يېتمەياتگندەى اۋىنقىراق بالەلرېنىنگ شوخ-شىنگ شاقىنلرې اېلكەسىگە سۈلەيىدى. تاكلر، گللر، شاخ-شېلر اوزرە اوچىپ-قۇنەياتگن آرلر، بىنگكلر، چىرچىرەكلرېنىنگ تاووشىگە قولاق بېرگىسى يۇق. او اوچون ھەمە حضور-حلاوت عايلەدە. چاغدن فايدەلنىپ، اۋزى توغىلىپ اۋسگن يورتىدە ايكى كونگە بۇلسىن، دم آلىپ قىتىش نىنگ گشتى بۇلكچە. قرەب كۇرسە قىشلاق نىنگ آلدىنگى حضور-حلاوتى قاللمەگندەى نظرىدە. «غچىر-غوچور چورپەلر^۳ بىلن ايكى كونلىك دىدارلشوو زنگ باسگن كۇنگىلنى يويىپ كېتركن؛ آدم نىنگ اوستىدىن خودى تاغ آغدريلگن بۇلركن» -دېردى ميرزا باى هر گل اويىدن بارىپ كېلركن. باشقە ايشىچىلر ھم شو فكردە.

^۱ آتيگى: ھەمەسى بۇلىپ، بار-يۇغى، نھايتى، فقط گىنە.

^۲ دىم: ۱. شمالسىز، شىبادەسىز و نىفسنى قىترەدىگن درجەدە ايسىق. ۲. جىم، آواز چىقمەى، گېرمەى جىم

اۋتېرىش اۋىنى. ۳. سىرە، اصلا؛ جودە، جودە ھم؛ ھىچ ھم، ھىچ بىر، تاماماً، عومماً.

^۳ چورپە: بالە، فرزند.

ايلينر-ايلينمس، تېپەسىدە اسیغلیق یېلیغیچنی آلیشگە توتیندی. بیردن کۆزی باغ اېتگیدەگی تېپەلیککە چلیندی. تیکیلیب قرەسە، ایکی قارەلیک (کیمسەمی، نرسەمی؟) اونگە تامان بیر-بیر مۇرەلب قۇیەدی. آلدین ایکیتە باش؛ کبتیدن ایکیتە اېلکە تیککەلنیب، بیر-بیر مۇلەریب^۱ قۇیەدی. خودی، باغ اېتگیدن ایکی آدم تشلنیشگە تیار تورگندە؛ پایلشە باتگندە^۲ توویلەدی. رزم سالیب قرەسە قندەدی دیر سلەلی، ساقاللی آدملرگە اۇخشەیدی. او «شو ایکی قارە شېخنینگ^۳ پستلیکدن سېکن-سېکن کۇتریلیب توشووی آدمدن باشقە نرسە اېمس» -دېگن قطعی فکرگە کېلدى. بو حالت هوشینی بند اېتدی؛ قۇرقوو باسیب، باشیدن خیالی اوچدی. «حیرانمن! نیمە بۇلر؟ یاكە، ایزیمدن توشگنمی بو کثافتلر؟» -دېگن اۇیگە باریب، تانگ قاتدی^۴. توریب تورگن جاییدن میغیدە اۇتیریپ آلدی. سېزدیرمەمی، نہایتدە احتیاطکارلیک بیلن قیمیرلەمسدن بیر زوم اۇیگە تالدى. «اولر(؟) حملە قیمسدن بورون بیر چارە کۇرەدی اېندى، بۇمەدی» -دېگن اۇی ایچیدن اۇتدی. میرزا باینی بارگن سرى قوتغو باسیب، وهیمە چولغە ییدی. دغ-دغ تیترەدی باشلەدی. تاماغى قوروب تیلی ایلنمەدی قالدى. بیر آز چۇللەدی^۵ هم، بیراق، یان گینەسىدەگی کۇزەدن بیر کاسە سوو آلیب بۇغزینی هۇلشگە قۇلی بارمەدی. مییەسى اۇتە تیز درجەدە ایشلەدی کبتدی. کیم یاكە نیمە اېکینى بیلشگە شاشلیب تورییدی. «بولر کیم بۇلیشى ممکن اېکن ای؟ اۇغریلمی یاکی، -بايەگی قارە نرسەلرنینگ باش

^۱ مۇلرماق ~ مۇلتەیماق: ۱. آیەنجلی قرەماق، کۆزنى جۆردیرەتیب، مایوسلنیب، اېزلیب قرەماق؛ جۆدیرماق. ۲. اعتبارسز، خیال پریشانلیک بیلن قرەماق.

^۲ پایلشماق: پایلەماق فعلی نینگ بیرگەلیک نستی. پایلەماق: بیرار کیمسە یاكە نرسەنینگ کبلیشینی کوتماق؛ بیرار خادەنینگ صادر بۇلیشینی، رۇی بېرىشینی کوتماق؛ تعقیب قیلماق؛ پئیدە بۇلماق؛ مۇلجگە، نسانگە آلماق، مۇلجللەماق.

^۳ شېخ: تن؛ سایە؛ اوزاقدن کۆرىنەدیگن قارەلیک.

^۴ تانگ قاتماق: تعجیلنماق، حیرت قیلماق، حیران بۇلماق.

^۵ چۇللەماق: سووگە تشنە بۇلماق؛ سووسەماق، چقنەماق.

كۈتۈرۈپ، بۇيىن چۈزۈشلىرى تېزلىشىدى، -بەندى پيدا بۇلگن باسماچىلىرى^۱ اېكىن؟...» -دېگن كۈپلۈپ احتماللارنى شاشىلىنىچ كۈز اۆلدىگە كېلىتىردى. قۇرققىدە آدمىنىڭ مېھسەسى عادتدەگىدىن كۈرە بىر نېچە بارابەر كوچلىراق ايشلىشى شوندىە پىتلردە بېلىنرەن.

مىززا باى قارە كللەرنىڭ بۇپلىشىپ قرەگنىگە باقمەى، توكل قىلىپ: «اۋلىم- اۋلىم بىر اۋلىم» -دېيە اڭگىدە رېجە توزىپ چىقىدى، بارە سالىپ، اويدەگىلرنى بىر- بىرىن اويقىدىن اويغاتدى. بالەلرى قۇرقوو سىرەب ايزى-چووگە توشدى. «قۇرقمىڭ، قۇرقمىڭ» -قىلىپ يوپتىشىگە تىلى ايلنمەيدى. يريم كېچە بۇلەياتگن كوتىلمەگن وضعىت ھر كىمنى ھم شو كويگە سالمەى قۇيمەيدى.

- آنەسى -آنەسى تور، ايكى اھووو انە او ايكى آدم انچەدن بېرى بىز تامان كېلەياتگندەى قىمىرلەيدى، قرە، قرە! اووو انە اولر، -دېب برماقلىرىنى اۋشە قارەلرگە بىگىز قىلىپ كۈرستدى.

- اېى! ياپىرىم اېى، اۋزىڭ اسرە! اۋزى نىمەلر بۇلەيتدى آنەسى، -دېيە اۋرنىدىن سېچىپ^۲ كۈتۈرىلدى تورسون اى خالە.

- نظر، تور، تور نظر! مېنى اېشىتەيىسنمى؟ -سېكىن گىنە اياغىنىڭ اوچى بىلن تەلەب، تورغىزدى كتە اۋغلىنى، -قۇلىڭگە بېلنى آل، مېنگە كورەكنى اوزەت؛ اڭنگە اۋراغنى؛ اوكەنگ و سىنگىللىرىڭگە تېمىر كاساومى^۳، بالتەمى^۴، اۋقلاو، سوپورگىمى؟ نىمە كە توشسە بىر اولرگە. جىڭ بۇسە جىڭ!!!

^۱ باسماچى: بىر اولرنىڭ مال-ملىكىنى تالوچى شىخس، باسقىنچى، باسقىنچىلىك قىلووچى. بو بېردە باسماچى مىجاد، طالب معناسىدە قۇللنگن.

^۲ سېچىماق: كېسكىن حرەكەت قىلىپ، بىرار كېمسە ياكە نرسەگە تىشلىماق، اۋزىنى (يوقارىگە) اتماق؛ سكرەماق، اىرغىماق، تۇستىدىن اۋرنىدىن تورماق؛ اىرغىب تورىپ كېتماق.

^۳ كاساۋ: اۋت، اۋونى تۇغرىلىش، تارتىش و شو كېيلر اوچون ايشلتىلەدىگن ياغاچ ياكە تېمىر تىاق.

^۴ بالتە: تىر.

جايدىن آتېلىنىپ^۱ تورگن نظر بىردن آتەسىگە:

– آتە نېمە بۇلدى، توش كۆرەيپسىزمى؟! يۇغ اې باستىرىقلە دىنگىز^۲ آتە! قنى دشمن؟! قى ياقدە توريشىيدى اولر؟ –دېب، ينە ياستىققە باش قۇيدى.

– بۇلە قال دېيىمن، وقتنى قۇلدىن چىقرمەي يوگور بالم، پلوان ابەنگنى هم خبر قىل. يونس قارەنى هم اويقىدىن اويغت، –دېدى يورەك هاووچلەگن ميرزا باي بايەگى قارەلرگە كۆز سالە ياتىب.

اېرەك-خاتىن، كتە-كېچىك، همەسى بۇلىب اۋن يېتتى كىشى تېمىر تېرسك، بېل، تىياق، بالئە، اۋراق... بىلن قوراللىقنلر بىر اويگە كىرىشىپ آيىب تۇپلانىشىدى، اۋز ارا كېنگىدلىر. «بالە، ياش گۇدكلرگە قرەنگلر يىغلىشمەسەن تەغىن؛ كوچوككە هم قرەنگلر؛ غېشىنىپ ونگىللمەسەن ينە» –دېيە جدى جىنگ آلدېدىن آگاھلتىرىش هم قىلىپ قۇيدى ميرزا باي.

تون يىرىمگە قرەب آغە ياتگندى. حقيقى جىنگ آنلرى هم يقىنلىشماقدا اېدى. كىم نېمە قىلىشى كېرەكلىگى يىخىشلىب اوقتىرىلدى^۳. ايشلر بۇلىب بېرىلدى. كىم قە ياقدىن دشمنگە قرەب يورىش قىلىش رېجەسى آبدان توزىلدى. پالوان ابە عسكەرلىك قىلگن داويورەك كىشى-دە باغى نىنگ اېتگ تامانىدىن يعنى، دشمن نىنگ قاق آرقەسىدىن كېلىشگە شىلندى. رېجەگە كۆرە اوشبو ايكى ناتىش ياقم قىلىنىپ، تېرىكلەيىن قۇلگە اوشلب آلىنىشى كېرەك. مبادا يره دارلر اوچون، اولرنى اېملىش^۴ مقصدىدە هر احتمالگە قرشى ميرزا باي پختە، لتە، ملهەم-پلهەم لرگچە تيارلر

^۱ آتېلىنىپ (آتېنەلىپ) تورماق: تېز حرەكەت بىلن، سكرەب، سېچىپ تورماق.

^۲ باستىرىقلەماق: اۋزىنى بىلمەگن حالتدە اويقىدىن تورماق؛ اويقىدىن اويغانمەگن حالدە هوشسىز هر نرسەلرنى آيتىپ يوربارىش، بىرار عىملىنى انجام بېرىش.

^۳ اوقتىرىماق: بىلدىرماق، انگلتماق، توشىنتىرماق. اوقماق: پىق بآلماق، حس قىلماق، سېزماق.

^۴ اېملىماق: دوالةماق، درمان قىلماق.

قۇيدى. «اۋلسەلر مېندىن اېمس. خاتىن غرلە نىمە قىلەدى تون يريم اويىمگە كېلىب؟ نىمە باي مى اېدىم مېن؟ حضورىم يۇقالدى اۋزىدن كۇرسىنلر!!»
تون نىنگ تفتى سۇنىب، اىلبىزەك توردى. مەيىن شىمال اېكىنى^۱ اورىلە يىدى. كېنىدىن ياقىمتاي گىنە شىمال ھەم اېسە باشلەدى. ايكى قارە شىخ نىنگ باش چىق بىر كرتلىشى ھەم كوچە يىدى. خودى بولر سىرى لۇكىللىب كېلە ياتگندە. انە-منە دېگونچە حىيات-مىمات جىنگ باشلىنىشى مقرر؛ بو كېتىشىدە اوروش بۇلمىسدىن علاجى يۇق.

ھە دېگونچە، بىرگەلىشىپ، بىر اۋازدىن حىركت باشلىدى. بىرىنچى بۇلىپ، پالوان ابە اۋقدەى اوزىلىپ اۋزىنى دشمن نىنگ ارقە تامانىگە يېتكزدى. باش قىمىرلەتە ياتگن قارە كوچلرنى كۇرگن مىرزا باي قۇلىدە بېل، كلتك يان تاماندىن تىشلەندى؛ نظر، يونس قرەلر اېسە سۇل تاماندىن ھجومگە اۋتىشى كېرەك، خاتىن-خىلچ ھەم اېرككلرگە ياردەم بېرگنى جېھە اۋرتىدىن اۋغە قرەب، اىلگىرلىب بارە ياتىرلر. اش-پش دېگونچە معلوم ئانىلەر اىچىدە دشمن نىنگ تۇرت تامانى قورشىپ، اۋرەب اۋلىدى. مىرزا باي حىملە قىلىشىگە بو يوروق بېرەى دېب تورگن پىت بايەگى قارە باشلر اۋزىنى پەنگە اۋلىدى. وضعىتىنى خوب كوزە تىب تورگن مىرزا باي: «دشمن-كو، جودە عىيار، اورىش عاقىبتى ھەم جودە وحىشتلى بۇلىشى ممكن» -دېگن اۋىلرنى اىچىدىن كېچىردى. شو وقت پالوان ابە: «ياھوا!» -دېپە قارە باشلر تورگن جاينى چقانلىك بىلن ضبط اېتدى؛ قۇلىدەگى كورەك و اۋراق بىلن «قىدەسن دشمن؟!» -دېگنچە اۋقتەلىپ^۲ تورە بېردى. گودەسى كتە، قارە غاۋ ساقاللى پالوان ابە اكەسىگە قىچقىردى:

^۱ اېكىن: شىمال، سوو و شو كىيلرنىنگ اقىمى، شو اقىمدەگى تاثيرى، اورىنىشى.

^۲ اۋقتلماق: تۇغرلىنىپ تورماق؛ مىشت، تىاق، مىلتىق و شو كىيلرنى اورىش، ايتىش تەھدىدى بىلن كۇترماق.

- اكه، اكه! منە سىز آيتگن جاي نىنگ كىندىگىگە كېلىپ چىقىپ آلدىم. قۇرقمىنگ، بالەلرگە ھەم آيتىنگ قۇرقمەسىنلر قۇلىمىز بلند.

- اۋزىنگدن احتىياط بۇل پلوان، يره تگن اېگم قۇللەگن بۇلسىن! -دېدى مىرزا باى او كەسىگە ھىجانلى بقىرگنچە.

- قاچدى مى بو بچەغرلر نىمە بلا؟! اكه ھىچ نرسە يۇق -كو، بو پىردە.

- خاملىك قىلمە تەغىن، اېسىنگنى بىغىب آل پالوان. اولر خوفلى دشمنگە اۋخشەيدى؛ كۈزىنگنى باىلشگن دىر، ھوشىيار بۇل! -دېدى اكهسى.

- يۇغ اېى بۇلمەگن گپ، خى قۇرقمەى كېلىنگ اكه كۈرەسىز، دېدى پالوان.

مىرزا باى ھەم اۋشە قارە كلەلر تورگن جايگە شدت بىلن اۋزىنى يىتكزدى. قالگن ايككى تامان ھەم بېكىتىلگن، دشمن قاچە آلمەيدى. «بۇششمە پالوان» -دېب قىچقىردى. اۋرنىدن جىلەمن دېدى-يو، قرەسە كە بالدىرىگە^۱ تىكن، قرغەنك كىرىب قانەگن. پالوان ابە قومندەسىگە تىار تورىيدى. دشمن تورگن چۇقىلر ضبط اېتىلدى. قرەسە كە جاي بار جولى يۇق. چىندن ھەم ھىچ كىم كۈرىنمەپىدى. اۋنگ تامانىگە بىر سىلتەنىب^۲ قرەگن مىرزا باى نې كۈز بىلن كۈرسىن كە باغنىنگ چېتىدەگى ايكىتە قارە باش باغنىنگ چېتىدەگى اۋشە ايككى بقە تېرەك اېكن. ھر بىر شمال تورگندە ساللنە-ساللنە بىر-بىر باش چىقەياتگن اېكلر.

۲۰۰۲

تاشكېنت

^۱ بالدىر: اباق نىنگ تىزە بىلن تۇپىق آرهسىدەگى قسىمى.

^۲ سىلتەماق: قاقماق، سىلكىماق، كوچ بىلن كېسكىن تارتماق.

کیمیا

كىميا

(قىسقە تىنىشوو)

حكايمىز قهرمانى - كىميا: «خوش بېچىم، سولوو؛ باياقىش^۱ عايله گە بېتەگىنە تىلەكى بالە^۲. اونىنگ بېش برماغى هنر؛ اۇقىمىشلى، تېرەن^۳ قرەشلى؛ ھلى اويلنىشگە شاشىلگىسى يۇق. مکتىدەلىگىدە-ياق، غرب اونيورسېتېتلىرىدە^۴ تحصيل آلىشنى كۇزلب قۇيگن. يورەگى اۇشە ياققە تلىپنىب كېلەدى. وقتى كۇپراق كىتابخانەدە اۋتەدى. كۇپراق كون باتر بويوك متفكرلىرى كىتابلىرىنى اۇقىيدى. كىمياگە عنعنەوي اۋى سورويش يات؛ اوچىنچى جەھان آدملىرىدە فكرلىشنى ياقىتىرمەيدى. اۋزگچە تفكر اېگەسى؛ ايزلنوۋچن، انگلى، اېسلى و عقللى قىز. اېركنى، آزادلىكنى جانىدن ھم يىخشى سېۋەدىگن قىزىلردن. ھر نرسەگە شېھە-گمان بىلن قرەشنى يىخشى كۈرەدى. كۇپچىلىك نىنگ فكرىگە قۇشىلمىسلىك؛ اۋزگچە فكرلىش، عنعنەوي تورموش طرزىگە اۋىسىتىپ^۵ كۇز سالىش اونىنگ جاني

^۱ باياقىش: اچىنىش اويغاتوۋچى حالتلى، بېچارە، شۇرلىك.

^۲ تىلەكى بالە: كۇپ مدت كوتىشىدن كېين توغىلگن بالە، اۋى نىنگ يگانەسى؛ تېنگرىگە يالوارىب، يىغىلب، دعالر قىلىب اوندن تىلب آلىنگن بالە.

^۳ تېرەن: چوقور، چۇنقىر؛ مضمون-ماھىت جەھتىدن كېنگ قىراولى، كوچلى.

^۴ اونيورسېتېت: بىلىم يورتى، عالي دركاه، پوهنتون.

^۵ اۋىسىتماق: تنقىدى قرەماق.

بىلن قارىلىپ كېتىگن اېزگو عادت دېسە ھم بۇلەبېرەدى. «حكاىە بۇلگن واقعه اساسىدە، بدىعى تۇقىمە قىلىپ يازىلدى. كىمىانىنگ اۇستادى جناب "آخ" ھم تىرىك.»

كىمىا اۋن اىككىنچى صىفنى بىتتىرىپ-اق، اۋزى يشب تورگن شەر اونيورسىتېتىگە اۋقىشىگە كىرەدى. درسلىرىنى يىخشى اۋزلىشتىرەدى؛ استعدادلى؛ شىخىي مطالعەسى اونى معنوي يوكسلىتىردى. يىخشى اثرلر اونىنگ اوچون يۇلچى مياق^۱. درس چاغىدە استادلرنى سوارلرگە كۇمىب تشلەيدى. بعضاً سۇراقلىرىگە جواب تاپە االمەى، اىچىدىن بىزاوتەلنەدى. خودى كۇنگلىدە اېسكى بىر دردنى توگىب قۇيگندەى. برچەنىنگ اعتبارىنى تارتگن؛ صىفداش و اۋقووچىلرنىنگ حرمتىنى قازانىب، ارداغىدىن جاي اآگندى. اونيورسىتېتىنىنگ اېركەسى ھم سېركەسى ھم انه شو كىمىا بۇلەدى. او بىرىنچى كورسنى توگىتىپ، اىككىنچى كورسنى ھم يىرىمىل بېلەدىر اېدى.

كىمىا اق يوزلى گىنە، كۇزلى كتە-كتە، كىپىرىكلرى اوزون-اوزون، «آغزى تار، قواقلرى كېنگ-كېنگ»، ساچلىرى اوزون، كۇكرەكلرى بۇلىق. تىشلىرى االماسدەى يىرەقلب تورەدى. چوقورچە توشگن ياناقلىرى قىزىل االمەدەى لاولب تۇنەدى. نازك كىنە قىز؛ كولچە يوزلىرى كولگىچلى؛ دوداقلرى حىات بولاغىنى اېسلىتەدى. گۇزەللىكدن كىمى يۇق، اۋىچن و قرەشلىرى معنالى، قىيىق قاشلىرى جان تىلىمى يىنگلىغدىر. تىلىدىن بال تامر، كولىب تورگن گىنە، سۇزگە چىچن^۲، بىحنى يىخشى كۇرەدى...

كىمىا سوو سىپىلگن دوكان رستەلرى بۇلىب، ناجو آغاچلر كۇلنكەسى^۳ اۇستىدە يورىب، ھر كونى اۋقىشىگە بارىب كېلەدى. اېسى-ھوشىدىن كۇرە يىم كۇركى-يو،

^۱ مياق: يۇل كۇرسە تىب تورەدىگن، اۋرنك، نمونە، عبرت بۇلەدىگن نرسە، مشعل.

^۲ چىچن: چقان، اوستە، ماھر.

^۳ كۇلنكە: ساىە.

جمالى جانىگە بلا بيتگن. يۇلدە كېتە ياتىب دوكاندارلار، نانبايلار، سۇكانغىچ سىقى^۱ بالەلر نىنگ ايلماقلى گېلرى^۲ جانىگە تېككن. يىنە شو بېزارى بالەلر نىنگ تېگە چاغلىگى^۳، ار قەسىدن اوشتك چلىشلىر، ايرىملردە اوستى-باشىگە سوو سېپىب قاچىشلىر-كو، هر كونگى ايشلردن. كىمىا يشب كېلە ياتگن يورتدە بو نرسەلر عادتى حالگە ايلنگن. قىز-خاتىنلر نىنگ بىردە ياتگن كىر لىتە چە قدرى يۇق بو وطندە. خاتىن-قىزلر نىنگ جسم و جانلرى قىيىنلە-قىيىنلە ادا بۇلگندىر. خاتىن-قىزلر، حرمتى سىنگن بختى قرالر بۇلىشە دىلر.

كىمىا تحقىر و اياق اوستى قىلىشلىرگە قرشى جنگگە اتلنگن حقىقى داو يورهك اۇقووجى بىر قىزدىر. تقدىرگە تن بېرە ياتگنلردن اېمس. او چىندن هم بوندە يېزارلىك و تۇسىقلرنى يىنگىب اوتىشگە جزم قىلگن. بىر بولر اېمس، كىمىانى باشقە نرسە قىيىنە يدى. اونىنگ تىنچىنى بوزگن بىردن بىر نرسە استاذى نىنگ تىنچىم سىز زوغومى^۴. صنفدە استاذى نىنگ دغدغەسىدن جانى بۇغزىگە تىقلىب كېلەدى. كۇچە دەيدى بالەلرى نىنگ شوملىكلردىن كۇرە، استاذى نىنگ گېلرى اشىب توشگن. نىمە بۇلسە هم كىمىا تىشىنى تىشىگە قىسىب، بو كونلرگە زۇرغە چىدب و كۇرە شىب يشىدن اۇزگە اعلاجى يۇق. باشىدە، بو احوال و كۇرگولكلرگە جودە كۇپ اچىندى، كويدى، ياندى، پىشىدى. آخرى اچىدە قلە شىب ياتگن يىغى-دردلر، كۇزىگە قلقىب چىقدى...

بۇلە ياتگن ماجرالرنى آتە-آنەسىگە سىر بېرمەى كېلەدى. اۇز غمىگە يقىنلرنى هم مبتلا قىلىشنى اىستەمەدى. اوزون قولاق گپ-سۇزلردن اونچە-مونچەسى آتە-

^۱ سىقى: سىندىراقلىب بېكار يوره دىگن؛ بېكارچى، سىاق، دەيدى.

^۲ ايلماقلى گېلر: كىنايو، غرضلى، بېكار گېلر.

^۳ بېزارى بالەلر: بېكارچى، همەنى اۇزىدن بېزار قىلووجى بالەلر.

^۴ تېگە چاغلىك: مزاحمت، آزار يىتكزىش.

^۵ زوغوم: قهر-غضب؛ دۇق-پۇيسە، دغدغ؛ ظلم.

آنەسىگە اللە قچان يېتىپ بارگن. كېميا اوچون قووانرلىسى شو اېدى كە، اونى آتە - آنەسى قيسووگە آيشمىسدى؛ تېرگشمىسدى^۱. او اۇجر قىز، بىراونىنگ يېتاويگە^۲ بۇيىن بېرمەي، حياتدە جدّي كورەشماق اونىنگ مقصدى. قىينچىلىكلەرگە بۇيىن اېگىب، بىراوگە قرەم بۇلىپ قالىشنى ھىچ پىت خواھلەمەيدى. شىخسىتى سىنىب، پرچەلنىب كېتىشەن قۇرقەدى. او ميلونلرچە قارە بخت اسىرلر صىفگە يەنە بىر بختسىز عىال كېلىپ قۇشلىشىدىن ھدىك سىرەيدى. شۇرلىكلەرگە تن بېرىپ، اېزىلىش، تاپتەلىش^۳ و خۇرلىك^۴ حسابىگە جمعيت يىلن يۇل بارىپ، ماسلشىب يىشش مەمكىن البتە. لېكن، بونى او اىستەمەيدى، خىالىگە ھم كېلتىرە آلمەيدى. باردى تېورەك - اطرافىدە بۇلە ياتگن دوو - دوو گېلرنى^۵ اكەسى يۇلبرس يىلسە بارمى؟! برچەنىنگ آغزىگە چىم قۇيەدى. ھىچ نرسە بۇلمەگندېك ھمە ياقنى تېكىسلەيدى. موشتوم زۇرلر^۶ ئىنگ پىتگىنى ياتقزمەي قۇيمەيدى. درآو ھمە ياق سوو سېپىگندەي جىمىب قۇيەدى قالەدى. اما، كېميا يالغىز اۇزىگە ايشانەدى. اۇزىنى كىتە كورەشلىرگە شىلەماقدە؛ اىچىدن شونگە يېتىلىپ تورىيدى. كۇزىدن كوچ ياغىلگودەي بۇلىپ، ضمىرىدەگى ھىجانلر اۇتكىر سۇزلرگە آيلەنىپ، تىلىنىنگ اوچىدە تورىيدى. خاتىن - قىزلرنىنگ باشىگە كېلگن، قارە كون و بختسىزلىكلەرگە قرشى كورەشماققە بېل باغلهگن. كېميا: «نېمەگە خاتىنلر يىرىم آدم حسابلنىشەدى؟»؛ «مىرائىگە، گواھلىككە شونەدى»؛ «خاتىنلر نېمەگە اېرككلرنىنگ اېكىنزارى و ... خاتىنلرنىنگ اۇرەسىنى^۷ بېرىپ، شەھوتىنگى قاندىر»، «قىز بالە پلخمان تاشى»؛

^۱ تېرگشماق: تېكىشىرماق، نظارت قىلماق؛ تېرگاو قىلماق؛ تعقيب آستىگە آلماق، كوزەتماق.

^۲ يېتاو: جلودىن توتىپ اېرگشتىرماق، يېتكەلەماق؛ خط - حرکتى، ھدايت قىلماق.

^۳ تاپتەماق: آياق يىلن باسماق، اېزماق، پىخان قىلماق؛ تحقيرلەماق.

^۴ خۇرلىك: عزت - نفسى پايەمال بۇلىش، تحقيرلنىش.

^۵ دوو - دوو گېلر: كۇپچىلىك آرەسىدە ترقلگن ھر خىل تۇغرى و شەھەلى گپ - سۇزلر.

^۶ موشتوم زۇر: زۇرەوان.

^۷ اۇرە: پۇل، قۇل حقى.

«قىز بالە بىراونىنگ خصمى»... دېگن حەملىرگە جەۋاب تاپىن و اونىگە قىشى عصيان كۇرستماقچى.

ھەۋا سەف، كېچەگى اينىچىق بولوتلرنى سۇلېم شەماللر قوۋىب سالگن. بىرتىق- يولوقلرنى^۱ آفتاب كويدىرىب بارەپىكىندى. كوۋىك^۲ بولوتلرنى تىرتىق، ماما قوۋاش زىن ياللىنلرنى ترەتېب چەرەقلەيدى. گە-گە يېل اېسىب، اورىلەياتىن اېكىنلردىن^۳ شاخ-شەلەر بىر-بىر تېرەنەدەر. قۇنى-قۇشنىلر اولىردىن تشقىرى سىرى تېرەنەدەر اېدى. بو آرەدە بالەلرنىنگ غلە-غاۋورى ھەم اېشىتىلدى. خەلص، ھەمە ۋز ايش-يوموشىگە آتلنگن. شۇر حىيات آلاۋىدە يانېب كېلەياتىن دىردى كىميا! آتە تىرىكچىلىك عۇمانىگە شونىغېب كېتىن؛ رۇزغار تېرەتېش ۋزى بۇلمەيدى. آتە بېچارە ۋى، تىرىكچىلىك ايشلرنى سىرانجام قىلىش بىلن اندىرمان. كىميا اېرتەلب اۋىغاندى. يوۋىندى، تىشلىرنى تازەلەدى، كوموش سىرغەلرنى قولاغىدن بېچدى. بىلك اوزوكلرنى مەرمەدى تۇنەياتىن بىلگىدن چىقردى. بىلنر-بىلنمىس يېنىگىلگىنە يىس-توسن قىلدى؛ كۇزگو قىشىسىگە كېلە تورىب، «اۋف!» تارتىب آغىر ۋىگە تالدى... توشكونلىككە توشىش اونىگە يات اېدى... آيرىمىلدە ۋكىسىنېب: «آخ اې! بوگون تشقىرىگە ايشلرېم بىلن چىقسىم نې-نې كۇرگولكلرگە دوچ كېلىشىمنى اېسلەسم ۋپىكم ۋپىرىلېب آغزىمگە كېلەدى. ھلى ۋقىشىگە بارىشىم كېرەك. آھ!! قىز بۇلېب توغىلىشدىن كۇرە تاش بېتىسم بۇلمىسى اېدى؟» -دېگن توغوللرنى آينەگە آيتىن بۇلدى. سۇنگ جۇدىرەگن ياشلرنى رۇمالچەسى بىلن آرىتە ياتىب: «يۇق، يۇق! بو حىيات اېمىس. خاتىن-قىزلرنى كەم سىتىشىگە قرەتلىگن ھەر قندەى ظلمگە قىشى كۇرەشماغىم كېرەك. مېن ۋزىگەر چىزىغىدن يورمەيمىن. اولرنىنگ بوۋىرۇق، تاپشىرمە و كۇرستەلرېگە عمل قىلېب ىشمەيمىن. مېن

^۱ يولوق: يولېب تىشلىن، يولېب آلىن، اوزىلگن.

^۲ كوۋىك: كوۋىن.

^۳ اېكىن: شەمال، سوو و شو كىلرنىنگ آقىمى، شو آقىمدەگى تاثيرى، اورىنىشى.

اۋزىم-من-اۋزىم!» - دېيە غىرت و شجاعت آتىگە مېندى. يېرىم ساعەت اۋتركن، كېميا ناشتاسىنى قىلدى. اويىدىن كۈچەگە چىقركن اققىنە لچكچەسىنى^۱ ناچار باشى نىنگ يېرىمىدىن اېلكەسى تامان سالدى-دە، سىنگىلچەلرى نىنگ اويلرىگە كىرىپ، بىر-بىر يوزلرىدىن شىمىرىپ اۋپدى و خىرلشدى. سۇنگ ائەسى نىنگ بۇينىدىن قوچاقلەگنچە «خىر ائە جان، سىز ھەم يىخشى قالىنگ! آتە جان سىز ھەم خوش قالىنگ! خاۋاير ائەمگ، اويىمگە كېلە-من - بىرىنگىزگە قىتتېب» - دېيە، اينجە برماقلىرىنى ھوادە سىلكىتتېب خىرلشدى و كۈچە اېشىگىنى ياپىپ، اۋقىشىگە جۇن ب كېتدى. ائەسى ھەم: «بۇينىگدن ائە اىلىسىن ائەنگ، يامان كۇزلر، بوزوقلردن اۋزى اسرەسىن سېنى! آى بارىپ، امان كېل بالەم!» - دېيە اىستكلندى^۲ و دروازەگچە كېلىپ، كېميا بىلن خىرلشدى.

آرەدە اىكى چقىرىمچەلىك يۇل بار. اۋقىشىگە اورتاقلىرى سىز بارىپ كېلەپىدى... اونورسىتېت نىنگ صىفگە كىرىش قۇنغىراغى چىلىندى. «اېسى كېچىكىدىم» - دېب كتە-كتە ادىمل ب شاشىلدى او. چقان-چقان يورىپ بارەياتگن كېميا بۇساخە ھتلب بىلىم يورتى نىنگ اىچكىرىسىگە كىردى. سوو سېبىلىپ، چىنگلر آرىتىلگندى. يكە-يېرىم قىزلر، بالەلر كېچىكىبىراق بۇلسە-دە، صىفلرىگە كىرماقدە اېدىلر. بالگىنە ائەمال صىفگە كىرەياتگن سۇنگى اۋقوۋچى اېدى. طلبەلر يۇقلەمە قىلىنماقدە^۳. كېميا صىف اېشىگىدىن اېندى ادىم باسىپ، «سالام» قىلىپ، كىرەى دېب اېدى يم كە، صىف تىختەسىدە بىر نرسەلرنى يازىپ تورگن استاذ ارقەگە تىسرلىپ، «سالام» نى اىلىك ائەمەى، كۇزلرى چقچەبىب^۴، غضب بىلن بىر بقرەيدى. شو پىت

^۱ لچكچە: خاتىنلر (كۇپىنچە كېسە عىاللر) باشگە اۋرەيدىگن آق داكە ياكە سورپ؛ دكئە.

^۲ اىستكلندى: دعا قىلدى؛ آرزو قىلدى.

^۳ يۇقلەمە قىلىنماقدە: حاضرى ائىنماقدە، طلبەلرنىنگ صىفدە بار و يۇقلىكلرى معلوم قىلىنماقدە.

^۴ چقچەبىق: كۇزىنى كئە اچىپ، آلە-كولە قىلىپ قرەماق؛ بقرەيماق.

بېرگىنە قىزغىش، ملە، ماوي، يشىل بۇياقلىرگە بوركنىن بېر كېلەك^۱، لىكك آچىق دېرەدن سىنقىگە اوچىپ كىردى. بالەلر قىي-چوو سالىشىپ، قۇللىرىگە كىتاب، دىنەر كۆترىگنچە، بوگىنە شۇخ كېلكنى اوصلب آلىشىگە توتىندىلر. بىراق، كېلەك توتقىچ بېرمەي^۲، سىنقىنىڭ بىر بورچىگىدە دېوارگە ايلىندى. خۇددى اۇشە بېردن دىرسنى كوزەتە ياتىگىگە اۇخشىب، تېپەدن قرەب تۇرە بېردى. كىمىيا شاشە-پىشە اېشىك آچىپ سىنقىگە باش سوقدى:

- كىرسم مىلى مى استاد؟ - اجازت سۇرەدى او.

- تۇختە، جايىنگە تۇر! - دېدى استاد دۇق آھىنگە^۳،

روپكە ماش و گوروچ ساقالىنى توتملە ياتىپ.

- مېن اۇقىشىگە كېلدىم، دىرس اۇقىشىم كېرەك استاد، - جواب قىلدى كىمىيا.

- يۇق! كىرمەيسن دېدىم مى؟ - آغزىدىن توفكىسى سچرەب، - ايتدىم - كو! گپ-سۇز

بىتتە بۇلەدى، يۇقال! آرقەنگە قىت، كوزىمگە كۇرىنمە!!!

- نېگە كىرمىسلىگىم كېرەك استاد؟ - دېركن، كىمىيانىڭ كۈنگلى چۇكىپ، كىلىگى

كېلىپ كۇزىگە ياش ايلندى. كۇزلىرىگە قلقىگن ياشلر ياناغى^۴ اوزرە ايرماقلەي^۵

كېتىدى. آياق اوستىدە، بىر پس اۋىگە تالدى و اۇقتووچى سىگە كېچىكتىرمەي درآو

جواب قىتتى:

- مېنىڭ قدرىتلىرىم، انسانى لىگىمنى آياق استى قىلىشىگە حقىنگىز يۇق. بىرار-بىر

نرسە حقىدە اۋىلىش و قرار چىقىرىش بو مېنىڭ ايشىم... اېندى كتەلردن،

آقساقاللردن، جگرىگە الف كىرمەگن سوادسىز ساقاللردن؛ دىنانى تار اۋىلە ياتىگن،

^۱ كېلەك: ايككى جفت اق، كول رنگ ياكە رىگمە-رىنگ قاتالى نازك حىشە.

^۲ توتقىچ بېرمىسلىك: اۋزىنى توتدىرىپ قۇبىمسلىك.

^۳ دۇق آھىنگە: بۇيىسە، سىياست قىلىپ.

^۴ ياناق: يوزىنىڭ، بېتىنىڭ بۇرتىق قىسمى.

^۵ ايرماق: بىرلىشىپ، كتە دريا حاصل قىلووچى ھەر بىر ايرىم كىچىك دريا؛ درياچە. ايرماقلەماق: دريا بۇلىپ آقماق.

كۆرەياتىن انە اوندى يىلردن، -صنف دېوارىدە ياپىشتىرىلگن آق ساقاللىر مجلسى تصويرىگە اشاره قىلىپ، -اندازه آلىب يشش نىنگ دۆرى اۆتدى. اپندى ساقال، تىسېح، آفتابەنى دستكلب آدملرگە عقل اؤرگەتېش، تاپشېرىق بېرىش... اۆتمىشگە تعلقلى. بىلدېزىمى حرمتلى استادا!

- به آوو ابى! اېچىنگ گېدن تۆلە اېكن سېن منچە نىقىنى.

- حقارت قىلمىنگ، قىمنىگ حقارت!

- سېن عقلى ناقصلرنى آدم قىلىشىمىز كېرەك.

- نىمەگە بىر يىرېم بىلدن بويان جۆرەتەسىز مېنى؟ -سۆرەدى كىمىا استاىدىن اۆپكە لىنىپ.

- چونكى، ساجىنگ كۆرىنىپ ياتىدى، هر دايم شو احوال. حجابىنگ يۇق سېن قىزنى، -دېدى استادا جون باسگن بېتىنى سىيرە توريپ.

- بىر اۆىلب كۆرىنگ استادا! مېنىنگ چادرگە يا بىر مېتر لچككە اۆرەنىپ اۆقىشگە كېلىشىم نىمەنى حل قىلەدى؟ يرەتگنگە كېرەكمى شو؟ هېچ بۇمسە، شو عادى گىنە سۇراغىمنى توشونتىرىپ بېرە آلەسىزمى؟

- توشونتىرىپ بېرە آلەمن-و، لېكن بونگە اذن بېرىلمەگن-دە بىزگە. اورغاچىلر يوزىگە تىكىلىش نىنگ اۆزى كتە گناهلردن. استغفرالله!!!

- دىنىمىزدە «نىمەگە؟»، دېب سۇرەلمەيدى هېچ قچان، بلكە بويورىلەدى. بىزدە دليل اۆتمەيدى. همە نرسە آلدىندن بېلگىلب قۇيىلگن. يساقلرىمىز¹ اۆزگرمىدىر. مسألەلرنىنگ جوابى هم آلدىندن آيتىلگن. اۆىلىشگە حاجت يۇق، -غضب و اچىغى يوزىگە تاشىب چىققن كويى، -مونچە ولدېرەى بېرمە، حق-حقوقىنى تىنگن قىز بۆلىب قالدېنگىمى ھلى سېن!؟

¹ يساق: قانون، قانونلر مجموعى.

- استدلال بۇلمسە؛ اوندە بو خدا بېرگن خام كلّەنى نېگە كۈتريب يوريب سىز؟ ھمە نرسەنى عقل كۈزىدىن اۋتكزىب، منطق چىغىرىغىدىن اۋىلب قبول قىلىش كېرەك بۇلەدى انسان ذاتىگە. بو باشدە گى گۈلچىراق نىمە اوچون بېرىلگن؟ ھىچ اۋىلب كۈرگىمى سىز؟.

- بو كلّەنىنگ اېگەسى بار، اېگەسى؛ اۋووو تېپەدە تورىدى، -اسمانگە بۇيىن جۈزىب قىرركن، -اونىنگ امرى سىز درختدە يىراق ھم قىمىرلەيدى.

- سىز عقل اېشىگىگە قولىڭىزنىڭ قولىڭىزنىڭ سىز؛ آدم بالەسى سۈرەب-سۈرەب حقيقتگە اېرىشەدى، اېمىسى استادا؟

- يۇق! دىنىمىزدە يالغىزگىنە اطاعت بار! قالگەنى اللەنىكى... شك قىلىنسە باشلر كېتگۈسىدور. حكىم شو!

- خوش، دىندە نىمەگە عىال ساچىدىن مونچەلىك قۇرقىش بار؟ بىرار-بىر بوزغونچىلىك، غلەمىسلىك^۱ ياكە ياووزلىككە اېلتىوچى قندەدىر كوچ و قدرتى بارمى بو بىچارە خاتىن-قىزىلر ساچىدە؟

- سېن حجابگە قرشىمى سن ھلى؟

- يۇق، مېن حجابگە قرشى اېمىمىن. حجابنى خاتىن-قىزىلرگە اېمس، اصلىدە بو قارە و فلاكت تۇرەسىنى، اېر ككلرنىنگ كلّەسىگە كىيدىرىش كېرەك. مېنىڭچە بو ھم كىلىك قىلەدى. اېر ككلرنىنگ كۈزلىرىگە اىلچدە اۋرتوك^۲ توشىرىش لازم؛ تېمىر پردە توشىرسە اوندن ھم يىخشى بۇلردى. اېركىن يىشب يوررمى اېدىك بو ياروغ عالمدە؟!

- اللە خىشود بۇلمەيدى بو گېنىگىن؛ ايشلرىنگىن ھم، -دېدى استادا «توبە، توبە، توبە!» قىلىپ ياقەلرىنى اوشلركن.

^۱ غلەمىسلىك: كىشىلر مناسىتىگە، اونىنگ حالتىگە رخنە سالىش؛ غىبت، فتنە يورىتىش.

^۲ اۋرتوك: پردە.

- كېرىشىم كېرەك، كېچىرىسىز استاذ. مېن درس اۇقىغىنى كېلگنمەن.
- بو احوالده مېنىنگ درسىمگە كېرە آلمەيسن خۇبى؟ - بۇرلنگن^۱ برماقلىرى بىلەن
پېنچە^۲ دېك قاپ-قارە ساقالىنى سېلەى توريب، - مېن حجابسىز قىزلىرىنى درسىمگە
عموماً كېرىتمەيمەن. بو مېنىنگ الله بىلەن قىلگن عەھد و پىمانىم. يەنە نىمەنى
بىلماقچى بۇلەسن-؟ اېندى توشوندىنگىمى آيىمچە؟!!!

- ايچىم قىسىلەدى، تېرلەپ كېتەمەن؛ يازنىنگ جىزىرەمە كونلىرى سەسىيدى قىز بالە.
بىر قىتىم بىلغىنى بىزدن درىغ تومنگ استاذ. باشىمىز بېمەنت قوياش نورىدن
بەرەمەند بۇلسىن، دېمەن. بونىنگ نىمەسى يامان؟ ياپىنچىق ايچىدە آياغلىرىم
سودرەلىپ يىقىلىشىم بار. بىرار جايىم سىنىشى ھېچ گپ اېمەس. گېنىگىزدە سېرە
مىنطق يۇق استاذ. بىرار جايىم سىنىب، افگار بۇلىشىم تورگن گپ بو احوالده.

- يورگن يۇلىنگدە «الله، الله»، دېب مىنگ مرتە تىكرارلەسنگ، يىقىلمەيسن، جن ھەم
چىلمەيدى^۳. قۇرقمە ھېچ بالا اورمەيدى سېنى.

كىميا بىلەن اۇقتووچى اۇرتەسىدەگى ايتىشوو دەلىزدە بۇلەيپدى. استاذ صىف
اېشىگى يانيدە، كىميا اېسە دەلىزدە آياق اوستىدە. آلدىنلىرى ھەم استاذ بىلەن بىر نېچە
بار گېلىشىلگن شو الفاظدە؛ تارتىشىلگن ھەم. كىميا حوصلەسى قارىب^۴، قىستەلىب؛
سۇز قاتدى:

- سىز ايتىنگنلر بو بىر اېسوردە^۵ استاذ. سىزنى موھومات چولغاب آلگن؛ قارە تومىنلر
ايچىدە سرسان-سرگردانىسىز. قرەنگ اخىر، مېنىنگ حجاب كىيمەگنىم ھېچ كىمگە

^۱ بۇر: ھەك تاشنىنگ مىدە آپپاق يوشماق تورى؛ تىباشىر. بۇرلنگن: بۇر ياكە تىباشىر بېشىلگن.

^۲ پېنچە (پېنچە): پېنچىك؛ تىدىردە نان پېشىرىش پېتىدە قۇلگە كېيىلەدىگن پېنچە.

^۳ چىلماق: بىراونىنگ آياغىنى اۇز آياغى بىلەن اېلىپ، تېپىپ، اونى بېقىتماق ياكە گىدىرەكتىماق؛ خىل بېرماق؛ ضرر

بېتىزماق؛ كېسماق، قىرقتاق، يىقماق. (بو سۇزنىنگ باشقە معنالىرى بار)

^۴ حوصلەسى قارىماق: حوصلەسى كېتىپ قالماق.

^۵ اېسوردە: ھېچ قندەى معنالى انگلتمەيدىگن تاكىد، فىكر ياكە حالت.

خلەقیت^۱ بېرمەيدى-كو! عكسىنچە، ياپىنگىم اولا اۋزىمگە معماً توغديرەدى. قالەبېرسە، بېتربيت انسان نما ھنگىلرنيىنگ^۲ (كېچىرەسىز) حرص و ھواسىنى قۇزغەتەدى. آدملىر آچىق نرسەنى اېمس كۇپراق يايىق نرسەگە تلىپنىشەدىلر... انسان طبعىتى شوندى قوريلگن.

استاذ بىلن شاگرد اۋرتەسىدە بحث و تارتىشوو تابارە اۋج آلرکن، كىميا: «مېن اۋز حقىم اوچون رخصت سۈرەيمن، -دېيە اجازەتسىز صنفگە باستىرىپ كىردى. بوندن درغضب بۇلگن استاذ يۇلىنى تۇسماقچى بۇلدى. شو پىت كىميانىنگ باشىدن لچكى توشىب كېتدى. استاذ: «اسغفرالله كۈزىم كويسىن، گناھگە باتدىم. نفل نمازى واجب بۇلدى. اې پروردگار بو اورغاچى شيطانلردن پناە تىلەيمن، دېب كۈككە قۇل آچدى و يىنە كىمياگە يوزلندى:

- كۇپ پالا مەھمەدائەلىك قىلمە سېن قىز! چىق دېيىمىن صنفدن، -دېدى استاذ.
- التماس، گېيىمى اېشىتىنىگ استاذ. جەنمگە توشەسىز بىرى بىر. قۇيىنىگ اېندى مېن درس تىنگلەي. ھوا ايسىق، دېم بۇلىب كېتدى. مېن باشقەلرگە اۋخشىب تۇرە كىيب، چادىرگە اۋرەنىب كېلە آلەيمىن اۋقىشگە. توشونەسىزىمى مېنى استاذ!
- او سېنىنگ اېشىنىگ، سېنىنگ پرابلىمىنگ؛ مېن اللەنىنگ بوپروغىنى بجرەمن. مېنگە دخلى يۇق بو نرسەلرنى.

استاذ بىلن كىميا اۋرتەسىدەگى ايتىشوو يىگىرمە سگىز دىققەچە وقتنى آلدى. شو پىت اۋقوۋچى بالەلردن كىم دىر: «كىميا كىر صنفگە! كىر اېندى، نىمە قىيدى؟ كىرەبېرسىن، اۋقىسىن، بىلىم آلسىن استاذ» -دېيە سۇزلەدى. استاذ بۇلسە، نىمەلرنى دىر اۋلىب، اېشىتىلر-اېشىتىلمس زۇرغە: «اوندە كىر بۇمسە يم كىميا! تۇختت بو اۋجرلىگىنگى. ايمانلى بۇل» -دېگن سۇزلرنى نرىدن بېرى تۇنغىللىب

^۱ خەلقیت: مانعلىك، مزاحمت.

^۲ ھنگى: ھە دېب ھنگرەوېرەدېگن؛ اېركك اېشك؛ بقىراق، شىغى.

تىلگە ەلدى و كۇزلىرى آتېلىپ چىققودەى اېدى. استاذ باشىنى اىرغىتىپ: «صنڧگە كىر!» -دېگىدىن پشيمان بۇلدى. اۇزى اۇرتىگن ترتىب و قاعدەنى بوزگن بۇلىپ اېمس، بلكە، كىمىانى «ىخشىلىب تىببە قىلىش، تىلىپ تولش» و «اېزىش، اىزە قىلىش و خۇرلش» نىتىدە صنڧگە كىرىشگە رخصت بېرگن بۇلدى اۇقتووچى.

كىمىا سېكىن كېلىپ اۇز اۇرىندىغىگە اۇرنەشىب ەلدى. شو زمان تورلىنىپ، توسلىنىپ تورگن كېەلك تېپەدە، قۇيىنلپ ياتگن يېرىدن اوچىپ، كىمىانىنگ راپە-راسە باشىگە كېلىپ قۇندى. سۇنگ گىر-گىر اىلىنىپ اوچە ياتگن كېەلك كىمىانىنگ اېلكەسىگە؛ سەهل اۇتمەى ەلى يازىلمەگن، اق كىتابچەسىگە كېلىپ قۇندى. كىمىا ايندەمسدن كېەلككە تىكىلىپ تورەوېردى. نظرىدە شوگىنە كېەلك اۇقتووچى نىنگ زوغومى، كىمىانى كەسىتىپ، تاپتەب خوارلشلىرىگە گواھلىككە چقىرىلگندەى اېدى. شوگىنە كېەلك ىشىل يىراقلر، گل-چىچكلر بۇياغى و مستانە ەيدىنى، آزادلىك ەواسىنى صنڧگە آلىپ كىرگندەى بۇلدى گۇيا. بلكە، استاذنى آدمىلىك، رحم و شفقت، انصافگە، عقل و فراستگە چقىرماقچى بۇلىپ كىرگندىر. قىسقەگىنە وقت اىچىدە عصرلرگە تاتىگوليك معلوماتنى آلمىشگن بۇلىشىدى كىمىا كېەلك بىلن آرەسىدە. كېەلك كىمىانىنگ قولايغىگە: «بو قارە كونلر بىتر بىر كون؛ سېن ەم انسان سن، خۇر ىرەلگن سن؛ ەيچ بىر اېرك سېندن، ەيچ بىر قىز خاتىندن اوستون اېمس؛ اۇز حق-حقوقىنگ اوچون اۇزىنگ كورەش؛ عزمىنگدە تور؛ آرقەگە چېكىنمە؛ ظفر سېن بىلن» -دېب شىويرلەياتگندەى اېدى. كىمىانىنگ سۇزلىرى-كو، معلوم. بىراق، كېەلك نىنگ ەم نىمەلرنى دلېدە توگىب، صنڧگە اوچىپ كېلگنى يىم عيان، يىم قرانغى بۇلىپ قالدى كىمىاگە. صنڧداشلىرىنى ەم حىرتىنى آشىردى بو منظرە. بىلگن بىلدى، بىلمەگن بىلمەدى.

تېرىسى سويگىگە قىشىب كېتىگن، اوزون بۇيلى، سەهل اېلكەسىنى بۇكىب يورەدى، بۇيىن تامرى بۇرتىب چىققن، اوزون تنەسى قورت بىگن تېرەككە

اۋخشەيدى. استاد درسىنى تۇختە تىب، آغزى كفلنگن بىر كۇرېنىشە يەنە وېسب كېتىدى:

- مېن سېنگە بىر يىرېم يىلدىن بويان صىفگە حجابسىز كىرمە، دېب آيتىب كېلماقەدەن. سېن بۇلسە اۋز بىلگىنىنگىن قالمەيسن قىز.

- بو گپلېزنى صىفدە اېمس، درسدىن تشقرى بىرار بېكار قولاغنى تاپىب گېرسىگىز، گېيرەبېرىنگ استاد.

- الله نىنگ بو يىروغىنى، آيتگىنى «گپ» دېدىنگى سېن ھلى!

- جانىمگە تېگدى، بىر يىرېم يىلدىن بېرى جەغىز تىنمەي آيتگىز آيتگن. مېندىن باشقەنى تاپمەدېنگىزىمى اۋزى گېيرىشگە؟ نىمە بېن سىزىنىنگ ارپەنگىزنى خام اۋردىمى؟ تۇختە تىنگ بو پۇيسەلرېنگىزنى.

- مېن آيتەبېرەن، قىامتگچە آيتەبېرەن تاكە صىفگە ياپىنىب كېلگۈنىنگچە آيتەن. بونى آيتەسم الله نىنگ حضورىگە قىسى يوز بىلدىن بارەن اول دىياگە؟ بۇمەغور نادان قىز؟!

- حقارت قىلمىگ استاد مېنى. شو پىتگچە حرمتىنگىزنى سىقل كېلدىم. اېندى شرت-شرت جواينگىزنى قۇلىنگىزگە بېرەن. مېندىن خفە بۇلىب اۋتىرمىگ تەغىن. مېنى كۇزى يومىق، آنكى سۇقىر^۱ دېب اۋىلەمىگ.

- اي عقلى كلتە بدبخت. پىغمبر دشمنى، مېنى يىخسى بىلىب آلگىن. آتەمنى مولوي «الف» دېگىچ اېدى. مېن اۋشندەي بويوك آدم نىنگ اولادىن. مېن سېنگە اۋخشەنگن كافرلرنى تۇغرى يۇلگە دعوت قىلەن، -دېدى استاد.

صىفدە جىملىك حكمران. استاد قۇتير^۲ بۇلگن تەكەدېك اوياق-بوياققە ھلاسلب، يوتونە آلمىسدىن سۇزىنى تىلدىن تشقرى چىقرە آلەمى سرگردان. شو آرەدە صىفدىن

^۱ سۇقىر: كۇر، عاجز؛ ھىچ نرسەنى بىلمەيدىگن، سىزمەيدىگن؛ قالات.

^۲ قۇتير: بىندە پوفكچەلر حاصل قىلىپ، قىتئىق قىچىشتىرەدىگن يوقوملى تېرى كىسلىگى.

چىقىپ، بىر-يېقى قور^۱ سىگرېتىنى ياندىرىپ، اىچىنى توتوندىن تۇلدىرىپ ھم آلدى استاڭ.

- خالص صىفدىن چىقەسن! - دېب دۇق قىلدى كىمياگە استاڭى.

- بو سىزىنىڭ شىخى مېھمانخانىھىڭىز اېمىس، دولتىنىڭ اىشخانىھىسى، - آياغىدە تۇرىپ، تابارە شىجاعت بىلەن ھىجانلى ھالەتدە جۋاب قىتىرىشگە شاشىلەدى، - مېنىڭ ھىجابدە بۇلىش - بۇلمىسلىگىم سىزىنىڭ ۋىظىفەھىڭىزگە كىرمەيدى خۇبىمى استاڭ! اكر مېنىڭ ياپىنمىسلىگىم دولت اوچون كتە پىراپىلىم توغدىرەياتىڭ بۇلسە، اوندە بو اىش بىلەن شىغىللەياتىڭ تىشكىلاتلار بار. سىزىگە علاقەھىسى يۇق استاڭ بو نىرسەلرنى. ھىر كىم اۋز اىشىنى بىلسىن...

- سېن قىز شىك كېلىتىرمە، كافر بۇلدىنىڭ. بوگون - آق، اوىنىڭگە بارىپ خىرات، صدقە قىل. شىخى جانگە نذر قىلىشنى بۇىنىڭگە آل. اوىنىڭدىن بىرگە اربىمەسىن دېسنىڭ آتە - آنەنىڭگە آيت ماللارنى چقىرىپ، قرآن ختمى قىلسىنلار.

كىميا سداغىدىن^۲ آتېلىپ چىققىن اۋقدەھى استاڭىگە ىنە يوزلدى:

- اۋرگىلىپ كېتەھى يىرەتگىدىن. اۋز بوپىروغىنى، سىر و اسرارىنى بىز اعاىاللردىن ىشىرىپ نىمە قىلەدى؟ پردە آرتىدەھى سىرلى سىندوقچەھىنى سىزىگە اۋخشەگىن اللە قىسى كىر ساقاللى اېر كىلەرگە آيتىڭ - و كېتىڭ اېكن - دە. بىز بېخىر! بو سىفسطەگە قىسى اخماق اىشانەھىدى؟ اصلا اىشانمەھىمىن يالغانلەرگە بونقە تېلەھ - تېسكىرى داستانلەرگە استاڭ.

- كىرگە كېتىدىڭدىنىڭ سېن قىز! سېنلار اللەنىڭ قۇربىگە بېتە آلەھىسنلار، ناپاك سىزلار، خىلقىنىڭىز لايى شونداق.

^۱ قور: مرتە، دفعە، دۇرە، گل.

^۲ سداق: تىردان، اۋقدان؛ كەھلك اۋقلىرى جاپلىنىپ، بېلگە باغلەندىگىن ياكە بېلگەگە اسىب يورىلەدىگىن اسباب.

- حقارت قىلمىگ استادا، -دېب ابدى ھەم كە كەپەلك كۋترىلب، كىمىيانىگ سۇل كۋكرەگى اوزرە قۇندى. تىلسىزىگىنە كەپەلك خودى، كىمىيانىگ قلىبىگە قولاق توتە ياتىگنەگە اۇخىب جىمىب توره دىر ابدى.

- قان كۇرگن كونلرئز سىزلر بىلن حتاكە گىلشئش حرام بىلدىنگىمى؛ صنفگە ھەم كىرئتمسلىك لازم سىز افلاسرنى...

- استادا! سىزنى ھەم بىزگە اۇخىشەگن بىر آنە دنياگە كېلتىرگن بۇلسە كېرەك؟ ياكە كۋكدن اسىلب توشدىنگىزمى؟ مېن حرمتلى آنەنگىزنى «ناپاك، نجس»، دېب آيتە آلەمىمەن، تىلېم بارمەيدى بوندەى بىمعنى سۇزگە، -دېدى كىمىا افسوسلئىب.

- شوندىن كېيىن اخى — افسوس! -دېبە چوقور اۇكسىندى استادا.

- عقل و منطقدىن ائش آلېنگ استادا. سىزىنىگ حتاكە درسىنگىزنى دىنگە ھىچ علاقەسى يۇق اۋزى. طبعئىنىگ اۋزگرمس قانونلرى بار. بىز طبعئى فرزندىمىز. بىز اۋن تۇرت مىليارد بىل زمان حاصلەسىمىز. بىزنى لايدن يرەتىب، اېرككىنىگ چپ قېرغەسىدن حاصل قىلگنى شونچە كە بىر داستان.

- دىن ھەم نرسەلردن اوستون توره دى. بو كفرانە گېلرېنگ جزاسى اۋلېم.

- يۇق، اوندەى اېمس استادا. حقىقتى آيتەمن اېندى. دىنى سىزگە اۇخىشەگن شھوت پرست اېرككلر اۋىلب تاپىشگن. اۋز منفعتىنگىز يۇلىدە فايدەلئش اوچون دىن دوكانىنى اچىب آلگن سىزلر. نېمە، سىزنى كۇرگن خدا بىزنى كۇرمەيدىمى؟ اۋرتەدە دلالنىگ نېمەگە كېرەگى بار؟ مېن شونى بىلەمن كە پروردگار اۋزى يرەتگن انسانلرېگە خاتىن دىر، اېرككىدېر نىفرت كۇزى بىلن قرەمەيدى. بلكە سېۋەدى. يۇق اېسە يرەتمەگن بۇلر ابدى خدائىم ادملرنى.

كىمىيانىگ يورهگى اوستىدە قۇنگن كەپەلك، تىك اوچرلرگە اۇخىب، تېپەگە كۋترىلدى. صنف بالەلرى «بو بخت كېلەلگى» -دېيىشىب، توتماقچى بۇلدىلر. اېرىم طلبەلر: «بو بى آزار جان ذات، تېگمىنگلر! قۇيىنگ ھەر كون درسىمىزگە كىرسىن»

دېب اۋىناقلىشىدى. شو آن تېپە ساچى كېتىگن اېللىك ايكى ياشدەگى استاذ تابوتدەى بۇيى چۈزىلىب، اوزون كاساو سيمان قۇللىرىنى سونىب، كپەلكنى ھوادن يولقىب^۱ اىب كفىگە قىسىب، مَجَقَلب^۲ تشلەدى. سۇنگ كفىنى آچدى. اۇنگ قۇلىنىنگ كفىدە كپەلكىنىنگ ساووققىنە جسدى ياتر، گۇزل مخلوقىنىنگ قانى و قناتلىرىنىنگ تعريفسىز بۇباغى استاذىنىنگ ناپاك كفىگە افسوسكە، مەرلەنىب قالگندىر اېدى.

شو تاب صنفدن «بى بى»، «وى، وى»، «چوق، چوق» -دېگن اۋكىنچ تاووشلر كۇترىلدى. بعضى قىز طلبەلر كپەلك اۋلىمنى كۇرىب، ھىق-ھىق يىغلىشىدى. استاذ قۇلىدەگى بۇر و كتابنى تختهگە قرەتە اولاقتىردى و جەل بىلن صنفدن تشقىرگە چىقىب كېتىدى. تنفس قۇنغىراغى ھم چلىندى.

تنفس پىتى، اونيورسىتېتىنىنگ حاويلسىدە اۋقوچىلر تۇپلەنىشىب تورىبتىدى. تارتىشولر قىزىغى ھمان كىمبانىنگ حجابدە بۇلىش-بۇلمسلىگى اوستىدە بارەياتىر اېدى. اونيورسىتېتىنىنگ باشقە اۋقتووچىلرى كىمىا مسألەسىدە استاذ «خ.أ»نى ملامت قىلىب تورىبىدىلر. استاذلرنىنگ تاووشى بلندىب كېتىدى. شو ماجرا يوزەسىدن بىر-بىرىگە قىزرىشىدى، بۇزرىشىدىلر. آغزەكى جىنگ كوچەيىب كېتىدى...

- استاذ حكىم، سىزىنىنگ ھم مېيەنگىز اىنىگىنگە اۋخشەيدى. مېنىنگ تامانىمنى آلمەى حجابسىز بىر شللقى^۳ قىزنى حمايە قىلەيىسىز-آ؟ گۇر و ايمانىنگىز كويىب كېتىدى، دېب اچىق اوستىدە مەمىزلەدى^۴.

^۱ يولقىماق: تارتقىلىب اوزىب آلماق، سىلتب تارتماق، يولىب تشلەماق، يولماق.

^۲ مَجَقَلبماق: آرتىق درجەدە اېزىب يىنچماق، بَجَقَلبماق، اىچق قىلماق، اىچىغى چىقماق.

^۳ شلقى: شرم-حىانى بىلمەيدىگن، بۇلر-بۇلمسگە جىنل كۇترەدېگن، جىنلش.

^۴ مەمىزلەماق: بۇزرىب قرەماق، يوزگە آتىنلماق.

- آغیزینگیزگه قرهب گیرینگ استاذ «خ»! انسان نینگ حرمتیگه تجاوز قیلینگ خۇبمی؟ -دېدی استاذ حکیم باسیقلیک بیلن.

- مېن بو بد جنسلرنی حقارت قیلگندورمن. باشقهلرنی اېمس، -دېدی استاذ «خ» قۇللى قلتیرهگن بېر حالتده.

- نېمه، سیز عیب سیز پروردگارمی؟ «اۇل اۇزینگه باق، كېين ناغاره قاق» - دېيىلگندير مقاللرده.

- سىزىمى ھلى اۋشە شىخسىت شىناس دامالا! -قۇپال توس بىلن سۇز قاتدى استاذ «خ» كىسبداشىگه قرهب.

- ھە، مېن بۇلەمن. تېلىمنى قېچىتىدىنگ سېن افلاس. اېندى ھەمەسىنى شو جايدە بالەلر نینگ حضوريدە ايتىب بېرەمن. باشقه چارەم قالمەدى، سېنى ھەم باشقەلر بېر تىب قويسە يامان بۇلمەيدى. قنچەلىك آلچاق^۱ و ياوو بۇلگنلىگىنگى اۋز كۈزىم بىلن كۈرگنمن.

- نېمەنى آيتەسىز استاذ حکیم؟ ھىجانلمنگ، انسان خطاكار.

- نېمەنى آيتردىم؟ ھلى ھىچ قچان ايسىمدن چىقمس كۈرپە تگى ماجرالرنى -دە، اېندى اېسىنگگە توشگندير-! سېنىگ ھەم كىملىگىنگى اۋقوچىلرگە بېر تىشىتىرىب بېرەى بۇمسە يم، اجازت بېر.

استاذ «خ» سېكىن اۋرتەدن سوغرىلىب چىقىب كېتماقچى بۇلىب اېدى ھەم كە، استاذ حکیم آلدىنى تۇسدى و سۇزگە كىردى:

- اۋشە سېن اېمسمى؟ آلتى يىل شۇروىگە بارىب پولىتخىكىنى اۋقىب كېلگن؟ ھر كونى شراب اىچگىنىنگى، مست-الست بۇلىب قوتورىب^۲ يورگىنىنگى كۈرمەگن كونىم بۇلمەگن، ارىقلرگە دۇمەلب ياتگىنىنگ اېسىنگدن چىقدىمى؟ اوندىن كېين ھەم

^۱ آلچاق: اۋتە كېنگن رذیل، پست؛ ياوو، نامرد، خايىن.

^۲ قوتورماق: جان-جهدى بىلن، اۋزىنى توتالمەگن درجەدە، ياووزلرچە حرەت قىلماق؛ باسر-توسرىنى بىلمەى قالماق، حددن آسماق.

اؤشه بیره اول آخرى، ييگيرمه ييلدن كۇپراق يشب، ايشينگ فقط ايچيش اېدى-
كو! ينه ايشينگ بوزوق خاتينلرينگ آياغىنى يەلش اېمسمى اېدى؟! بېساقال
بازليک هم سېندن قالمەدى. پوليسگە توشگن سېن اېمسمى؛ كسلخانه لردە ياتيب
چيقتن اۇزلرى اېمسمى؟ مېن بو صحنەلرينگ تيريك گواھى بۇلگنمن-كو! اوو
قىسى بيرىنى آتەيىن؟ غر خاتين دېب اېشيتگنديم، بيراق سېندەى توپن، غر
اېرکكى كۇرمەگنمن. ييگيرمه يىلليک بوزقليک بېلگىلرى هنوز تورقینگدن¹ اوريب
توريبدى. اويىلگين اخير بوندهى دېندار و خدا جۇيلىكدن. كير كېچميشينگىنى قى
بېردە يشردىنگى؟ اولرنى بير كونده آيتيب، توگتېب بۇلمەيدى. باشقە هم شونگە
اۇخشش شرمندەليک جايلرينگ نهائتدە كۇپ بۇلگن. اولرنى كېزى كېلسە آتەمن،
خۇبمى؟

- همه سىنى تهمت قيلەسيز استاذ حكيم، مېن پاك آدم بۇلگنمن، -دېدى استاذ
«خ» يوزيدن قانى قاچيب.

- هلى شوندهيمى؟ -بكسىنى اچيب اېومنى چيقرە ساليب، -منە بولر هم
عكسلرينگ. همە ياق لاله زار-كو! بولرگە نيمە دېيسيز؟ بيز بيلن بيرگە اۇقيگن كيم
قنچە طلبەلر هم شاهد-كو! اولرنى شاهدليکكە چقيرەيىنمى يا؟

- بۇلدى مسخرەبازليک استاذ حكيم، -البومنى قۇلېدن اوزيب آيب، بيرگە آتدى، -
قۇيىنگ بولرنى، مېن پېشين نمازيگە بارەمن، كيتديم، -دېدى استاذ «خ» و
صحنەنى ترك قيلدى...

اېرتەسى كيميا اۇقىشىگە كېلدى... استاذ اوستيدن، رئيسگە، وزيرگە و پريزدىنتگە
يومەلاق خطى يۇللەدى. سۇنگ رسماً عريضه قيلدى. شو كونى استاذ «خ»
عرضلېب، اونيورسيتېتگە كېلمەدى. اونيورسيتېت رهبريتى اېسە، كيميانى شكائيتيگە

¹ تورق: تشقى قيافە، اوضاع، و حاجت.

جواب قىلىش اۋرنىدە، «استاذگە حرمت قىلمەن»؛ «بېتىگە چاپىلىك» و «...» عىيى بىلەن اۋقىشىدىن ھىدەلسىن» -دېگەن خىلاصەگە كېلىشىدى. سۇنگ رھبىرىت: «كىميا حجابسىزلىك قىلگەن؛ شىكائىلىك قىلگەننى اوچون مىھمەتلىك ھەيۋەتلىك جىۋاب بېرىسەن» -دېگەن مەنئە دەۋا عرىضەسىنى ھەم ھازىرلىشىدى و تېگىشلى ادارەلەرگە جۈنئەتلىدى. استاذ كىمىنەن دەرگى چىقىمەدى. ايكى كۈن اۋتىب يەكە باغدىن اۋلىگى تاپىلدى.

شەھردە ھەممەنەن آغزىدە شاۋ-شۋو گېلەر يۈرىدى. كىمىنەن مەجراسى كەتتە داستانگە ايلنگەن... كېسكىن ھەيۋەتلىك خىۋاتلىرىنى كىميا جانىنى قۇيرىگە جاي تاپمەي، ئەنەسى بىلەن بىرگە اېرتەلب بىر ۋاقىت شەھەرنى تىرك اېتەدى. تۇپارى^۱ سۋادسىز قوراللى دىندارلار اېندى كىمياگە امانلىك بېرمىلىگى مەلۇم بۇلدى. كىميا قانۇنىي يۇللى بىلەن ايكى ھەپتە اېچىدە اۋزىنى كۈن باتىر دولتلىرىدىن بىرىگە بېتىكىدى... مقرر اۋلىمدىن نجات تاپدى.

آغىر كۈنلەرنى باشىدىن كېچىرىگەن كىميا بارگەن مەملىكتە يىنگى ھەيۋەت باشلەدى. بو يېردە كىميا طىبى كۆرىكىدىن^۲ اۋتكىزىلدى. رۋىھىتىنى سەنئەتلىك اۋنىنگ كۆمىگىگە اشىقىشىدى^۳. ساغلىگى تىكلەندى. كىميا اۋ كىيىنىپ، اۋ تىرەپ دىنەگە قىتە كېلگەنگە اۋخىش، ايدىيال شىراپىدە ىشەي باشلەدى. شو دولتدە اۋقىشىگە كىرىپ «بىر ھەقۇقلىرى» ساھەسىنى تىلەدى. بار كۈچى، مەھرىنى شو ساھەگە بىغىشلەدى... استەدالى ياش تىقىقاتچى بۇلىپ بېتىشىدى.

كىميا ايزسىز، دىركسىز اېمىلىگىنى اشىكار قىلىش اوچون يىنە كۈرەشىگە دوام بېردى. انترنېت مەجراسى كېلەسىدىن اۋز تىكىرىگە جاي اچىرىلدى. خىۋاتلىك قىشى يارۋىلىك تىرەتىش و رۋىھىتىلىك قىلىش نىيەتدە يىنگى بىر ۋىب ھەيۋەت اچدى. مەجراسى

^۱ تۇپارى: جۋدە سادە، عادىي، قىلۋىرلىكنى بىلمەيدىگەن.

^۲ كۆرىك: تېكىشىرىش، ائىقلىش، بىلىش، بەھالاش تېكىشىرۋى.

^۳ اشىقماق: سىزسىزلىك بىلەن ھەيۋەت قىلماق؛ شاشىلماق، ائىتىقماق.

ترماقلرده جانلی کورستوولر تشکیل قیلدی. انسان حقوقی معمالرینی یخشی یاریتووچی بۇلیب ایش باشلهدی. سایتیگه «کپه‌لک» -دپیه آت قۇیدی. درس و تعلیم یانیده قیسقه-قیسقه تحلیلی مقاله‌لر یازه کبتدی. بیتیکلریده دردی اؤتمیشی عکس ابتدیریلیدی. ایلك مقاله‌سیگه «استاذ آته‌نگندن اولوغ اېمس!» -دېگن نامنی بېردی. ایکینجی انالیتیک مقاله «استاذ قاضی اېمس!» -دېگن تیمه‌گه بغیشلندی. اوچینچی تحقیقی مقاله‌سی: «بوزوقلر دیندن پناه ایزلشه‌دی»؛ کپینگ مقاله‌سی اېسه «قار یاغدی-یو، ایز اۇچدی» -دېب ناملندی. اونینگ «فکریمیزده قصور بار»، «شرقه حسیات، غریبه اېسه عقل و تجربه‌گه سېوینیلهدی»... سرلوحه‌لی قطار مقاله‌لری اونى جوده یم مشهور قیلیب یوباردی. هر بیر مقاله شرق و غرب فرهنگلری اؤرته‌سیده‌گی تفاوتلر روحی بیلن سوغاریلیب یازیلدی. موهوملیک جایینی انیق‌لیق، اېرتک-افسانه‌لر جایینی قیناق حیات نفسی اېگلله‌دی. اېرکینلیک نیمه اېکینى کۆزی بیلن کۆریب، مشاهده یوریته باشلهدی. او عمرینی عیاللر آزادلیگی یؤلیده بغیشلهدیگن بۇلدى. کیمیا کون باتر دنیا‌سیده آتشین نطق و معالی فکرلری اوچون قۇشه‌لاق مکافاتلر آلدی. خاتین-قیزلرگه نسبتاً، هر خیل شخصلر، گروهلر، طایفه و دینلر تامانیدن بۇله‌یانگن کم‌سیتیش؛ ناروا ظلملرینینگ آلدینی آیش قیلیب بېلگه‌لهدی. کېلگوسی مقصدی، عیاللرینینگ حرمتینی اېرککلر قۇلیدن قتریب آیش، جمعیت رهبرلیگینی یالغیز اېرککلر اېمس؛ خاتین-قیزلر هم بو بخت و سعادتگه سزاوار، دېگن غایه‌لر تشکیل بېردی. خاتین-قیزلرنی تېنگلر ارا تېنگ کۆریشنی آرزو قیلدی. کیشیلیک جمعیتی انسانی و دموکراتیک قانون-قاعده‌لر اساسیده قوریلسه، انسانلر شاد و قووناق، ساغلام یششه‌دی. سؤز اېرکینلیگی و عدالت بار جایده دورکون-دورکون¹ زمانلرگه اېریشیلهدیگن مسأله‌لر اېگلله‌دی. کیمیانی اولوغ مرتبه و رواج‌لنیش پله‌ پایه‌لری کوتماقده.

¹ دورکون: بولوق، تۇله، گۆده‌لی؛ اوسیق، اوسیب بیتیلگن.

قلمپیر

قلمپير

كېلىنگ، بدىعى تۇقىمە قىلمسدىن، سۇز و تصويرلر نىنگ بۇياغىنى قويوقلشتيرمسدىن بۇلگن گپنى بۇلگنىچە آيتىب بېرەى:

بوندىن اېللىك سكىز يىل آلدىن، چمەسى بېش-آلتى ياشلرئىمدە اېدىم. قۇشنى نىكىدە نىمە بۇلگىنىنى زۇرغە-زۇرغە اېسلەيمىن. آنمگە اېرگشىب بارىب اېدىم قۇشنىمىز نىكىگە. اېسدە قالىشى نىنگ بىر سببى بار. كمبغل گىنە قىشلاقدە يشەيمىز. قىشلاغىمىزنى گلتىپە دېگىچ اېدى. سېر سوو، سېر باغ، سېر درخت كۇم-كۇك وادىي نىنگ بىر چىتىدە يېرلشگن. وادىي نىنگ بىر ياغىدە آقر دريا؛ بىر ياغىدە شاشقىن نهر اۇتەدى. دريا اولوس دارلىكلرنى سوغارسە، نهر اېتك قىشلاق و كتە-كىچىك قريه لرگە سوو بېرەدى. دريا هم نهر هم پست-بلند قيرلر بىنىدە جايلىشگن. يىگىرمەگە يېتر-يېتمس خاندان بو قىشلاقچەدە. بىزنىنگ بىرندەلى حاويلمىز كون چىقرگە قرەب سالىنگن، آرقەسى جرگە قرر، چپ تامانىمىز خالەم نىنگ اويىگە توتش، اۇنگ تاماندەگى قۇشنىمىزنىنگ حاويلسى اېسە جنوبگە تامان قرەيدىر. ياغىن-ساچىن بۇلگودېك بۇلسە، ناوهرلنىنگ شرأس سووى حاويلمىزگە آقىب توشەدى، همە ياقنى شلبا-كۇل قىلىب تشرلدى. اۇشندە مېن بالە پقىر قۇلىمگە بېل توتىب، نىمەدىر قىلماقچى بۇلگنمىن-و، ايشتانچەم كلاو لنىب، چلقانچىسىگە يىقىلىب اورگنمىن. انه تماشا! اكە، آپم، آنم لايگە بېلنگنىمگە قرەمەى، «بوزقلىك قىلدىنگ

سېن تېرآنچە، اۋزى بيتتە اوست و باشينگ بار اېدى...» -دېيە آيتىپ، بېتىمگە ترسكى، شېپەلاقلر توشيره بېردىلر. آرە بير آز تىنگىچ، كۈزلرېنى چپ قىلىپ، يرېمتە ناننى دستورخواندن سېكىن آلىپ، قۇلتىغىمگە بېكىتىپ، زىغىر تۇپانى^۱ سالىنگن سامانخانەگە كىرىپ يشىنىپ آلدېم. مېندە عىب يۇق اېدى، ھمە عىب قۇشنىدە اېدى. ترناولرى^۲ حاويلىمىزگە قرەمەگندە بوندەى كۇرگولىك بۇلمىدى. انە اۋشندن باشلب مېن قۇشنىمىزنى يامان كۇرگنمەن-يامان. اۋغىلچەسى بىلن اۋىنمەى قۇيگنمەن.

حوىلى نىنگ اصل اېگەسى ھمساىەمىز باشقە يورتگە كۇچىپ كېتگن. قۇرىماللىكە بير باياقىش گىنە^۳ عابلىنى قۇيىپ قۇيگن. شو آيتەدىرگىم - يان قۇشنىمىزنىنگ اويىدە چقەلاق بۇلدى. كىمبىل نىنگ اويىدە چقەلاق توغىلىشىدىن كىم ھم خورسند بۇلدى؟ بابا، آتە، آنە، خالە، عمە، تاغە و آپەلردن سېوېنچى آلىشگە كىم آشىقسىن؟ سېوېنچى نىنگ اۋزى قنى؟ قنچىغەسىز آدم عابلىسىدە كۇز آچدىنگىمى، يىغلب توغىلەسن. تېپكى-يومروق يىب اولغىەسن. كويىپ-پىشىپ يشىشگە محكوم و مجبورسن؟ قردىنگىمى، آخرى درد يوكى آستىدە كۇز ياشىنگىگە كۇمىلىپ بارسە كېلمىسگە^۴ روانە بۇلەسن. بالەلىگىنگ ترىقەدى ساچىلىپ كېتەدى؛ ياشلىگىنگ، يىگىتلىگىنگ اۋكسىك^۵ و اۋزگەلر ايشى، زوغومى آستىدە اېزىلىپ ساپ^۶ بۇلەدى. كېكسەىگندە كوندەدى تېپەنگدن يارىلىپ، خزان بىراغى ىنگلىغ تۇكىلەسن، تريكىلەسن^۷، تېگرەنگگە قرەيسن، اۋزىنگدن باشقە ھىچ كىم يۇق. اۋلىمدن باشقە

^۱ تۇپان: مېدە چارى ياكە يىرىك كېپىك.

^۲ ترناو: ناوہ (نوا): ياغاچدن قوور ياكە ارىقچە شكلىدە ىسلگن ماسلمە.

^۳ باياقىش: بېچارە، شۇرلىك؛ آچىنىش اويغاتوچى حالتلى.

^۴ بارسە كېلمس [بېر]: نرىگى دنيا، قېر.

^۵ اۋكسىك: اېزىلگن، غمگىن، قىغولى؛ بىرار نرسەدن افسوسلىنىپ خفە بۇلىش.

^۶ ساپ بۇلماق: يۇق بۇلماق، اۋرتەدن كۇترىلماق.

^۷ تريكىلەسن: يالغىز قالەسن، سېن ترك اېتەدىلر.

غمخوارینگ یۇق قۇلینگدن اوشلەسه. چىغايلىك نینگ تورگن-بیتگنی اۋکینچ، قییناق و عذاب-عقوبت! توغیلب-آق، مینگ بیر کسلگه یۇلیقهسن؛ بۇلمه غور رسم-رُسوملرینینگ چیریک اییلریگه باغلب تشله ییدیلر. خرافاتلر ایلان-چیان بۇلیب یاقه ننگگه ترمشه دیر. بلا-آفتلر تېپه ننگدن یاغیلگنی یاغیلگن.

اۋشندە قیش نینگ اۋرتەسى اېدی. ملا کېلیب چقه لاق نینگ قولاغیگه آدان آیتدی. بیرگینه ایچکویر ماماسی اېزگو تیلکلر ایله حاضرچه چقه لاق نینگ آتی «قلمپیر بۇله قالسین» -دېیه آت قویدی. کیم و قیدن کېلگنینی بیلمه یمن. «یۇغ، یۇغ، آتی قربان بۇلسین «قربان!» -الله یۇلیده جانینی قربان قیلهدیگن ییگیت بۇلیب اولغه یسین الهیم!» -دېدی بیردن اووچینی کتّه آچیب، یوزیگه قۇل چبککن بیر آتین آی. ایککی-اوچ کون اۋتمه ی، چقه لاق کسل بۇلدى. تغین ملانى چقیردیلر. ایلس-ایلس اېسىمه، «آخونیم!» -دېر اېدی کۋچیلیک ملانى. ملانینگ یاشی اۋتیز بیرده بۇلسه کبره ک. بۇی پستراق، بیچیمی بۇدنه دېک کینه، میده قدم، ساقال و یوزلری یلتیره ب تورردی. باشیگه آق سلّه اۋرردی. بیر پیت کیریب کېلدى. بخمل کۋرپه چه ده اۋتیریب آلدی و: «بلا-آفتلردن اسره گه یسېن یار رېیم!» -دېب چقه لاق نینگ آغزیگه اوچ قیتّه توفله دی. عربچه جمله لرنی و لدره ب-و لدره ب، چقه لاققه «امت» دېب آت قویدی. منه بیر چقه لاققه اوچته آت نقد بۇلدى. بایه گى^۱ ملا، بیر کونی کېلیب، «محمدگه امت بۇلسین! بیر یوزیده کلمه گوی مسلمانلر کۋپیّه بېرسین!» -قېلیب حقینی آلیب، تاماغینی مایلب کېتدی. چقه لاق بۇلسه، هلی کۋز آغریق، هلی ایسیتمه سی آشگن، بیر قره ب سیز تیریق، ینه بیر پیت کۋرپه سیز قیزه میق تاشگن، بولر یېتمه گنیدېک تاماغی خۇرازک بۇلیب آغریق، بیر آی اۋتیب چبچک چقیدی، دمی سنچیق، گاه کۋک یۇتل، گاه توماو، یره-چقه لر... باسیب کېتگن. کۋریم-کۋز بۇلیب کېتدی چقه لاق. بۇلردن بۇلمسی درگمان. بیر بو

^۱ بایه گى: بایه، حالی صادر بۇلگن، بایه یوزبیرگن، کۋریلگن، ایشیتیلگن؛ حالیگی، اۋشه.

اېمىس، برچە چقەلاقلار شو دۆرەنى باشىدىن كېچرەدى. چىقمەگن جاندىن اميد دېگنلرېدېك، ايرىمچىلر ايرىمنى قىلىپ، اېمچىلر چقەلاق نىنگ تاماغىنى باسەدى. كۆزلرېگە قىزىم سالەدىمى-يېي، كۆكرەگىگە شىمە باغلاشەدىمى؛ كۇپراق ايشلرى شو ملاگە آلىب بارىپ اۇقتىش، كوف و سوف قىلدىرىش بىلن آوارە. گۇدكە سىرە اۇنگلىش، توزەلىش يۇق. مىرىق چقەلاق ياتە آلمەي، خلص علتى بۇلىپ، چلە جان اۇسەپىدى.

او زمانلر توغىلگن كونلرنى بىرەم قىلىش قەيىردە؟ كىمىغل نىكىدە «اۇزبېك نىنگ اۇپگنى تېپگنى» -دېگن مقال ھىمىشە حكمران. چقەلاق نىنگ آتەسى قلمراد بىراونىنگ ايش و قوشى بىلن عايلەنى تېبەرەتەي، -دېب ھفتەلب قارەسىنى كۇرستمەي يىتېب كېتگن. كونلردن بىر كونى ايشىدىن بۇشەگن قلمراد خاتىن-بالەسىدىن خبر آلگنى اويىگە كېلدى. خاتىنى برچىن آپە كۇيلگى نىنگ يىنگى بىلن كىلىمىد گۇدكى چىبىنلردن يېلىپ تورەدىر اېدى. قلمرادنىنگ برچىن آپەگە التفات قىلردەي مجالى يۇق اېدى. برچىن آي آپە قىينەلىپ شىگىدىن يىغلەي-يىغلەي كۆزلرى كۆكرىب كېتگن. اېرى بىلن اورىشماقچى اېمىدى. يىرىم جانى اېرى نىنگ اىچىدە، يىخسى كۇرەدى. برچىن آپە: «خدانى يىخسى كونىنى كۇرمەدىم بو اېشىگدە، سويگىم آقريب اۇلىب كېتەمن» -دېب تاووشىنى چىقريب يىغلب، يورەگىنى بۇشتىدى. كۇرپەچە نىنگ بىر چېتىدە چۇككەلەگن قلمراد ھم كىلىگى كېلىپ، يورەگى تاشىب، سېزدىرمىسدىن كۆز ياشى قىلدى. قلمراد: «نېمە قىلەي خاتىن! بندەگە بندە بۇسەم. قۇل قىلىپ يەرەنگن تنگرىمدىن منتدار بۇلەيمى؟! بو نېمەسى؟ بالە-چقە نىنگ حضورىنى كۇرە آلمەسنگ، خاتىنىنگگە اېلكەداش بۇلە آلمەسنگ! شو يىم حيات بۇلدىمى؟! مېندەيلرنى باشىنى سىلەيدىگن كىمسە يۇغ اېكن بو ياروغ عالمدە» -دېب المىنى تۇكىب سالىدى. برچىن آپە اورىنىپ سورىنىپ، بىر بۇلك زاغەرە بىلن بىر چاينك چاينى اېرى نىنگ يانىگە كېلتىرىپ قۇيدى-و: «سىزنى پېشانەمدىن

آمەسین الھېم، قرەنگیز بىر دولت، باشىمگە پنه بۇلىب تورىنگ آتەسى» -دېيە كۈنگىلىنى كۈترگن بۇلدى. سۇغىنراق قلمراد اكە خاتىنىگە قرەب:

- بىر بى بى سەشنبە قىلرلىك سودا كېتىردىم آنەسى. ملا ھم كېلىب قالەدى. خاتىن-خلىچنى چقىرىب ارواحلرنى خشنود قىلەيلىك بىز ھم ابل قطارى. اويت بۇلەدى، اوستىمىزدن كويليشەدى. قۇنى-قۇشنى اېتگىنىنى قىمەسك بۇمەيدى خاتىن، -دېدى.

- خۇب آتەسى. اورىنەيىمىن شونگە. سيال-بابات بار بىلەمن، دېدى خاتىنى. ايتىلگنلر يىغىلىشىدى. بى بى سەشنبە ايچىلدى. ملا بۇلسە اوى نىنگ تۇرىدە كېرەيىب اۇتيرىدى. اوسىق ساقالىنى سيلر، تسيحىنى تۇرتتە-تۇرتتە آغدرر، «سبحان الله، سبحان الله» نى ايتىشدىن تۇختەمسدى. ايلان نىنگ ياغىنى يلەگن ملا بى بى سەشنبەدن راسە بۇكركن، غرە-غرە كېكىرىب، «بسم الله، بسم الله، بسم الله» - دېگنچە قاشىق، تباقنى يلب، يوتقب، كۇزلىرى تۇرت تامانگە چقچەيىب توره بېردى. خاتىنلر «ساوغەنى كېلتىرىنگ» قىلىشىب بىر-بىرلىرگە شىيىرلىشىب تورهدير اېدى. شو پىت قلمراد برچىن آپەگە:

- قنى نىمە قىلدىنگ ساووغەنى؟ -دېدى.

- منە كېتىرەمن، -دېب اۋرنىدن سىچىب توردى-دە، «قرآن» آستىگە قۇيىلگن آپاق سوپ (سورپ)نى ملاگە االىب كېلىب اېرىگە بېردى. قلمراد آق سوپنى ملاگە توتقۇزدى. ملا اېسە اول ايكى قۇللب كلام اللهنى آرکن، اۋيىب، كۇزىگە سورتىب، ياستىق اوستىگە قۇيدى. قرآن آستىدەگى بېش-آلتى مېترلىك سوپنى قۇللىرىدە توتگنچە يىغىلگنلرگە قرەتە نطق سۇزلەي:

- عزيز مۇمنلر، -چۇزىب بىر كېكىرىب آلدى، -حرمتلى مسلمانلر! بوگون قلمراد عايلەسىدە بىرەم. و قالەبېرسە ھەممەمىز اوچون تېرگ سنە. منە بونى، -آق سوپنى يازەياتىب، -يىلسنگىز كېرەك، امت جانگە آتەلىب، بىچىلگن «كفنىلىك» بۇلەدى.

نصيب بۇلسە، كتە بۇلسە، امت جان كافرلرگە قرشى غزواتگە كېتەدى. شهادت نصيب قىلگن بۇلسە، منە بو «آخرت سرپاسى» بۇلەدى، -دېيە ھۇنگ-ھۇنگ يىغلب صلوات آيتدى. قالگنلر هم «يا مصطفى!» -دېب بلند تاووشدە ملانينگ سۇزلىرىنى تصدىقلىشىدى. رمزي معناده كسل بالەنى، بىر آيلىك چقەلاقتى سوپگە/كفنىلككە اۇرەب يومەلتدىلر. شوندى قىلىب، بى بى سەشنبە معركەسى ترقهدى. مېن بو صحنەنى كۇرېب توربىمەن. معناسىنى بىلمەيمەن. خاتىنلر نينگ يىغىسىنى كۇرېب، اۇشە لحظه دن باشلب، گۇدكلىك اۋى-خيالىم چىلپرچىن¹ بۇلدى. بىرآز آنلەدەم داستاننى. مېندە سوال توغىلەبېردى. كافرلر كىم؟ محمد كىم؟ اسلام نىمە؟ -دېگن اۋىلاو مېنى ايلان-چيان بۇلىب چقەبېردى. يېتىنى تۇلدىرىب سكىزگە قدم قۇيگن بۇلسم كېرەك. بوندى واقەنى بىر اۋزبېك عايلەسىدە بىرىنچى كۇرىشىم اېدى. باشقە خاندانلردە هم شونقە ايشلر بۇلگىمى، يۇقىمى؟! بىلمەيمەن. تاريخدە اۋقىگىم بار. اورنگزېب زمانىدە، بىر آنە اۋغلىگە چىلوير² اىپ بېرىب يوبارەدى. «اېندى بار اۋغلىم بىر شىعەنى اۋلدىرىب، قانىگە شو اىنى بۇىب كېل...» -دېيدى.

آرەدن سەھل كم آلتىمىش اىل اۋتدى. اصلى بىر چقەلاق بۇلگن اوچلىك: «قلمپىر» دن، «قربان» دن و «امت» دن ھلىگچە خبرىم يۇق. اىللر اۋتېب، شو امتگىنە نىمە بۇلدى اېكن؟ اونىنگ تورموشى قى يۇسىندە شكلىندى اېكن؟ ايش قىلىب، «جھاد قىلەمن» -دېب حاضرگى جھنم نىنگ قان قازانىگە قاوريلمەگن بۇلسىن زارە، -دېگن اۋى-خيالىگە بارەمن، سورىشتىرىب-سورىشتىرىب دەرگىنى تاپە آلمەدەم. ياشى-كو، آلتىمىشگە يىقلىگن. تورقى، كۇرىنىشى، بۇى-بستى قندەى اېكن؟ اىچىم كويگىدىن، اۋلىب كېتمەگن بۇلسە يىخشى بېچارە، دېب يورىمەن.

¹ چىلپرچىن: پرچە-پرچە، مېدە-مېدە؛ چىل-چىل.

² چىلوير (چىلىير): اىنگىچكە پىشيق ارقان، ارغمچى؛ چىزىمچە.

اوتینچیم شو: اوشه مېن بیلگن کسلمند «امت جان» مییه سیگه اپکیلگن دهشت اورغی سبب اولیب کېتمه گن بولسین. او کته ییب، بختیار آته بولیب، بیرگینه پاک عایله نینگ باقووچیسیمی؟ بیلمه یمن. قربان آته-آنه سی نینگ چپکن دردلریدن خبری بارمی اېکن؟ قیده سن جگریم «قلمپیر»؟ قیده سن یوره گیم «قربان»؟ قیده سن «امت»؟ حیاتینگدن بیر قتیمینی گپیریب بېر. ساغیندیم اولگوده ی. قیشلاغیم نینگ شمالی، ساغینچلی ایسی کبلیب تورسین سوزلرینگدن قربان. یازگنلریم حق و حرمتی تیریک بولسنگ تقدیرینگدن یاز مېنگه، یاز عزیزیم.

۲۰۱۸

تورانتو، کانادا

اوزيلگن ارقان

اوزىلگن ارقان

اوزون يىللردن بويان حسن شەردە يوك كۈتريب، حماللىك قىلەدى. بو كسب اېگەلرینی «جۋالى (قاپكش)» دېگىچ اېدى. يوزلرى قوياش تفتيدن راسە قاره ييب كېتگن حسن - سيبىرەك ساقال، چۈزىنچاق يوزلى، قاتمەدن كېلگن، يىلنگ تۇش^۱، عادى بىر ايشچى. اېنسەسى^۲ توشىب يورر؛ ايكىتە پستكى آلد تىشى توشگن؛ كۈزلى اىچكرىگە چۈككن؛ قنسىگن راق يىرتىق كلە پۇشىنى قىشە يتىرىب^۳ باشىگە قۇندىرىب يورەدى. آياغىدە لونجلىرى سۈتلىق يماق كاوش ايلىنگن؛ اېلكەلرىدە داغ بۇلىب بيتگن ارقان ايزلىرى شونەدى كۈرىنىب تورەدى.

حسن تىنىم بىلمس محنتكش بىر انسان، محنتگە قارىلىب كېتگىدىن بۇش وقت دېگن نرسەنى خيالىگە ھم كېلتىرە آلمەيدى. ايش - يوموش بىلن اورىنە ياتىب كۈزلى مىزغىب آلەدى. چقان - چقان يوگورگىلىب ايش قىلىشگە اۋرگىنىب كېتگن. ياشى بىر يېرگە بارىب، حركتى سېكىنلىشگىدە گاه بىردە «ھى، آتنگ!» - دېب قۇيەدى. عمر بۇيى اىپ اېلكەسىدىن توشمەگنى اوچون اونى حسن چىلبىر

^۱ يىلنگ تۇش: گۈدەلى، بىلكەلرى كېنگ؛ كۈكرە كدار.

^۲ اېنسە: آدم باشى نىنگ ارقە پستكى قسىمى.

^۳ قىشە يتىرماق (قىيشە يتىرماق): اېگماق، بوگماق، اعدىرماق، قىنغە يتىرماق.

دېيىشردى آدملىرى. شو كىر ارغمچى اونىنگ هم نانى، هم جانى. كتە-كتە قاپ، قنار تۇلە بوغداي-اون، غلە-دانلرنى اولكن يوك مۇترلردىن آرقەلب، ماركېتگچە ارەنگ اېلتىپ توشىرەدى. قۇپال، آغىر يوكنى كۇتريب بارركن، قاپ-قارە تېرگە باتىپ، بۇيىن تامىرى اوزىلگودەي، كۇز ساقەلرى^۱ كاسەسىدن آتلىپ چىققودېك بىر كۇرىنىشده، ايچىده بىر نرسەلردن خواطرلنگنگە اۇخشب، اۇكسىنىپ-اۇكسىنىپ اۇزىچە: «شونىسىگە هم شكر!» -دېب قۇيەدى.

چمەسى اېللىك بېش ياشلى حسن چىلبىر اوچ قىز، بىر اۇغىل نىنگ آتەسى. شەرگە يقىن قىشلاقلردن بىرىدە حىات كېچىرىپ كېلەدى. كېچگەچە ايشلب تاپگن-توتگىنى اويىگە آلب بارەدى و ياش-ياش گۇدكلرى نىنگ آغزىگە توتەدى. بىر كون شەرگە كېلىپ قاپكشلىك/حماللىك قىلمەسە، ايشلمەسە - تيشلمەيدى. شونىنگ اوچون حسن چىلبىرنىنگ كونى شەردە اۇتدى. قارانغى توشگندە پاخالپۇش^۲ كلبەسىگە كىرىپ بارەدى. بو كلبە هم بىراونىنگ امانت اويى. حسن عايلەسى بىلن كىم نىنگدېر باغىگە قاراووللىك^۳ قىلىپ يشەيدى. حسن اۇتە عذابلى كېچگن اۇتمىشىنى خاطرەسىدن اۇچىرىپ يوبارگن گۇيا. موھوم امىدسىز كېلەجك حقىدە اۇىلشگە هم وقتى يۇق. بوگون نىنگ اچىغىنى تاتىپ، يشىدن اۇزگە علاجى يۇق.

حسن بوگون بر وقتراق اويىگە قىتدى. گۇدكلرى نىنگ قاشىگە بېتىپ آلركن، بالەلرىنى بىر-بىر بىر بىرگە باسىپ، اېركلەتىپ اۇىنتدى. بېشەلەسىگە بېشتە شۇر قند اوزەتىپ، آغىزلىرىنى شىرىن قىلدى. خاتىنى قۇل، آياقلىرىنى اوقەلشگە^۴ توشدى.

^۱ ساقە (سقە): شر (دايره، سياره)، زۇلدېر؛ چۇت دانەسى؛ بالەلر اۇيىنلردە: تىكىلگن گنكى اورىش اوچون بېلگىلگن اشىق، يانغاق و شو كىيلر. كۇز ساقەسى: كۇزنىنگ شر سىمان يومەلاق قسمى.

^۲ پاخالپۇش ~ پخلپۇش.

^۳ قاراووللىك: قۇربماللىك، قۇرىقلەماق، نظارت قىلىش، كۇز-قولاق بۇلب توريش.

^۴ اوقەلەماق (ادبى تىلدە اوقەلەماق): بدننى ياكە اونىنگ بىرار قسمىنى باسىپ سىلەماق، اېزگىلەماق، ايشقەلەماق.

اغرىقلىرى بدنيدن گوو-گوو تۇكىله يازگن كىبى بېنگىل تارته باشلەدى. اوزهلگن آياقلىرىنى زۇرغە يىغىب آلدى. بىر پيالە كۇك چاينى ھۇپلەدى،^۱ سۇنگ چرچاق شدتيدن كۇرپەچەگە تىرسكلب يانباشلەدى. خاتىنى گل اندام ينه ابرى نىنگ قۇل-آياقلىرىنى اوقەلب، بېلىنى تېدى. ابلەكلرېدەگى قىزىل سىيرىق داغ ايزلرېگە اچىق ياغدن پختەگە آلب سوردى. قىزدىرېلگن مامىق^۲ باسدى. قىزىل گل شفتالو رۇمال بىلن تنغىب باغلب قۇيش نىنگ علاجىنى قىلە آلمەدى.

- بىلەمن، شو پىت سىزگە ھىچ نرسە ياقمەدى. تنەنگىزدە اغرىق يوگورگىنى يخشى حس قىلەمن آتەسى. خدا پاشا! شو دمىگە ھم شكر قىلەمىز، خدا رحملى و مېربان ذاتدىر، -دېدى گل اندام ابرىگە مأيوس گىنە قرەب.

- قچان مېربان بۇلەدى يرەتگن؟ نخواتكى، ابلگە يازىق قىلگن^۳ شونچە آچرچىلىك^۴، خوارلىك، ظلم-عذابنى كۇرمسە-يە؟ نىمە كۇزى كۇرمى؟ ياكە بىرار ياققە كۇچىب كېتگنمى؟ اېبى!! مېن بىر بېسواد آدمەن. ھىچ كىمدن قۇرقمەي، يورەگىمدەگىنى تىلىمگە چىقرەبېرەمن. بايلر تابارە بايىب، تۇقىلىگىدن يارىلىب كېتەي دېدى؛ كىمبىلر بۇلسە قشاقلىكدن تابارە قشاقلىشىب بارەپىدى. بو اوروش-قان تۇكىشلىر؛ انتحارى حملە و تجاوزلرنى آىتمەيسنمى؟ نې-نې ياش يىگىتلر بنگوار، قارەدارى، ھىروىين پودرىگە مبتلا! بېوقت اۇلىب كېتماقەدىر. يورتمە-يورتن وطن گدا بۇلىب كېتگن مھاجر-مىسافىرلرنى آىتمەيسنمى؟ اوروش بىتمس-توگەمس بىر بلا بۇلدى. بو يورتنىنگ لايىنى اوروش، قانىنى مصىبت بىلن قارىگنمى يرەتگن اېگم؟! بىلمەدېم حىران من خاتىن. ايش يۇق، مېنىنگ ھم «ارقانىم» اوزىلەي، دېب تورىدى.

^۱ ھۇپلەماق: بىر ھۇپلم، ھۇپلم-ھۇپلم اغزىگە آماق؛ اغزىگە آلب يوتىب يۇق قىلماق.

^۲ مامىق: پختە.

^۳ يازىق قىلگن: يايلىگن؛ كېنگ، اېنلى ترقلگن.

^۴ آچرچىلىك: اذىق-اوقت تىقىلىگى، قىچىلىك.

- ابيبي آتهسى! بيراو ايشيتمه سين تعين بو گپلر زنى. اوزى بير ساده، كؤنگلى تازه آدم سيز. شو كونيميزدن هم آيريلمه يليك ينه. سيز آيتگلرنى خدا كوره دى، فقط سيز و بيزلرنى «قنى چيدهى آلرميكن؟» -ديه امتحان قيله دى، سينه يدى يره تگن ايگم. - گپينگى قره، -منگله نى اوشلب، سلماقلنىب، -قيزيق گپيردينگ خاتين! اوزى يره تگنيدن كپين ينه نيمه نى بيلماقچى بوله دى؟ اونينگ اراده سى سيز درختده برگ هم قيميرلمه يدى. او همه نرسه نى بيلگووچى ايمسى؟ تبه ده كؤريب توربيدى -كو! شو گپلر بيلن آغزيميزنى ياييب، قانيميزنى سؤريب ياتيديله. بيلمه ديم، اونداق دپسنگ مونداق دپيدى؛ مونداق دپسنگ اونداق دپيدى. مهن بو گپلرگه توشونمه ي قاله من.

- اېندى شو كونى بيزگه مناسب كورگن اېكن -ده، نه چاره؟ باشگه توشگنى كوز كوره دى آته سى. باشقه نيمه هم قيله آلرديك. جاني -تنيز ساغ بؤسين شو ارقانى منگله بيزدن آلمه سين الهيم.

- بيلمه ديم -ده، تا كوچيم بار اېكن، سيزلرنى آچ -يالانچا قالديرمه يمن، -ياستي قنى بلندراق قىليب، چلقانچه سيگه اوگريليب آلدى، -بو ياغنى اويلمه سنگ هم بوله دى آنه سى، ايش قىليب منه شو ايپ بوقت اوزيلمه سين خاتين، -دېدى حسن كويينيب. - بيزدن هم توبنراق، آچ -گدا يشه ياتگلر كؤپ بو زمانده. نفس كيريب چيقه يتدى -كو. قاره قازان تېز -تېز قينمه سه يم، ارپه دير -تريق دير قارينگه توشه پيتى آته سى! شو دميگه يم شكر.

- بو شهرده بوله ياتگن احوالى بير كوزينگ بيلن كؤرسنگ اېدى. آدملر نينگ حالگه ميمونلر بيغله يدى. بپوه -بپچاره لرنى ايتمه يسنى؟ اوزيگه اوت قؤيه ياتگن عياللر، اېرى نينگ شكنجه سيدن اؤله ياتگن خاتينلرنى نيمه دپيسن؟ ايتيب

اۋتيرەبېرسىم باشىنگ شىشىپ كېتەدى خاتىن. ھەمە ياقنى گزەك^۱ آلب كېتگن. اوروشدن اۋلىگى كېلەياتگن نوقيران^۲ يىگىتلر ايچ و بغيرنى اېزەدىگن احوال. راست آيتەسىز آدە جانيسى، -بالەسىنى تپ-تپ اېلكەسىگە قاقىب، اۋخلتە ياتىب، سۈزىگە دوام اېتدى، -بىزگە يره تگن اېگم تۈزىم بېرسىن، بالەلرنى ساغ-آمان كتە قىلەيلىك. اوياغى بىر نرسە بۇلر. تېشىك تاماقنى بېرگن، رزق و روزىسىنى ھم بېرر اخىر.

- بىزنى ايش سىزلىك، آچرچىلىك، كسل-بىمارلىك قىينمەسە بۇلگنى. - گپنىنگ قىسقىسى، منە آى كونىم ھم يېتىب قالدى. اېندى تيارگرلىك كۇرە بېرەيلىك چقەلاققە.

- نېچە كون قالدى كۇز ياريشىنگگە؟
- ھە آز قالدى، يىنگى آى باشىدە نصىب بۇلسە.
- شونى آيتەمن-دە، بىلىب قۇيەيلىك دىيىمن.
- بىر آى-يو، -برماقلىرى اوچى بىلن بىر-بىر سنب، -يۇغ-يۇغ راپە-راسە اوچ ھفتە، -دېدى اېرىگە گل اندام مېدەلب توشونتىرركن.
- قاپدەگىنى قادر بىلەدى. درد توتسە تۇغرى كسلخانگە آلب بارەمن-دە، يىنە نىمە قىلردىم خاتىن؟

- بو اوچتە قارە كۇز نىمە بۇلەدى؟ -سۇرەدى گل اندام اېرىدن.
- توگلىنى اۋزىگە قىلىشدىن بۇلك نىمە ھم قىلردىك خاتىن!
- اۋيىلسىن شۇر پېشانەم، -كۈزلرىدن قىناق ياشلر تىزىلىپ تۇكىلە كېتدى، -يقىن قىرىنداشلرىم ھم يۇغ، اولرگە قالدىرىپ كېتەى دېسىم گۇدكلرنى. اۋزى يارلقەسىن بىز بېچارە غرىب و شودە لرنى قادر اېگم.

^۱ گزەك: يره نىنگ يىلغىلگن، يىرىنگ آلگن حالتى. گزەك آلماق: گزەكلەماق؛ يامانلشماق؛ رواجلىنىپ، خۇنك عاقىتلر كېلتىرىپ چىقارماق.

^۲ نوقيران: كوچ-قوتگە تۇلە، قىرچىللمە ياش؛ تىك قامتلى ياش.

- خى! خدا آسان قیلر خاتین. لېکن، باله لرنى توغديریش اوچون هم اونچه-مونچه پول، آقچه، چیقیم^۱ کهرهک بوله دی. قى یېردن قیله من آتى اؤچگور ملا شرهنگى^۲?
- رۇزغاردن آرتیریب بۇمسه، آسمان بلند یېر قتیق، - دبیه اؤکسیندی گل اندام.
اوخلشدن آلدین خاتین بیلن بیر ساعتچه لیک دردلشیش حسن چیلبرنینگ تنه سیده گی بار آغریقلرنى یوویب کبتدی. هارغین چیقردى، خودى، چرچاغى یازیلیب، حمامدن چیققندېک اؤزینى بینگیل تارتدی. تورت دېوار ایچیده، چوقور-چوقور نفس آلیب، کپه گه اؤخشه گن اویده خیالگه چۇمیب کبتدی.

۲

حسن چیلبر خاتینى نینگ بېلى آغریگنى، دردى قیزیب تۇلغاق توتیب کبله یاتگینى بیلگچ، ایشگه کبتمه دی اؤشه کونى. «سېنم بیر کون دم آله قال بېچاره چیلبر، مېنى دردیم سېنى هم ایزیب یوبارى»- دېدى سوپکلری ققشب آغری یاتگیندن نالیدی.

کېچقورونگه باریب، درد زۇره دیدى. حسن تېورهک-اطرافده بینگیل ماشینه لر یۇقلیگینى بیلیب، آت-اولا^۳، مۇتر قیدیریشگه هم اورینیب اؤتیرمه دی. او، کبچه سی قارانغیده خاتینى کیچیکراق سینق کراچیسىگه میندیریب کسلخانه گه آلیب کبتدی. یۇلده کبته یاتیب، قۇقیسدن بوزوق کراچى نینگ بیر غیلدیره گی چیقیب کبتدی. ارايه قییشه ییب ییقيله ی-ییقيله ی دېگنده خاتینى زۇرغه اؤزینى توتیب قالدی. «یا پیریم اې خیریت!»- دېدى گل اندام ییقیلیشدن سقلنیب قالرکن. تون قارانغیده اورینیب-اورینیب، بیر عملب کراچىگه پانه قاقیب یورگیزدی. کبچه پیشگنده کسلخانه گه ییتیب آلدی. شفاخانه نینگ دروازه سیگه ییتیب کبلرکن:

^۱ چیقیم: صرفلنگن یا که صرفلنه دیگن مادى مبلغ: خرجت.

^۲ ملا شرهنگ (ملا جبرنگ): پول، آقچه (مجازى روشده).

^۳ آت-اولا: مینله دیگن ایش حیوانلری (آت، اېشک، خچیر و شو کبیلر).

«خاتىنىم نىنگ آى-كونى بېتگن، كۈز يارهدى، آچىلر دروازهنى!» -دېب ساقچىلرگه^۱ جھل ارەلش قىچقىردى حسن. ايكى عسكر چاتى^۲، قۇلتىق و بېقىنلر ينى قىدىرىب، پېسېل^۳، تېمىر پنجرە اېشىكىنى قىرىللىتىپ آچدى و حسن چىلىبرنى ايچكىرىگە كىرىندى. تونكى نوبتچى دوكتور قابەلر كسلىنى قبول قىلىپ آلرکن، يېنگ شىمىرىب^۴، گل اندامنى توغروقخانهگە^۵ تېزلىك بىلن آىب كىرىشىدى. كسلىنىنگ حالى بارگن سرى آغىرلشماقده اېدى.

۳

دوكتور بىردن دارولر نىسخەسىنى يازىب:

- منە بو سىروم، منە بونىسى پېچكارى و قالگنلر ينى هم ساتىب آىب كېلىنگ چقان-چقان بۇلىنگ، -دېدى آق كىيىنگن همشىرە^۶.
- مېنىنگ پولىم يۇق، باشقەسىنى بىلمەيمىن، نېمە قىلىپ بۇسەيم توغدىرەسىزلە خاتىنىمنى، -دېب دۇنغىللەدى حسن.
- خاتىنىمنى كېچىكتىرىپ آپ كېسىز شفاخانهگە، احوالى آغىر. يخشى قرەسىن اوچون دوكتورگە قۇل پولى بېرىشىز كېرەك بۇلەدى ھلى، توشوندىزىمى عمكى جان؟ -دېدى قابەلە حسنەگە، قۇلىدەگى قلمىنى تېشىگە ايلەياتىب. حسن احوالىنى توشونتىرماقچى اېدى. آيتىب-اېشىتىشىگە وقت هم قولاق هم يۇق اېدى.

^۱ ساقچى: ياسان، قۇرىقچى، قراوچى، قاراوول، سقلاوچى.

^۲ چات: چت، ايكى سان آرسى؛ بوت آرەلىغى.

^۳ پېسېلەماق: قۇل بىلن اوشلپ ياكە سىلپ كۇرماق؛ شو يۇل بىلن قىدىرماق.

^۴ شىمىرماق: آرەقسىگە قەيىرىپ، ھىمىرىپ، يوقارىگە كۇترماق. يېنگ شىمىرماق: جان-جھدى بىلن اورىنماق.

^۵ توغروقخانه (توغوروقخانه): آى-كونى يقىنلىشگن آنەلرنى قبول قىلىپ، اولرگە توغوش پېتىدە و اوندىن كېىنگى بى

نېچە كون دوامىدە طىبى ياردەم كۇرستەدىگن مخصوص اۋرىن.

^۶ همشىرە: عىال نرس ياكە قابەلە.

- ھە، ھە، خاتىنىم گۈل اندامنى آيتەمن.
 - خفە بۇلمىگ، آيتىشىگە تىلىم بارمەيدى عمكى جان.
 - تېزراق آيتىلە مېنگە، نېمە بۇلدى اۋزى خاتىنىمگە؟
 - بالە اوستىدىن كېتىدى، قضا قىلدى. يەرەنگن نىنگ حكىمى اېكن.
 - وای داد الم! بو قندەى شوم خبر، -كۈزى غىلقە ياشگە تۇلدى، چۈنتىگىدن كىر
 رۇمالىنى چىقىرىپ، كىسلخانى دېۋارىگە باشىنى قۇيىپ، اوۋاس كۈتۈرۈپ يىغلب
 يوباردى، -اۋچتە گۇدكنى اويدە قالدېرىپ كېلگندىم. شۇر پېشانە بو چقەلاقلرنى
 اېندى نېمە قىلەمن؟ بىر باشگە شونچە ھم مصىبەت توشەدىمى؟ بو دنيادە بىر مېنى
 تاپدىنكىمى خدایىم؟! او كونيمن بو كونيىم بترراق بۇمسە اېدى! داد قۇلىنگندن
 خدایىم!!!

۴

تانگ آتدى. حسن ايككى چقەلاغىنى بىرىگە باسىپ، أشقال^۱ سالەياتگن ايدىشلر،
 اېسكى-توسكى نرسەلر يانیدە باش قۇيىپ اوخلب قالگن... آرەدن ايككى-اۋچ كون
 اۋتدى.

قوياش بىر ارقان بۇيى يوقاريلەگن. تكسىلر غىر-غىر اۋتېب قىتماقدە. كىسلخانىگە
 يقىن جايدە اېسكى-توسكىلر ساتىلەياتگن بازار جايلىشگندى. آدملر غوج-غوج^۲
 بۇلىشىپ، نرسەلر بەھاسى اوستىدە تارتىشماقدە. نىراقدە توتىلگن آلتى مېترلىك
 چرايلى بىر قالىننى پولىگە كېلىشە آلمەى، تورگنلرنى دلال كېلە سالىپ: «بار! بۇلدى
 اېندى. برکە قىل!!!» -دېب آۋوچى و ساتوۋچىلرنىنگ قۇللىرىنى يوقارى-قويى قىلىپ
 سىلتەماقدە اېدى. باشقە پىردە، بايسكل، يەنە بىر پىردە گىلم، چاينك، چىلىم، ناس
 قىلى، عصا، يىسمە آياقلر، بېمارلر اراپەسى، كۇرپە-تۇشك، باشقە طرفدە رادىو،

^۱ أشقال: أشغال، اخلت.

^۲ غوج-غوج: بىر-بىرىگە يقىن ياكە تېگىب جاي آلگن؛ تۇپ، تۇدە حالتلى.

تلویزیون، آفتابه-چیلایچین. خلص، تېمیر-تقەدن توتیب، کیمیم-کېچککه چه پوللنماقده ابدی. کیم دیر تاووق، خورازیگچه آلیب کېلگن، عسکرلر نینگ یونیفورمی، نرسه-بو یوملر قەلب تشلنگن. بیر چپته حسن نینگ اوزیلگن چیلیری ساتووقه قۇیلگن. بیر بۇرە نانگه ساتیلسه هم هر نه...

شو پیت اۇرتەدن کیم دیر: «احتیاط بۇل، قرەب باق ینه اۇغیرلیک مالی بۇمه سین تعین!» -دېهه قیچقیردی یوغان تاووش بیلن. بازار نینگ باشیدن غۇریلله گن بیر آواز اېشیتیلدی. کیم دیر آدم لر نینگ آره سینی یاریب، بیر سېتچە متاعگه اۇراغلیق، تۇپپه یگن بیر جفت نرسه نی کۇتریب کېلیب:

- آله سیزلرمی، منه شو ایککی چقه لاغیمنی ساتەمن، -دېدی بلند آوازده جولدور^۱ کیممیک حسن.

آدملر یاپیریلیشیدی، «مېن آلهمن، مېن آلهمن» -دېگن قیچقیریلر ینگره دی. شو آره ده کیم دیر:

- باله بیزنی ساتمگ اکه، گناه بۇله دی دېدی، -بازارده تورگنلردن کیم دیر.

- مجبورمن اکه، مجبورمن. خانه ویران بۇلیم آدملر!

- نیمه، شو ایککی چقه لاقنی باقه آلمه دیزمی؟ غیرتنی نیمه قیلدیز؟ ای اویت سیزگه اېی، آدم بۇل دیزمی ییی!

- خاتینیم اۇلدی اکه! باله اوستیدن کېندی. میدانده قالدیم مېن بخت سیز. نیمه قیلەی؟ کیم باقه دی بولردی. یاره مگه توز سېپمگ اېندی اکه. پولینی بېرینگ اېگه تورینگ باله لرگه. گپنی چۇزيب نیمه قیلە سیز برادر.

شو آره ده یاپینگن بیر خاتین چادر آستیدن چیریلله گنچه:

- ساتمگ چقه لاقلرنی! خدانینگ قهریگه اوچره سیز. قیلمگ بو ایشنی. خدان قۇرقینگ. جگر یزنی ایککی گینه بۇلگینی ساتیشگه قنده دی حدیز بۇله دی؟ اېسیز

^۱ جولدور: کیله وېریب یا که توتیله وېریب دېده له سی چیقن کیم.

جايدېمه؟ اونداق قيمنگ اكه جان. منه مېنگه بېرينگ جانېم بېلن باقه من. قالگن عمرېمنى شولرگه بغېشله يمن. باله سېزىنىكى بۆله دى. صوابى مېنگه يېتسه بس. قىغورمىنگ. بېله من بونداق ايشلر هر قدمده بۆلب ياتيبدى. سېز قيمنگ اكه جان. - سېز شيرتى كېتىب، پيرتى قالگن اېسكى كمپىرسىز، ابرته-ايندىن اۆله سېز كېتسه سېز. باله ينه ميدانده قاسىنمى؟ اره لشمىنگ نراق بارىنگ، دېدى حسن يىغىدن اوزىنى تۆختته آلمس اېكن. شو پېت كېم دېر:

- منه پولىنگنى آل، تاپشېر چقه لاقلرنى بو ياققه، دېب غۇنغىلله دى. - نېچه -نېچه؟ اوزهت بو ياققه پولنى، -دېدى حسن چىلبىر و ايكى دسته پولنى هوادان اوزىب آلدى، -منه اۇغىلىگه يىگىرمه مېنگ، قىزىگه بۇسه اۆتتىز مېنگ بار بركه قىل حسن، -دېدى خرىدار پولىنى توته ياتىب. -حسن انگره يىب تورر... نېمه آنگلب قالدىنگ؟ چقه لاقلرنى اېته يېمن گرەنگ، دېدى خرىدار حسنگه بۇزه رېب. چقه لاق اېللىك مېنگ افغانى پوللدى. آلووچى سىدچەنى كۆتريب غىزىللب كېتدى. اېگىزه كلرنىنگ بايه گى «اينغه-اينغه» قىلىب تورگن يىغى آوازي اېسه جىملىك بغرىگه سۇندى؛ قېتىب اېشيتىلمه دى. قىزىب تورگن بازار چقه لاقلر سوداسىدن كېن سوو سېگندهى ساويدى. ايكىنچى قۇل بازار ده باله ساتىش بېرىنچى و آخرگى هم اېمسدى. چقه لاق، اۇن ياشگچه باله لر، اېنىقسه قىزه لاقلرنى ساتىش اوجىگه چىققدى. كېم دېر بو باله كىلرنىنگ اىچكى اعضالرنى اىنتىقلىك بېلن كوته يانگندېر. ياش-ياشگىنه باله لر، قىزه لاقلرنى جنسى فايده لنىش مقصدىده بازارگه سالىنىشى-كو، بار گپ. كېم قنچه لرى گۇدكلىگىده-ياق، خاتىنگه ايلنتىرلىگنى نىنگ سانى مېنگته. حسن چىلبىر آخرگى بخت سېز آته اېمسدى.

¹ ايكىنچى قۇل بازار: كهنه فروشلىك، ايكىنچى قۇل ماللرى ساتىله دىگن بازار.

کپینگی گل قیسی آته-آنه یاکه قیسی چقه لاق نینگ نوبتی؟ هلی بو قلمگه
قارانغو...

۲۰۱۵/۲/۱

تورنتو، کانادا

كۆزگو سېنىقلىرى

كۆزگو سىنىقلىرى

آدم بالەسى نىنگ قىسىم ايىلىرى جىغرافىيە جىرىگە زىجىرىند اېتىپ باغلىنگىدىر. «سېن هم آچونگە كېلەسن بىر كون!» -دېب آيتىلمەگن، سۇرەلمەگن حۇكم مېوھسى اېمىسى انسان بالەسى؟ تصادفى لذت اوروغلىرىدن اۋسىب چىققن كۈچتگە قىدىن بۇلىسىن اختىيار؟ قارىن اقليمىدن وجود قوچاغىگە آتلىگن چقەلاق نىنگ اىلك اوچرەتگنى، كۆز آچىب كۇرگنى محترم خاتىن و عزيز آنەدىر. خاتىن-قىز، آنە اصلىدە بىر شفاف و تىنىق كۆزگو. آيتىلمەگن، كوتىلمەگن فاجعە و آفتلردن يوزلىرى غبارلنمەگن، سىنىب چىلىرچىن بۇلمەگن خاتىن-قىز و آنە بارمىكن بو ياروغ عالمده؟ اوشبو حكاىيە كۆزگو اوشاقلىرى ىنگلىغ سىنىب، ساجىلىب كېتكن قىزلردن بىرى حقىدە بۇلەدى. مصفا كۆزگو سىنىقلىرى نىنگ بىر پرچەسى تصورىگە آلىنگن. ھلى بىتتىك بۇياغىنى كۇرمەگن، تىمەگن بوندەى ذرەلەر سان-سناقسىز. سىنىق كۆزگو سىنگرى اوشاقلىنىب كېتكن ذرەلەر يازىغىنى اۋكتم قىلمىرىگە تاپشىردىك.

تۇيگە خبردن سۇنگ... كېلگنلرگە آش تارتىلىب، دعا-فاتحە قىلىندى؛ قىسقىھراق تۇى ترقهدى. قۇناقلىر اوى-اوبىلىرىگە قىتىشىدى. اۋىنب، كولىب يىرەب يورگن قىزچەلر و بالەكىلر تشقىرى، اېگمبېردى اكه نىنگ بعضى يقىنلىرىدن بۇلك ھىچ كىم

حاولىدە قالمەدى. اېگەچى^۱، سىنگىل، جىئىنلرى... تېورەك-تاشنى يىغىشتىرىپ، قۇلى قۇلىگە تېگمەى شقىر-شوقىر، جىرنگ-جورىنگ قىلىش، قازان-تاباقلرنى يوويشە كېتدى. شو آرەدە اورىنىب-سورىنىب يورگن بېگىم خالە كتە چۇين^۲ داش قازاندەگى جىيدەدېك قىزىرگن قىسماقلرنى قىرىپ، كىفپىرگە اىلىپ بىر تاش تىباققە سالىپ قۇيدى. اېرى كېلىپ لىگىللىب تورگن اۇچاغ چۇغلىرى اوستىگە اوچ-تۇرت بېل توپراق سالىدى.

ھوا تىپ-تىنىق، آسمان اۇزىنىنگ ماوى ياپىنچىغىنى يىغىپ، اۇرنىگە غوجغان^۳ مېتى-مېتى^۴ زر توكمەلى قارە پردەسىنى يايگن تون اېدى. ىنگى آى تۇلگن كېچەدە، اوزاقدەگى كۇز قىمىتىر يولدوزلر بېرگە قرەب جىلمەيىپ، شۇخ-شۇخ كولهياتگندەى. ىعنى، باىبېچە كۇك اۇز سېپىنى اېنغەنىن يايىپ تشلەگندى. قارە تونىكىلرگە توتقىچ بېرمىس سان-سناقسىز يولدوزلر سامان يۇلىنىنگ اۇرمە تۇلقىنلرى بۇىلپ ىلت-ىلت كۇرىنىش بېرر، بىر توركوملرى زرحل^۵ مونچاقلرگە اۇخشىب سېپىلىپ، ساجىلىپ ياتر، توننىنگ قارە ساچلرى اوزرە كېكسە آىمامە قويوق-قويوق زرىن نورلرىنى ترەتە ياتىر اېدى.

تېپەدە چىرخ-فلك يورىلر؛ آنە بېردە اېسە تۇلغاق حىات آغرىق چېكر. مصفا ىشلىلىك اۇرنىنى سېمىز مدعا، قلىن-قلىن رنج و اېمگك^۶، بىتمس-توگنمس غوغا، تۇپالان^۷

^۱ اېگەچى: اېه، بىر آتە-آنەدن توغىلگن قىزلردن كتەسى.

^۲ چۇين: چوون، چودن؛ پۇلاد حاصل قىلىش اوچون اىشلىتېلەدىگن قاتىشمە.

^۳ غوجغان: تۇدە، جوق؛ غوج.

^۴ مېتى: جودە كىچىكئە؛ جىمىت.

^۵ زرحل: زرىن، زر بىلن قاپلنگن، زردېك نورافشان، ىرقىراق.

^۶ اېمگك: محنت، زحمت، قىينچىلىك.

^۷ تۇپالان: اورىش-جىنجال، مۇشمشە، ماجرا، عصيان؛ تىرتىب سىزلىك.

و الغدەلىك^۱ قاپلەگن. انسان انە شو سىرسان-سىرگىرەلىكلىك اۋپقانيدە^۲ غرق. دىنانىنگ ايشىلىرى اېكن. بىر جايدە عەزە (عزا) بۇلسە، قى يېرلەردە دىر مزە!
 ... يان اويدە قىرق دىقەلەر اطرافيدە اجابت قبول بۇلىشى كېرەك. لطفە بايەگى قىسماقلارنى قاشىق اوچيدە توتىب تورگن جايدە تاتىنىب، قىسىر-قىسىر چىنەگىسى كېلدى-يو، كۈنگلى بىزاوتەلىنىب آرتگە تىسىرىلدى. اىچى توتقىنىدىن اېشىك تىرقىشىگە بارىب قولاق توتدى. ملانظر، گلچەرەنىنگ عمەسى، تاغەسى و ينە ايكى شاهد تۇپلەنىشىب، اۋز ارا كېنگشە ياتگندى. ملا سۇپىسى چۈزىنچاق تىبىحنى آغدرگنچە، اىچيدە شىپ-شىپ قىلىب، دعا اۋقىدى و آمىنگە قۇل آچدى. سۇنگ، «بۇلدى، بۇلدى منە بارەمىز آلدېگە» -دېب اجابت قبول تىدىغىنى اىش اوچون سۇز قاتدى:

- «سېن ضعيفە گلچەرە بنت اېگمبېردى! عبدالرحمان نىنگ تن محرمى، خاتىنى بۇلىشىگە راضى مىسن؟!» -دېگن سۇراغىنى اوچ مرتە تىكرال ب تىلگە آلدى. گلچەرە قۇلئيدەگى قۇغىرچاغىنى قوچاغىگە باسگنچە؛ هېچ نىمەنى انگلمەگندىن «قىقىر-قىقىر» كولىب يوباردى. قىزگىنەنىنگ عمەسى: «هې! بوگون قۇغىرچاق تۇيىمس، سېنى تۇيىنگ بۇلەپىتى گلچەرە!» -دېبە شىغىللا، قىزەلاق نىنگ اېلكەسىگە بىگىزدېك برماقلىرى بىلن نوقىدى^۳. موسىچەدېك كىنە گلچەرە بالەلرچە جواب قىلگن بۇلىب:

- «يۇق، يۇق! قارە كۇزىمنى تۇيى بۇلەدى بو كېچە» -دېدى، تىخلب آلگن بۇغچەسىنى قوچاغەلى تورىب. شو تابتدە، گلچەرەنى بالەلىك دىناسىدىن اجرەتىب آلىب، اونىنگ دقتىنى بو گونگى تۇيى ھنگامەلرېگە بورىش انچە قىين كېچدى، برى بىر توشونمەدى قىزەلاق. اوندىن سۇز چىقە بېرمىس، اۋرنىگە عمەسى پرى گۇل بلند

^۱ الغدەلىك: ناتىج، بىزاوتە.

^۲ اۋپقان: چوقورلىك، غاوك، بۇش جاي، گرداب؛ قىراو، قورشاو.

^۳ نوقىماق: باسماق؛ بىرار نرسەنى انگلتىش مقصدىدە قۇل بىلن استەگىنە تورتىب قۇيماق.

اوازده شرتتەگىنە: «هە، راضىمىز، راضىمىز، راضىمىز، قبول قىلدىك!» - دىيە شىغىللىق جىواب بېرىپ قۇيە قالدى. شۇندىن سۇنگ سىيرەك، ماش-گورۇچ ساقاللىق مالا نىز گوگورت چۇپى بىلن تىشلىرىنى كاولەياتىب، تىدىقنى «بىتدى» اعلان قىلىش اوچون عربچە توشونرسىز اوزوندن اوزون دىعالرنى اۇقىي كېتدى. وكىل و تانىقلىق مالا نىزنى خورسند قىلىشىدى، سىلىشىدى^۱، قۇلىنى اوشلب قۇيىشىدى، يعنى، مالانىنگ قۇلىگە اقچە^۲ قىستىرىشىدى. مالا كە قوخ-قوخ يۇتەلىب، چۇنتىگىدن رۇمالچەسىنى چىقىرىپ، اول پالاو يىگن قۇلىنى سۇنگ آغزىنى آرئىتىدى. چۇزىنچاق يىتلىب تورگن ساقاللىنى توتىمىل، ايشىق-ايشىق قۇيدى. اوزون كېكىرىپ، آتب قۇيىلگن كۇك رۇمالچەدەگى ساچەلە-شېرىنلىكلرنى قۇلتىققە اوردى-دە، مىدە قىم يورەياتىب، تۇنى نىنگ اۇنگىرىنى يىغىب آلىب، اۇمگىنىنى تىشلىق ياتگن قارە كۇپكىنى «كۇچ نىجس!» - دېب تىپتىدى و تۇيخانەنى ترك اېتىدى. بېچارە، بى آزار ايت شىغىللىق نىزراققە بارىپ چۇنقىيىب تۇره بېردى.

كېسىمى كىچىكىنەدن كېلگن گلچېرەنى بېجىب يىستىرىشگن. سېكىن قۇلتىقلىشىپ، كېككەدەگى خانەدە تىكىلگن چىمىلدىققە آلىب كىردىلەر. سېرەيمە^۳، يۇغاندىن كېلگن ياوايى بوقەدېك كويانىنگ يانىدىن كىچىك كىنە بۇيى بىلن گلچېرەنى سوزىلتىرىپ قۇيىشەدى. گلچېرە قۇللىرىگە خىنە قۇيىلگنى، قوبوق قىلىپ يىستىرىلگنى سىبىنى يىخىشى توشونمەيدى. آنگ-جىلنگ وضعىتگە حىرت ايله قرەيدى. اونىنگ بار هوش-خىالى قۇغىرچاغىدە. تورگن بىرىدىن: «تغىن، قۇغىرچاغىمنى بىراو اۇغىللىمەگن بۇسىن» - دېدى مأيوسگىنە. سېوينگىدىن مى، خفەلىكىدىن مى كىپرىكلرى اوچىگە اوچ-تۇرت تامچى ياش قلقىب چىقەدى. كېلىن-كويانى سوزىلتىرىپ قۇيىشەدى. بو منظرە گۇيا نىق اىچى كاوهك قىلىپ اۇيىلگن بىر قىرى

^۱ سىيلەماق: حرمتىنى بىجا كېلتىرماق، عزت-اكرام قىلماق، اعزازلەماق.

^۲ اقچە: پول.

^۳ سېرەيمە: بىر جايدە انگرەيىب، حرىكت سىز تورگن كىشى؛ اېسر، انقاو.

تال درخت ایچیده کؤکریب تورگن سنبلنی اېسلتهدی. شووو اېتیب، اېر-خاتینلیک «اېلری» محکم باغلندی. قیسقهچه، توی مراسمی بؤلیب اؤتدی.

۲

تؤیچیلر: «اېندی بؤلدى، توی توگهدى، چیقینگ-چیقینگ، یورینگ-یورینگ» قیلیشیب، کېلین-کویاونی یالغیز قالدیریشهدی... کېچه پیشدی. همه غرق اویقیده؛ ایچکریده گلچهره هم بالهلیک ناز اویقی آغوشیده اوخلب قالگن.... انچه کوتیب، بیتابنه یاتگن عبدالرحمان نینگ خلوتلشیش چاغی راسه قیستهگن. ایچکریدن اېشیک تورمکلنهدی، ایلگیچی چیق اېتیب توشیریلهدی. بیر آز اؤتیب، تیرقیشدن عبدالرحمان نینگ غیدی-بیتدی گیلری زورغه قولاققه چلینهدی. کېتیدن پیش-پیشلب، هنسیرهگن تاووش خانهدهگی یریم ساکنلیکنی بوزهدی. اېشیک تیرقیشیدن تشقیرگه سیزیب چیقہ یاتگن چیراق نورلری هم خیره لشهدی. کؤپ اؤتمه ی گلچهره نینگ کوچلی-کوچلی خورسینیب، پینغیللب، ییغلشیری اېشیتیلهدی. ایکی پله لی اېشیک آرقه سیده گلچهره نینگ عمه سی خودی، پتی کویگن تاووقده ی ناتینچلنهدی. آله زره کلیگیدن^۱ ایچکریدگه یاپیریلیب کیره ی دېسه، اېشیک تمه لب^۲ قؤبیلگن. عمه سی بیر-ایکی «گلچهره! گلچهره» -دېب قیچقیردی. سهل اؤتمه ی ایچکریدن گلچهره نینگ تیتراق باسگن قورقینچلی تاووشی تاباره بلندلشه بېرهدی. اونینگ قتیق قیچقیریب «وای آنه جان!!» -دېب یوباریشی تشقیرگه واهیمه لی اېشیتیلهدی. بیردن چیمیلدیق آرتی ساووق سوو سېگنده ی جیمیب کېتهدی. معلوم بؤلیشچه گلچهره قاووشیش پیتی آغریق زورلیگیدن چیره نیب^۳ کوچی باریچه بقیرگن. عبدالرحمان نینگ بؤریده ی تشلنیشیگه کوچی بیتمه سه هم گلچهره جان

^۱ آله زره ک بؤلماق: او یاق-بو یاققه بی سرانجام قره ماق، آنگ-جکنگ بؤلماق.

^۲ تمه له ماق (تمبه له ماق): اېشیکنی بکیتیش اوچون اونینگ آرقه سیدن بیرار تختنه تیره ب قویماق یا که اېشیک محکم گینه یاپماق.

^۳ چیره نماق: بیرار مقصده بار کوچینی ایشگه سالیب حرکت قیلماق؛ کوچنماق.

ھاوۋچلې قرشىلىك قىلگن. ايشىنى يىتتىرىشگە شاشىلە تورگن عبدالرحمان، كورەك دەى شپەلاغى بىلن قىزەلاق نىنگ اغزىنى ياپىب توره بېرگن. اۋن دىققە اۋتر-اۋتمس، خانەدەگى اغىر ساكنلىكنى عبدالرحمان نىنگ يۈتەلىب دۈرىللەگن توشونرسىز آوازى بوزدى. بىر از اۋتېب، بەھىب كويواو، كاوشىنى آياغىگە اىلىب، ھىجان ارەلش بىر احوالە، شاشىلىب چىمىلدىقنى ترك قىلە كېتدى، ھوا اۋگنى تشقىرىگە چىققن. او نىمەدن دىر قانمەگندەى تېز-تېز نفس اۋلەياتگندى. بىر اۋتېرەدى، بىر تورهدى. كوياونىنگ ایتەى تورگن گېى اغزىدە موزلب قالگندى. چىمىلدىققە كىرر-كىرمىسلىگى بېللى اېمىسدى.

۳

تون قىيامىگە يىتگن اېدى، كىملىردىر طرفە توشلر قوچاغىدە تىن اۋلەيدى، كىملىردىر الجىرەلىب، الخسىرەياتگن بۈلىشى ممكن. عبدالرحمان نىنگ توغمس خاتىنى و گلچەرەنىنگ عمەسى پرى گل كويواو تشقىرىگە چىقىشى بىلن گلچەرەدن خبر اىش اوچون اويگە كىرىشگن. اىكاۋى بىر بورچكەدە خواطرلنىب، غىد-غىد قىلىشىب اوخلەمسدن، نىمە قىلرىنى بىلمەى تانگ قاتىشگن. لطفە و پرى گل اىكاۋلان «بو نې شرمندەلىك!» -دېبە يىغلىشىب تورىدى. نې كۈز بىلن كۈرسىنلر كە، چىراق نىنگ سۇلغىن نورلرى اۋستىدە، چوۋەلگن چىمىلدىق تۈشگى ارەسىدن، ھوشسىز گلچەرەنىنگ يرىم اچىق، قانلى و افگار تنەسى اوزەلە توشىب ياتگن. عمەسى نىنگ: «ياپىر اېى! نىمە بۇلدى سېنگە گلچەرە؟!» -دېگن تاووشىگە جواب بۇلمەدى. پرى گل اۋنگ قۈلىنى گلچەرەنىنگ كۈكسىگە اىب بارىب قۇبەدى. قۇرقوۋو چولگەگن گلچەرەنىنگ يورەگى تېز-تېز تېپەياتگىنى سېزىشەدى. قرەسەلر كە، اىش-اىشدىن اۋتگن، مىلتىق كۈچىب اۋسل^۱ اىش بۇلگن. خاتىن-خالىچ شاشىلگىدىن نىمە قىلرىنى بىلمەى، دراۋ بىر ھويلم نبات شرىتىنى بىر ياغاچ قاشىققە

^۱ اۋسل: يرمەس، يامان؛ بېمعنى، ناقولەى اىش.

ايب، زۇرغە قىزچەنىنگ اغزىگە قۇيەدىلر. باشىدن كۇترىشىب، يوزىگە ساووق سوو اورىشەدى. او اۇزىدە اېمس بۇلگن گلچېرەنى اياق اوستىگە تورغىزەلمەيدىلر. نرراقده، شەھوتى تورقىگە اورىب چىققن، كۇزلىرى بقرەيگن عبدالرحمان حويلىنىنگ بىر چېتىدە ايوان اوستونىگە تەيىنگن حالده، حلقومى تۇلە قويوق توتوننى كېتمە- كېت اۇپكەسىگە جايلىب، اۇپكەدن قىتيمىنى كۇككە پوركەياتگندى. يوگور- يوگورلر ايش بېرىب، اولاول^۱ تاپىلدى شېكىللى، كېچمە-كېچە، اووو نرراقدهگى قۇشىنىسىنىنگ مۇترىنى چقىرتىرىب، هوشىدن آرگن گلچېرەنى اۋرەب-چوركب ماشىنگە ساليب، كسلخانەگە ايب كېتىشىدى.

۴

داكترلر بېمارنى تېزلىكدە شفاخانەدە ياتقۇدىلر. گلچېرەنى اېملەى-اېملەى ايگى- اوچ ساعت دېگندە هوشىگە كېلتىرىشىدى. قىزەلاقدهگى جراحت ھلى بېرى بىتەياتگن اېمس دېيىشەدى. معلوم قىلىنىشىچە او جدى روجى و جسمى شكىستلنگن. اىچىدەگى سىنىش و افكارلىك علامتلىرى قلقىب يوزىگە چىققن. اونىنگ بالەلىك دىئاسى سىنىق كۇزگودەى پرچەلىب كېتگن. او ھر گىدە قۇغىرچاغىم! قۇغىرچاغىمنى بېرىنگلە» -دېب بىغلەيدى، خۇرسىنەدى. ھر تۇكىسدە اوچىب توشەدى، كۇزى اويقوگە كېتر-كېتمس: «مېنى اورمىنگ!» -دېگن قىقىرىق، بۇغزىگە تىقىلىب كېلەدى، نىمە قىلرىنى بىلمەى كۇزى لىققە ياشگە تۇلەبېرەدى. ىنە بىر پس كۇزى اويقوگە اىلىنەدى. قۇرقىنچلى توش كۇرىب، كېچەلرى قىچقىرىب اويغانىب كېتەدى. قراقچىلر قۇلىگە توشگندەى واهمەلى بقىرىب تورەدى.

يۇقسىللىك قورسىن اېكن. بىر ھفتە دېگندە اىس قىشلاقدن گلچېرەنىنگ آنەسى قىزىدن خىر آلگنى كسلخانەگە كېلدى، يقىنلرىدن كىم دىر بىتكىب كېلدى چمەسى.

^۱ اولاول: مېنىب يورىلەدىگن حيوان؛ يۇلاوچى، يوك تىشىش واسطەلرى.

تختدە ياتگن گلچەرگە يوزلنرکن، بېگيم خالە: «آه آنەنگ اۋلسين! كۋرر كونيم بار اېکن. سېنى نيمە قىلدیلە؟ آ اۋبى كويسين تېکين تاماقلرنى! اۋبى يانسین ملا عوضنى، گۋرمە-گۋر بۋلسين الھيم!!!» -دېگنچە بغيرگە باسيب يوزلريدن چۈپللىلتیب اۋپەبېردى و قىچقيريب يىغلىشگە توشدى. «آتەنگ كىمبغل بۋمسه، آغزى، جىغى بۋسه شو كونلرگە قالەميدىنگ بالەم... قارە قازان قىنەسین اوچون سېنى ساتدىلر» -دېدى و يىغلب ايچىنى بۋشتىدى.

آق كۋپلكلىكلر گلچېرەنى اېرکەلب، لېلرگە كولىگى قۇندىرىشگە اورينە ياتگندى. كولىش نيمە ليگىنى اېسىدن چىقرە يازگن قىزە لاق قۇغىرچاغىنى تېز-تېز ساغىنەدى. كىسلخانەدە روچىنى كۋترىش اوچون اونگە ينگى قۇغىرچاق ھەم اېلب بېرىشەدى. گلچېرە نېگە دىر باشقە قۇغىرچاقنى يات سىرەيدى^۱، كۋنگىل بېرگىسى يۇق باشقە سىگە. ينگى سىگە باتىنىب، رازلىشىسى كېلمە يىدى. قۇغىرچاقدن ھەم ائمىقە دىگن بۇلدى. يۇقسە، قۇغىرچاق نىنگ مىلدىرەب تورگن شىرىن گىنە قرەشلىرى جايىدە-كو. چىندن ھەم، ينگىسى بىلن دردلشسە دردلشگۋدېك؛ سوپونىب بغيرگە آلسە آگۋدېك گۋزل قۇغىرچاق.

گلچېرە خۇددى، اوستىگە تاغ آغەنب، آغىر يۋك آستىدن چىقە آلمە ياتگن دېك، تلىپىنەدى، حالسىزلىنىب، تېز-تېز اوچىب توشەدى. بېمار كىسلخانەدە اوزاق قالە دىگن بۇلدى. قىرىق كۋن دېگندە تەسىدەگى آغىر و جراحت زۇرغە بىتدى حساب. شۋندە ھەم قۇلتىق-تىاق بىلن يورگىزىشە دىلر اۋنى.

۵

ياز كۋنى. قوياًش افققە باش قۇيەى دېب تورگن بىر چاغدە، كىسلخانە دەھلىزىدن قندەى دىر تىنىش آواز اېشىتىلدى. بېگيم خالە گلچېرە نىنگ آلدىگە كىرەمن، اۋتىنچىم شو، ينە مېنى اېلب بارىيلە. شو پىت رحىمى كېلگن قابىلەردن بىرى

^۱ يات سىرەيدى ~ بېگانە سىرەيدى.

عبال نىنگ قۇلتىغىدىن سوريب: «منه شو اۋنگ تامانده گى اېشىككە قىرىلىنگ خاله جان» - دېدى. قابله اېسە، كۈزى چله كۈرەياتگن بىر خاتىنى يېتىك، بېمار ياتگن خانەگە االىب كىردى. گلچەرەنىنگ انەسى بېگىم خاله كۈزلىرىنىنگ ياشى جودىرەب: «يۈلىنگدە ادا بۇلدىم! نىمە يامان قىلگنىم بار اې پروردگار؟ بالم گلچەرە يىخسى مى سن قىزىم!!» - دېپە زار-زار يىغلب قىزەلاقتى يەنە بىر قىتە كۈكسىگە باسىب يوزى و كۈزىدىن تۈيىب-تۈيىب اۋپدى. گلچەرە هم انەسىنىنگ بۈينىدىن قوچگنچە، ايسكب-ايسكب اۋپە باشلەدى. دىدارلشىب تورگن انە-بالە خانەنى سېوگى-ساغىنچىگە تۈلدىردىلر. شو پىت گلچەرەنىنگ كۈزلىرى انەسىنىنگ قۇلتىغىدەگى قۇغىرچاققە ايلىندى. شوندا گلچەرەنىنگ خورسندلىگىدىن كۈزلىرى چىقنب: «انە يالغىز اى» - دېپە بقىرىب يوباردى. اېركەلب كۈپ سويگىدىن گلچەرە قۇغىرچاغىگە «قارە كۈز»، «قورەلى»، «يالغىز اى» دېب ات قۇيگن اېدى. گلچەرە يالغىز اىنى، انە اېسە هر ايكەلسىنى كۈكسىگە باسدى، انە-بالە ياپىشىب-قىشىدىلر. بىر-بىرىنى قۇيىب يوبارگىسى يۇق. بېگىم خاله اۋنگ قولى بىلن گلچەرەنىنگ يوزىنى سىلب، ساچلىرىنى هيدلب، يوزىدىن شىمىرىب-شىمىرىب اۋپماقدا اېدى.

- نىمە بۇلدى سېنگە بالم؟ - سۇرەدى انە.

- بىلمەسم انە جان.

- شونداق... قىزىنىنگ قىسمى قورسىن اىكن بالە ام!

- مېنى قۇغىرچاغىمدىن اىيرىب، نېگە بىر كتە آدمنىنگ الدىگە قىمب تشلەدىلە؟ مېندىن شونچەلر تۈيىب اېدىلر مى انە جان! نېگە مېنى غۇرە اوزومدەى تاكىمدىن اوزىب، باغىمدىن بدرغە قىلدىلر؛ دېودەى آدمگە بېمىش قلدىزلرە؟

- جگرىندىم. سويوكلى بالم! سېنى ساغ كۈرگنىم چىن بۇلسىن! اتەنگ، اكەنگ، اوكلەرىنگ سېنى سۇرەب قالىشىدى. سلام ايتىشىدى. اۋكىنمە قىزىم، ھەمەسى

يخشى بۇلەدى. كىمغىل نىنگ قىزى ھىچ قچان يارىب يالچىمەيدى اېكن. يا قىزىگە حسابلب بىرىلەدى ياكە، «يامان كونگە يىرەسىن» -دېب ساتىب يوبارىلەدى. ھەر قندەى يامان كون بىرىنچى بۇلىب، كىمغىل نىنگ باشىگە كېلەدى اېكن بالىم. سېنىنگ يازىغىنگ بوندە يىلرگە اۇخشمەسىن دېيىمىن.

- آنە! مېن آتەمدن خفەمن، -دېدى گلچېرە آنەسى نىنگ گېنى بۇلىب.

قىزچە باشىدن كېچىرگىلرنى تىلگە آلىشدىن چۇچىيدى. داستانى يازغىرىشگە تىلى بارمەيدى. اۋشەلرنى اېسلسە، تەنەسىگە آغرىق يوغورگندەى بېزاوتەلنەدى. او قۇرغىرچاغى يالغىز آينى قوچاغلب تورىب، اونى گېگە سالماقى بۇلدى. كېين، گلچېرە جىگىنە بالە كىلر تىلىدە قۇغىرچاغىنى سۇزگە توتدى:

- «مېنى ساغىنمەدىنگىمى عىلىم؟ اېسىنگدەمى؟ سېن و مېن قندەى قاه قاه آتىب، كوليشىب، اۋىنشىب يورردىك. سېنى يىقتىگىلرېم اېسىنگدەمى؟ مېلى مېنى كىچىرە قال خفە قىلگن بۇلسم! قارە كۇز، سېنى قىتە تاپگىنمىدن سويىنەمن. اېندى سېن مېن بىلن بۇلەسن. سېن سىز ھىچ ياق كېتمەيىمىن، -دېدى گلېرە قۇغىرچاغىگە. سېنىنگ او يىنىگ مېنىنگ قوچاغىم، خۇپمى!؟»

بېمار، اوزون-اوزاق دوالش و روحي پرورش بىلن بىر آز اۋزىگە كېلدى. اېرتەسى گلچېرە قۇغىرچاغى بىلن كىسلخانەنى ترك قىلىشى كېرەك.

۶

خودى ھىچ نىرسە بۇلمەگندەى، قىزەلاق نىنگ جانىگە جىر قىلگن كىمسەنى ھىچ كىم سۇراق قىلمەدى. قىزىگىنە نىنگ كېلگوسى حياتى نىمە بۇلىشى ھىچ كىمنى قىزىقتىرمەيىدى. بىر نىرسە عىان بۇلىب تورىيدى كە گلچېرە عبدالرحمان نىنگ رىسمى خاتىنى. بىرى بىر تىقدىر اىپى اۋشە اېسكى قازىققە آىب بارىب باغلەندى. آخىرى قارە بخت گلچېرە يىنە اۋشە شوم عبدالرحمان نىنگ قۇلىگە ناچار توتقزىلەياتگن بۇلدى. آنەسى، كونداشلىرى بىرگە لىشىب گلېرەنى كىسلخانەدن آتە-

آنەسىنىكىگە اېمس، يەنە قىتريب اېرىنىكىگە اېلب كېتىدېلر. ھە، «گلچېرە عبدالرحمان نىنگ» ناموسى، «قلىنگە توشگن تاپىلدىغى، ياستىقداشى-دە»، -دېگن گېلر اوستونلىك قىلمەى قۇيمس اېكن. شرىعت نىنگ حكىمىگە بۇيىن سونمىسدىن علاج يۇق... او اۇشە جبر چېككن اوويده يەنە بىر عمر يششگە محكوم. اونى اېندى نامعلوم تقدير كوتماقده. اونىنگ بو بىردە، يالغىز آى دن اۇزگە يقىن ھىچ كىمى يۇق. قرضگە حسابلب بېرىلگن قىزەلاق نىنگ بىردن-بىر جانكويرى، اگر قۇلىدن يولىب ائمسەلر شوگىنە قۇغىرچاق خلاص. مەر اريگن تاش يورەكلرنى ھىچ نرسە يومشتە ائمس اېكن، قۇغىرچاققە يۇل بۇلسىن.

گلچېرە ھلى قەياققە اېلب كېتىشلرىدن خبرسىز. او اۇزىنى اونىب-اۇسگن اووى، آتە-آنەسىنىكىگە اېلب بارىشەدى، دېب اميد قىلگن اېدى. يۇق، اوندەى بۇلمەدى. شونچە ناخوشلىكلردن كېيىن ھم نىمە قىلسىن؟ شۇر پىشانە، گلچېرە اۇزىنى يەنە بېغبار بالەلىك آرزو-اميدلرى چىلپىرچىن بۇلگن كونلردن سۇنگ يەنە عبدالرحمان چىنگەلىدە اۇزىنى تاپدى. بو حاولى ايلان-چيان بۇلىب چقەبېردى اونى. ناموس شىشەسى سىنگن بو اوى كۇز اۇنگىدە سىنىق بىر تابوتگە اۇخشەيدى. چىمىلدىق آرتىدە ھمان ايكى باشلى اژدرھا ياتگندەى نظرىدە. «يور، اوينىگە بار گلچېرە» - دېب قۇلتىغىدن اوشلب اۇشە چىمىلدىق سالىنگن خانەگە اېلب كىرماقچى بۇلدىلر. گلچېرە بۇلسە: «مېن بو خانەگە كىرمەيمەن، يۇق قۇرقەمن او بېرگە بارىشدىن...» - دېب بىر تېيىب تورەبېردى. يىغى-سىغىسىگە قرەمەى، كۇزلىرى ياشگە تۇلە قىزچەنى سودرەب، اۇشە بېرگە اېلب بارىب قۇيدىلر. قنچە يىغلمەسىن-سىقتەمەسىن شوم قىستگە بۇيىن اېگىشدىن اۇزگە چارەسى قالمەدى. باشقەلر كۇزى بىلن قرەگندە، بو خانداندە او اېندى «آتىلگن اۇق؛ ساتىلگن متاع؛ خدا قرەگن جنس؛ اېركك نىنگ چۇرىسى¹ تمام!». حاولىدە گلچېرە عبدالرحمانگە خاتىن

¹ چۇرى: قول خاتىن؛ توتقونلىكدەگى عيال؛ خدمتكار خاتىن؛ آق ساج.

بۇلىشدىن تشقۇرى، اپرتەدن-كېچگەچە خذمتگارلىك قىلىشى كېرەك ھلى؛ بو ياغىنى اپىلەى آلسە ساچى سوپورگى، قۇلى كوساو. باشقە ناز-نخرەلر اۋتمەيدى. باردى او بو كونلرگە كۈنمەى، بۇيىن تاولسە، عادىي كلتكدن تشقۇرى باشىگە قانلى قمچى ياغمىردەى ياغىشى مقرر. اونى اېشىتەياتگن ھىچ كىم يۇق بو اويدە. كۈچەگە چىقىشىگە اذن بېرىلمەگن. شرىعتگە كۈرە: آق كۈيلىك بىلن ابرى نىنگ اويىگە كىردىمى، آق كفن بىلن بو اويدن بارسە كېلمىگە روانە بۇلىشى شرط.

۷

گلچەرەنىنگ كىلىگى كېلدى؛ سىم-سىم بىغلب اچىق كۈز ياشى قىلدى. حاويلدە تومنا^۱ ايش اونى كوتىب تورىيدى. بو ايشلرنى بىر چىككەدن بېلى بۇكەجگ^۲ بۇلىب قىلىشىگە مجبور. ھىچ قندەى بەھانە اۋتمەيدى. آخرى، تۇقىزگە كىرگن گلچەرە مجبورن شو كونگە كۈنگن بۇلدى. آنەسى بېگىم خالە: «خى بالم چىدەگىن. كۈپ نىنگ باشىگە كېلگن سودا اېكن». قەيىن آنەسى بۇلسە: «قىز دېگننى بىر آلمەى گۇر آلدەيمى؟ قىستىنگ قۇشىلگن اېكن، ھلى بالە كۈرەسن...» -قىبىلدە پىچىنگ^۳، كېسەتىقلىك^۴ نصحت قىلدى. اوچ كون اۋتىب خالە ھم اۋز كولچەسىگە آلاو تارتگنى اويىگە قىتدى. گلچەرەنىنگ آنەسى كتە حاويلدە شونچە جملغە اىچىدە بوغدايگە توشگن ارپەدەى ابدى، كمبغل باشىنى آلىب قىشلاغىگە كېتدى. حىات نىنگ قارە و شىقت سىز كونلرى ھەدبمەى اېشىك قاقدى. قىدەسن گلچەرە؟! بىر اوپىدە نىمە ايش قىلىنىشى كېرەك بۇلسە، برى

^۱ تومنا: تورلى-تومن، ھر خىل.

^۲ بۇكەجگ (بۇگەجك): اۋزىنى كۈترە آلمەى قالماق.

^۳ پىچىنگ: بىراونىنگ شىخىبىتىگە تېگىش، غشىنى كېلتىرىش، مسخرەلش اوچون ايتىلەدىگن ايلماقلى گپ؛ قاچىرىم، قاچىرىق.

^۴ كېسەتىق: قاچىرىم بىلن، پردەلب مسخرەلش، كولىش ياكە كمسېتىش؛ استېزا، پىچىنگ.

اونىنگ بۇنىگە يوكلتىلدى. اېندى گلچېردە بيتەگىنە آرزو قالدى. او ھم بۇلسە، اچىق كونلردە شوگىنە قۇغىرچاغى بۇلمىش يالغىز اينى بىر قۇبىنگە آلسە-يو، اېچىدەگى بار درد و المىنى تۇكىب سالىسە. او اېچىدىن: «اۋزىمنى اۋلدىرىشگە نىتتىم يۇق» -دېگن تويغو آنكىدە كۈكلندى^۱. ھەر قلەى اۋلىمدن باشقەسىگە چىدەسم كېرەك» -دېگن خيال بىلن قارىشىپ كېتدى. كون-كونگە، ھفتە-ھفتەگە، آى-آىگە، يىل-يىلگە اولشىب، اېورىل دنيا آىلنەبېردى. ھەدېمەى گلچېرە سويگى قاتىب اۋن سېكىزنى ھم تۇلدىردى. او اېندى عبدالرحمان كوتگن اىستك-آرزولرنى يوزەگە چىقىرىشى شرط. عبدالرحمان نىنگ كۈز اۋنگىدە، تىز چۇكىب، شى تورشى نھايتدە مھم. گلچېرە ھلى قۇچقاردەى-قۇچقاردەى اۋغىلر توغىب بېرىشىنى ايسدن چىقىرمىسلىگى كېرەك...

۸

ھاولىدە بىر تۇپ عىال. گلچېرەنى ىم قۇشىب سانسە ھمەسى اۋن بىرتە خاتىن-قىز بۇلەدى. بىرچە-بىرچەسى عبدالرحمان نىنگ ھكمىگە قوللوق قىلىپ، باش اېگىشىگە مجبور. بىر عمر بوپروق بېرىپ اۋز سۇزىنى اۋتقىزىپ كېلگن آدم، ھەر داىم تېورەككە تېپەدن قرەيدىگن بۇلىپ قالرکن. اۋقىش، يازىشدىن بىراق عبدالرحمان بىلەغانلىك كسلىگە مبتلا، اۋزىنى باشقەلردن عقللىراق توتەدى. بىراولر اېگىلىپ، بوكىلىپ ھرمەت قىلىشىنى اىستەيدى. سۇزىنى تىنگلشگە تيار تورىشىنى خواھلەيدى. آدملىرگە عىب تقيب چىقىرىشىنى خوش كۈرەدى. ھكمرانلىك نىنگ شراب سىنگرى كىف و ھمارى ھم بۇلرکن. قۇل آستىدەگىلرنى سۇكىب، يوگورتىرىپ اىشلەتىشىنى ياقتىرەدى. دۇق-پۇيسەلرى ھاوورىنى باسمسە، تېپكى، شىلاقدن اىش آلەدى اېكن ھكمران كىشى. باردى شو اىشلىرنى قىلمسە، ھمارى توتىپ، بىران نرسەسىنى يۇقاتكندەى گندىرەكلب قالەدى اېكن؛ او تېنتىرەكلب اۋزىنى اۋققە-چۇققە

^۱ كۈكلندى: عمل آدى، اۋسىب رواجلندى.

اوره بېرەدى. عبدالرحمان شونقە سۇرت آدملىرى سېرەسىگە كېرەدى. بېلگىدىن كوچ ياغىلىپ تورگن عبدالرحمان نېنگ قاواغى قىراولۇپ كېتىگن. بىر كۈنى او اۋزى بىلەن گېلىشىپ، چوقۇر اۋىگە تالدى. «شونچە بېلدىن بېرى بو ماچە^۱ بىلەن يىشب كېلەمەن، بىر اۋغىل نېنگ آتەسى بۇلە آلمەدېم-هە، -قارە كۇل كلاھىنى تېزەسىگە قۇندىرگنچە اۋزىنى بو دىيادە يالغىز سېزگندە تويدى، -بو نې كۇرگولۇك؟ بىر اۋغىل نېنگ تىرناغىگە زار بۇلىپ اۋتىشىدىن كۇرە يامانراغى بۇلمەسە كېرەك-و! پالچىگە، قاقىمچىگە آلىپ بارىپ، يورەگىمدە كېچىگن برچە ايرىم-سىرىملىرىنى قىلدىم ھەم بۇلمەدى، كىلتنى ھەم كىمىنى قۇيمەدېم. مەنە آخىرى داكتىرگە ھەم آلىپ باردىم بو مېكە جىنىنى. اۋزى بد اصل اوروغدىن اېكن؛ عابىلەمگە شونېنگ پاى-قىدىمى تېكىندىن بېرى ايشلىرىم ارقەگە كېتىگنى كېتىگن. بو شوم قىدىمى توبەسىگە بىر تەيىتىرمەسم بۇلمس؛ بو قىچىق نېنگ جايى آغىلخانە^۲. بونى آت، ايشكلر آلدېدە محكم باغلب تىشلەيمەن، تاكە، آدملىكىدىن چىقىپ حيوانگە آيلنىسىن، اۋزىم بىلەن عھد و پىمانىم شو. كىم بېلىپ اۋتېرىدى، شو بېردە چىرىتىپ، آخىرى بو مەكاندىن گۇرگە جۇنتەمەن مېن بو كىچەلىنى. بونېنگ اوچون اوپدە گىلرېمگە قەھرىمنى تۇكىپ، زەھرىمنى ساقىپ توشونتىرشىم كېرەك. مبادا بونى شو كويگە سالگودەي بۇلمس، ايسى تىشقىرگە چىقىمسىكن؟ گپ-سۇز بۇلىپ قالسە نېمە قىلەمەن...؟ -دېب اۋزى اۋزى بىلەن گېلىشىپ آلدى. «يۇق، مېن بونى قانىنى چىقىرمەي، جانىنى آلىشىم كېرەك. اۋلا، اچىنگدە گىلرېنى ادىنى بېرىشىنگ، كۇز اۋتىنى آلىشىنگ كېرەك عبدالرحمان. لطفە بىلەن ناردان گپ لاپە تىشقىرگە چىقىمسە بۇلدى. قالگىنىنى اۋىلمەسە ھەم بۇلە بېرەدى. قىزلىرىم نېنگ ھەم طىنابىنى تارتىشىم لازم.»

^۱ ماچە: ماچەغر؛ ايت ياكە اېشك نېنگ اورغاچىسى؛ اورغاچى اېشك.

^۲ آغىل: آغىلخانە، اوى حيوانلىرىنى سىقىش و باقىش اوچون قورلىگن مخصوص بنا؛ ماخانە.

عبدالرحمان ايچيده اۋىلب تاپگن جزانى عملگه اشيريش پيىگه توشدى. بىرىنچىدىن آغىلخانەنى كۈزدن كېچىردى. رېجەسىنى عملياتدە خوب توسمالل^۱ تېكشىرىپ كۆردى. گلچەرەنى آغىل نىنگ قى نقتەسىدە بايلىب قۇيشىنى خىالىدىن اۋتكزدى. او قىلماقچى بۇلگن ايشىنى خاتىنلرى نىنگ قولاغىدىن اۋتكزدى. «ىنە گپ تشقريگه چىقمەسىن تەين» - دېب ھم تاكىدلىب قۇيدى.

گلچەرە قارە سحرىدىن تورىپ، تىمىرسكىلىنىپ^۲ تىرىكچىلىك يوموشلرى بىلن بند. اويدە گىلرنى توشقى اوقتىدىن تۇيغىزدى. كتە عايلە نىنگ كىچىك بىر خىدمتگارى صفتىدە، صفە نىنگ بىر چىتىدە آياق اوستىدە، حضور-حلاوتسىز اوقتلىگن بۇلىپ، تىمشىدى. او دايم حركتدە بۇلگن بىر تىمىر خاتىن، بىر بىردە اۋتىرىپ دم آلىش و اوقتلىنىشىنى اونوتىپ يوبارگن.

عبدالرحمان قارنىنى تۇيغىزىپ بۇلگىچ، توره سالىپ، گلچەرە نىنگ بىلگىدىن محكم اوشلىب، «يور سېن جلىب بو ياققە» - دېب اونى آغىلخانە تامان سۇدرەى باشلەدى. «خاتىنى مېن نىمە عىب قىلدىم، مېنى قىگە ابلتەسىز؟ واى داد خدائىم...!» - دېدى.

گلچەرە نىنگ بو داد-وايىنى اۋزىدىن باشقە ھىچ كىم اېشىتمەدى. شۇندە برزنگى^۳ عبدالرحمان بو «شوم آياق»، سېومس خاتىنىگە يوز بورىپ: «آوازىنگى اۋچىر ماچە خر!!» - دېب جھل ارەلش بىر وضعىتدە، قۇلىدەگى سىرتماق^۴، چىلبىر بىلن اونىنگ قویروغىگە كېتمە-كېت بىر نېچە تە توشىردى. باشى بىلن اېلكەسى بۇلىپ ىنە بىر-ايكى ترسەكى سالىدى. كلتكلىشلردن زدە بۇلىپ كېتگن گلچەرە نىنگ نفسى

^۱ توسماللەماق: توسمال-تخمىنگە اساسلنماق، توسمال-تخمىن اساسىدە ايش كۇرماق؛ توسمال قىلماق.

^۲ پېسلىب ياكە تىتكىلىب قىدىرماق، اخترماق.

^۳ برزنگى: ھىيتلى، دۈەنگىردەى، يۇغان گۈدەلى.

^۴ سىرتماق: ارقان، چىزىمچە و شو كىبلىر نىنگ بۇيىن باغ شكلىدە سۇرىلەدىگن و سىقىلەدىگن قىلىپ باغلەدىگن

ایچیگه اۆرهلدى. بیلگینی قۇییب، ساجیدن توتملب اوشله گن عبدالرحمان خاتینینی آلیب باریب، تارتیب باغلب قۇیدى. هنگی ایشکینینگ یانیدن اول قۇلریگه سیرتماق سالدی، سۇنگ چیلیرینی بیجیب، ایکی آیاغیدن تېمیر قازیقغه باغلهدى. یورهگی یاریلهی، دېب تورگن گلچهره جاییده بوکچه ییب اۇتیریب قالدی.

گلچهره بو آغیلخانده قاله بېردى. «کېرک بۇلگن پلّهده، اونگه تکه-تیشلم نان بېریب کېتیبیله» -دېدی. باشقه ضرورتلر وقتیده هم اونى کونیده بېش-اۋن دقیقه قازیقندن بۇشتیب، سۇنگ ینه شو جاییده باغلب قۇیه بېردى. بیر نېچه آی اۇتدی. گلچهره هیچ کیم بیلن ملاقاتده بۇلمهدى. سۇزلىش نیمه لیگینی هم اونوته یازدی. اوزاق جسمانی قیناق، حقارت و ایزیلیشلر ارقه سیدن اسکلیتگه آیلندی. بدنیدن سووی قوریب، تېریسی سویگیگه یاپیشدی. کۇرگن تامیرلری یوزه گه بۇرتیب چیقدى. پخالگه باتیب یاتگنیدن کیر باسگن ساچلری اجینه^۱ کبی تۇزغیب^۲ کېتگن. آلتی آیدن بېری یوزلری یوویقسیز گلچهره، نق اوراگه اۇخشردی. ینه بیر نېچه آی و ییل اۇته بېردى. قاره ییب کېتگن برماقلری اوچیدن قانب، اۇسیب سینگن تیرناقلری کۇزگه تشلنیب تورردى. تیرسکلری یره، ایکی تیزه سی نینگ سویکلری قاقشال^۳، ابلکه سی نینگ سویگی اووه ده^۴ کیمینی تېشیب تشقریگه چیققن. کۇزلری چۇکیب کېتگنی عیان. باش چناعی^۵ قوریب، بۇشب قالگن آش قواقنى اېسله تردى. گلچهره توتقون آلینگن قول سینگری اغير شراپلده همان یشب کېله دیر اېدی. او آغیلخانده «بیر کون آزاد بۇله من، حیات آغوشیگه قیته من» - دېب اۇیلب هم کۇرمه گن. حیاتدن امیدینی اوزگن. اۇبلىش و خیال سوریشدن هم

^۱ اجین (اجینه): تېرده گی (اساساً یوز و پېشانده گی) یۇل-یۇل، باتیق چیقیزقلر.

^۲ تۇغزیماق: تۇزیماق، تۇزماق؛ هر یانگه ترقلماق؛ ترقلیب، ساچلیب کېتماق، بی ترتیب یایلماق.

^۳ قاقشال: اریقلىكدن قاق قوریب قالگن، قاق قوروق، قوروق سویک.

^۴ اووه ده: اېسکیریب، سیتیلیب، بیرتیلیب دېدهله بۇلگن کیم-کېچک؛ لته-پوته، اېسکی-توسکی.

^۵ چناق: کاسه، کاسه سیمان سویکلر. باش چناعی: باش کاسه سی.

محروم بۇلگن. تشقىرىدە ھم جۇشقىن حيات بار، شادلىك، كولگى-اۋىين بار، سېۋىش، سېۋىلىش و ساغىنىش بار، ىم-ىشىل طبعىت كۈركىنى تۇكىب تورىدى. قولقلرگە قوشلرنىنگ چولدىرەب سىرەشلىرى ياقىملى جرەنگلەيدى. آى و قوباش، كۇك و بولوت، باغ و راغ، تون و كون بارلىگىنى اېسگە كېلتىرەلمەيدى. احتمال باشىدە: «آتم-آتم مېنىنگ بو كونىمدن خبر بۇلرمىكن؟ اولر مېنى بو قارە اوچماخدن قوتقۇزمىكن؟» -دېب احتمال اۋىلىشگە توتىنگن دىر. شونچە مدت اۋتىب آغىلخانەدەگى دەشتلى حيات خبرى ھلى تشقىرىگە چىققىنچە يۇق. چىققن تقدىردە ھم عبدالرحمان نىنگ كاوشىنى تۇغرىلب قۇيەدىگن آدم يۇق.

شو كونى گلچەرەنىنگ آتە-آنەسى قىزىنى يۇقلىب، كېلىشىدى. آلدىن ھم بىر-اىكى مرتە كېلىشگن اېكن. عبدالرحمان ھر گل تورلى بەھانە بىلن حويلىگە كىرىتمەى اولرنى، تشقىرىدن رخصت قىلىب يوبارەبىرگن. كۇپ وقتگەچە آتە-آنە اېسە: «اېرى بطل^۱ دە، قىزىمىزنى، آتە-آنەگە كۇرستىشنى خواخلەمەيدى» -دېب يورگن. كۇپ بارە كېلىب نىجەسىز قىتگنلردىن سۇنگ آتە-آنەنىنگ يورەگىدە قندەى دىر شېھەرلر اۋىغانگن. تىنچى يۇقالىب قىزىنى تاپىشگە عزم قىلەدى. قدىمى اوزىلمەى عبدالرحمان نىكىگە بارىشدىن تايىمەيدىلر^۲.

۱۰

عبدالرحمان نىنگ مال-حالىگە قرەگنى اونىنگ زمان دېگن جىيەنى خبر آلىب تورەدى. بالە آغىلخانەدەگى وحشى لىكلردن خبردار. بويورىلگن ايشنى بجرەدى-يو، اويىگە كېتەدى قىتېب. ايسىنى چىقرسە باشى كېتىشىنى يخشى بىلەدى. زمان، نىم جان ايغرەنىش^۳ تاووشى، يىنگەسى نىنگ قىينلىشىگە چىدەىلمەيدى. يورەگىدن بىر نرسەلر كېچەدى. بو يېردە گلچەرەنى زىجىرىند قىلىب باغلنگىلىگىنى كۇزلىرى

^۱ بطل: اۋتەكېنگن ياووز، بېرحم، وحشى، رذىل، يرەمس.

^۲ تايماق: قىتماق؛ سىرغىماق، تايغىماق.

^۳ ايغرەنماق: تېبرەنماق، چىقلىماق.

بىلن كۇريب، چىدەي آلمەيدى. هر گل عبدالرحمان جىيەنىگە «ھىچ نرسە بۇلگنى يۇق. ھەممەسى يىخشى، مال-خالدن خبر أليپ تورگىن آندە-ساندە» -دېب قۇيەدى. زمان ھم «خۇب بۇلەدى تاغە جان!» -دېب يۇليگە دوام اېتەبېردى.

۱۱

تۇرت قىشلاق نرىدە امانت بىر اويدە اېگمېردى و بېگىم خالە عايلەسى كون كۇرىشەدى. «قىزىمىز گلچەردن خبر يۇق» -دېگن تشويش بىلن ھىچ كىمگە سىر بېرە آلمەي يىشب يورىشىيدى. قۇرقىشىدن ھىچ كىمگە بو حقدە سۇز آچە آلمەنگلر. گلچەرەنىنگ بېدرک قارە تقدىرى بارگن سىرى بېزاوتە قىلەبېرەدى بولرنى. آرەدن اوچ-تۇرت يىل اۇتدى. ھمان گلچەرەدن خبر يۇق. اۇليكمى، تىرىكمى؟ ھىچ كىم بىلمەيدى. ياشلىگىدن اېرگە اوزەتيلگن قىزچە شو پىتگە كېلىب، ۲۱ ياشگە كىرگن. او اوچ يىلدىن بېرى قۇل-اياغى باغلىنىپ، آغىلخانەگە تشلنگن. «بو كئافتنى تىرىكلىگىدە قورىتەمن» -دېگن عبدالرحمان يىخشىلپ حكىمنى اۇتكزگن. اونىنگ جىرىدن بو ياووزلىك و آچاقلىك خبرى تشقىرگە چىقمەي كېلەبېرگن. قىشلاقداشلىرىدن كىم دىر شىبەلنىپ، قىزىنىنگ تقدىرى بىلن قىزىقەدى. آخرى گلچەرەنىنگ كۇپ يىللردن بېرى اېرى تامانىدن آغىلخانەدە باغلب تشلنگنى خبرىدن آگاہ بۇلىشەدى. كونلردن بىر كونى عبدالرحمان نىنگ جىيەنى بو خبرنى گلچەرەنىنگ آتە-آنەسىگە يىتكزماقچى بۇلىپ، يۇلگە چىقدى. يۇلدە كېلەياتىب، زمانگە اۇشە شىبەلنگن كىشى دوچ كېلىشىدى. كۇزىگە قىزىق كۇرىنرکن زمانگە: «او كە مېن عبدالرحمان نىنگ خاتىنى گلچەرەنىنگ تاغەسى بۇلەمن، -دېدى بايەگى كىشى، بىر گىيىم بار اېدى. يىخشىلىك حقى-حرمتى خبرىنگ بۇلسە ايتىرسن! مىلى مى؟» -دېدى.

مىلى سلام تاغە، شونداغمى؟ -دېدى زمان، -بىلىسم ایتەمن البتە.

– شو اېگمبېردى تاغە و بېگىم خالەلر قىزى نىنگ داغىدن كوئىب كباب بۇلدىلر. بىر نېچە يىلدىن بېرى قىزىدن درك يۇق اېمش. قىزىنى كىچىكلىگىدە عبدالرحمانگە اېرگە بېرگن-و، قالگنئىدن خبرى يۇق. بىز بىلن ھم كىردى-چىقىدىسى يۇق. سېن عبدالرحمان نىنگ اويىگە يقىن اېمىسى سن مبادا؟ خبرىنگ بۇلسە ايتگىن جان اوكم! يىخىلىگىنگى قىترەمن.

– اونداغ بۇلسە ايتەمن اېندى، اېشىتىنگ بۇمىسە ھم: مېن بىر كونى عبدالرحمان تاغەمنىكىگە ائىلخانەگە ماللرگە اۋت، يېم-خىشك بېرگىنى كىرگىنمىدە، قىز بالە نىنگ اىنگىچكە گىنە يىغلەگن تاووشى اېشىتىلگندەى بۇلدى. مېنى او ياققە يۇلتمىس اېدىلە. تاغەم كىمگە دىر ظلم قىلگنگە اۋخىشەدى. رزم سالىب يورە بېردىم. آخرى بىلىب باقسىم بو شو گلچېرە اېكن. حيوانلر يانىدە باغلب قۇيىلگن خاتىن اۋشە گلچېرە يىنگەم اېكنلە. بۇلىب اۋتگن داستاندىن خبرىم يۇق. اونى قوتقىزىش كېرەك. مېندەگى گپ بارى شو. تاغەم بىلمەسىن تىغىن، مېنىنگ تېرىمگە سامان تىقەدىلە. راسە خونىك، ظالم و پىس آدملە اولە.

– سېنگە رحمت اوکە شونچە معلوماتنى مېنگە يېتكىزگىنىنگ اوچون. ھىچ كىم بىلمەيدى، خواطر آلەمە. تېنگىرى يارلقەسىن سېنى. بو گېنىنگى باشىم كېتسە ھم باشقەلرگە يېتكىزمىلىككە سۇز بېرەمن. كۈنگىلىنگ تۇق بۇلسىن اوکە!

۱۲

زمانگە توشونتىردى، زمان ھم راضىلىك بىلدىردى... بو خبرنى اېشىتىگن آتە-آتە كويواى عبدالرحمان نىنگ اويىگە قرەب روانە بۇلدىلر. اوچ كىشى حاويلىگە باستىرىب كىرىب، اۋشە ايتىلگن جايدىن گلچېرەنى تاپىشىدى. بىراق عبدالرحمان اويدە اېمىسدى. يوزلشدىلر. آتە-آتە قنچەلر يىغلب قىزىنى قوچاقلب آلەمەسىن. قىزى آتە-آتە سىنى يىخى تىمە يىدى. «بولر كىملر؟ نىمەگە كېلىشىدى؟» -دېگن سوال گلچېرەنىنگ اىچىدىن اۋتگن بۇلىشى مۇمكىن. اېنگ يامانى شو كە، گلچېرە

سۆزلىشىشنى اونوتىپ قۇيىڭن. ساقاولردەي^۱ معناسىز غودورلەيدى خلاص. گلچەرە برماقلىرى بىلن بىر نرسەلرنى ايما-اشارە قىلەباشلەدى. شاشىلىنچ روشدە تىرىك جسدنى بو يېردن آلىب كېتىشىلر.

۱۳

گلچەرەنى بېگىم خالە و اېگمبېردى اكهلىرى نىنگ اويىگه آلىب كېلدىلر. ۱۲ يىل آلدن بو خانداندىن چىقىرىلگن قىزچە ھىچ نرسەنى اېسلەي آلمەيدى. مېيەسى بۇشب، قورىب، ققشب قالگندەي كۆرىنەدى، منقورتگه آلىنىب قالگن. بدنىگه كىمى ياپىشىب كېتىگندىن آنەسى قىزىنى يووينتىرگىنى تشنابگه آلىب كىرە آلمەدى. باشلې بدنىگه اچىق ياغ سورىب، سۇنگ ياپىشگن كىمىنى تنەسىدىن آيىرىب آلىشگە كىرىشىدى. قۇل تېكىزگن سرى، گۆدەسىدىن قان بىلن ايرىنگ چىقەبېردى. كىر و افلاس كىمىنى يېچىب آلرکن، بدنىنى سوو و صابون بىلن يوويشگە علاج تاپىلمەدى. قانىگە بېلىنىب ياتگن بېمار اوچ-تۇرت ساعەت آنەسى نىنگ قوچاغىدە اېدى. شو آرەدە كۆز آچىب، جىلمەيمەدى ھم. نفس آلىشى تابارە سېكىنلشە ياتگندى. تازەراق كىم كىيىدىرىب، كۆرپەچەدە ياتقىزەمىز، دېگن اوۋى بىلن قىزىنى يېردن اوزىب كۆترماقچى بۇلدى خالە. گلچەرە نىنگ سۇلىگن تنەسى ساوويى باشلەدى. او چلقانچەسىگە^۲ ياتگن يېرىدىن آخرگى مرتە ارەنگ كۆزلرىنى يىرىم آچىشگە اولگوردى. شو چاغدە او «قۇغىرچاغىنى» اېسلې قالگن بۇلسە عجب مس. اونىنگ يورەگى تېپىشدىن تۇختەدى. نھايت گلچەرە آنەسى نىنگ بغيرىدە منگو ساكنلىك قەرىگە چۈكدى. كۆزلرى اۋتمسلىشىب قالگن بېگىم خالە اېسە ابدى ايرىلىق داغىدە يانىشىدىن اۋزگە چارە تاپە آلمەدى.

^۱ ساقاو: تېلىسىز، گنگ، گنگەلك.

^۲ چلقانچەسىگە (چلقنچەسىگە): ارقەنى يىرگە بېرىب، چۆزىلېب، آسمانگە قرەب.

عبدالرحمان نىنگ توپغوسى اۋيين-كولگى، خوش-خوردىلىكلردن بوتون بۇشب قالگن. او شونچە كە بىرتقيچ طبعيتلى، خاصيتلى آدم. حكومتدە گيلرنى الله قچان تاماغىنى مايلىب قۇيگن. جانىگە تېككنلرگە دارىب، قرشى چىقر؛ «قاواغىنگ اوستيده قاشىنگ بار» -دېگن انسان نىنگ پېشانەسىدن دريچە آپمەى قۇيمەيدى. آرقەسى تۇلە. اويدەگى، تشقىردەگى حياتى آچىب بۇلگن. عايله سىدە گيلردن كىمنى آيەمس؛ شعورى يره-گزه كلرگە چۇنگ ميدان بۇلىب قالگن. قربانلردن بىرگىنە گلچەرە نىنگ اۋزى چىقدى. قالگنلريدن خبر يۇق. تېمىر قۇيوندە حس-تويغو، رحم-شفقت و آدمي لىك نىمە قىلسىن؟ عبدالرحمان اېركىن حيات بغرىدە دۆر-دوران سورىب يورىيدى. گلچەرە نىنگ آتە-آنەسى: «كونى قچان بىتركن؟» -دېگن خبر ايلينجيدە.

(حكايە قَيْتە ايشلندى)

۱۹۸۸- يىل، شىرغان

يېر اوپىگن برماقلىر

بېر اۋپگن برماقلىر

يېگىرمە سكيز يىلدىن بېرى، ھمراھ قول ولى جان نىنگ اېشىگىدە دەھقان. ولى جان اېسە، جالايىرنىنگ باي وچە غلجى لىرىدىن بۇلگىچ اېدى. او تخمىن يوز چقىرىمچەلىك نردە بېرلىشگن شۇر دريادن شەرگە كېلىپ، حكومت دستگى ايله اۋزبېكلردن سېر حاصل بېرلرنى سرياغ دەى بۇلىپ-بۇلىپ، اۋز آتىگە قبالە قىلىپ آلەبېرگن. اوچى-قىراغى كۆرىنمىس كېتگن باغ-راغلىر، اېكىنزارلر حاصلينى يىغىپ-تېرىپ آلىش اوچون محلى آدملىرنى اۋزىگە يېتىم-دەھقان، خذمتگار قىلىپ آلكندى. غلجى لىرنىنگ خانى بۇلمىش ولى جان پىنئاس^۱ چۇل، تقىر دەيمە، دال-درخت سىز شۇر دريادن بالە-چقەسى، اوروغ-اىماغى بىلن شىرىن تگاب اولوسدارلىگىگە تېز-تېز اېنىپ تورر؛ بې پايان بېر و مۇلكلىرىدىن خبر آلر اېدى. اولكن بايلىك آرتدىرىپ، شېھردن اۋزىگە قطار-قطار دوكانلرنى ساتىپ آلىپ اېگەلىك قىلدى؛ محلى آدملىرنى قۇى، اېچكىلر بېرىپ بۇنىگە چە قرضگە باتىرگن؛ كىشىلرنىنگ سادەلىگىدىن فايده لنىپ، قىلر ايشىنى قىلىپ نانى ياققە باتگن زادەگانلردن؛ انىقراغى، حكومت نىنگ آغزىنى تحفە-تارتىقلر بىلن ياپىپ تىشلىگندى. مېھمانلىكلر اوپىشتىرىپ زۇرەوانلىكنى اوچىگە چىقرگندى.

^۱ پىنئاس: ھىچ نرسە كۆكرمە يىدىگن جاي، قوروق صحرا، چۇل.

ھەمراھ قول بۇيى پستك كېنە، كىچكىنە آدم، قارەچەدن كېلگن ۶۳ ياشنى اوريپ بۇلگن كىشى اېدى. اونىنگ توروش-تورمىشى محنت بىلن قارايلىب كېتىگندى. قويروغى بېر ايسكەمس بوندەي چەبىر و اېچىل آدم حياتدە كمدن كم اوچرەسە كېرەك. كۈسە ساقال، سلەسىنى پېچ قۇيمىسدن اۋرەيدى. جغ تيشلرى توشىب كېتىگن، ارپە-تەرىق نان-زاغارەنى سووگە باتىرىپ زۇرغە تمشەندى. آزغىنلىكدن يىناقلرى تشقىرگە بۇرتىب چىققن، اېتى اېچكرىگە تارتگن، اياقلىرىگە لونجى يولوق^۱ چاروق ايلردى. يۇل-يۇل بۇز^۲ گوپپىچەسى اونىقىب، تىزە، تىرسكلرىدن ماموكلرى ايلوبىرەب تورردى. كۈزلرى كىرتەيىب اىچكرىگە كىرىپ كېتىگن، رنگ-توسى قوياشده تابلنىب قارەبگن، قۇلدىن گورانە^۳، ابلكەسىدن بېل توشگىنىنى ھىچ كىم اېسلەي آلمسە كېرەك. خاتىنى تاشىدل خالە ايش-محنت بابىدە اېرىنىنگ اۋزگىنەسى. بىراق تۇلەدن كېلگن، جرار، تاووشلرى جرنگلب تورگىچ بىر صوتلى خاتىن. تىنىش-بىلىشلىرى ھەمراھ قولنى ھەمراھ چال ھەم دېب چقىرردى. ھەمراھ چال نىنگ اىكىتە اۋغلى، بىر بېوھ قىزى بۇلىب، اوچ نىبەرەسى بار اېدى. اوزاق يىللىردن بويان ولى جان قۇلىگە قرەيدى؛ ھەمەسىنى قۇشىب حسابلسە سەھل كم اۋتىز يىلدىن بېرى ولى جان مالدار اېشىگىدە. ھەمراھ قول نىنگ ولى جانگە دەھقان بۇلىب توشگىنگە سبب، اۋشە-اۋشە مال-ملىكىدن اجرەلىب، قرەم بۇلىب قالگنى و بېلىنى بوكلن كمبەلچىلىك اېدى. ھەمراھ قول اصلىدە يشب كېلەتورگن جايىدن اۋن قىشلاق نرىدە توغىلگن؛ ولى جان بوياقلردن بېر-ملىك آلگندن سۇنگ كۇچىرىپ كېلگن. ھەمراھ چال ولى جان بىلن تىنىشىب، آلدى-بېردى قىلىپ يورگىدىن كۇپ اۋتمەي، قۇقىسىدن بىر كونى ھەم نرسەسىدن اجرەلدى قالدى. قندەي قىلىپ دېگندە:

^۱ يولوق: يولىب تىشلىگن، يولىب آلىنگن، اوزىلگن.

^۲ بۇز: خام بېشىتىلگن پختە ايدىن قۇل دستگاھىدە تۇقىلگن متاع.

^۳ گورانە (گاوران): مال، قوی و باشقە حيوانلرنى ھىدەش اوچون ايشلىتەلەيدىگن اوزون يۇغان تىياق.

بىر كۈنى دفتىرچە آجىلىب، حساب-كتاب قىلىنغىچ، ميداننى ھېچ نرسە بىلن تۇلدىرىپ بۆلمەدى. دىراۋ ھىمراھ قولنىڭ بىر پىكالى باغى قىزىگە حسابلىب آلىندى. دەيمە يېرلر، كېيىن قۇش ھۆكىز، درەنغىللەگن حاويلسىدىن ھىم اجرەلدى. شۈندە ھىم تۇلاولر نىڭ يىرىمى اوزىلمەى قالدى. آخىرى، تۇقىز ياشلى قىزچەسى نار خالىنى ھىم حسابلىب آلدى. بو تراژىدىنى تىلگە آلىشدىن قلمنى تىتراق باسەدى. آنەنى چىرقىرەتەب، قىزىنى ايزىللىتەب جلايىرگە آلىب كېتىڭى بىر قوم اوچون كتە ماتم اېدى. يىغلمەگن كتە-كىچىك قالمەدى. تون قارە ساچىنى يايىب، عزا آلگندەى گۇيا. اۋشە كۈنى بغيرلر سۇكىلدى؛^۱ قىامت قۇپدى؛ زمين و زمان ماتم تونگىگە اۇخىردى. ھە، اۋشە كۈنى قوم ھوا اۋرنىدە غم-قىغو يوتىشىدى؛ آش-اوقت اۋرنىدە زھر-زقوم يېدى، اىچدى. باشلر ياستىققە اېمس تاشگە اۋراغلىق سىم-تىكىنگە قۇيىلدى. اۋشە كېچەسى ايتلرنىڭ غېشىنىب ھورىشلىرى، مونگلى ھولىشلىرى قندەيدىر ناخوشلىكدن درك بېرىپ تورىيدى. جانوارلر ھىم ھىمە نرسەنى بىلىب، اۋز وفادارلىگىنى اظھار قىلىشگن بۇلسەلر نې عجب! مچىتدە نماز اۋقىشگە يىغلىشىب تورگن تومنا ت قىشلاقداشلر آرەسىدىن:

«باش كۇتريب يورگۈدەى بۆلمەدىك؛ شىرمندەلىك! اۋزىنى ناموسى كېتدى!» - دېگن كويونچك سۇز خالق صوفىدىن چىقدى... نفسلر اىچگە اۋرەلدى. «اېركك ناموس نىڭ قلقانى؛ ملت اوچون، ننگ و ناموس اوچون كېتسە كېتسىن بو جانلر!» -دېب يىگىتلردن مراد اۋرتەگە چىقدى. كىمدىر: «اۋزىنگى باس بالە! بوتون قىشلاقنى قىرىپ گۇمدان^۲ قىلەدى بو ظالم باسقىنچىلر» -دېب آرنەنى ساووتدى. مېن اۋشندە چمەسى اۋن بىر ياشىمدە اېدىم، جانىم چىمىرلېب كېتدى؛ يىغلب يوباردىم؛ خۇرسىنىب-خۇرسىنىب، «قۇلىمگە ملتىق بېرىيلە، مېن آتەمن دشمنى» -

^۱ سۇكىلدى: المگە باتدى، ويران بۇلدى.

^۲ گۇمدان: گم، يۇق بۇلىش.

دېب اوياق-بوياققە تېلىنكىم اېسىمدە. اتم-اتم: «بارمى سن اې خدا! بو ظلملرنى كۈرىپ نېگە تاش قىمەيسن اې پروردگار!» -دېبە آسمانگە قۇل كۈترىكى همان يادىمدە تورىدى. خلق ناموسىنى تارتىپ آلىپ كېتىش حادثەسى اۋتە آغىر بۇلركن؛ چارە تاپەلمەگن ملت باشىنى قويمى سالىب يم-يم كۈز ياشى قىلىشدىن اۋزگە علاج تاپەلمەدىلر. نار خالنى اېمس-غىلجىلىر اولوس نىنگ جانىنى سوغورىپ كېتىشىدى.

بو اۋشە يىلگى اوچىنچى واقعه اېدى. بوندىن كېين هم بىر نېچە مرتە قىزلرنى قرضگە سنب آلىپ كېتىشلر بۇلىپ توردى. قان يوتىپ بۇنىگە يوك بۇلىپ ياتگن قرضىنى اوزىش اوچون همراە قول بوندىن بوياغى يەنە نېچە يىل پېشانە تېرى تۈكىشى كېرەك - بونىسى ھلى بېرى قارانغى!

سېر مغىز، قىپ-قىزىل تۈنىب باشاقلەگن بوغدايلر يېتىلىپ، يېرگە اېگىلەى دېب تورىدى. اۋراقلر قېرەب قۇيىلگن. همراە قول نىنگ قولى بۇشمەى تورىدى. وقت تاپىشى بىلن-آق، بوغداى اۋرىشىگە كىرىشەدى. بالە-چقەنى باقىشىگە يېترلى رزق-رۈزىنى انە شو يېردن تېرىپ آلىشىگە امىدىنى باغلب قۇيگندى...

...ھفتەنىنگ باشىدىن بوغداى اۋرىشىگە كىرىشىلدى. عايلەسى بىلن بىرگە لىشىپ، قاودەلب قۇيىلگن بوغداى اۋرىملىرىنى تىشىپ، اوچ ھفتە دېگندە چمەسى ايكى-اوچ آدم بۇى قىلىپ اويىلگن^۱ اولكن خرمان تىخلەندى. قوياش نىنگ جىزىمە نورلرى آستىدە، نواقانچىلر يېلىپ-يوكىرىپ، سىنىپ ياتگن بوغداى باشاقلرىنى تېرىشر اېدىلر. انگرەدە سىگىر، بوزاق، مال-حال اۋتلب تورر اېدى.

اۋشە پىت همراە چال خاتىنى تاشىدل خالە بىلن ھاردىق چىقرىكى بىر زوم اۋزلىرىنى پخال كۈلنكەسىگە آلىپ، غىيتلردن گپ قورىشىدى؛ گپ آرەسىدە مېش^۲ سوويدن بىر جامنى تۈلدىرىپ، نوبتى بىلن سىمىرىپ، سىپقىرىپ اچىشىدىلر. كۈككە بۇى چۈزىگن

^۱ اويىلگن: اوستمە-اوست قاشتىرىپ، بىر يېرگە تۈپلپ قۇيىلگن، يىغىلگن.

^۲ مېش: سوو، قىمىز و شو كى سوپوق نرسەلر سالىپ قۇيىلەدىگن، تىشىلەدىگن تېرى؛ سناچ.

خرمان، كۆزلرنى قووانتيرهدى. «جۇجهنى كوزده سنه» -دېگن مقال انابتگه آلىنسه، همراه چال نىنگ اولوشى قنچه بۇلىشىنى آلدن بىلىش قىين اېمس. خرماننى بايلر بنده لردهى اېمس، خدادهى بۇلىشهدى. خام چۇت قىلىب، اويىلگن خرماندن قنچه اولوش تېگىشىنى بىر چمەلب كۇرىشدى اېر-خاتىن تەغىن ايكاولان:

- قىشىمىزگه يىتگودهى دان تېگرمىكن؟ آتەسى، -دېب سۇرهدى تاشبدل خاله اېرىدن.

- امىدسىز شيطان، -دېدى همراه قول قۇلىنى پىشانەسىگه توتىب، -خاتىن! اۇزى شو بىل يىخشى حق آلرمىكنمن، دېدى گمان سىرهگن بىر كىفئتده.

- نېچەدن بىر حق آلهسىز آتەسى؟

- همىشهگى دهى، يتىدن بىر حق آلهمن-ده، نصيب بۇلسه آتەسى؟

- نىمه دېگىز، مونداغ توشونتىرىب آيتىنگ قنى؟

- خاتىن، دهقانچهسىگه قىلىب آيتسم، مېن يىنچىلگن منە شو تيار بوغدايدن يتىدن بىر اولوش آلهمن. بو دېگنى يتى قاپدن بىر قاپى مېنىكى بۇلهدى؛ مېنگه تېگەدى كىمده.

- اېسكى قرىلرئز تقاوى آلگنلرئز-چى، اولرنى كىم اوزهدى؟

- ولى جان بو بىل انصافگه كېلىب، آدمىلىگى توتىب قرضىنى آلمىدىر اخر! شونچه بىللىك محنتىم كۇزىنى توتمه يدىمى؟

- كۇرىب تورىب سىز، ياپىنر-تۇشه نرىمىز هم اېسكىرىب، ساپ بۇله يازدى چال. باله-چقەنى كىيىنتىرىش دېگن تشوئش بار آلدىنده هلى. يىخشى-يامان كونلر دېگندهى. پىشه ندهه يازىلگنى بۇلهدى خاتىن.

- سىزگه اىچىم كويەدى، -قرسى نىنگ اوچى بىلن كۇز ياشىنى آرئتركن، -كېچه دېمەى، كوندوز دېمەى، بىل اۇن ايكى آى جان بېرىب ايشله سىز-و، تاپگىز

قرىزىزدن آرتمه يدى، بىر قاپ بوغداي يا يېتەدى يا يېتمەيدى، -دېدى تاشبىل خالە
اېرىگە تىكىلىپ.

- نېمە قىلەي آنەسى؟ بىندەگە بىندەمن-دە!

- شو اوروغى قورىگور غلجىي لىر كېلمسدىن آلدېن يىخشى گىنە حياتىمىز بار ابدى.
اۈزىگە تۇق بۇلىپ يشەگىمىز-كو. قىشلىك اوچون بۇرداقى باققىمىز؛ مەيىزغال
تۇلدىرىپ مەيىز آردىك اۈشە پىتلىر؛ اويلر تۇلدىرىپ قندىل دەي-قندىل دەي قىلىپ
اوزوم آسىب سايەگى مەيىز آردىك؛ پاليزلردن تربوز-قاوون نىنگ كېتى آرىمسدى؛
خاوازلەر^۱ تۇلدىرىپ تايپى اوزوم آسگىمىز؛ كۈزلەر تۇلدىرىپ شىنىنى قىلردىك. قاق
گۈشتلرگە چە غملىب قۇيردىك. خومرەچەلر^۲ تۇلە قىماق، سوت و قىتىق، سرياغلرنى
آيتمەيسىزمى؟ قنى اېندى دوركون-دوركون اۈشە زمانلر، قنى؟ يالغان آيتگىندەي
برى اونوت بۇلدى-يوو.

- بو كونلر شۇر پېشانەمىزدە يازىلگن اېكن، تارتمىز اېندى خاتىن.

- حكومت اوغانلر نىكى، اۈزبىنى سنەسىنى ھىچ كىم اۋقىمەيدى. بو خلق معلم،
سرکاتب بۇسە يم كتە گپ. اميدىمىز يۇغ اۈزبىلرنى باش يىلنگلرېدن.
- تۇغرى آيتەسن خاتىن اۈزبىنى اۋقىتىپ منصبدار قىلىپ بۇمس اېكن، مېن شو
فكرگە كېلدىم.

- يىنە گېلرېمگە كۈنگىز چۈكمەسىن آتەسى. بارىزگە قووانەمن، يۇغىزگە كويىنەمن،
خاتىنىمىن اخر. سىزنى كۇپ اۋىلەيمىن-دە. بار-يۇغىزنى شو كېلگىندىلرگە تاپشېرىپ
قۇيدىز برکە تاپكور. بىر اۋىلب باقىنگ-دە! بو ياغى قىنداق بۇلەدى؟ آلدى-كېتىزگە
قرەمەي ايش توتەدىزمى اۈزى؟

^۱ خاوازه (خاوازه): قىشە اوزوم آسىب قۇبىلەدىگن ايشكام، پنجرە؛ تاكلرنى كۈتريب قۇبىش، ترەش، يايىش اوچون
پايە و بغزلردن بلند قىلىپ قورلىگن ياي سىمان سۇرى؛ وەلىش.
^۲ خومرەچە: قىماق ايدىشى، كىچىك كۈزەچە.

- مېنى سوادىم بۇلمسە؛ حمايه چىدىن يارىب يالچىمەگن اېسىم؛ بو ياغى اېندى كۈپچىلىك نىنگ باشىگە كېلگن سودا بۇلسە؛ «زمان زۇرنىكى، تاماشا كۇرنىكى» - دېب يشەى بېرەمىزدە آنەسى. نىمە قىلەمىز بىزنى يوزەگە اېلب چىقەياتگن اۇقىمىشلى لرىمىز يۇق. اۇزبىنى ھۇكىزنى دۇمىگە باغلب قۇيگن اېكن پروردگار.
- باشىم شىشىب كېتدى خاتىن، شو داستانلرنى يازغىرمەگىن.
- اۇرگىلب كېتەى سىزدن، بىر گپ ایتەيمى؟
- ایت گپىنگ بۇلسە، ایت، ايش قالىب كېتدى!
- راستىنى ایتسەم، اۇزبىكلرىز اغزى پلوان، مقتنچاغ؛ غىرتى يۇغ اېكن اولرنى. شونچەلىك تومنات اۇزبىك اوستىدىن بىر ھاووج دغەلر حۇكم يورغىزىب تورسە-يە؛ آدملرنىنگ مال-ملكلرىنى تارتىب آلەبېرسە، قرضىگە حسابلب گۇدك قىزلىرگچە چىرقىرەتىب آب كېتە بېرسە، بو نىمە دېگنى؟ شىرمندەلىك اېسمى؟ اېشىتىشىمدىن بىر بىزىنىنگ اولسواللىگىمىز اېمس، اۇزبىكلر يشەياتگن برچە ولايتلردە احوال شو اېمىش؟! بولر كون سەبىن اورچىب بارەياتىر؛ ھەمە ياغنى باسىب كېلەيپدى دېشەدى قۇنى-قۇشنىلر.
- تۇغرى ایتەسن آنەسى؛ حكومت شولرنى قۇلىدە. تېگىرمان تاشىنى اىستەگن تامانگە ايلتتىرىب ياتىتيلە.
- اخ اېى! بىز خلق اۇقىشىگە اهمىت بېرمەى، پادەنىنگ، مال-حال نىنگ ارقەسىدىن توشىب خطا قىلماقدەمىز. ھەمە گپ انه شوندا آتەسى.
- اولرنىنگ قۇللىدە «نظامنامە ناقلین (كۇچمچىلرنى حمايه قىلەدىرگان يارلىق/بويروق خط)» بۇلگن. بو ايش بوندىن سكسان-تۇقسان يىل آلدىن باشلنگن بۇلسە، بوياغى دوام اېتەدىگن كۇرىنەدى، خاتىن!

- مېن بو رحمسىزلرنىڭ ايجىدە قندەي دىر قاره كوچ ياتيبدى، دېب اۋىلەيمىن. بولر اَلدیده انسان حیاتی بیر پول. حیاتی قدرلَمەي، زۇرەوانلىككە بېل باغله گنلردن قۇرقماغ كېرەك. بوندن بدتراغيدن اسره سىن آتەسى، -دېدى تاشبدل خاله. قاق ياز پىتى. همراه قول تاغه قاره سحردين هۇكيزلرنى قۇشيب، خرمان ينجيشگە توتىندى. كېتىدن چاپر باغلب، بير هفته دېگندە خرماننى ينجيب، قىپ-قىزىل بوغداينى چاش^۱ قىلىپ قۇيدى. قوياش باتمسدن ولى جان هم شاتيرلىرى^۲ بىلن خرمان اوستيده پيدا بۇلىپ قالدى. آق سلە اۋرەب، اوزون پېچ قۇيگن ولى جان چاش قىلىنگن بوغداي اوستيده توريب: «قنى، دعا بېرىنگ آخىنىم» -دېدى اۋز تىليدە، ملا جلالگە تاماغىنى بير-يىكى قاقىب، اۋدەغىلب يوز بوررکن. ملا جلال اېسە هاووچلرینی كتە آچىپ، قۇللىرىنى يۇقارى كۇترگنچە قبلەگە قرەب اوزوندن- اوزون دعالردن اَلدى:

- يره تگن پروردگار! خانىمىزنىڭ سايەسىنى باشىمىزده بر دوام توتگەيسن. الهىم ولى جان نىڭ دستورخوانى مۇل-كۇل بۇلىپ، دولتىنى بوندن هم زىادە ايله گەيسن. خانىمىز اَلسىن الهىم، اَلدىرمەيسن. كۇپنىڭ دعاسى ايله باشى امان، كۇرگن توشلرى اۋنگيدن كېلەبېرسىن. منە بو كۇرىب تورگىمىز چۇغ دەي يلتىللب تورگن بوغداي خرمانى بر كەلى بۇلسىن. الهى خانىمىز اېشىگىدە، همراه قولگە اۋخشەگن يىخسى-يىخسى خىزمىتگارلرنى حاضر و ناظر توتگەيسن. نوقانچىلر، كېسپىنچىلر^۳ قنى قۇل كۇترىنگ - آمىن يارب العالمين! -دېدى. ملا جلال نىڭ تاترچن سۇزلرى برچەنى اېرىتىپ يوباردى. مچىت امامى، پادەبان، دُلاک، سووچى، دەبک^۴، گۇرکاو، يووغيچ، تىلمچىلر و برى يىغىلىشگنلر بير اوازده قۇل كۇترىشىپ دعا قىلدىلر.

^۱ چاش: لىما-لىم، لىق تۇلە؛ تازەلنگن غلە، پختە و شو كىيلرنىڭ خرماندەگى اويومى، اويىلگن غلە، خرمان.

^۲ شاتير: آدملىر اَلدىدن يورەدىگن جرار آدم.

^۳ كېسپن (كېسپن): خرمان كۇترىلگندە كىمبىلرگە بېرىلەدىگن صدقە-سىيلاو.

^۴ دەبک: ارباب نىڭ ياردمچىسى.

ولى جان اۋرتەدە توريب، كېپسنىچىلرنى بىرىن-كېتىن آت توتىب چقىرىشنى ملاگە بويوردى. يوزلرى لۇپە چىققن جۇجە خورازگە اۋخشب مى بېرىب تورگن ملا جلال غاو، سرغەيگن كىر ساقالىنى كفتيگە ايشقەلب تىلگە كىردى:

- بىرىنچى بۇلىب، اربابنىنگ آدمى كېلسىن، -دېدى ملا.

- لىبى، -دېپە آلدىنگە چىقدى اۋرتە ياشلى قاتمەدن كېلگن بىر كىشى.

- اربابگە بىر يىرىم غلبىر بوغداى بېرىلسىن، -دېدى خان.

قنى اېندى مىراب كېلسىن، -دېدى ملا جلال.

- مىرابگە بىر غلبىر بوغداى، -دېدى ولى جان.

دلآك كېلسىن، -دېدى ملا.

- يىرىم غلبىر بوغداى بېرىلسىن بونگە، -دېدى خان.

- پادەوان دېب چقىردى، -ملا جلال.

- بونگە چارك غلبىر بوغداى، -دېدى ولى جان.

گۇركاووووو! -دېدى ملا جلال.

- ھوو، -دېدى قۇل قاووشتيرىب تورگن بىر كىشى بىردن اۋرنىدن سېچىپ توريب.

- بونگە يم يىرىم غلبىر بوغداى بېرىلسىن، -دېدى ولى جان.

آخردە كېپسنىچىلرگە يم كپە، ھاووج قىلىب، بوغداى ترقىگن بۇلدى ولى جان اودوم بۇيىچە. بوغداينى اۋلچشدىلر. ميداندە اۋممە^۱ قىلىب قۇيىلگن بوغداى يوز قاپدن آشەراق چىقدى. بىر يىرىم قاپدن سەھل كۇپراغى نق ھمراھ قول دەھقانگە تېگىشلى بۇلدى.

منە بو قاپلردن (ھمراھ قول اولوشى بۇلگن قاپلر) بىرتەسىنى سېن آبارە قال، - خودى سخاوت قىلگنگە اۋخشب، -دېدى ولى جان ھمراھ قولگە قرەب.

^۱ اۋممە: يىغىلگن، چاش، تۇپلنگن، اويىلگن.

- برماغىمنى بىر تەلەب، بىر گە قەدەب چىققندەى قىلىپ، بوغداى اېكسەم-و، اولوشىم بار-ياغى شو بىر يىرىم قاپ بوغداى بۇلسە انصافدن بۇلمس، -دېدى ھەمراھ قول بلندراق تاووشدە اۋكىنىپ-اۋكىنىپ آھ تارتدى. شو تاپدە، «اوزون يىللردن بېرى كېكىرتكىنگە چە كۈمىلىپ ياتگن قرضنى قچان تۇلەيسن آشنە! يا اېس و گمانىنگدە اېمىسى ھلى؟» -دېدى غضب ايلە قاوواق سالىپ تورگن ولىجان. اونغە چە ملا جلال اۋرتەگە توشىپ، دلالت قىلماقچى دەى بۇلىپ بىر نىمەلرنى گىپىرگن بۇلىپ دۇرىللەدى:

- ھى ھى! خاننى خفە قىلىش آدابدن بۇلمس ھەمراھ قول. بو ايشىنگى الله ياقىتىرمەيدى؛ بىتگە چاپر بۇلمە، اۋزىنگە يىخسى بۇلەدى. بىزىنىگ قىشلاغىمىزدە خانلرگە حرمت قىلمەگن آدمىنىگ كاسەسى آقرمەگن، شونى زىھار اېسدىن چىقىرمەسنگ بۇلگىنى -دېدى ملا جلال.

ھەمراھ قول شوندە اۋرنىدن تورىپ، اېتگىنى بىر سىلكىپ قاقىدى-دە؛ باشىگە، كېلىپ تورگن بلانىنگ آلدىنى آلماقچى بۇلدى شېكىللى؛ چاپانىنى قۇلتىقلىپ، مونگلى قىافەدە، بىر تىشلەم نانگە دىدەسى زار بۇلىپ تورگن بالە-چقەسى تامان يۇل آلدى. تاشىدل خالەنىنگ بو يىلگى دەھقانچىلىكدن امىدى كتە اېدى. ھەمراھ چال كۇزلىرى غىلقە ياش، يىلگ تۇش قىشلاققە يۇل آلدى. و آياق اوستىدە تورىپ، «تنگرىگە تاپشىردىم سېنى ولىجان. قىامت كونى مېنىنگ قۇلىم سېنىنگ ياقەنگدە! -دېگنچە سلەسىنى بىرگە اورىپ قرغەدى...

(اوشبو مشق درجەسىدە بىتىلگن حكاىە ۱۹۸۰- يىلى، مېمىنە شەھرىدە بىلگن تىلىمدە قلمگە آلىنگىدى. و شو خامەكى متن بىر آز ايشلاو بېرىپ، نىشر قىلىنماقەدە)

تهمت

تېمەت

انقلاب. بو قاره كون نينگ باشلنگىگە اېندى يېتى بىل بۇلىب اېدى. بىر تامانده شوروى - اوچماخ^۱، تاپىنىشگە^۲ قبله؛ ينه بىر تامانده جهاد آلنگهسى، آرتىده اميرىگه - عام پناه. انقلاب تانگىدن باشلب شوروىگه بارىب، اۇقىب كېلىش همان اوجىده. آرى اوبهسى قۇزىگندهى همەنينگ ايلىنجى ساويتلر مملكتىنى بىر بارىب كۇرىش. مىنگ-مىنگلب طلبلر سېلدهى شمال تامانگه قرەب شاشەياتگن كونلر. قوتمى، قوتسىزلىكمى، تصادفمى بو حكاىه نينگ راوي سى مېن هم طلبه لىك مقامىگە اېرىشدىم...

يورت ساغىنچىمى، خاملىكمى اوچ بىل اۇتىب، اۋىلمەى-نېتمەى مېن هم ايكى آى تعطىل بهانه، يۇل خرچىگە اقچەم بۇلمسە-ده، وطنگە اشىقىمىن. قى يېرگە بارەمن؟ نىمە يىب-ايچەمن نى اۋىلمەى، شىلېنگى بىلېنگ قىلىمىن-ده. هلى يۇلگە چىقمىسدىن واكزلده^۳ بىتەسى بىلن تەنىشىب قالدىم. او هم مېنگە اۋخشەگن محصل اېدى. آخترىب يورگن آدمىنى تاپگندهى كېلىب مېن بىلن قويوق احوال سۇرەدى. يانېده بىر اۋرتاغىم بار اېدى. بو وطنداش نينگ حقيقى اسمىنى بىلمەدىم.

^۱ اوچماخ: جنت، بهشت.

^۲ تاپىنماق: سىغىنماق، سجدە قىلماق، باش ابگماق.

^۳ واكزل: يۇلاوچىلر و ترانسپورتگە خدمت كورسەتىش اوچون مۇجللنگن بنا، بنالر مجموعى، ترمىنال.

اۋشندە بىر ايكىتەسى طوفان، دېب چقرىگندى. طوفان اۋرتاغىنى بلا، دېب چقرىردى. يۇلداشلىرىم نىنگ بىرى طوفان، بىرى بلا ابدى. تىرېن دە^۱ اۋتېرېب يۇل الدېك. تقىر-تقېر قىلىپ، قطارىمىز چېگرەگە يقىن شەرگە يېتىپ كېلدى. طوفان و بلا بىلن يۇلدە ابدان تەنىشدىك. اوياق بو ياقدن گپ-گورونگ قىلىپ كېلدىك. يۇل يورىپ، يۇل يورسك هم مۇل يورىپ، كېچقورون ساعت اۋنلردە شەر مېمانخانەلرىدن بىرىگە كېلىپ قۇنىم تاپدىك. جزىرمە قوياش تفتىدن شەر زۇرغە نفس اەلەياتگندەى گۇيا. هېرىلەگن شمالدن درك يۇق. قوشلرنىنگ چوغور-چوغورى هم تىنگن. كېچ اېسە-دە، هنوز تاوهدېك قىزىگن اسپالت بېرلر و بنالر دېوارلرىدن قوياش نىنگ قىزىمەسى كېتگىنچە يۇق. اطرافنى قارانغىلىك چولغب اەلەى-اەلەى دېگندە جادە-يو كۇچەلر چىراقلىرىدن تېورەككە ساجىلەيانگن يالقىنلر تون اۋرتوگىنى كۇككە اىترەياتگندەى توپىلردى. شو پىت تىنچ شەرەدە ادملرى جۇشقىن و امىدلى حىات قوچاغىدە تىن اەلەياتگندى. اَشخانە، كافىلر اچىق؛ سقلن سوولر، باغ و راغ گۇشەلرىدە ياش-يىگىت قىزلر قووناق موسىقەلر تىنگلشېب، بىر-بىرىگە تىلك تىلشېب، قدح كۇترىشماقدە ابدى. اولر شىرە كىف، مى سرخوشلىگىدن سېوېنچلرى اىچىگە سىغمەى، بىر-بىرلىرىگە قىناق قوچاق و تاتلى اۋپىچلر ھدىە قىلىشماقدە ابدى...

سىلەم^۲ قورىگىنېدن، نىمە دىمىقىب ياتەمنى، دېب مېمانخانەگە كىرىشگە يورەگىم بېتلەمەيدى. مىزغىب االىشگە مدارىم يۇق، هوا هم يىتمەياتىر ابدى. دىمىققن هوا ااستىدە اۋتگن-قېتىگنگە تېلمورىب اۋتېرە بېرىش هم جانگە تېگدى. بىر داشىم ساپ بۇلدى. اأرى مېمانخانە اىچكرىسىگە كىردىم. قۇشخانەچىدن اچقىچنى^۳ االىب، التىنچى قوۋەتگە كۇترىلدىم. بارە سالىب تختگە اۋزىمنى اأدىم.

^۱ تىرېن: رېل.

^۲ سىلەسى قوربىماق: كوچ-قوتى كېتماق، نھايىتدە چرچەماق، تىنكە-مدارى قامسلىك.

^۳ اچقىچ: كلىت.

آلدىم-و، پشەلەر رقصى باشلىدى. قازاندا قاوريلىگن بوغداي دېك پتيردەيمىن. چرچاقدن كۈزلىم اويقوگە ايلينيىدى اېكن. دېرەزە پردەسى نىنگ تىرقىشىدىن خانەگە سىزىب كىرەياتگن قوياش نورلىرى چككەمنى سىلب يارىتگندى بۇلدى. اېتىم جىمىرلب، سېسكەنىب اۋرنىمدن توردىم. يىخسى تۋىيب اويقو آلدىم دېب آيتەلمەيمىن. قرەسم وقت الله محل بۇلگن. كۈپرىكدن اۋتەلمەيمىن تىغىن، دىبە دراۋ نرسەلرىمنى يىغىشتىرىب، اىخچم گىنە بكسىمنى اېلكەمگە آسدىم-دە، هوا اىسىمىدن تېرەندىم. بۇساخە هتلب تشقىرگە چىقىشىم بىلن غير اېتىب مسافر تشىووچى سروپس هم كېلىب قالىدى. بىز ستودىنتلر (طلبەرلر) اۋرىندىقلرگە اۋتىرىب آلدىك، بىر آز اۋتىب سروپس قۇزغلىدى. بىزنى يىگىرمە بېش دىقەقەچە يۈل يورىب، باجخانه^۱ آلدىگە كېلتىرىب توشىردى. نوبتگە تورىب باجخانه تېكشىروويدن اۋتدىك. كۈپرىكنى كېچىب، بندرگاگە كېلىب توشدىك. دريا ياقەسىدە بنا اېتىلگن بو شەر باشقە بىر قىافەدە. اىكى خلق اۋرتەسىدەگى مدنى تفاوتلر يقال كۈزگە تشلەندى. قوم كۈچكىسى يۈلنى تۈسگنى باعث بىرار ساعتچە قالىشگە تۇغرى كېلدى بو پېردە. كون قىزىگندن قىزىماقدە اېدى. دريانىنگ سلقىن سوولرى ترەتەياتگن مەيىن بىل بىزگەچە بىتېب كېلەلمەى سرابگە اىلنىب كېتر، قوم تۋانلرى قويونلشر^۲، كتە-كتە يوك مۈترلرى نىنگ بوغروق توتونلرى يۈلنى كۈزدن اىلب قاچەدى. يولغون^۳ و سكساوول زار^۴ آرەلب، اېچكى اېمىلرنىنگ پشىللب چاپىب يوگورىشلىرى غلطى منظرە حاصل قىلگن. يۈل باسىب بارماقدەمىز، بىر يىم ساعت

^۱ باجخانه: گمرک، باج آلىنەدىگن جاى.

^۲ قوبون: قىتىق اوبورمەلى شمال، اوبورمە؛ شدتلى ياغىن، طوفان.

^۳ يولغون: گلى مەيدە، آقىش، مەيدە برگلى بوتە.

^۴ سكساوول: شۇرەزارلر عابىلەسىگە منسوب، مركزى آسيانىنگ شۇرەخاك و قوملى چۈللرىدە اۋسەدىگن، برگى

يىخسى رواجلىنمەگن بوتە ياكە درخت و اونىنگ يانىلغى صفتىدە ايشلتىلەدىگن ياغاچى.

دېگندە شەرگە يېتىب آلەمىز. شو دم هوا حرارتى ۵۵ درجەگە چىققن. شىمال نىنگ جانى اوزىلگودېك.

شاشقىن آمو دريا سۇلىم و آباد يورت بىلن جېنم اۋرتەسىدن آقىب اۋتەدى. دريانىنگ او تامانىدە آسايشتە حيات حكمران. بو ياغىدە اېسە جھالت، قوتقو، دھشت، اور-يىقىتلر بىداد سالەدى...

...تەكسى توتىب، يۇلگە چىقدىم. قرەسم آلدىنراقدە بايەگى كوتىلمەگن يۇلداشىم طوفان بىلن بلا تورىشىدى. اولر هم تەكسىگە قۇل بېردى، پولىگە چىنەلشدى، «بۇلدى راضى بۇلىنگ اكه!» دېيە ھىداوچى بىلن كېلىشىب او هم تەكسىگە مىندى. مېنى كۇرىب سلام قىلدى، احوال سۇرەشدىك. بىر يىرىم ساعىدە گوجوم^۲ كېوتىرل شېرىگە يېتىب كېلدىك. بىزنى ھوتلگە آلىب بار، دېيە تەكسىچىدن التماس قىلدىك. تەكسى بىر پىسە بىزنى منزلگە آلىب بارىب قۇيدى. ھوتل رختىگە چىققن محصللردن لىق تۇلە. خانەلردە اۋرىن يۇق، ھوتل نىنگ كتە سالونىگە كىرىب باردىم. سالون هم شوروى دن كېلگن تومناى طلبەلر-لە آغزىگە چە لىق تۇلە و تىقىلىنچ. طوفان هم اۋرتاغى بىلن اۋزىگە جاي تاپدى. ايلان نىنگ ياغىنى يەگندەى بلانىنگ اۋزىگىنەسى اېكن. درآو مېزبانگە آلىنىب قالىدى قۇيدى.

طوفان آزغىندن كېلگن قارە مغز يىگىت، كۇزلىرى توشلەدېك اۋىنب تورر، تېز-تېز چۇنتىگىدن سگرىت چىقىرىب ياندىرگىچ^۳ ايلە ياقر، تىنىمىسز بىلىب-يوگوردى - جرآر اېكن. ھوتلدەمن، نەفىمىنى راستلەماقچى بۇلىب، بىر چىتگە بارىب چۇكدىم. ايسىقدن راسە قارەتيرگە باتگنمن. ھلى تون كىرمەى كۇرگنلرىمدن بدترراق پشەلر رقصى باشلندى. يوز و باشىم، قۇل-آياغىم، نې كە آچىق جايىم بۇلسە، پشە تلاق بۇلدى. فراغىتىم بوزىلىب ھوتل ايوانىگە چىقدىم. سوو سېپىلگن اۋت-اۋنلر اوستىگە

^۱ قوتقو: قۇرقىتىش، قۇرقووو سالىش.

^۲ گوجوم: كۇپ، زىچ؛ آدم كۇپ بىغىلەدىگن جاي.

^۳ ياندىرگىچ: گوگرد، لايتىر.

پَتومنى^۱ يايىب، ناچار چۈزىلدىم. تشنە قالگنىمدن ياتەالمەي، قىتیب يەنە هوتلگە كىردىم. دھليز بورچكىدە قۇيىلگن كۈزەدن بىر جام موزدېك كىنە سوونى قويىب شىقە كۈتردىم. كۈتردىم-۹، كۈزىم تېلفون گۇشكىنى قولغايدە توتىپ، كىم بىلن دىر گېلشەياتگن طوفانگە توشدى. سوو اېلتىپ بېرەي مى دېسەم، يۇق، دېگن معنادە باشىنى سرەك-سرەك^۲ قىلدى.

قۇلىمدە «خيام رباعىلىرى» اېدى. يەنە بىر-ايكى اۋزىم ياقىتىرگن كىتابلردن اىلىپ اَلگنمىن. مېنىگ بو دىيادە تاپگنىم، بىرگىنە اىلىنچىم سۇز و شىرىت اېدى. قىگە بارسەم اوونچىم، اۋمىچىم شىر. شىر بىلن دردلىشەم، يوپنەم، او دردىمنى اَلدى. شىر اۋقىسەم ياكە يازسەم اىچىم بۇشب يىنگىل تارتەم. شىر بىلن اوخلىب، شىر بىلن اويقودن تورهەم. شىرگە كېلىپ-اق، يورهگىم كۈچىب تۇرت اېنلىك شىر يازىپ، اونى رۇزنامەگە اَببارىپ بېردىم، قىتیب يەنە هوتلگە كېلدىم.

كېچ بۇلىپ قالىدى. آسمان قارە پلاسىنى تۇشەدى. ازدهام، آدملىرىنىگ اۋتىب قىتىشى سىيرەكلشدى. مېن بو شىردە اۋزىمنى يالغىز حس قىلدىم. اوچرەشكى، سۇزلىشكىنى هېچ كىمسە يۇق. يورهگىم ترسە يارىلەيازىدى. يەنە بارىپ هوتل اىوانىدەگى اۋت-اۋلن اوستىدە ياتەبېردىم. بىر عمللب كونى تونگە اولب چىقىشىدن بۇلك علاجىم يۇق. شو پىت نېگەدىر، تۇيقىسەن خىالىم بوزىلدى. اىچىم قارانغولشىپ، غىشلندىم. نىمە قىلدىمنى بىلمەي، كۈزلىم اَلگ-جىلگ بۇلىپ، قىسى دىر قىرىنداشىمنى كوتەياتگندەي احوالگە توشدىم. مشربىنىگ: «غرىبلىك شىرىدە اۋلسەم مېنى يۇقلىر كىشىم بارمى؟» -دېگن غزلى اېسىمگە كېلدى. اۋزىمنى تابارە بختسىز، يار و دىارسىز حس قىلە باشلەيمىن. اۋزىم بىلن اۋزىم اىشىپ تورىيمىن. اۋشە كېز بو روحي جىنگىنىگ غالىبى مېن اېمىس اېدىم. بىر پىت كىمىدىر

^۱ پتو: قدىفە (قطىفە)، شال، يايىنچىق.

^۲ سرەك-سرەك: باشىنى قىمىرلىتىش.

قۇلىنى اېلگەمگە قۇيىپ: «سېن يالغىز اېمىسەن! كېل غىرىيىم! سېن ھەم شو يورت
 اۇغلانىسەن! غەم-غەصە يېمە، ھلى ياشسەن، بىر كۈن سېن ھەم بو اېل نىنگ دردېگە
 درمان بۇلەسەن. ايشانىب آيتەن كە، اېل نىنگ بىتمىس يەرلەرگە ملھەم قۇيەسەن بىر
 كۈن كېلىب. سېنىنگ اېچىنگە كتە بىر درد تۇلغەنماقەدە. بىر كۈن كېلىب سېنىنگ
 قلمىنگ تىلگە كىرەدى. اولكن اثرلر يازەسەن، اۋزىنگى توت جگرېم!» -دېگەندەى
 بۇلەيىدى خىيالىمدە. بو غايانە اۋوتىق سۇزلر مېنى تىنچلنتىرىش اۋرنىدە، تابارە
 روھىمنى كېمىرە كېتەدى. اۋز يورتىدە كىمەسەسىزلىكەن يامانى بۇلمەسە كېرەك.
 كۈزلرىمدە ياش قلقىب، يوزىم المەن بوروشكەندەى بۇلدى... بىر دردكش تاپسەم-و،
 اېچىمەدى بار گېيىمى تۇكىب سالىم دەيمەن. مېن اىزلەياتكەن دردكشلر پېرنىنگ
 آستىدە احتمال...

ھوتل ميدانچەسىدە اۋزىمگە جاي تاپكەنمگە شكر قىلەمەن. يانىمدن طوفان اۋتىب
 كېتىدى. مېنگە ايشى بارمىدى، ياكە شونچە كە كۈزدن كېچىردىمى بىلمەدەم،
 كىم نىنگ دىر كوتەياتكەندى چمەسى. تشقرىگە تېز-تېز كىرىپ چىقەدى. شو پىت
 بىر قارە چىپ غىزىللىب، مېن اۋتىرگەن جايگە كېلىپ تىققە تۇختەدى. بىردن قوراللى
 تۇرت آدم مېنى قورشاب آلىب، قۇلىمنى ارقەمگە باىلب، كۈزىمنى قارە باغىچ بىلەن
 محكم تارتىب باغلب، جىيگە تىقىشىدى. ھىچ نرسە سۇرەمەدىلر، مېن ھەم كېتەياتىب
 مىق اېتمەى حىرتلە بۇزرىب تۈرەبېردىم. بېش دىققەلىك وقت اېچىدە آسمان كېلىب
 بېرگە قىيىشىدى. چوققور اۋىگە تالدىم، مېندن نىمە عىب اۋتگىنگە عقلىم بىتمەدى.
 نې خطا قىلدىم كە بو كۈبلرگە توشدىم، دېگەن سۇراقنى اۋزىمگە بېرەبېردىم. جواب
 يۇق. مېنى كتە بىر سرايدە جايلىشكەن «خاد» -دېگەن بىر ادارەگە آلىب بارىشىدى.
 تون ساعەت اۋندىن اۋتگەن اېدى چمەسى. سراى ميدانىدە اۋرىندىقلر قۇيىلگەن، شو
 بېردە بىر نېچە حربى كىيىمەدىكى شىخصلر درسنگ^۱ قورىشىب گپ ساتىشەيىدى.

^۱ درسنگ: مجلس قورماق، آدملىرىنگ اۋز ارا چىقچىلىشىب اۋتىرىشى.

سۆزلری بادرهشیدن^۱ شیره کیفلری بارگه اؤخشهیدی. قۇلیم و کۆزلریمنی آچیب بیر زخ^۲، نئیققن قارانغی خانهگه سالیب، اوستیمدن قوفلشدی. ابرته تانگ آتگونچه شو خانهده توره بپردیم. اویقی بیلن عرضلشدیک. نیمه قیلسم هم کۆز قورغور یومولمهیدی. باشیمنی توتیب، اؤزیم بیلن اؤزیم گپلشیشگه انچهگینه فرصت تاپیلدی. خانهده مېندن آلدین هم کیم قنچه آدملر سۇراق قیلینگنیه دېوار، تام، اېشیک-تېشکلر تانیخ. قولاغیمگه غلطی چینقیریلر^۳ اېشیتیلگندهی بۇلهدیر اېدی. قنچه-قنچه آدملرنینگ آه و نالهسی اوی دېواریگه یاپیشیب قالگندهی نظریمده. نئیققن خانهدن شیبیتیر هیدی انقیب دماققه اوریلیب توریدی. ایلان-چیانگه مهمان بۇلدیم بو تون، قورت-قومورسقه لرگه^۴ ییم بۇلدیم شېکیلی دېمن اؤزیمگه. قارانغی خانهده بد بوی ایسلر شکنجهسیدن هنسیرهشگه توشدیم. خیالیمده مېنی کوته یاتگن مشئوم واقعلرنی کۆزدن بیر-بیر کپچیردیم. انه کېلدی، منه کېلدی سۇراقچیلر، دېب یورهک هاووچلب توریمن ایچیمده. «قیلمه گن عیبینگنی بۇنینگگه آل» - دېب هر قندهی قییناقلرگه سالیشلردن تارتیب، کلتکلشیر، اوروش جبهه لرگه یوباریشگه چه بۇلگن تقدیرنی مییه مده تصویرلب کۆردیم. هر کونی جنوبدن تینمه ی اۇلیک تَشیدیلر. نې-نې ییگیتلرنینگ عمری خزان بۇلماقده. باشیم قتیق آغریقدن گرس یاریله ی دېب توریدی. راسه تیتراق و هیجان باسگن، باشینگنی کوندهگه قۇیه یاتگن چاغده اۇلیمگه تیک باریش آسان ایش اېمس. کونیم بیتدی، دېدیم اؤزیمچه. «خاد» اؤز آتی بیلن خاد. اؤیله گنیم تۇغری بۇلیب چیقدی-یو! مېنی اوشلب تورگن جای «خاد» - ملی خوفسیزلیک» ادارهسی اېکن. بو نامنی اېشیتیش نینگ اؤزی بیر دهشت. بو اداره حقیده اېشیتگنلریمنی اېسله سم اؤپکم

^۱ بادره ماق: بۇرتیب، قپه ییب چیقماق؛ آشماق؛ کۇپه یماق؛ دووللب، تاشیب چیقماق.

^۲ زخ: سووی کۆپ، سېر نم، نملیک، زخکش جای.

^۳ چینقیریق: اینگیچکه و اؤتکیر آواز، قیچقیریق.

^۴ قومورسقه: میده چومالی؛ عموما، هر قندهی چومالی.

اۋپىرېلىب آغزىمگە كېلەدى. كېچەنى اوخلىمەي، تېشىنى تېشىگە قىسىپ، تانگ
 آندىردىم. كىچىكراق خانەنىنگ ايچىگە غىرە-شىرە كونگى ياروغلىك آرەلەي
 كېتىدى. سوراققە تارتىلىشىمنى كوتماقەدەن. بوتون وجودىمگە قلتىراق كىرگن.
 اضطراب زۇرىدن...

تشفريدن قندەي دىر غىدىر-بىدىر تاووشلر قولاغىمگە چلىندى و بىردن ابشىك
 آچىلدى. مېنى سۇراق قىلىشىگە آلىب بارىشىدى. شعبەگە كىرىشم بىلن كۇزىم
 «وجدان ابنگ عادل محكمه ابكن، قاضىگە احتىاج يۇق» -دېگن دېوارده آسىغلىق
 يازووگە كۇزىم توشدى. چمەسى ۲۸ ياشدەگى كىشى مېنگە دوسىيە آچىشىگە
 كىرىشىدى.

- قلم قىلپاقچەسىنى تېشلەياتگن كىشى مېنى سۇراققە توتدى و -آيتچى اسمىنگ
 نىمە؟ سۇنگرە او باشىنى قىمىرلەتىپ، غىمىر-غىمىر بىر نرسەلرنى يازىشىگە توتىندى.
 - آنىم ...، دېدىم.

- نېچە ياشدەسن؟

- مەنە شو بوگون ۲۸ ياشگە كىردىم.

- قى يېردە توغىلگنسن؟

- شو يورت فرزندىم.

- نىمە ايش قىلىپ يورىيسن بو ياقلردە؟

- محصلمن، باشقە ايشىم يۇق.

- قىسى جمهورىتدە اۇقىيسن؟

- اۇ...دە، دېدىم.

- آلتى آى آلدىن سېنى پشاوردە - پاكستاندە كۇرىشگن ابكن، تۇغرىمى؟

- قندەي قىب؟ بۇمەگن گپ، دېدىم.

- قىسى رشتەدە تحصيل قىلەسن؟

- ت. و ا.

- محصل بۇلسىڭ قنى پاسپورتىڭ، -دېدى مېڭگە دۇق قىلىپ؟

- قۇلىمدە اېمس، يۇق پاسپورتىم، -دېدىم پست گىنە تاووشدە.

- نىمە قىلدىڭ پاسپورتىڭنى؟ -دېپە جزاوه لندى.

- چۇزدىرىش اوچون مركز كابلگە اۇرتاقلرىمدن يوباردىم، -دېدىم.

- افت و بشرەنگ محصلگە اۇخشەمەيدى -كو! ساقالنى نېگە اۇستىردىڭ؟

- شاعر طبعيت آدملىر شونەدى يورىشىنى ياقتىرەدى.

- شاعرمى سن؟

- ھە، اۇزىمچە بىر نرسەلرنى يازىپ يورەمن.

كۇرستىڭىچ برماغىنى ايىه گىگە تىرەب توريب، مېڭگە بىر اۇقرەيدى سۇراقچى

يىگىت.

- اېندى حقيقتنى آيتەسن.

- بۇلەدى، آيتەمن حقيقتى، -دېدىم.

- مجاھدىمى سن؟

- يۇغ اېى.

- پاكستانلىكمى سن؟ -دېب جھل بىلن سگريتىنى يوزومگە پوركەدى.

- يۇق، مېن اوغانستانلىكمى، -دېدىم سۇراقچى يىگىتگە.

- آيغاقچى¹ اېمس مى سن؟! -قاشلرىنى چىمىرگنچە اۋرنىدن توردى و

بىلكلرىنى شىمرە كېتدى.

- بو نغمەلرىڭ اۋتمەيدى... -سۇكىندى و غضب اھنگىدن موشتىنى مېزگە

اورىب، دۇنغىللەدى.

- عىبىم يۇق، -دېدىم رنگىم بۇزدەدى اقرىب.

¹ آيغاقچى: جاسوس، مخفي اجيت.

- توره تور، حاضر سېنى سرەيتەمىز^۱، -مېنگە يقين كېلدى-دە، برماغىنى بىزگىز قىلىپ چككەمگە تىرەدى و سېيرەك كىنە ساقالىمدن اوشلب دېوارگە گوپىللىتىپ اورە كېتدى. تىرسگىنى كۇكسىمگە قۇيىپ تورىب نىقتە^۲ باشلەدى، -تېلىنگ چىققن دىر اېندى، -دېدى مستنطق.

- تنگريگە آنت ايچىپ آيتەمن كە مېن آيغاقچى اېمىمىن، پاكستانلىك ھم اېمىمىن، مجاھد ھم، -دېدىم اونگە.

اونىنگ تىلىدن «اېندى قولاغىنگ تويىدن درىچە آچەمن» دېگن گپ چىقەياتگنگە اۇخشىب توريىدى. جودە رحم قىلسە اوروش جېھەسىگە يوبارەدى.

بونى آلىب كېت ايندى -دېب ساقچىگە قىچقىردى. «خۇب بۇلەدى» -دېيە ترق سلام قىلگن ساقچى مېنى قۇلتىقلىب اولگى جايىمگە اېلتىپ قۇيدى. قۇشنى خانەلردن وحشتلى اوازلىر اېشىتېلىپ توريىدى. گرس-گورس، ترس-تورسلر آرەسىدن نالىش، ايغره نىش، اينگرەش^۳ و داد-وايلر اېشىتېلماق دەپ. مېنىنگ ھم شونەدى احوالگە توشمىسلىگىمگە ھىچ قندەى كفالت يۇق. قالەبېردىم شو يېردە، مېنگە نوبت يېتمەدى شېكىللى.

ايگنچى و اوچىنچى كونى ھم سۇراق قىلىندىم. ھلى اشدى قىيناقلر باشلنگىنى يۇق. اولر كوتگن حقيقتنى اولر ايستەگن دەى بىچىپ آيتىپ بېرەلمەدىم. بو آرەدە ايگى كون تنفس-دم آلىش كونى كېلىپ قالدى. ھمەلرى اوى-اويلرىگە كېتىپ قالىشىدى. بېش كوننى اضطراب بىلن باشىمدن كېچىردىم. دوشنبە كونى اېدى. بو يېردە قنچە قالرىمنى بىلمەيمىن. ايگى ايش بۇلىشىنى انىق سېزىپ توريىمىن. يا آلىب بارىپ آتېشەدى ياكە اوروشگىنى جنوبگە يوبارىشەدى. «خادامات» دەگىلر ايشگە كېلىشىدى. بو ياغىگە تېلىم سۇزگە بارمىسە كېرەك، دېماق دەمن اۇزىمگە اۇزىم.

^۱ سرەيتىرماق: سرەلەماق، معلوم قىلماق، تىلەماق، بىخىشى-يامانىنى اجرەتماق.

^۲ نىقتەماق: قۇل ياكە آياق اوچى بىلن تورتماق، تىغىزلب جايەلەماق، مشتلب تىقماق.

^۳ اينگرەماق: آغرىق-الم تآئىرىدە مونگىلى، انگرارق تاووش چىقماق.

مېنى ميدانگە آلىب چىقىدىلار. كۈزىم آق كۈپلۈكلۈرگە توشىدى. تايىم قاچىگىدىن، دوكتور چىقىرىشكن شېكىللى، مېنى دوالسەلر كېرەك، دېگن اۋىگە باردىم. بىر آق كۈپلۈكلۈ مېندىن «بىلگىنگىنى آچ قنى» -دېدى. بىلگىمنى شىمىرىب اېگىمنى توردىم. اىگىنەنى تامىرىمگە تىقىب، بىر لېترچە قانىمنى آلىشىدى. رحم و شفقتى كېلىبمى، دۈرە سالىب اۋتىرىشكن خادچىلار يانيدە صۇفەگە اۋتىرغىزىشىدى. اۋتىرىشكنلر مېنگە پىچىنگ، كېسەتىقلر قىلىشىب ايلماقلى گېلردن آتەپىدىلر. شو آرەدە پۇستەچى رۇزنامەنىنگ يىنگى سانيدىن بىر نېچتەنى تشلب كېتىدى. رۇزنامەنىنگ ايلك صفحەسىدە «بىر قىغولى خىر!» -دېگن سرلوحەگە كۈزىم توشىدى. قرەسم خىر آستيدە تىنىش آدمىنىنگ عكسى باسىلگن. «اۋرتاق طوفان بې وقت عالمدىن اۋتدى» جملەسى اعتبارىمى اۋزىگە قرەتدى. قىزىق سىنىب اۋقىماقچى بۇلدىم. مېن بىلن ھىمسفر كېلگن طوفان-كو بو عكس دېدىم اىچىمدە. قۇرقوو باسگىدىن ساووق تېر اېتىمدىن جىمىرلې چىقە بېردى. ايش پەچەوۋە بۇلدى، دېدىم يورەگىمدە. بونى ھىم مېنگە تۈنكەشسە-يە، دېگن اۋى مېھمدىن كېچىدى. بو خىر، اوچىنى اوچىگە كېلتىرەياتگن نرسە اېمس مېنىنگچە.

قان يۇقاتگىمدىن سىلەم قورىب، يىقىلەي-يىقىلەي، دېب قلقىب كېتەيىمىن. اولر ھىم رۇزنامەنى آلىشىب اۋقىركنلر، اۋز ارا پىس-پىسلىشكە توشىشىدى. تامدە جىملىك حۇكم سوردى. اېندى قباقلردىن آقىب توشەياتگن غضب مېنگە يۇنلمس اېدى. كۈزىم رۇزنامەنىنگ ايكىنچى صفحەسىگە تېگدى. نې تىل بىلن آيتەي كە مېنىنگ، عىنا اۋزىمىنىنگ عكسىم، عكس آستيدە يقىندەگىنە يازگن بيتە شىرىم باسىلگن رۇزنامەدە. قرشىمدە شوم تقدىر، تېپەمدە اۋلىم ساىھ سالىب تورگن بىر كېزدە شوندىەى واقىنەنى كۈرەمىن، دېب سىرە اۋىلمەگندىم. قۇرقوو و قووانچ ارەلش حىسلر تىنىمى چولغىب آلدى. بې اختيار:

¹ تۈنكەماق: كىمسەگە اغدرماق، كىمسەدىن كۇرماق، عىيلەماق.

خادچىلەرگە: «تاپدېم، منە پاسپورتىم!» - دېدېم. جرئىتىم قۇزىب، شاشە-پېشە رۇزنامەنى توتقۇردىم اولرگە.

قۇلىمدىن رۇزنامەنى يولىب آلرکن بو سېنىمى؟ - دېيە جىلمەيدى سۇراقچىلردىن بېتەسى.

- ھە! مېن دېدېم. مېن ھەم شو وطن نىنگ بىر درېدر اۋغلى من. يورتدە كېچە ياتگن قان تۇكىشلر، شۇرلىك اۋلىم مېنىنگ ھەم ايچىمدىن اۋتەدى. بىرگىنە اۋتەدى اېمس، روحىم ققشب آغرىيدى. ھەر بىر اۋق اول مېنگە قرەتە اۋتەلەدى، تىغىن باشقەلرنى اۋلدېرەدى. مېن بو ياووزلىكلر يرە-داغىنى سۇز بىلن يوويب تازەلەى دېيىم. خلقىم نىنگ يوزىدەگى امىدسىزلىك، شۇرلىك، قارە داغلىرى شو سۇز بىلن اۋرتەيىن دېيىم.

مېنگە معنادار قرەشلر بۇلدى. كوتىلمەگن بىر وضعىت وجودگە كېلدى.

- عذر توشونماوچىلىك بۇپدى رفىق، - دېدى مېنگە بايەگى سۇراقچىلردىن بىرى.

اۋقىب كۇردىك شعرىنگىزنى، سىزدە فقرالىك پاسپورتى اېمس، درد و انسانى لىك حجتى بار اېكن، دېدى خوش بېچىم گىنە^۱ بىر كىشى.

- مېلى شۇرلىك پېشانە حىات اېكن... دېدى مېن اولرگە.

- رفىق طوفان نىنگ اشتباھ راپورى يوزەسىدىن سىزنى اوشلەدىك. آغىر-پىنگىل معاملە قىلگن بۇلسك عذر سۇرىيەيمىز، كېچىرىنگ دۇستىم، - دېدى اۋشە سۇراقچى بىگىت.

- پاسپورتىنگىز كېلگونچە منە بو حجت بىلن سىز بې ملال شېھردە يشب يورىشگە حقىلى سىز شاعر دۇستىم، - دېدى خادچىلردىن بىرى.

توشكونلىك ياقەمدىن اوشلەگندە، مېنى سىلەگن اۋشە يوپەتتىق تاووشى بې اختيار اېسىمگە توشدى. اونى يۇقاتگنىمدىن ايچىم خۇقتان^۱ اېزىلەدىر اېدى. ساغىنەمن

^۱ خوش بېچىم: بۇيى-بىستى كېلىشگن، قدى-قامتى چىرايلى.

اۋشە صدانى. «خاد» قىيىناقخانەسىدىن چىقەياتىب، اۋشە ساغىنچلى تاووش: «منە مېن!» -دېيە ايچىمدن ندا قىلدى. شوندىن سۇنگ اېتىمگە قان يۈگۈرىب، جانىمگە جان قۇشىلدى. او يىنە بىر بار: «بىر كۈن كېلىب چاوينگ ترەلگەى، سېنى ھم كىم دىر اېسلر، كىملىرى يازگنلىرىنگى اۇقىر، كىم دىر بو اېزگىن قلم بىزدەگى بۇشلىقنى تۇلدىرىشگە اىنتىلگن دىر و كېلگوسى اولاد تارىخ حافظەسىنى اچىب كۇرر و سېنى تاپر» -دېيە دلدە ۲ بېردى و سىنىق روھىمنى كۇتردى.

مېنى اۋشە جىبىگە سالىب، يىنە قىتىب ھوتلگە اَلِب كېلىب قۇيىشىدى. ھوتل محصللردن لىققە تۇلە اېدى. بولر آرەسىدە اىغاقچىلر يۇق، دېب بۇلمەيدى. جاسوسلر يىنە كىملىرى دىر جىغىللىتىب، «خاد»گە توتىب بېردى اېكن، بىزگە قارانغى. ھوتلدە ھمە بار، بىر اۋشە طوفان و بلادن درك يۇق اېدى.

۲۰۱۲/۹/۱۶

توراننو، كانادا

^۱ خۇقتان: غش، خفە.

^۲ دلدە: روھنى كۇترووچى، كوچ-غىرت، مردلىك، دەدىللىك بخش اېتووچى معنوي ياردم، حمايه، اېلىق سۇز و شو كېلىر.

کتھ کمدن نری
قازی نینگ باغی،
قوشیق
میمنه جان

كتە كمدن نرى قاضى نىنگ باغى،

قۇشيق

مىمنە جان

(بېرىنچى قىسىم)

ياشى آلتىمىشدىن اۋتگن حكايمىز تىرىك قهرمانى دىنانىنگ بىر چېككەسىدە حىيات كېچىرىپ كېلماقده. او دىنانى آيچىلب^۱ بارىب قالگنمى بىر ياققە ياكە دىنا اونى آرتماقلىق^۲، آخرى «منە شو بېردە يشەيسن اېندى» -دېگنمى بىلمەدېم. يا اونىسى يا بونىسى. او اېللىك يىللىك قىيىناق-حىيات واقعهلرى نىنگ تىرىك تانىغى بۇلگن، اىچىدە دردى كۇپ. اونگە قلمنى توتقەزىب، يقىن كېچمىشدىن سۇزلاوۋچى حكايمىنى يازىب، گىپىرىب بېرىشنى سۇرەيمىن. راوي اۋز حكايمىسىگە منە بونداق فضا و مكان يره تە باشلەيدى:

^۱ اىچلەماق: اىچماق، كۇترماق، توتىب تورماق؛ يىتكەلماق، قۇلب-قوتلەماق؛ تىشده تىشلىب، آرقەدە اىچىلب كۇز قارەچىغىدە سىقلىب، ارداقلب.

^۲ آرتماقلىق: آرقەسىگە اىلب كۇترماق؛ يىلكەسىگە آرتىب آلماق.

«قىشلاق دوكانلرى نىنگ بىرىدە، ساىە-سلىقن ارىق بۇيىدە، بىرنە آستىدە اۇرتاقلر درسنگ قىلىشىب، اختلاطگە غرق ابدىلر. بىگىتلىك شۇخلىكلرى بۇلسە كېرەك بېغبار قهقە آتىب كولىشلىرى تانگدە آچىلگن چمن-چمن گۇلى اېسگە سالەدى. بادراق دەى-بادراق دەى^۱ كولگىلر مزەلى ابدى. اولر سترنجى گىلم اوستىدە قور^۲ تۇپلنىشىب قرته اۋىنشە ياتگندى. تۇشك نىنگ بىر چىتىدە «بېش يوز اۋتىز» آتلىق جاپانچە تاپىنى^۳ بلند تاووشدە سننە ماقدە ابدى. زنگ، تال و دنبورەگە اويغون: «مىمنە جان»، «گلە باغ»، «مەكىلى»، «بايجۇرە» و باشقە خلق تېرمە قۇشقىلرى اۋچىدە يىنگرەپىدى. جۇرەلردن بىرى تايپ نىنگ موربىتىنى باسىب، كسىت االمىتىرەدى. حمىد قۇشقىچى، اېشان رمضان، حىدر... كى قۇشقىچىلر نىنگ قىتان (فېتە) لرى بىرىن-كېتىن يىغىندە جىرەنگ ساچەپىدى. بىگىتلرگە، اىچكرى اويدن پتىنىسگە سالىنگن قرمزى چاينكلر چاىى آریمەپىدى. چىنى بوشقابلردەگى نخودلى قارە مەبىز مەنە مېن من دېدى. قۇشقىلر آرەسىدە «مىمنە جان» آتى كۇپ اېشىتىلەدى. هر گل شو نامنى اېشىتىسم نېگە دىر قولاغىم قىزىب كېتەدى. اىچىمدە مىمنەگە نسبتاً اۋزگە چە مەر اويغانگن. نىمەگە قۇشقىلردە مىمنە آتى كۇپ كېلەدى سىنى بىلمەمىن تۇغرىسى. اۋشە قۇشقىلردن ايرىملرى اېسىمدە قالگن:

مىمنە جان تاغ اېكن،

تېگرەگى باغ اېكن.

...

كتە كمدن نرى قاضى نىنگ باغى

ابلىك بىل آلدىنگى اۋىلر بىمىن بىر قىمىنى آيتەيىن:

^۱ بادراق: پىلە چۇخارى (جوگارى); پاپكون; قىزدىرىلگن قومدە ياكە برقى اسابده قاوورىلگن و آپپاق پختەدېك بۇلىب بادربەب آچىلگن چۇخارى.

^۲ قور: دايرە، دۆرە.

^۳ جاپانچە تاپىنى: جاپانده ايشلب چىقىرىلگن نرسەلردن بىرى; جاپانى رادىو يا تايپ (تىپ); ۵۳۰ مودللى تايپ.

كتە كمدە جودە كۇپ موتترلر آغەنب، آدملىر اۇلر، مشئوم حادثەلر يوزبېرر، شونىنگ اوچون كتە كم جودە مشهور اېدى. «قاضى نىنگ باغى»، «دُرە نىنگ داغى» نىمە دېگنى اېكن؟ -دېب راسە اۋىلردىم... بالەلىك-دە؛ نىمە بو، مېمنە گە بارگنى قاضى دُرە بىلن سۆبە اېلكەسىنى مامە تلاق قىلەدىمى؟، دېردىم اۋزىمچە. بو جومباق ذھنىم آرتىدە قالىب كېلدى. اولغەيگندىن سۇنگ بو قۇشقىلر تەگىدە اولكن فاجەلر ياتگىنىنى انگلب يېتدىم. باشقە شەھەرلرنى كۇرمەگنمىن بوندىن سەھل كم اېللىك يىل آلدىن. «مېمنە جان» -دېگن ات اېچىمگە آلاو سالدى. مېمنە اېسىمگە توشگن چاغ قوش كىبى درآو اوچىب كېتىم كېلدى... راسە قىزىقىدىم، قىنداق جاي اېكن؟ آدملىرى قىنداق اېكن؟ بىر كۇرسىم يانصيب، دېگن نىتىنى كۇنگىلىمگە توگىب قۇيدىم.

۲

شېرىن تگاب. قىرق ايكى يىل بورون اۋن يېتتى-اۋن سىكىز ياشلردە اېدىم. انقلاب. قارە طوفان نىنگ تخمىن دستلىكى ايلرى اېدى. سرسان-سرگردانلىك باشلنگن - بختى قرا كونلر. معلم، مأمور، مکتب اۋقىنگلر اۋز كېنتى، اۋز قىشلاغىدە سىغمەى قالدى آخرى. ھمە ياقنى اشرار/مجاھد باسماچىلر اېگىللىشىدى، قاچە-قاچ بۇلدى. مونى قرەنگ، تقدىر مېنى مېمنە جانگە يېتىكلىسە بارمى؟

...كوز اېدى، داو-دراختلر اېندى سرغەيىب، يىراقلىرى يالەلرېدن چىرت-چىرت اوزىلىب يېرگە توشەياتگندى. خودى عزاگە كىرگن كىبى تېورەك جىم-جىت، قويوق مونگ چولغىب تورىدى. آدملىرى گىنگسىب، قۇرقىنچلى قوتقو بوتون اولوسدارلىكىنى قىغوگە باتىرگن. آه! شو يېرگە كېلگندە گىپىرەى دېسەم كۇزلىمگە ياش قلقىدى. تىلىم موزلب، يورەگىم آرقەگە تارتىب كېتەدى. بختىم يارلەقەگن اېكن، جان ھاوۋچلب بىر كتە يوك مۇترىگە اۋزىمنى آتدىم. شو يېردىن اۋلمەى قوتىلىب قالگىنىمگە شكرلر قىلدىم. لارى مۇتر قىمىرلەدى. گۇرزاد كىمىدن ھم آشدىك. يوكى آغىر لارى مۇتر نەسى اوزىلگندەى اىغرەنە-اىغرەنە توپراق چىنگىتىب يۇل باسەدى.

قرە شىخى، جمعه بازاردن ھم اۋتدىك. كىچىك كىم، كتە كمدن ھم امان-اېسان
 آشيب، چنگلرگە باتيب بۇلسە ھم مۇتر مېمنە جان سىرى اۋردم^۱ بۇلدى. اۇنقىر-
 چۇنقىر^۲ يۇللر كېچيب، سايلر آرەلب، مېمنە جان نىنگ بىر قوراغىگە يېتىب كېلدىك.
 قرەسم اۋنگ-سۇل و آرت تامانىم يوكسك قير-آدير، پست-بلند قوروق دەيمە
 تېپەلىكلر. قرشىمدە ابادانچىلىك، يم-يشىل باغ-راغلر ياستنە كېتگن. مېمنەنىنگ
 اېتىگىدن كۈكلمدە شاشقىن دريا، قىش، ياز و كوزلردە اېسە شىتى سۇنىق بىر
 تېگىرماندن كىم-كۈپ سوو آقىب اۋتەدى اېكن. شېرنىنگ قاق اۋرتەسىدە جايلىشگن
 نارنچ رنك كۈركىم سىفالموك سىنماسى صلابت تۈكيب، كۈزگە يىقال تىشلەدى.
 قىزغىن حيات نىسى بىزگە چە اوف اوريب تورەدى...

۳

چېككە قىشلاق آلدیدە لارى مۇتر گور-گورلر، بوزىلگىنگە اۋخىش تۇختب قالدى.
 اۋرنىمدن توريب اۋنگ-سۇل، توبىنگە سېكىن تىكىلب مۇرەلەدیم. بىر-بىرىگە
 توتش بىر قېت كېتگن پخسە حاولى لر. يالانچاچلىق بارەيازگن توت، انار، بېھى،
 تال، تېرەك، غوجوم^۳ درختلىرى آرەسى سۇنگى خانداندىن كۈككە اۋرلەياتگن
 توتونلر كۈزگە ايلىنب توريپىدى. سلەلى، قرە قۇل دۇپىلى، باش يىلنگ كىشلر اۋز
 ايشلىرى بىلن اندرمان، اويلرگە كىرىب-چىقىب يوريپىدى. نې كۈز بىلن كۈرەى كە
 بىر دروازەنىنگ بېتىدە قۇرقىنچلى قندەى دىر عكس آسىغلىق اېدى. يورەگىم شوو
 اېتىب كېتىدى. اوغانچە اق كۈپلىك ايشتان كىيگن اوزون قارە ساقاللى آدم صورتى.
 پىخس^۴ سالىب قرەسم آستىدە فارسچە قىلىب «امىرى... انجنير فلانچى»، دېب
 يازىلگىندى. آرغىن، كېسىمى كىچىكدىن كېلگن، اۋرتە بۇيلىك، كۈزلى كىرتە يىگن،

^۱ اۋردم: مايللىك، يۈنەلىش، نىشايلىك.

^۲ اۇنقىر-چۇنقىر: يوزەسىنى چوقورلىكلر و دۇنگلىكلر قاپلەگن؛ بلند-پست، ناتېكىس، اۋيدىم-چوقور.

^۳ غوجوم: غوج، تۇپ، تۇدە، غاۋ.

^۴ پىخس: دقت، جدى توجه، دقتلى قرەماق.

قىرە بورون تىنقىلى مجاهد رهبر. قندهى قىليب بونقه يات آدم بو اهل آرهسىده كۇكرىب قالدى اېكن؟ دېبه اۋزىمگه اۋزىم سۇراق بېرەمن. شولرئىنگ دستىدن قاچىب كېلگندىك. مېمنه جان ده هم آمان يۇق شېكىللى، دېىمن ايچىمدە. تەغىن باقسىم، دەيدى اۋقردن حولى دروازەلرى اىلمە-تېشىك، ايكى ياكە اوچتە آتيلگن ايت جسدىگه كۈزىم توشدى. اووو نرىدە اۋقغه توتيلگن بىر ايت گۈشتىنى اۋلكسەخۇر^۱ كلخت^۲ و قوزغونلر^۳ چۇقىب-چۇقىب يېر، او يېر-بو يېرىنى تېبمىردەى پنجهلرىدە توتىب يولىشەيىدى. قاره قوزغونلرئىنگ بىر سورىگى آسمانده پىدا بۇلىب قالدى. كۇكده گىر ايلنىشلىرى قۇرقىنچلى اېدى. هر نې مېمنه اوزره يايلىب اوچىب كېتىشىدى. بىر كون بو قاره قوزغونلر مېمنەنىنگ باشىگە يېتەدى، دېدىم ايچىمدە. بىر چقىرمچە يورىب دريا كۇپرىگىگە يېتىب كېلدىك. كۇپرىكنى هم كېچدىك. كىم دېر شاشىلگنچە: «بۇلىلر پېشىن نمازى بۇلدى، قضا بۇمەسىن ينه!» -دېبه اۋدەغەيلەدى. يۇلاوچىلر مۇتردن توشىب، چاپانلرى چنگىنى قاقدى، سلەلرئىنى يېچىب يېنگلرىگە تپ-تپ اورىب، توپراقلرئى توشىردىلر. اۋتېز چاغلىق آدم درياگە قرەب اېندى. طهەارت آلگنى كىرىشىدى... جماعت قىلىشمسدىن هر كىم يكە-يكە پېشىن نمازىنى اۋقىب آلدى.

۴

قرەسم اۋنگ تامانده تىاغىگە سوبىنگنراق بىر كىشى تورىيدى. تېگرەسىنى اۋن چاغلىق ايت اۋرەب آلگن. اېگىنىدە ملە چاپان، بوغداى رنگ تۇلەراقدن كېلگن كىشى اېدى. آق ساقال، دۇمەلاق يوزلى، بورنى كتەراق، قاشلرى اۋسوق، بۇز سلەسى باسىب اۋرەلگندى. مۇترده گىلر كۇرستگىچ برماقلرى ايله «اووو انه جۇره ملنگ» دېيىشىدى.

^۱ اۋلكسەخۇر: اولگن جانوارلرئى بېيىدىگن، اولىمتىك بىلن اوقتلىنەدىگن.

^۲ كلخت: قرچىغەى سىمانلر عايلهسىگە منسوب كتە بىرتقىچ قوش: سار.

^۳ قوزغون: قرغەسىمانلر عايلهسىگە منسوب، هر قندهى نرسەنى هم بىبەوېرەدىگن، اولىمتىكخۇر اۋتراق قوش.

- كيم او جۇرە ملنگ؟ - سۇرەدېم يانېمدەگى تېرى جلاب ھاشم ابەدن. اوندن
 آلدېنراق جنگلەدەگى ھمراھ ابە:
 - فقير، ھېچ كيم مېنن ايشى ياغ، خدانى سېوگن بېر بىندەسى -دېب قۇيدى.
 قىزىقىشىم آرتىب:
 - عجب! جۇرە ملنگ تېورەگىدە مونچە تومنا ت كوچوكلر، ايتلر نېمە قىلىشەدى؟ -
 دېب حيرت-لە سۇرەدېم.
 - مېھمان مى سن بالە كى؟ -دېدى ھاشم ابە. و ھزىللىشىب: «سادە غوجىلە خۇر اوكم
 ابى!» -دېبە اېلكەمگە قۇل اوچى بېلن تېگىب، شېرىن گىنە جىلمە يىب قىيدى.
 - مېمىنەگە قالەسن مى ياكە قىتەسن مى، -دېدى باشقە بېراوى.
 - بېلمە يىمىن، -دېدېم.
 - ھلى مېمىنەگە قاسنگ بېلەبېرەسن، -دېدى سفرداشلردن پۇستىنچى تورسون ابە.
 - مېمىنە خلقى يىخشى آدملە. انقلاب بۇلدى. خفە بۇمەگىن كۇپنى باشىگە كېگن
 سودا، ھمە باشىگە تىاق يېگىندەى گرەنگىسىب، نېمە قىلېرىنى بېلمەيدى، -دېدى
 اېنەغەنېن گىنە.
 اوى-جايدىن، آتە-آنەسىدن، اىنىقسە، قىشلاغىدن، كۇچەسىدن، صنفداشلىرىدن و
 تېنگقورلىرىدن ايرىلگن بېر جبر كۇرگن بالەگە قىين كېچركن. مسافرچىلىك
 نېمەلىگىنى بېلمە يىمىن. اولاقىب چىققن بالەمن اۇشە پىتلىرى. كۇزلىمگە اضطراب
 چۇككن، بلېرىمدن كولگى قاچگن، يوزلىمگە مونگ و قارانغى كېلەجك
 ايزغىش سېمان^۱ تۇرىنى يايىب تشلەگن. نا ائىق كېلەجك خودى آلتىمىش ياشلى آدم
 غم و غصەسىنى اېلكەمگە يوكلەگندەى. اۇشە قىرس-قورس، گرس-گورس تونگى
 آتىمشلەر تاووشىدن قولاقلىرىم ناتىنچ، ملايم تاووشلرگە زارمن.
 مۇتريمىز رۇزى باى سرايىگە كېلىب غېرە تۇختەدى.

^۱ ايزغىش: اۇت نېنگ تورى، باشقە اۇتلرگە قۇشېلىب بېمار قىلوچى اۇت.
 ايزغىش سېمان: آفتگە اۇخشېب.

میمنه جان

(ایکینچی قسم)

مىمنە جان

(ايكىنچى قىسىم)

انقلاب! مىمنە! مىنگ تۇقىز يېتمىش تۇقىزىنچى يىل. كتە قارە طوفان نىنگ تانگى، سرسان-سرگردانلىك باشلىنگن كونلر ابدى. مىمنەدەمن، رۇزى باى سرايىدە عزت الله نىنگ ياتاغيده قۇنىم تاپگنمن. مېنى كىم بو يېرگە باشلې كېلگىنىنى اېسلەي آلەمەيمن. توننى كونگە اولب سېمىز قىغولرگە قارىلىب يشەيمىز ايش قىلىب. بو سرايىدە عزت الله آتلىق بىر عزيز انسان نىنگ اۋتاغى جايلىشگن. ايكىنچى قوۋەتگە چىقىب باردىم. اۋزبېكچىلىك اىپلرى مېنى شو منزلگە يېتكەلگن اېسە عجبمىس. عزت الله كىملىگىنى بىلمەيمن. آتىنى اېشىتمەگنمن، كۇرمەگنمن. شو كىشى نىنگ اۋتاغىدەمىز. بىر پىت عزت الله كىرىب كېلدى. باشىگە سىرىق قارە كۇل دۇپى قۇندىرگن، بۇيى بلند، آزغىندىن كېلگن، كولىبگىنە تورگن يىگىت، اۋتە صىمىي، بىر بىر بوتون، يورەگى كېنگ بىر انسان اېكن عزت الله دېگنى. مېندىن تشقىرى تىغىن تقدىرداش چقىرىلمەگن اوچ-تۇرت مېھمان ھم بار بو اۋتاقده. عزت الله بىز بىلن قويوق سالاملىشىدى، اۋزىگە يىقىن توتىب يوپىتىدى. «كۇپ نىنگ باشىگە كېلگن سودا» -دېب يورەگىمىزنى كۇتتىدى، دردىمىزنى آلدى. ھزل-ھوزول، يىغى-كولگى قىلىب چىچقلىشىدىك. «توشلىك قىلىش كېرەك بالەلر» -دېدى عزت الله. دسترخوان

يازىلدى، توشلىك قىلدىك. چاى-پاى اىچىلدى. عزت الله قۇلدىن كېلگن ياردىمىنى ايه مسدن بىزنى قناتىگە آلدى.

وقتىمىزنىڭ طعمى اچىق. قوباش نورىنى بىزدىن قىزغىنە ياتگىدى گۇيا، ھوانىڭ ھم تاتى قالمەگن. جانسىزگىنە شىمال اېسىب تورىدى. اويقۇمىز ھم بىزدىن نرى قاچگن. كۇنلرى سىقىب، يىلىب-يۇگۇرىب، تۇنلرى اېسە رۇزى باى سىرايىدە شو قدرلى انسان نىڭ اۇتاغىدە اوخلىب چىقەمىز. قىستىمىز ھوادە معلق، كېلەجگىمىز اېسە قارانغى...

اېرتەلب بۇلدى، يەنە دېرەزە آرتىدىن شىھەر كۇچەلرى، يان-اطرافگە تىكىلەمن. حىيات اۇز مرامىدە دوام اېتەيپىدى. بىر مېن آرتقىچەلىك قىلىپ تورگىندەنى من نظرىمدە. يوز و قۇلنى يۇويپ اۇتاق نىڭ بىر چىتىدە نىمە قىلرىمنى بىلمەى مۇشەيىب اۇتېرەبېردىم. اىچىم سىقىلىپ، شو سىرايدىن اونچەلىك اوزاق بۇلمەگن دريا بۇيىگە يۇل آلدىم. بەھار فصلىدە تۇلىپ آقەياتكن دريادە تۇيىققە^۱ ھم كېلرەپك سوو يۇق اېدى اۇشنىدە. دريانىڭ سەھل چوققۇراق، اۇت، قىمىش باسگن جايلىرى - يىشىل تۇرلر آستىدىن قورباقەلر قورىللىشىپ، يان تېورەككە سېس ترەتەيپىدى. برماقدەى-برماقدەى بلىقلر سوودە تاوونگىنچە سوزەدىر اېدى. بىر پىت كۇزلرىم اۇلىك بىر بلىققە توشدى. سىرتى توبن، چلقانچەسىگە جانسىز سوودە بلىقىب ياتىدى جانوار. يانگىنەسىدە قناتلرى سىنىق، بىقىن^۲، اوستى-يو كۇكىسى اىلمە-تېشىك بىر آنە بلىق زۇرغە نىفس آلەيپىدى. اونىڭ تېورەگىنى برماقدىن كىچىكرات بلىققەلر اۋرەشىپ، خۇدۇ ھمدردلىك بىلدىرگۇدەى بۇلىشىپ گىر اىلنىشىردى. بو منظرەنى بىزنىڭ قىستگە مېنگزەتسە بۇلەدىر اېدى. بلىقلر سوو آستىدە قىرماقلردن^۳ تىلكە-پارە؛ بىز بۇلىك قوروقلىكدە جىر كۇرگن بېچارە. شۇندە غىيىدىن قولاغىم آستىدە: «حكمت

^۱ تۇيىق: بالدىر سوپىگى نىڭ پىستكى اوچىدەگى يان تامانگە تورتىب چىققن دۇمباق قىسمى.

^۲ بىقىن: گۇدەنىڭ قۇلتىقدىن تا تاس سوپىگىگە چە بۇلگن اىكى يان قىسمى.

^۳ بلىق اولش اوچون اىپگە باغل، سووگە تىلەنەدىگن اۇتكىر اوچلى مخصوص اىلگك.

كۇرسنگ درياگە باق» -دېگن اۇگيت جرهنگلەدى. سووگە باقەمن. طبعيت قۇلى بيلن دريا توييگە تۇشب تىشلنگن قوملر، جغللر، شيلديرەب تورگن سوولر سرغەيگن يوزيمگە تېرموليشيب:

«بونى اۋتر دنيا دېيديلر. سېندەى لرنينگ كۇبى بيز بيلن يوزلشدى، سېن ھم شولرنينگ بىرىسن. اېندى كېلەجگينگنى قارانغى تصاف قۇليگە تاپشيريشدن اۋزگە چارەنگ يۇق دېگندەى بۇليپ كۇز ساليشەيپدى. دريا بيلن يورەك اچيب سِرلشديم، ايچيمدەگى قلەشيب ياتگن دردلرئيمنى ايتديم. مېن اونى بار وجوديم بيلن انگلەدېم، توشونديم. او مېنى توشندىمى، يۇقمى، بيلمەدېم.

دريا بۇيىدەمن. شو تابدە اۋنگيمگە اۋگيريليپ قرەدېم. اۋنگيمدە قۇليدە تياغى، ارقەسېدن سكيىز-اۋتتەچە ايت اېرگشتيريب كېلەياتگن بىر آدم مېن بيلن دريا اۋرتەسېدەگى سكوتنى بوزدى. بو آدم اۋشە جۇرە ملنگ اېدى. يانيگە باريب سلام دېدېم. قاشلرئنى شيميريب يوزيمگە قررکن، جواب معناسيدە باش ايرغيتيب قۇيدى. اۋيلىب قرەسم، بونينگ دردى دريا-يو مېنيكىدن ھم اۋشە اوچ كون اۋلدين اوچرەتگنيم جۇرە دېوانە. شھردن تۇپلەگن نانلرئنى ايتلريگە بۇلكلب بېرەيپدى. ايتلرنينگ بىرى دېسە ھم بۇلەدى بو آدمنى. جۇرە ملنگنى تنيش-بيليشلر ايت شناس، ايت باقر، ايت قرر و ايت سېور دېگيچ اېدى. ايتلريگە ات ھم قۇيگن. بىرئنى: «كۇپك، بىرئنى برجى، ينە بىرى قشقر، باشقە بيتەسئنى تلغير، كوچلى راغئنى بۇرى باسر، ياشراقلرئنى اېرکەتاي، بقە لاغيم، بۇغير ساغيم» دېب ات توتردى. اتئنى توتيب چقيريشى بيلن ايت-كوچوكلر دۇمئنى ليكىللتگنچە اۋيناقلشيب كېليشردى. جۇرە ملنگ اېلنلرى اسيئەلە تورگن آنە ايتنى عليحدە اۋەيلىب، اعتبار بيلن قورەلەى^۱، دېپە چقيرردى. بو ايتلر جۇرە ملنگنى تاپگونچە نې-نې تياق، تېپكى يېب، نې-نې كلتكلردن جغى سينيپ، اياقلرى غيژدەلنيب،

^۱ قورەلەى: كيىكلرنينگ ياش بالەسى.

اومورتقەسى^۱ اوزىلىپ، بېلنگى^۲ بۇلىپ اداى تمام بۇلگن اېدى. بولر يېتمەگنى دېك، اووو نرېدە قۇلىدە تاش اوشلب تورگن ايكى بېزارى بالەنى ایتمەيسىزمى. ملنگ كۇزىنى چپ قىلدىمى تاشلىرىنى ايتلرگە ائىب قاچە كېتەدىلر. كاشكى بو تاش و كلتكلر آخرگىسى بۇلسە اېدى. «ايت نجس»، ايت «حرام»، ايت «نجس» -دېب قولقلرگە قويىپ كېلىنگن يورتلردە كوچوكلرگە قىدن ھم بۇلسىن امانلىك؟! جۇرە ملنگ بىلن ايتلر آرەسىدە ازلي مەر و محبت اىپلرى محكم باغلىق اېدى. ملنگ بولرنيگ اول يرە-چقەسىنى آرئىب، باغلب، كېن قارنىنى غملش بىلن اندرمان اېدى. ايتلرنى تازەلب، اوقىنىنى بېرگونچە ھر بىرىنى اېرکەلب، اوتىق سۇزلر ایلە سىپلردى. ايتلر جۇرە ملنگ نىنگ جانى اېدى. او ايتلرى بىلن بىرگە اوخلب، بىرگە تورەدى. ايكي ساعت چمەسى جۇرە ملنگ و اونىنگ ايتلرى بىلن قىزىقىب وقت اۇتكزدىم. سۇنگرە خيالچن بىر احوالده آرئىمگە قىتدىم.

يۇلدە كېلەياتىب قارنى يرە، قىبورغەسى شىشگن، تىشى سىنيق، آغزىدن قانى آقەياتگن ايتلرنى كۇردىم. اۇن قدم آتمەى لايگە باتدىرىلگن، آنەسىنى اىزلب چىققن، دەيدىب، يورگىرىب كېلەياتگن بىر پىستە گورجىگە كۇزىم اىلىندى. بولرنيگ كېنىدن ھىلاسلب^۳ بارەياتگن آقساق^۴ ايت دقتىمنى تارتدى. شەرگە يقىنلىشىدىم، قصابدن بىر خشت، كىباچىدن تۇقماق^۵، نانبايدن سىخ، ھوتلچىدن كۇساو يېگن ايتلرنى كۇرەمن. بو منظرەلرنى كۇرىب، خيال مېنى قىشلاق و شېرىمگە آلب كېتدى. بىزدە ھم احوال شو اېدى. داستانلردە اۇقىگىنم يادىمگە توشدى. دىپىرلى

^۱ اومورتقە: ستون فقرات.

^۲ بېلنگى: بېلى مەيۇب بۇلگن ياكە آغىر اىشدىن بېلىنى كۇترەلمەى قالگن.

^۳ ھىلاسلەماق: تېز، كۇپ و قىتىق حركت طقىلى آغىر-آغىر نفس الماق، ھىسەرەماق.

^۴ آقساق: آقسب يورەدىگن، بىر آياغى كلتە ياكە چۇلاق.

^۵ تۇقماق: كلتك، دستەسى و اورىلەدىگن قىسمى كۇپىنچە ياغاچدن قىلىنگن، باسقانگە اۇخشاش اسباب.

بوتون شرقدە، اينىقسە مسلمان مملكتلردە وضعیت شو. سالىشتىرىلسە مېمنەدە كىمراق. ھە، حيوان آزارلىك تېرىيە اصولى بۇلىب قالگن بو اۇلكەلردە.

تغىن يىنە كۇنگىل شەرگە قرەب تارتدى. باررگە عزت الله نىنگ اۇتاغىدن باشقە جاى يۇق. يورەگىم سىقىلىب، سرايدىن تشقىرگە چىقىدىم. بندر آرەلب بېش-اۋن قدم آدىملەدىم. تگاب بندرىدن شەرنىنگ مركزى تامان يۇل آلدىم. ناچو درختلىرى آستىدن سايەلب، آدملىر گوجوم بۇلەدىگن پارككە تامان اۇقتلدىم. آلدىمدە چولدر كىيىگن بىر كىشى كېتەيدى. اۋشە كۇرگىم جۇرە ملنگ، ايتلىرى بىلن قىمىرلب بارماقدە اېدى. شو پىت كىمدىر دوكان تۇرىدن تورىب: «اۋوو جۇرە دېوانە!» -دېب قىچقىردى. جۇرە دېوانە بۇلسە، قۇلىدەگى بې سۇنقەي^۱، كۇزلى و يۇغان تىياغىنى بىقىنىگە تىرەب، مۇلەرىب، تاووش چىققن طرفگە معنالى قرەدى و تىتراق آوازده: «نېمە دېسىز اېه!» -دېبە معصومانە جواب قىلدى. سۇنگ اۋشە ياندىن بخمل گوپى كىيىگن، كتە ياشلى بىر كىشى اخلاص ايلە:

«منە بو يېمىكنى آلىنگ ملنگ!» -دېدى اۋتىرگن يېرىدىن قۇلىنى اوزەتەياتىب. يىنە كىمدىر: «يشنگ جۇرە ملنگ!» -دېبە قرشى دوكاندىن دۇنغىللەدى. جۇرە دېوانە اىنتىلىب ناننى آلدى-دە، پېشانەسىگە سورتىب اۋپگىچ، بۇلكلب ايتلىرىگە ترقتدى. سۇنگ، آياق اوستىدە اېگىلىب ايتلرنىنگ باشىنى بىر-بىر سىلب قۇيدى، و اېركەلب-اېركەلب، ايتلرنى آرتىدىن اېرگشتىرگنچە سېكىن تېبەندى. ايتلر ھم اۋز اېگەسى كېتىدىن شەر رستەلىرى آرەلب بارەدىر اېدى.

ھمە نرسەدن واز كېچىب، دىنانى ترك قىلگن بو درویش نىنگ كۇرىنىشى غلطى. آرىملر اونى «اوليا» دېردى. اوچىنچى كۇرگىنمدە بوندى قىافەدە اېدى: باشىدە دۇپپە يىب چىققن كىگىز قىلاق، اوستىدە باستىرمە^۲ قەلىن يونگلى كېپەنك^۳، آياقلىرىدە

^۱ بې سۇنقەي: بې اۋخشاو، قۇپال، كۇرىنىشى يىشى اېمس.

^۲ باستىرمە: تۇرت تامانى ياكە ايكى يانى و آلد تامانى آچىق.

^۳ كېپەنك (كېبەنك): اىچى كىگىزدن بۇلگن چكىن، چاپان؛ چۇپانلر كىيەدىگن چكىن.

لونجى ايرتېق اېتىك^۱، اېگنئە^۲ اېسە ياقەسىز اق كۈيلىك. ياشى آلتىمىشدىن آشىپ كېتىگن؛ ناوچەدىن كېلگن گۆدەلىككىنە كىشى. بۇيى اۋرتەچەدىن تېپەراق، چىنگ باسگن ساچى-ساقالى دىقىب، اۋسىب كېتىگن؛ يوزلىرى قوياش نىنگ اۋتكىر نورلىرىدىن قارە مغىز يانغاق كى تۈسگە كىرگن. كۈكرەگى اوستىدە آسىلە توشگن ساقالى اۋسىق. قىزىل قۇنغىر ياناقلىرى، چۇزىق ساقالى بىلن چىتمە قاشلىرى آرەسىدىن يىلتىللىب كۈرىنەدى. باسما كېپەنگى اوستىدىن بېلىنى چىلىبىر بېلباغى بىلن تىغىب باغلب آلگن جۇرە دېوانە اصلىدە كم گىپىردى. بىر كۈن سۇزگە كىردى. سماوارخانە نىنگ سۇرىسىدە چايلشېب اۋتىرگن كىشىلەرگە اۋقرەيىب^۳ مە بو گېلرنى كويونىب آيتدى: «هېھات، بو قندەى كۈرگۈلىك؟! آدملىر توگۈل ايتلىر ھم شەرلەرگە باش پناە اىزلب ياپىرىلىب كېلماقەدە. توبە يې! آدملىر-كو، اىغلب-سىقتب كۈنلىرىنى كۈرىب نصىبەسىنى تاپىر. قىتە مېنىنگ قىغوم آرئىب، تشوئىشىم كۈپەيدى. شۈندەى ھم نانخۇرلىرىم آز اېمس!» - او ايتلىرىگە كۈز تىكىب توررىكن، يىنە ايكى كوچوك يانىدە دۇمىنى لىكىللىتېب كۈكرىب توردى، «مە تال خىمچەلرېم كېلىب قالدى. قالىگىلرى ھم جۇرە باباسىنى سۈرىشتىرىب يورگىندىر. بىر جانىم بار شولرنىكى!» - دېب يوزلىرىنى اېتىگى بىلن آرئىتدى. و - «توف اوردىم بو اېورىل زمانگە، توف اې!» - دېدى اۋكىنچ ايلە.

اۋشە كېزدە ھوا شېشەدەى صاف و تىنىق، كېمەگە اۋخشب كائىنات بىغرىدە سوزەياتگن بابا قوياش مېمىنە اوزرە بېمىنت نورلىرىنى ھدىە قىلماقەدە. شەر جادەلرى نىنگ يىشىل و كۈركم ارچەلرى قوياش حرارتىنى استە-استە سۇرىب، تىنىگە جايلىەپىگىندى. آرئىقلردن تۈلىب آقەياتگن سولر تېورەككە، سلقىن، پارىم و ياقىملى

^۱ اېتىك: مۇزە.

^۲ اېگىن: آرقەنىنگ بېلكە و بۇيىن آرەسىدەگى اوستكى قىسمى؛ كىشى تەنەسى.

^۳ اۋقرەيماق: جەل، غضب بىلن قرەماق، چىقچەيماق؛ خۇمرەيماق.

شمال ترەتماقده. هوا آدملرنى لىنج^۱ قىلىپ، اوخلە تردهى درجەدە اېمىس. قوشلر هم دان-دون تېرگىنى پىت پايلىشماقده. كېوتەر و موسىچەلر جادە اۋرتەسىدە تىكىلگن برق اوستونلرى سىمىگە قۇنىپ توشەپىدى. چومچوقلر چىرىللەشىپ ترناولر اوچىدە بىر-بىرى بىلن كۇنگىللىشماقده. نىراقده قىصاب دوكانىدەگى اىلگىچلردە اسىغىلىق تورگن گۇشتلرگە، بىنگك و اربىلر^۲ وىنغىللەشىپ ياپىشىگى ياپىشىگن. بىردە قىناق حىيات اوف اورسە-دە، آدملر باشىدە پارلب تورگن قوياش نىنگ زىن نورلرىگە تۇسقىنلىك قىلەياتگن قارە بولوتلر آسمانده سېزىپ تورىدى.

شەرنىنگ اوضاعى بوزوق، اۋزگەچە توس آلگن. شوروى باستىرىپ كىرگن زمانلر اېدى. مللە ساچلى قىزىل عىسكلر شەر و هوا قۇنلغەسىگە^۳ كېلىپ جايلىشىلر... اولسواللىكلردە كۇترىلگن قۇزغالان^۴ مركزگە تامان قولاچ يايەى دېب تورىدى. خىلص، همه ياق تۇزغىگن. تومن و قىشلاقلردن جان هاووچلب شەرگە قاچىپ كېلگنلر آز اېمىس؛ شەر آدملردن تۇلىپ كېتىگن....

آدملرى زىچ يشەيدىرگن مىمنە شەرى اۋزگەچە منظرە كىسب اېتىگن. شەرنىنگ قاق اۋرتەسىدە سىف الملوک سىنمىسى بۇى كۇترىپ، صولت تۇكىپ تورىدى. شەرنىنگ كۇركى دېسە بۇلەدى. تېپەلىكدە جايلىشىگن سىنمادان بوتون شەر قۇلنىنگ كفتى دېك كۇرىنىپ تورەدى. سىمنا تېورەگى بۇىلب بېجىرىم^۵، مناسبگىنە تۇرت بورچك شىكلىدە پارک توشگن؛ مجنون تاللىر اېگىلىپ پىراقلىرىنى يايىپ تورەدى؛ آدملر سايە سلقىنىدە چىم، اۋت-اۋنلر اوستىدە اۋتورىشىپ درسنگ قورىشىردى. بالەلر بىر-بىرلىگە كاپتاك اىرغىتىشىپ، تۇپ تېپىشەدىلر. شو آرەدە

^۱ لىنج: تابى آينىگن، بۇشىگن.

^۲ ارى: زىبور.

^۳ هوا قۇنلغەسى: هوايى ميدان؛ تورر جاي، باشىنە بۇلىپ خىدمت قىلەدىگن جاي.

^۴ قۇزغالان: انقلاب؛ بىرار اجتماعى تۇزوم، حكمران وضعىتگە قرشى كۇترىلگن عاموى حرىك؛ عىبان.

^۵ بېجىرىم: تۇزىلىشى، بېجىمى اىخچىم، شىنم و چىرايلى؛ خوش بېجىم.

أریقلر بۇییدە سلقینلب یاتگن بیتە-ایکیتە ایتلر هم اوچرەب تورەدی. ایتلرنینگ احوالی اۇتە آیەنچلی! ایتلر نېگەدیر هارغین، افت-انگارلرینی کۇپ بیلیک چرچاق چولغب آلگن؛ بیر یوتوم اوقت و بیر تیشلم نان اوچون نېچە تېکی یېگنینی آیتیب بېرەلمەیدی-دە بو تیلسیز جانوارلر. اگر تیلی بۇلسە، بالەلردن بیقینیگە کلتکلر توشگنی، یوزی-باشیگە کېلیب تېککن تاشلرینی؛ اینگ مەھمی قۇشنی حاویلیدەگیلر کوچەلە^۱ یاگە نانگە ایگنە سالیب ییدیرگنلرینی زار-زار بیغلب آیتگن بۇلمیدی مظلوم مخلوق! تیلسیز حیوان گزەک آلیب کېتگن اېسکی قیغو-حسرتلرینی ایچیدە یوتمسدن نیمە هم قیلەلر اېدی. ایت-کوچوکلرنینگ کۇزلریگە غم-قیغو یوگورگن؛ بشرەسیگە نفرت و حقارت تۇرینی یایگن. یوزلریگە سچرەگن سۇکینچ و یامان سۇزلر موز قانگن کبی، کۇزلردن سینیقلیک، خفە و مایوسلیک تاشیب توریدی. تیللرینی چیقرگنچە هنسیرر؛ آچلیکدن سیلەسی قوریب، مداری کېتگن کۇرینەدی. بو جایلردە قیشلاقلردن اولاقیب کېلیب قالگن ایتلر هم اوچرەب تورردی. اولر قېسی دیر نجاتکارینی کۈتە یاتگندە، ایتلر تېورەک-اطرافگە آنگ-جأنگ کۇز سالیشەیدی. نېگەدیر جۇرە دېوانە کۇرینمەیدی، اوندن خبر یۇق. مبادا شو طرفلرگە کېلگۈدە بۇلسە اونی ایتلر اۇرەب آلیشلیرى تعیین....

بیر زمانلر میمنە جنوبی تورکستان نینگ یورەگی سنەلر اېدی. یۇللی اسپالت قیلینمەگن اېسە-دە، کیشی نینگ بغری-دلینی آچردە ایخچم، کۇرکم و شینم گینە^۲ جادەلردە سیر آیلش نینگ اۇزگەچە گشتی بار. کېنگ-کېنگ جادەلر نینگ ایکی تامانیدە بزازیلیک دوکانلری، رستورانلر، بقالیلیک، قصابلیک، کولالیلیک، زرگریلیک، تېمیرچیلیک و ینە اللەقنچە کسب و کار ایشخانەلری اېشیگی آچیق تورە ردی.

^۱ آیەنچلی: الم-اضطراب عکس اېتووجی حالتلی، آچینیش حسی اویغانەدیگن.

^۲ کوچەلە: تېرەک، تال کبی درختلر نینگ تۇپ گلی؛ گلی سریق، کۆک، سفسر اوت سیمان اوسیملیک ھمدە اونینگ طبیاتدە ایشلتیلەدیگن زھری، توگمە سیمان مېوەسی.

^۳ شینم: کۇرکم؛ ایخچم، قولە؛ یرەشیب توشگن، یرەشیلگی؛ یاقیملی، مراقلی.

مىندەۋى بازارگە يۇلىنىگىز توشسە عىباب-عىباب سىھنەلەرنى كۆرەسىز. جادەلەر ياقەلب آدمەر اۋتەب قەتەماقەدە. شەيدەرەب آقەياتگن آرىقلەر بۇيىدە تراق تەشلىرى دېك بىر تەكىس اېكىلگن ىم-يشىل آرچەلر^۱ قە راستەب، سولتەلى كۆرىنىش بېرەدى. سماۋارلەر بېقىر-بېقىر قەينەماقەدە اېدى. كىبابپزىلەر كۆرەگە سالىنگن كۆمىرنى تەنىمىسىز يەلپەتەر، قەيروق يەل سەخلنگن قۇزى گۆشتە نىنگ جىزىلەب يانىشىدن كۆتەرىلگن قەيوق توتۇنلەر كۆككە اۋرەرلەر، كىبابنىنگ ياقىمتەى هەيدى بوتۇن رستە آدمەرى نىنگ دەماغىنى قەتەقەلەپىدى؛ جەرنەگىلەتەب كەغىرلەرنى داش قازانگە اۋرەياتگن بكاۋوللەر قۇلى-قۇلگە تەنگەمەى آدمەرگە پلاۋ خان تۇرەدن آش سوزماقەدە اېدى. ايتلەردن بىر-اېكەتەسى موزدېك كەنە نەمىققن يەرگە اۋمگن تەشەب، آشخانە و رستورانلەردن آنتەب تەرەلەياتگن هەيدلەرنى مەرىقەب دەماغىگە جەيلەماقەدە. دوكاندەرلەر، مۇتەلەرنىنگ اۋتەب قەتەشىدن كۆتەرىلگن چەنگلەرنى ياتقىزىش اۋچون اېدىشەلەرنى سوۋگە باتەرىب شراپىلەتەب سوۋ سەپەدى. توش پەتە مەكتەبەن قەتەياتگن قەز-اۋغەل بالەلەر تۇرنەدەك^۲ سوزبەلەشەب اۋبەرىگە قەتەشماقەدە. باشلەرگە سەد كۆتەرگن نانۋايلەر ەر ياقەن: «آلب قالىنگ، مە ايسىق نان!» -دەپە قەچقىرەدى. بۇيەنلەرگە قۇنغەراقچەلەر تەقىلگن آت گادىلەرى شەلەير-شەلەير قەلەب، اۋزاق-يەقىندەن كەلگن يۇلاۋچەلەرنى اۋز مەزلەرگە يەتكەزەب تۇرەپىدى.

شەردە تەلەتۇپلەر^۳ باشلەنگىنى يۇق ەلى. آلدەندە قارە كۇنلەر شەردە قەرب آغزەنى آچەب تۇرگەندەى گۇيا. خەستەلنگن بېمارگە اۋخەش، شەردە اۋزى نىنگ اېنگ سۇنگەى تەنچ نەسەنى آماقەدە. اىكەى يەل آلدەنگە آسەشەتەلەك شەرنى استە-سەكەن تەرك اېتەياتگن اېدى. قەنەق حەت ساۋوقەنە ساكنەلەككە جەى بۇشتەياتگەندەى.

^۱ آرچە: نەجو؛ سەرداشلەر عەبلەسەگە نەسۇب، دەبەم يشىل بوتە يەكە دەرختلەر تۇرۇمى.

^۲ تۇرنە: ايسىق اۋلەكلەردە باتقەلەك و كۆلدە يشەيدەنگن، آياغى، بۇنى، تۇمشۇغى اۋزۇن، باشەدە تەجە (سەچى) بار كۆچمەنچە قوش.

^۳ تەلەتۇپ: اۋر-بەقىت، سۇر-سۇر و شو كەبىلەر بىر سەرنەجەم، نەتەنچ حەت؛ تۇس-تۇپلان.

جوره دېوانه ايتلرینی اېرگشتیریب هر کون شهرنی بیر ایلنّیب چيقه دی. اووه ده بیر کیمم بیلن شهرگه کېلیب کېتیشدن اصلا تارتینمه دیدی او. نیمه قیلیب بولسه هم، نیتى ايتلریننگ قارینی تۆیدیریش، اولرنی بیزاری باله لر، بی باش کیشیلردن آمان سقلب قالیش و نهایت ايتلریننگ یوره گیگه قولاق توتیش. اگر آدملر جوره دېوانه سۆزلرینی اېشیتماقچی بولسلر ایچیده دردی کۆپ. او بیر کونی تیلگه کیریب، کۆزینی یومدی، آغزینی آچدی:

«ای آدملر! بس قیلینگ حیوان آزارلیکنی، ایتگه نفرتینگیزنی تۆخته تینگ. بو تیلسیز حیوان نینگ هم سیزگه اؤخشه گن شیرین جانی بار؛ اؤزیگه یره شه حس-تویغولری بار اولریننگ هم. اېنگ وفادار، سېزگیر، سیزگه مونس اوی حیوانی انه شو ایتلر بولیشه دی. سیز، نیمه گه اولرنی ققشه تیب اوره یانگینگیزنی اؤزینگیز هم بیلمه یسیز. خاتین آزارلیک، ایتگه نفرت سیزیننگ قان-قانیگیزگه سینگیب کېتگن. خوش! اېندی توغیلگن ججی گینه کوچوکچهلرنی، نېگه دم و قولقلرینی کېسیب، یاکه چاپیب تشله یسیز؟ نیمه گه سیز کۆپ تۆققن انه ایت نینگ باله لریدن بیرارته اېرکگینی سقله یسیز-و، اورغاچیلری نینگ باشینی کېسیب یرگه کومه سیزلر؟ ایت نینگ اورغاچیسیدن نېگه عار قیله سیز ای آدملر؟ سیز فقط بېلدن پستنی اویله یسیز... قویب بېرسه شو تیلسیز جانواریننگ «چؤچاغینی» کېسیشگه هم تیارسیز، هی-هی آدملر! تۆخته تینگ بو خاتین بېزارلیک و ایت آزارلیکنی. بو نازنین حیوانلر نینگ هم یششگه حقى بار. بولر هم سیز و بیز کبی تیریک جان، خدانینگ مخلوقی. سیزیننگ تاینگیز قاقسه داکتر دېب، کسلخانه دېب، بارمه گن جایلرینگیزگه باش سوقه سیز. چنقه سنگیز سووگه چاپه سیز، آچیق سنگیز اوقتگه یوگوره سیز. بو جانوارلر نینگ بیزگه اؤخشه کۆرپه-تؤشگی یوق اخیر! ایتلر سیزیننگ اېنگ یقین دؤستینگیز بوله دی. اصلینی آگنده قۇپال طبیعت آدملرنی اؤزیگه رام قیلگن انه شو ایتلر بوله دیلر. ایتده خلاقیت، هنر و استعداد مۇل. ایتلر انسانلر نینگ

دردىگە تېگماقدە... جۇرە ملنگ حيوان سېور بىر انسان اېدى. منە مېن دېگن دەيدى، قاپاغان ايت هم اونىنگ آلدېدە مومدەى اېرىب كېتەر اېدى. قىزىق جايى شو كە جۇرە دېوانە ايتلرنى اېمس، ايتلر اونى قىدىرە يورردى و سېوردى هم. كېچ توشگىچ، قوياش يوزىگە چادىرنى تارتمەى تورىب، كۆز يارىغىدە جۇرە دېوانە يىنە قىتېب، كلبەسىگە كېلەدى. سيار ملنگ اېدى. او شەر اطرافىدە باش پىنە تاپىب، كون كېچىردى. گاه دەعزىزان، گاه بابا قۇچقار، گاه... دېگن تامانلردە كۇچىب يورردى. شەردن آرەلىغى ايكى-اوچ چقىرىمچەلىك يۇل. هر قچان قرەمنگ، ملنگ آرقەسىدن اۇن-اۇن بېشتەگەچە ايت قطارلىشىب يورەدى. اونى، مېن ايتلرنىنگ تېلىنى بىلگۈچى بىر دانشمند بۇلسە كېرەك، دېر اېدىم اۇشە پىتلر... ملنگ اۇز اىچىدەگى قانونگە اۇتە صادق و مسووليتلى اېدى. ايتلرنى كېچگە قالدېرمەى، غرىخانەسىگە آلىب قىتەدى. هر دايم ايت يىلاغى^۱، اېسكى-توسكى، شال-شول، اىيرىندى^۲ لئە-لوتە؛ قانگن-قوتگن نان اونىنگ كلبەسىدە بار بۇلردى. جۇرە دېوانە ايتلرى دۆرەسىدە اۇيچن بىر قىافە تورر، ملنگ ايتلرنى اېركەلب، هر بىرىگە نام قۇيىب اولرنى اۇشە قۇيىلگن اسملرى بىلن چقىر اېدى. بىرىنى ترلان^۳، يىنە بىرىسىنى بىر، قالگنلرنى لىچە^۴، ايسكاوچ^۵، اۇچى، اوروشقاق، تازى، اېنگ كىچىگىنى گورجى... دېبە چارلردى. بىر كونى كىم دېر، جۇرە دېوانەنىنگ ايتلردىن بىرىنى مشهور بىر آدمىنىنگ اسمى (گ-ن) بىلن اتب چقىردى. شوندە جۇرە ملنگ آغرىنىب، قىتق اۇكسىندى. بىر نرسەلرنى گىيرىب، باش چىقب اچىق كۆز ياشى

^۱ يلاق: ايت، موشوك كىب حيوانلرنىنگ اوقت بېشى اوچون بېلگىلنگن ايدىش؛ كەبل.

^۲ اىيرىندى: فايدهلىب بۆلمەيدىگن، اېسكىرىب كېتگن نرسە.

^۳ ترلان: آلە-چىپار، چۆكر؛ شو توسدەگى ات.

^۴ لىچە: كىچكىنە، بۇيى پست خانگى ايت.

^۵ ايس، هيد بىلەدىگن؛ يۇقالگن، قاچگن نرسەنى، كىمسەنى ايزىدن هيدلب بارىب تاپەدىگن.

قىلدى. و «عزىزلىرىمنى يامان آدملىرىنىڭ اتى بىلن چقىرىلىشىنى اصلا ايستمەيمەن. مېنىڭ ايتلىرىم قاتل اېمىس» -دېب تياغىنى يېرگە اوردى.

جۇرە دېوانە كۇپ پىت ايتلىرى بىلن صحبت قوروش، اولرىنىڭ حال-حوالىنى سۇر، ايتلىرىنىڭ يىللر بۇيى تەسسىدە زىل االىب ياتگن اغرىقلىرىنى آلەدى، بېل-اىاقلىرىنى اوقلەب اوخلەتر، ھەمئەس بۇلىب، اولرىنىڭ دردىگە ملەھم بۇلردى. تىلسىز ايتلر ھم جۇرە دېوانەگە تلىنىب، او بىلن اۋىنئشر، اىچلرىدە قلەشىب ياتگن غم-غصەلرنى تۇكىب سالردى. اوزون يىللر جۇرە ملنگدن خىر يۇق. احتمال، ايتلر تون يىرىمدە باشىدن كېچىرگن قارە كونلرنى بىغلب-بىغلب ايتگندىر جۇرە دېوانەگە. اگر مىلتىق اۋازلرى جىملىك بغرىنى يىرتمەگن بۇلسە، ايتلر اۋز خلاصكارى قۇبىنىگە باش قۇبىب، قارە شاملردە تۇبىب-تۇبىب ھولىگن دىر. جۇرە دېوانە ھم ايتلىرىگە:

«اۋكسىنمىڭ عزىزلىرىم، كويونمىڭ جىگرلىرىم. نە چارە! سىز و مېن ىشىگە مجبورمىز. تصاف بىزنى يايىگە سالىب آنە زمىنگە آنگن اېكن. شرفلى، مەرلى بېرنى انسانلر قارە كونگە سالىشىدى. مېن يارىق عالمدن كېتسەم سىزلرگە كىم قىرركن؟ سىزنى تاش كۇمدى قىلىشىسە، دارگە تارتىشىسە، آزار بېتكىزىشىسە، مېن قندەى گۇردە ياتەمەن. بو بغرى تاش انسانلرگە انصاف تىلب، شو سۇزىمنى وصىت قىلەمەن:

«حىوانگە ظلم قىلمىڭ اې انسانلر!» يوزومگە ابدىت پردەسىنى تارتىنگىز دېب قالەمەن. جۇرە دېوانە اۋلدى، دېگن خىر ترقلدى. قبرى تېورەگىنى ايتلىرى ترك قىلىشىمەدى. ايتلر بغرىنى ساووق يېرگە بېرىب، جۇرە ملنگ اوچون كۇز ياشى قىلدىلر.

(ويىلاگىمدە باسلىگن اوشبو حكاىە قىتە ايشلىنىب صىقل بېرىلدى).

جون، ۲۰۱۱

كانادا

ایکی تقدیر

ايكى تقدير

باله باله ليك قىلسين، كتّه ايسه كتّه ليك، حيات هارمونىسى (Harmony/هم آهنگليگى) انه شو مرامده دوام اېتهدى. يىشش هم صداليگى (Harmony) هيچ قچان بوزيلمسليگى لازم. باله كى لرينىگ اېنگ اولّا عايله ده، قاله بېرسه باغچه، مکتب، كۈچده روحيتى، قدر-قيمتى سينمسليگى كېرەك. باله هيچ قچان كم سېتلمه سين، كۈزلردن توشمه سين، كۈكره گيدن سوريلمه گنى يىخشى! يۇق ايسه روحي و جسماني ضربه لرنى تنه سېده تويگن گۈدك اولغه يىب-آق، آغرىق چېكه باشلەيدى. چېكىلگن ايچكى و تشقى ضربه لر قيزه ميقلەيدى. چېقانلب، دۇماللب^۱ بوتون بدنيدن تشقريگه اورەدى. باله محيطده كۈرگن اچيقليلكلرى اۈچينى^۲ جمعيتدن آله باشلەيدى. سيز و بيزگه بو گونگى حيات شوندهى اۈگيت بېرەدى.

^۱ دۇماللب چىقماق: بدنە دانە چىقماق؛ شىشىب چىقىش، دومەلب چىققن يره.
^۲ اۈچ: قصه، انتقام.

اولوسدارلىك^۱ مركزىدە بار-يۇغى ايكتە مکتب بۇلردى: بىرى قىز بالەلر مکتبى بۇلسە، ايكتىنچىسى اۇغىل بالە مکتبى. كتە-كىچىك يوزگە يقىن قىشلاقلردن مکتب اۇقىگنى شەرگە كېلىنەدى. هر بالە بىر دنيا دېدىلەر! دنىانى بالەگە بېرسەرلر اگر. بىراق كۇپچىلىك بىلگن ايكتى بالەنىنگ توروش-تورموشى، اۇزىنى توتىشى، قىلىقلرى اۇزگەچە:

مراد - اېسلى، ذھنلى، بىر آز تارتىچاق، كمسوقوم^۲، خيالچن، سېرگك^۳، بىر گېنى درآو پىقب آلەدىگن، كم گىپرەدى، بۇلرمن، چىغاي عايلەدە اۇسگن و اۇقىشگە قىزىقووچن بالە.

ىرەش - يلقاو^۴، انچە-مونچە بىزارى، شوملىكدن كمى يۇق، بىر قىناو بىتمەيدى، داودىر^۵، اچىغى بورنىنىنگ اوچىدە، جنگرى، تۇپالانچى و عصبى بالە. بولرنىنگ ايكتىسى هم بىر قىشلاقدن مکتبگە بارىب كېلىشر، تلەشىب-تارتىشىب اونىب اۇسماقدە اېدى.

اوچ-تۇرت چقىرىم يۇل باسىب مکتبگە بارىلەدى. كېتمە-كېت تىزمە قىر-ادىرلر آرەسىدە اوزونەسىگە توشگن سېر سوو، سېر آغاچ واحە^۶ كۇزلرنى قووانتيرگودېك كۇرك و جمالگە باى اېدى. طىبعت سىيلەگن بو واحەنىنگ قاق اۇرتەسىدن اېتك-

^۱ اولوسدارلىك: اولوسواللىك، تومن.

^۲ كمسوقوم: اۇزىنى كمتر، خاكسار توتەدىگن؛ تارتىنچاق طىبعتلى.

^۳ سېرگك: تېز، درحال سېزەدىگن؛ سېزگىر، زىرك.

^۴ يلقاو: ايشلشنى ياقتىرمەيدىگن؛ ايش ياقمس؛ دنگسە.

^۵ داودىر: تېلە-تېسكىرى ايش قىلەدىگن، تېلەنما، دومبول، انقاو؛ هاوولىقمە.

^۶ واحە: چۇل و چلە چۇلردە اباد قىلىنگن بىر.

يوقارى^۱ بۇيىب اۋتكزىلگن كتە خام يۇل اۋندن آشيق اولوسدارليكلرنى بىر-بىرىگە باغلهيدى. آغىر-يېنىگىل مۇترلر قتناوى انەشو يۇلدن. سۇلىم واحەنىنگ اۋنگ تامانىدن شاشقىن دريا، سۇل يانىدن بۇلسە اوزون جرلىك بۇيىب تۇلىب نەر اۋتەدى. بو يورت منظرەسىگە باققن كۇزلر آرام آلەدى، يوركلر يشىللىك بۇياغىدن يىرەب، يشنب كېتەدى.

بو يورتىنىنگ بىرى بوتون، قۇلى قداق آدملىرى كېچە-كوندوز دېمەى، ايش قووهدىلر، پېشانە تېرى تۇكىب، حلال رزقىنى تېرەدى، بالە-چقەسىنى باقىب تىرىكچىلىك تېرەتەدى. دوركون-دوركون چاغلر! عجابى انلر اېدى.

جزىرمە ياز كونلرى. پىشىقچىلىك، شمالدە باشاقلرى تاولنىب-تاولنىب قاچەياتگن زرغلداق^۲ بوغدايلر بېلىنى اۋراقلر قوچاقلەيدىرگن موسوم. باغ-راغلر يشىلگە نق بوركگن كونلر بۇلردى. جبەلر پىشتەسىگە دۇپەيىب يىراق يايگن تاكلرنىنگ الوان اېلىنلرى شىرەگە لىق تۇلگن... قوياشنىنگ زرىن تىغلرى آستىدە باش يىلنگ، آياق يىلنگ، اېنەسى^۳ توشىب، كۇپلكچن بىر كۇرىنىشده يۇل چنگىتىب مكتىگە بارىب كېلىنردى. كونلىك اۋقىشىگە بارىشنىنگ قىماغى، خلاصەسى يازىلسە كتەگىنە بىر كىتاب.

...بالەلر مكتىدن قىتەياتگندە يۇلنى باشلىرىگە كۇترىب، كۇچەلرنى شۇخلىكلر-و، قىي-چوو، شاوقىن-سورانلرگە^۴ تۇلدىرىب اويلرىگە يېتىب كېلىشردى. كېلىشىب-اق،

^۱ اېتك و يوقارى: شمال و جنوب.

^۲ زرغلداق: تۇق سىرىق رنگ، تۇق سىرىق رنگلى؛ چومچوقچەسىمانلر توركومىگە كىرووچى، قاناتلرى قارەمتىر، اۋزى سىرىق سىراقى قوش.

^۳ اېنەسە: آدم باشىنىنگ ارقە پستكى قىسمى؛ اېنەسە سويگى.

^۴ سوران: كوچلى شاوقىن، غاوور-غووور، شاو-شوو.

پادەمى، قۇى-اېچكىمى آرتىدىن توشىب، تېزەك-تېىمى، اۋتىن، چۇب-چىخس تېرگنى، ياكە اۋت اۋرگنى مشغول بۇلىشر، يىنە اېرتەسى تىكرارلنر شو بالەلىك حىات. كېتمە-كېت يۇل بۇيى آرى اوبەلرېنى بوزىش، كۇچەدە دروازەلر و دېوارلردە ادى-بدى نرسەلرنى يازىش و چىزىش؛ اۋز ارا ياقەلشېب، كۇپلك يىرتىش؛ تىراق، كىتاب، دۇپى، كاوش، شتک^۱ يۇقاتىب يورىشلر كوندەلىك عادت، بالەلىككە خاص قىلىق، شوملىك دېسە ھم بۇلەدى. قىلىققە قىلىك-كو، لېكن تاتى يۇق قىلىق! كېتىدىن دكى^۲، پۇپىسە، شىپلاق، تېپىكى، ترسكى، كلتكلرنى كىم گېيرسىن؟ قولاكلر سورپەدىك^۳ چۇزىلىب كېتردى. شۇرلىك! بالەلىكە، بالەلىك!!!

ىرەش، مراد بىلن كلە كۇزى بىگندەى، سىرە چىقىشە آلمسدى. ذەنى اۋتكىر مراد كوچلى، گودەلى، آتە-آنەدن اىمىقەدىگن^۴، مكىتب تىرتىب-انتظامىگە بۇى اېگووچى، بىر آز قۇرقاتى، سەھل غىرت يېتمسدى اونگە. ىرەش، مراد بىلن اوروشىب، گېلشمەى يورگىنگە ھم انچە بۇلىب اېدى. او راسە چەبىر^۵، اېپچىل^۶، مزنگىنە، ملەدن كېلگن، تىرىشقاتى، آزغىن، دارىب بۇلمس تىكەنك^۷ نىنگ اۋزىگىنەسى. سىرىق بۇلگنى اوچون تېنگقورلر اونى ىرەش «جرمن»، ىرەش «جىرەن» دېب اتەشردى. تېنتك ىرەش جۇجە خۇرازدېك مى بېرىب، جىنگىرلىك قىلىب يورىشنى اۋلگودېك ىخشى

^۱ شتک: چپلى.

^۲ دكى: ناچۇبە اىش، خط حرکت اوچون ایتىلگن اچىق گپ، قتیق تىببە، تعزارى، كايش.

^۳ سورپە: سوپرە، سفەرە.

^۴ اىمىقماق: ھوركىب تورماق، يورەكدە قۇرقوو يوگورماق، باتىنەالمسلىك.

^۵ چەبىر: بەقوت، پىشىق.

^۶ اېپچىل: اىشنى تېز بجرەدىگن، چقان حرکتلى.

^۷ تىكەنك: تىكن، تىكنلى اۋسمىرلىكلرنىنگ عمومى نامى.

كۆرۈردى. خونىك ايشلرى كۇپ اېدى بو بېزارى نىنگ. بىلكلرىدن كوچ ياغىب تورگن مراد اۋن بىر ياشده. باسقىراق، يوزلرى لۇبى^۱، بالدىر، بۇربايلرى^۲ بۇلىق، باشى گۆدهسىگه قرهگنده كتهراق توييلهدى. يرەش اېسە اېندى تۇقىز ياشنى تۇلدىرگن. اونىنگ بىر قىلىغى اېمس بلکہ، بار قىلىغى آرتىق. تىنىب-تىنچىمەگور يرەش تىك جرلر بېتىگه آسىلىب، قوش، قىرغى بالەلرىنى ایلانى بۇلىشگه قرەمەى، غار اىنلرىدن تارتىب آلردى. يۇلاوچىلرنىنگ آت، اېشگىنى هوركىتىب حادثە قىلگن پىتلىرى كۇپ. اونىنگ قۇلىدن اذىت كۇرىب، معيوب بۇلگنلر آز اېمس. اوروشنى يولگە ساتىب آلەياتگن بالر سۇرتىدن قورغور. آدملرگە لقب تقىش اودومىگە كۇرە اونىنگ بىر آتى «يرەش منقە». آتە-آنەسى اوستىدن كولىش اوچون بو آتنى قۇبىشىگنلر. بىلگنلرنىنگ گىپىگە قرەگنده يرەش منقە دېسە يرەش منقە-دە. اويىدە آتە-آنە، تاغە، اېگەچى، خالە، عمە، عمكى، قۇنى-قۇشنىلرىدن كۇرمەگن عذاب-عقوبتلرنى تارتگن بېچارە. كلتكى بىيە-بىيە سويگى قاتىب كېتگن. يرەش بو بىر كم دنياده بالەلىك قىلەآلمەگن باياقىش. يالچىمەى هر تۇكىسده بىر بلاگە دوچ كېلە بېرگن. او اېركەلش، سېوېش، سىيلىش، آووتىش، يوپەتىشلر و مېربانچىلىك نىمەلىگىنى بىلمەيدى. توشمەگور يرەش باشى يارلىب، آياق-قۇلى سىنگىگە قرەمەى، او كلتكىدن تۇيەدىگن بلا اېمسدى. قۇرقىش نىنگ اېلكەسىگە مېنىب، تىزگىلب^۳ آگىدى. اوندن مکتبگە شكایت توشمەگن كون نىنگ اۋزى يۇق.

^۱ لۇبى: دۇمباق، دوندىق، سېمىز.

^۲ بۇرباى (بۇرى): سېمىز بالدىر.

^۳ تىزگىلەماق: تىزەگە چۇكدىرماق، تىزەسىنى بېرگە اورماق.

دوچ كېلگن آدم: «يرەش-و، يرەش! اېرتە ارقەنگگە پۈستىن بايلىب بارەسن مەكتىبگە»
-دېردى.

بالەلەر آرسىدە جىگىشىپ قالگن جۈرەلەرنى يرەشتىرىش نىنگ قىزىق اصولى بۇلگىچ
اېدى اۋشە زمانلەر:

اۋرتاق بالەلەر اوچ-اوچ، تۈرت-تۈرت كىشى لىشىپ، اوروشگن تامانلارنىنگ قۇلى،
قۇلتىغىدىن توتىشەر، تارتقىلىپ، «بۇل آيت!»، «تېز بۇل!» قىلىشىپ، «فانچى نىنگ
آتىنى آيت!» -دېپ، قولاغىدىن چۈزىشەر، اچىقلىشىگنلارنى سودرەب-سودرەب آخرى
يوزلشتىرىشردى. شوندا يىم ھەر ايكىلە تامان قىسىرلىك^۱ قىلىپ، نازىن قىرەب،
اۋنگىرى، يىلگى بىلن يوزلارنى يىشىرگنچە: «آلدىن او آتسىن!»، «ياغ! مېن تىنى
يرىشمە يىمىن، يۇغ»، «ياغ-ياغ قۇيور!!» -دېپە سىلتەنىپ، بىر ياققە اۋزىنى آلىپ
قاچردى. اوروشگن تامانلارنى يرەشتىرىش آسان كېچىسىدى. خفەلشگنلەر شونچە كە
تۇقنىشىرىلسە، قۇل اوشلتىرىلسە بۇلدى؛ ياكە بىر-بىرى نىنگ آتىنى استە تىلگە آلسە
حساب، كۈنسە-كۈنمە «يرەشدى» سەلردى. بالەلەر اوچون حىقىي يرەشماق
چىنەچاغلارنى^۲ بىر-بىرىگە اىلدىرىپ اۋشلەتىش بۇلەدى. اۋشە كۈنى مراد بىلن
يرەش نىنگ آرەلەرنى آچىش جودە قىين كېچدى. سىبىنى سۈرەگندە اۋرتەلەرىدە
جدى عرضلىك بار اېكن. مراد، يرەش نىنگ آنەسى «فانچە» -دېپ دېواردە كتە
قىلىپ يازگن اېكن. عار-ناموس دېگن توشونچە بار ھەر حالدا، يرەش نىنگ غىرتىگە
تېگىپ كېتەدى. قلىتىس گپ. بو نرسە يرەش اوچون گۇيا كتەدن كتە
شەرمندەلىك.

^۱ قىسىرلىك: اۋز بىلگىدىن، توتگىدىن قىتمىسلىك؛ اۋچرلىك.

^۲ چىنەچاغ: چىمچىلاق، برماقلىرىنىڭ اېنگ كىچىگى.

سورىشتىرىلسە يرهش نىنگ بالەلىك يوره گى چىل-چىل^۱ سىنىب كېتىگن بۇلگن. هر گل او خودى، آسماندىن بىرگە توشگندەى بۇلەبېرەدى. شونچەلر تاپتلسىن مى يرهش اۇزگە بالەلر آلدېدە-يە؟! بو يورته آيە-سىنگىل، ياكە آنەنىنگ آتىنى تىلگە آماق اۇسل^۲ ايشلردن...

۲

بالەلر توش ساعت ايكيده مکتبىدن قىتە باشلەدىلر. يرهشدرن درك چىقمە يىدى. مراد كېلە سالىب يرهش نىنگ آتە-آنەسىگە: «اونى معلم له، آيەغىنى بىلە، خىمچەلەدىلە. آيەغ-قۇلى كۇرگىدىن يورهلمەى، قنى بىلەن ياتىتى مکتبە...» - دېگن خبرنى اېشىتىدىدى. ممت قول اكە و خاتىنى اۇغىل آى آپەلر الغە!^۳ جانىنى قۇيرگە جاي تاپەلمەى، تېورەككە آنگ-جىلنگ تىكىلەدىلر. «قنى يرهش جانەمر؟» - دېيە اۇرتاقلرىدن سۇرەشگە توشەدى. خبرىنى تاپەلمەگىچ، آتە-آنە يرهشنى سۇراقلب آرتىدن مکتبگە بارەدىلر. قوياش باترگە بىر ساعتدن كمراق وقت قالىب اېدى. اېر-خاتىن سرسان-سرگردان اوليگە مکتب ادارەسىگە باش سوقدىلر. قرەسلەر هېچ كىم يۇق. معلملر اۇنگ تامانده سپورت ميدانىده والىبال اۇنىشە يىدى. بىر پىت آرقەدن «آتە جاللاان!!»، «آنە جاللاان!» - دېگن مىنغىللمە تاووش اېشىتىلدى. آرقەگە اۇگرىلىب قرەسلەر بالە باياقىش - يرهش بىرگە بىرىنى تشلب، غىنگشىب ياتىدى. جايىدن جىلىشگە كوچى يۇق. «تىنمە گور! يشمە گور نىمە قىپ قۇيدىنگ؟!، يوره بىمىزنى ياردىنگ-كو!...» دېدى اۇغىل آى آپە. اېر-خاتىن اۇغلى

^۱ چىل-چىل: مېدە-مېدە، پىرچە-پىرچە، كول-كول.

^۲ اۇسل: يرهمس، يامان؛ بى معنى.

^۳ الغە: ناتىنچ، بېزاوتە.

يرەش نىنگ اۈمىزىدن^۱، اۈمگىدىن اوشلب، اۈك-چېك^۲ قىلىپ يورىتماقچى بۇلىشىدى، يورەلمەدى. سۇنگ بىر عملب يرەشنى اۈسى اۈچلب، اۈتماقلىب اۈيىگە اۈب كېلەدى. مرادنىنگ اۈتىشىگە قرەگندە يرەش فقط شو بوگون گىنە اۈتە-اۈسىدىن كلتك بىمە بىدى. اۈرىملر اۈشيتىب: «اۈرىن! ممت قول اكەگە تۈزىم بېرسىن! بونى قرەنگ، بالەگە رحم و شفقت دېگنلىرى شو بۇلسە كېرەك - دە» - دېيشەدى.

۳

اۈچ-تۈرت كون اۈتدى. نېگەدىر كۈچە تىنچىب قالگندەى جىم-جىت. يرەش نىنگ تۇپالانىدىن بۇلسە كېرەك قىشلاق بقىر-چقىرلرگە تۈلب يشر اېكن. اۈلر اۈتېب كېتىدى؛ يىللر اۈورىلماقده. شوندىن كېين يرەش قىتېب مكتېگە بارمەدى. بىتېم بۇلدى، چۇپان بۇلدى، قۇش ھىدەب دەقان بۇلدى، مردكار بۇلدى... كتاب و قلمدىن بىر عمر قوتېلدى....

مراد اېسە تابارە ترقى تايىب كېتەبېردى. بەھالىرى يوزدىن كم اېمس. مكتب، كتابخانەنىنگ توپراغىنى يلب اۈقىدى. مملكت بۇيى كانكور سىناويدە اېنگ يوقارى بەھانى اۈلدى. اۈتە-اۈسىگە، قىشلاق و شېرىگە اۈقىش ياغىلدى. مراد تىللردە داستان بۇلىب قالىدى. فاكولتەگە كىردى...

يرەش بر بستە بىگىت، ھلى اۈىلنگىنى يۇق. قارە محنت اۈلىگىنى سۇرىب اۈگن. يرەش نىنگ شوملىگى توتەدى، بالەلىك بېزارىلىگى قومسب كېتەدى گاھدە. اۈش

^۱ اۈمىز: بېلكەنىنگ قۇل بىلن توتشگن قسىمى.

^۲ اۈك-چېك: سېكىن-استە قدم تشلب يورە باشلەماق.

قىلىش ھم يورەگىگە اوردى. او راسە بېزدى،^۱ اۋساندى^۲ حىاتدن. بىر بەھانە بۇلسە- يو اۋزىنى جىن كۈچەلەرگە اورسە. عجباً! حىات ايكى تقدىرنى ايكى تامانگە ايكى اۋزەنگە^۳ بورىب يوباردى. بىرى بىلىم و دانالىكدن قانىب، ابل-يورنگە فايده كېلتىرىش، بختىار كونلرنى قوچىش؛ يەنە بىرى اېسە ابل-يورتنىنگ قانىنى قوربتىش، مىنگ كويگە سالىش سىرى ادىملب بارماقده.

۴

قۇقىسدىن سىياسى حىاتده كتە و مدەش پارتلىش يوز بېردى، مملكتده انقلاب بۇلدى. ادىلردە زىل اىب ياتگن علتلر اويغانىب كېتدى. بىراو بو كتە و قارە سىياسى حركتنى وقار سنب، يخشىلىك انگلب، اېزگولىككە يۇدى^۴؛ باشقە بىراولر اولكن فاجعە و بختسىزلىك... -دېيە توشونە باشلەدى. كېنىكى فكر حقيقتنىنگ عىنأ اۋزى بۇلىب چىقدى...

...يىللر اۋتىب مراد فاكولتەنى بىتيرىب، دىپلوم ادى. يىتوك جراح، دانكى كېتگن، قۇلى يېنگىل دوكتور بۇلىب وايەگە بېتىشىدى. مرادنىنگ باشىگە دولت قوشى قۇندى. منە ابرو، منە عزت-حرمت... مىنگلب انسانلرنىنگ دردىگە درمان بۇلدى مراد. او ياشلىكدهگى غۇر غىرتنى علمگە المشدى. اويىدە آتە-آنەسىدن كۇرگن مېربانچىلىكلر مېوەگە كىردى. عايلەدهگى كولگى، تشويق و اعتبار مرادنىنگ بې غبار وجودىنى معناگە تۇلدىردى. اىچكى قارە كىرلردن آرېدى. ابورىل زمان و توزوملر،

^۱ بېزماق: زده، بېزار بۇلماق؛ جانىگە تېگماق.

^۲ اۋسانماق: زېرىكماق، بېزماق.

^۳ اۋزەن: سوو آقىب اۋتەدىگن اوزون چوقورلىك؛ سوو يۇلى.

^۴ يۇماق: بىرار نرسە، حادثەنىنگ سبب ياكە ماھىتى، اساسىنى اۋزىچە تلىقن اېتماق، تىبىرلەماق، نىمە بىلن دىر باغلهماق، اۋشندن دېب اۋىلەماق، حسابلەماق.

سېلىيى واقىعە-ھادىئەلەر مەرادىنىڭ شەخسىيىتىگە سايە سالماقكەندى. انسان نىنىڭ گۈلى بۇلىپ بۇ كۇرستىدى و خلققە خىزمەت قىلەبېردى.

يەش ھەم بار شو جەمئىيەتدە. اونى قارە تەقدىر قۇلىدىن اوشلب باتقاققە اولاقىتىردى. سەسىق بېلىقەرلەر، قۇلنەسە^۱ تورموش اۇپقانىگە^۲ توشىپ كېتىدى. يەش كېلىپ-كېلىپ قەھرى قىتىق، بىغرى تاش قوماندانگە ايلندى. ايتىشلىرىچە يەش قوراللى گروە توزىپ، كلە كېسىلرنى اطرافىگە تۇپلې «جەھاد!» يۇلىنى تىلەدى. شو تابدە يىللەر اۇتىپ كېتىدى. يەش كۇپ خاتىن الىشگە اوچىكىدى. شەھوتى كۇزىدىن تاشىپ كېتەبېردى، بېساقال بازلىك دردىگە ھەم مېتلا بۇلدى. شەرلردن چىرايلى بېجەلرنى اۇغىرلې مەيشەت قىلىپ يورەبېردى. قىرغىن-بەرات^۳ اورشلىرنى يۇلگە قۇيدى، قان تۇكىشىدن تۇختەمەدى. عايلەدە، كۇچە، مەكتەدە كۇرگن خىشوتىلرى اىچىدىن تېرىسىنى تېشىپ تىشقىرگە چىقىدى. عقوبتلىر يە-چقەلب كېتىدى، زىراداب بۇلىپ ختى كۇزلىرىدىن شىش قاتار تىزىلىپ تۇكىلەبېردى. يەش نىنىڭ يورەگىدە جىز اېتىگن سېزىم يۇق اېندى. آدمىلىكدن زىغىرچەلىك بېلگى كۇرىنمەيدى. اېندى يەش قىلى سۇقىر، يوزى يىرتىق، طبعىتى غىجىم^۴ بىر رەھىمىز قوماندان. زۇرەوانلىك، ظلم، قان تۇكىشىدن لذتلىنىش اونى چولغىب ادى... ساچ و ساقلى اقرگىنىگە قەرمەي، اونى ياووزلىك، وھشىلىك ھەمان تەرك اېتىگىچە يۇق.

^۱ قۇلنەسە: ياقىمىسىز ھىد تەرەتەدىگن؛ سەسىق، بدبۇي.

^۲ اۇپقان: گىرداب، قەمراو، قورشاو؛ سوونى تارتىپ كېتەدىگن، بىر اىستىدەگى كۇرىنمىس چوققورلىك، بۇش جاي.

^۳ قىرغىن-بەرات: قانلى قىتىق جىنگ، قىرغىنچىلىك، زۇر ماجرا.

^۴ غىجىم: بوكلنىپ، اېزىلىپ، تىخى، تېكىسىلگى بوزىلگن.

آرەدن يەنە كېم قنچە يىللار اۋتېب كېتدى. ابورېل زەمان اۋز ايشىنى قىلدى. مرادگە بخت كولىب باقدى. اۋقىش يۈلېدە چېپكەن محنتلىرى ئىمرە بېرە كېتدى. او يېتوك جراح، بركمال داکتر اۋلەراق درېدر خلق خىزمىدە بۈلېب كېلدى. آە دستىنگدن قارە ظلمت!... قىسى تېل گېرسىن، آيتسىن بو مصىبتنى! آە اېسىز مراد!!

قىش نىنگ اىلك آى اداغىگە يقىنلەى-يقىنلەى دېگندە، مشهور داکتر مرادنى شەر اېچىدە اۋغىرلش حركتى بۈلدى... او اېشىگى قوفلاق مۇترېدن تشقرىگە چىقمەى، قارە باتىر - آدم اۋغىرلېگە قرشىلىك كۈرستدى. جانېدن حكاىە قىلىشگە توتىندى. اولر عادى آدم اۋغىرلېرى بۈلمەى، آرقەسىدە قارە توزوم تورگن، يۈل كورسەتېب، نقشە چىزىب بېرگنى راست. آدم اۋغىرلېرى تۇپانچەلرى¹ بىلن يەنە كېتمە-كېت اۋقتەلەدى. داکتر مراد جانېدن حمایە قىلىشگە قتق تىرىشىب آلدى. اورىنىشلر فاىدە بېرمەدى افسوس! شو جاي نىنگ اۋزىدە توشدن كېىن ساعت بېش-آلتى لر تېورەگىدە داکتر مرادنى آتېب كېتدىلر. داکتر مرادبېك شو جاي نىنگ اۋزىدە ھلاك بۈلەدى. فقط داکتر مرادنى اېمس، مىنگلېب بېچارە اېلنى داغدە قالدېرىشەدى ظالملىر. اېشىتگن بېمارلر كۈز ياشى قىلىب، «واھ حسرتا! اېسىز داکتر-ە! شفاگر قۇللرىنگ بېوقت ساووق قارە توپراققە اوزەلدى-يە!

يورت سېور، اېلسېورلىك توغوسى قانىنگدە آىلنردى. «توپراق سېنگە كېرەك اېدى؛ سېن توپراققە نېگە كېرەك بۈلېب قالدىنگ؟!» -دېگن سۇراقلرى اىلە افسوسلىنىب باش اىرغىشىدى كۇپلر. كىملرنىنگ دىر كۇزلرىدن دوو-دوو ياش تۇكىلە كېتدى.

¹ تۇپانچە: توفنگچە، پىستول.

اۈزگەلرگە جان عطا قىلگۈچى داكتىر اۈلگىنى اۈز توغىلگن قىشلاغىگە ائىب بارىب،
كۈمىشگە تردد كۈرەى باشلندى.

تومناى اءملر اېرتەسى قارە تابوتنى اېلكەلرگە كۈترب، داكتىر مراد توغىلېب، واېهگە
بېتگن حولىگە ائىب باردىلر. انەسى كۈكسىگە اورىب كويدى، سېوىكىلى خاتىنى
ساچلرىنى يايىب قارە كىيدى. يقىن قرىنداشر ماتم توتدىلر. اېل-اولوس بىرى برىان
بۇلېب تابوت اوزرە گۈل ياغدىرىشىدى، تومناى خلق داكتىرنى بارسە كېلمىسگە
كۈزەتېب قۇيىشىدى.

(حكايە ۱۹۸۸-قلمگە ائىنگندى. آخر واقەلەر مرادنىنگ قارە تقدىرى بىلن توگتىلدى)

۲۰۲۳/۲/۲۸

تورانئو، كانادا

ماوي بَیراق آستیده

ماوي بېراق آستىدە

ھىمىشەگى دېك حىيات. اۋشە سېر اولوس شەر، اۋشە قىمىرلشدىن تۇيمە ياتگن قىشلاق، اۋشە سېر شاقىن مکتب و اۋشە اوزون يۇل. بالەلر تېپور-توپور گەلەشىپ، يازنىنگ جىزىمە كونىدە مکتبگە قىتىپ كېلىشەدى. يان قىشلاققە قەيرىلر جايدە، تام اوزرە جانسىز ھىپلىپىرە ياتگن ماوي بېراق كۇزگە چىلىنەدى. ايكى كېچە-كوندوز اۋتىپ ھم ياغاچگە ايلىنگن ماوي بېراق جايدىن جىلمەي، زۇرغە تىبېرەنەدىر ابدى. اېرتەسى كون انىق بۇلدى كە بىلگى بىلدىرىش اوچون شو ماوي يلاو^۱ پايتختدن كېلە ياتگن كىملىرگە دىر اتب تىكىلگن اېكن. سوريشتىرسەلر كابلدىن كېلە ياتگن مۇتر اۋنگ قۇلدەگى انە شو بېراقنى كۇرىپ تىققە تۇختب، مېھمانلىرىنى شو نشانە جايدە توشىرىشى كېرەك.

آدملر اۋرتەسىدە: «قۇناقلر كىم اېكن، كىم اېكن اولر؟» بۇلىپ قالدى. اېشىتگن-بىلگنلر اېسە: «جىلرنى اوشلە يدىرگنلر كېلمىش» - دېيىشىدى. «جنى لرنى!» - انە بۇلدى داستان. مکتبەدە ھم اوزون قولاق دوو-دوو گىلر. بالەلر ھم انگلشىيدى

^۱ يلاو: بېراق، توغ.

بونى: «مەرحىم بىلەن عبدرحىم دېۋانەلەرنى ئۇقىتماق اوچون كابلەن قاقىمچى جىگىرلەر چقىرىلگەنمىش» - دېيىشىدى. آغىزلەردە كىم اېكەن جىنى؟ كىم جىنى بۇپتى؟! قاقىمچى جىگىرلەر قىنداق بۇلرەن، تۇبە؟ - دېگەندە گپ-سۇزلەر. سېزگىر بالەلەر «جىنەنى توتىپ آلىپ نىمە قىلەدە؟» - دېگەن سۇراقنى بېرىشەپىدى. شوندىن كېيىن مەكتەپدە قوللارگە درس كىرمەدى. اۇز ارا شو حقدە پىچىر-پىچىر گپلەر. بىرچە اۇقۇچىلارنىڭ قوللارنى دىنگ - اودە. شاگردلەر رىخت قۇنغىراغى تېزراق چىلىنىشىنى سىزىزلىك بىلەن كوتماقەدە ابدىلەر.

راپە - راسە ساعت بىردە جىرىنگ، جىرىنگ، جىرىنگ اوزون قىلىپ درسەن بۇشش قۇنغىراغى چىلىندى. بىردەن آرىنىڭ اويەسى بوزىلگەندە اوچ يوزگە يىقىن بالە قۇزغەلىشىپ، اوى-اويلرگە چاپە باشلەدىلەر. مېن ھەم شو جەمەدەن. بوتون شەر تىنىدى مېنى. ۳۵ يىل خىزمەت قىلىپ قۇيگەن مەكتەپنىڭ كېكسە اۇقتۇوچىلارنىڭ بىرىمەن. ياشىم اۆتمىش اۈچدە. مەكتەپدەن اويىمگەچە يەياو^۱ بارىپ كېلەمەن. آرتىمدەن بالەلەر اېرگىشىپ، مەكتەپكە بىرگە بارىپ كېلىشەمىز، بىر بىرگەچە يۇلداشمىز. كەتە قىشلاققە يېتىپ كېلگەندە ھەممەننىڭ كۆزى تىك ھىلىپىرەياتگەن اۈشە ماوى بىراققە. بوندى قەرلەسە جى بىلەن جىگىرلەر اۈرتەسىدە قىشتىغىچ جىگلەر كېتەياتگەندە تويىلەدى. شاگردلرېم: «استاذ بارەيلىك، بىزنى ھەم اۈشە بىرگە آلىپ بارىنگ» - دېپ قۇيمەپىدى. بو قۇرقىنچلى صەحنەنى سىز كۆرمەسەنگىز يىخشى، دېمەن بالەلەرگە. قۇيرەدە قۇيمەنى سۇرەنگلرى سېرەگەن. مېن ھەم خۇپ دېپ قۇيمەمەن.

^۱ يەياو: پىادە.

بۇياغى اونىققن دروازە قىيە آچىق^۱ تورر، خرابهراق حاويلى اېدى. تۇپلەنىشىب كىرىشىدىك. تشقرى حاويلينى كېچىب، اىچكىرى حاويليگە بورىلدىك. اىچكىمە- اىچكى حاولى اۋرتەسىدە دېوار. شال پردەنى كېچىب اىچكىرىگە كىرىشىدىك. مېن بىلن تۇقىز كىشى شاگرد «دېوانلر»نى كۇرگنى سېكىن-سېكىن آدىملىق بارەپىمىز. قرشىمىزدە بىرندەلى قطارەسىگە سالىنگن اوچ-تۇرتتە اوى تورىدى. غلطي، وهىمەلى بىر كىفیتگە توشىب قالەسن كىشى. قۇرقىنچلى اىچكىمە-اىچكى اويلردن اۋتىب، تۇردەگى خانەگە كىرىب باردىك. بىر قرەدەيم، خانەلر بۇم-بۇش كۇرىندى. اېگەسى باغىنىنگ باشىگە كۇچىب كېتگن اېكن. يىنە تىكىلىب راق باقسىم سۇل تاماندەگى خانەدن غۇنغىللەگن تاووش قۇلاققە اېشىتىلدى. شووو اېتىب يورەگىم آرقەگە تارتدى. اېشىكىنىنگ كۇزىدە، بىر دىستە سىنىق، اىنگىچە-يۇغان خىويچلر^۲ بېرگە توشىب ياتردى. كىرە سالىب دېرەلرنى لىنگ آچدىم. اوىنىنگ بىر بورچىگىدە تپ-تقران بېردە، چاك-چاك سۇكىلگن^۳ اىركىت كىمىدە عبدرحىم؛ اونىنگ سۇل تامانىدە بىرتىق-يماق جولدىر اوست-باشلى مە رحىم چۇنقىيىب اۋتىرىدى. غۇنغىللىب تورگن سېسلر بىزنى كۇرىب يىغىگە اېلندى. اىكلەسى-دە، بۇرىنىنگ آغزىگە توشگن كىيك بالەسىدېك بۇزرىشىب، بىزگە قرەب مایوس جىلمە يىشىردى. كۇزلرىدە جۇدىرەگن ياشلر يوزلرىنى كويدىرىب تامە ياتگندى. يوزلرىدە ایتىلمەگن قندەى دىر درد قلقىب چىققن. آدمنى اۋىگە تالدىرە دىرگن، قىغوگە باتدىرووچى مونگلى نالىشلىرگە اصلا چىدەب بۇلمەيدى. «بىزگە ياردم قۇلىنى چۇزىنگ، اۋلىم

^۱ قىيە آچىق: سل آچىق، قىيەغاچ آچىق، سل آچىلگن.

^۲ خىويچ: هۇل، اوزون ناودە، خىپچىن؛ خىمچە.

^۳ سۇكىلگن: تىكىلگن نرسەنىنگ اىبى اوزىلىب، سوغرىلىب، بۇلكلرگە اجرە تىلگن.

بۇغزىدە تورىمىز «-دېگن معناده قۇللىر هواده تېرەنەدەر اېدى. داد-فريادلىر خودى، بيزدن نجات سۇرەگندەى. اوى دېوارلىرىدىن قىناق غضب ياغىلىب تويىدى گۇيا. اوى هواسىدە قىناقلىر، آياوسىز^۱ كلكلىر يازىلگندەى تويىلەدى. تام بالارلىرى اجل قۇشىغىنى آيتەياتگن سيمان. امانت جانلىر اېسە: «اېندى خىر! الوداع شىرىن حيات!!» -دېگندەى كىفەيت توغدىرەدى آدمە. «حاوليدە نيمەدەر بۇلماقده؟» -دېگن سۇراق مېنگە تىن بېرمەيىدى. آرتىمدن بالەلر ياپىرىلىب كىرىشىدى. بالەكىلىر قىدىنم بىلسىن انسان فاجعەسىنى. «اوستاد قنى اجنە؟!» -دېب سۇرەشەيىدى. بو صحنەنى كۆرىش نە قدر عذاب اېدى.

...خانەلردن حاويلىگە چىقىدىك. درخت كۆلكەسىدە ياشى اېللىكدن اۇتگن بىر قراوول، باياقىش گىنە كىشى اۇتيرىيىدى. يانىگە كېلىب سلام بېردىم، توشونر- توشونمس عىلىك االى. يوزلىرى چىدىق^۲، تىشلىرى تۇكىلىب كېتگن بو بېچارە كىشىنى سۇراققە توتەمن.

- سىز نيمە قىلەسىز بو بېردە تاغە جان؟ -سۇرەدەيم مېن.

- نيمە قىلىپىدىم، مانە شو دېوانەلەگە قرەيمەن-دە، -دېدى قاراوول تمشەنىب تورگن جايىدە قىسىق كۆزلىرى بىلن يوزىمگە تىكىلرگن.

- بىزگە گىپىرىب بېرىنگ تاغە جان. مەرحىم، عبدرحىملىر نېگە مونچە قىناققە توتىلگن؟ خوار-زار زىرەنىشەدىلر؟

^۱ آياوسىز: آياو بېرمەى، آبەمەى قىلىنگن، رحىم-شەققەتسىز.

^۲ چىدىق: بىتگن يىرەنىنگ اوزنى، اىزى.

- بولەنى گرزىواندن آلىب كېلىشىدى. اووو اوياغىنى مېن گىيرمەي، سىز اېشىتمىنگ.
- هيجانلىق سۇزلەي كېتەدى، - جنلرى بار اېكن بولەنى. قتيق توتسە
تۇختە تيب بۇمەيدى. كۇردىزلەمى آياق-قۇللرىدەگى اۇلچك-زاوانەلەنى؟

- نېتىب بو احوالگە توشگنلر بولر؟ -سىنچكاو بىر آھگندە سۇرەيمىن.

- مېن نيمە بىلەي؟ -زۇرغە لىلرىنى جۇفتلەيدى-يو، گىيرگىسى كېلمەي باش
ايرغىتەدى اۇتىرگن جايدە.

- نې اوچون بو بېرگە آلىب كېلىشگن بو بېچارەلرنى؟ -ينە سوال بېردىم.

- كابلدن جن توتلەنى چرلدىلە. اولە سىلەدن آلدىنراق كېلىشىب، ايكلەسى
مەرحىم مېن عبدرحىمنى خوب يىنچدىلە، سۆەلشىدى. اېتلرى تىلىنىب كېتدى
غرىبەلەنى.

- نيمە اوچون يىنچدىلە، سۆەشدىلە؟ حىرتلىنىب يىنە سۇراققە توتەمن.

- اجنەنى هيدەيمىن دېب، اوو آناوى خىمچەلەنى كۇرەيتدىزمى؟ -برماق اوچى
بىلن كۇرستەدى، -اۋشەلە بىلن اورىب، بىدىن جنلرنى چىقىرىشكن. خىمچەلشدىن
كۇرە اۋشە جنلە يىخشى دېيمىن. رحىمى كېلمس، قلبى قتيق اېكن بولەنى. بىدىم
كېلدى آغە. دنيا ايشلرىگە حىرانمن. ساغلرنى جنى لىر كلتكلە ياتگندەي نظرىمدە، -
دېدى قاراوول اۋىچن بىر قىافەدە.

- بو عىبسىز پاك انسانلرنى خىمچەلب اورىش گناە-كو! -دېدىم اىچ و بغرىم
كويىب.

- تىغىن پىتى كون، -برماقلىرىنى كۇرسەتتە، -جن چىقىرىشموشلە، -دېدى
قاراوول باش چىقب.

- يىنە قچان كلكلە گنى كېلەدى؟ - سۇرەدېم كويىب-پېشىب.
- آفتاب باتىشىدن آلدېن.

۳

فرستېمىز يۇق اېدى، اويىمىزگە جۇنەى قالدېك. سىزگە يالغان اۋزىمگە چىن، يورەگىم ويران، اوضاعىم بوزوق بىر احوالده اويىمگە باردېم. بالە-چقەم، قىزىم، نېرەلرېم نېنگ طبعىتى شام بۇلدى. يورەگىم غش بۇلىب، تاماغىمدن بىر قولتوم سوو اۋتمە پېدى. باشقەلرگە سېزدىرمەى، بالەلر نېنگ آنەسىگە داستانى توشونتىردېم. خاتىنېم نېنگ آغزى آچىلىب، تىلى سۇزگە بارمەى قالدى. شك و شېهەسىز آتە نېنگ احوالى خفتان بۇلسە بوتون عايلە قىغوگە چۇكە دېر اېكن...

تانگ آتدى. درسگە كىرىشىم كېرەك. اېللىك دىقەقە يەياو يورىلىب مەكتەبگە بارىلەدى. مەكتەدە استاذلر هم قىزىقىشىدى بو مسئلەگە. اولرگە هم شو ناخوش واقەنى توشونتىردېم. «بو نې قباحەت، بو نې ظلم» - دېيە قاشلرېنى چىمىرىب، باش آغرىغى توتگندەى سراسىمە بۇلىشىدى. شاگردلر اېچىدە يىنە اوزون قولاق گېلر.

بوگون هم اۋقىشىدن كېىن جىنگىرلر نى يقىندن كۇرىشگە آشىقدېم. كېچەگى احوال، بالەلر آرتىمدن يۇل باسماقەدەمىز. يىنە اۋشە ماوي بىراق قەدەلگن تام آستىگە كېلىب تۇقىرەدىك^۱. بو گل قىشلاقەدە گىلر هم تماشاگە بارە ياتگندەى ياپىرىلىشىب، مەرحىم و عبدرحىملر نى كۇرگنى حاولىگە كىرىب بارىشردى. اولىگە يورەگىم بېتلەمدى... آخرى كىردىك حاولىگە. تۇغرى بارىب، برماقەدى-برماقەدى

^۱ تۇقىرەماق: تۇختلماق؛ كوتماق، حرەكتى سېكىنلشتىرماق.

خېمچەلەر غەملەنگەن^۱ خانەگە باش سوقدېك. نې كۆز بېلن كۆرەي و نې تېل بېلن آيتەبېن. كېمىلرى آلبىر-شلبىر، اوبت جايلىرى بىر آچىلىب، بىر يايلىب، مەرحىم و عبدرحىم بايقىشلر موسىچەدېك كېنە موشەببىب اۋتېرىشر، بندلرېدەگى زىرقىراق آغرىق شەتېدن بۇلسە كېرەك ايسىتمەلەگن كىبى دغ-دغ تېرەشردى. قانلىق تەنەسى كۆكرىب، يۇل-يۇل بۇلىب تېلىنگن اېتى كۆزگە تىلنردى. افتىدن «جىنىنى چىقرەمن» -دېب راسە بېچارەلرنى كلكلشگن.

مەرحىم قۇلىدە اۋلچك، آياغىدە كىشن، بىر چىمدىم رحم و شىقت اولشسىنلر، دېگن ايلىنچ ايلە بىرېمگە اۋزىنى آتەي، دېب سىلتەندى، تارتىلىب قازىققە يانباشل بىقىلەدى. مەرحىم نېنگ كۆزلرېدن مظلوملىك تامچىلرى يالانچاچ تىنگە تۇكىلەدېر اېدى. قوچاغىنى مېنگە آچەدى، «آيتىنگلە مېنى اورمەسىن!!» -دېگنچە يالوارردى. قرەب چىدەي آلمەدېم. چۇنتىگىمدن غىچىم قۇل رۇمالچەمنى چىقىرىب اىكلەسى نېنگ كۆز ياشلرېنى آرېتىب آلدېم؛ گۇدكلرچە مأيوس يوزلرېنى سىلب، بىر-بىر قوچاقلەدېم. بو احوالگە چىدەي آلمسدىن داد سالىب ھۇنگرەب بىغلەدېم. بولر ھم انسان-كو! يرەتگن نېنگ چقەلاق سىمان بېگناھ مخلوقلرى-كو! روھى خستە بۇلسە باردېر. بولرگە كۇرستىلگن ياردەم، مرحمت شومى؟ مونچە اچىق بۇلمەسنگ اې شىرىن حىات! -دېمىن بىراوگە دردىمنى تۇكىب سالگن ىنگلىغ.

تشفرىدە حاۋلى نېنگ اۋر تەسىدە اۋتېرگن قاراۋولگە يوزلندېم. كۇرسە تىنگ اۋشە اۋبى كۈيگور قاقىمچى جىنگىرلرنى، -دېدېم. قولاغى آغىرراق كىشى اېدى. قۇلىنى قولاغىگە توتىب، «نېمە دېبىسىز آغە؟» -دېب انگرەبگنچە قرەب قالدى.

^۱ غرەم: بېدە، پېچن و شو كېبىلرېنىگ تۇپلنگن اۋبومى. غرەملەماق: غرەم حالتگە آلماق؛ غرەم قىلماق.

توشونتىردىم. كابلدىن كېلگن بخشىلارنى ايتەن دېيە. «يۇغ، يۇغ، يۇغ، سىزنى اويلاققە يۇلتەمەيدىلە، سرگردان بۇپ اۋتىرمىنگ» - دېدى. اوستىمگە تاغ اغدرىلگن كىيى ناچار اويىمگە قىتتىم.

اېرتەسى مەكتەپكە كېلدىم. اۋقۇتتووچىلار بىرگەلشىب، بو احوالنى اولوسوالگە خىر بېرگنى قرار قىلدىگ. مقصد شو نامرادلارنى اياوسىز كىلكىدن قوتقىرىش اېدى. حاكىم اۋرنىدە اېمىس اېكن.

بوگون هم اۋتدى. مەكتەپ زىنگى چىلىندى. شاگردلار بىلەن يۇلگە توشەمىز. ساعت بىر يىرىم دېگندە اۋشە يىنە ماوي بىراق اۋستىدە تۇختەدىم. مەرحىم و عبدرحىمىلر اۋدىدە تونب قالەن بو كېچە، دېگن خىيالگە هم باردىم. قىيە اچىلگن اېشىك اۋدىدە بىر سىقىمگىنە بۇلىب ايكى كىمپىر زار-زار يىغلىشەيىدى. عبدرحىم و مەرحىمىلردن خىر اۋگنى گزىواندىن كېلىشگن اېكن. كىمپىرلەرنىنگ كۆكرەگىگە اورىب زارلىنىشلىرى ساووق واقەدن خىر بېرىب توريىدى. تشقىرى حاوولىدە اياق اوستىدە توريىمىن. اىچكىرىگە بارەى، دېب تېبەرەندىم. اونغەچە قولاغى اغير بايەگى كىشى كېلە سالىب مېنگە:

اغە، خلاص بۇلدى. تمام بۇلدىلە، بىچارەلە قضا قىلىشىدى. تابوتگە سالىب قىشلاغىگە اۋپ كېتەدىلر اېندى، دېب باشىنى چىقب، كۆز ياشى قىلدى قاراوول. تورگن جايىمدە قاتىب قالدىم. ايكى اۋلىك و ايكى درېدر اۋنەننىنگ تقدىرى نىمە بۇلدى اېكن؟ - دېگن اۋى خىيال چولغىب اۋلدى.

حىيات درختىدن ايكى برگ اوزلىب توشدى. اۋنىقراغى بو تازە يىراقلارنى اوزىب توشىردىلر. اېسدىن اۋزىش يازىقىمى اېدى اې شىفتسىز حىيات؟... بولر اۋرگىسى

اېمس. شؤرليک! مېن بيلگن ممه رحيم و عبدرحيملر اېسیدن آزگن تېلبه
كؤرينمسدى... همه بيلدى بو واقعهنى، هيچ كيم غير تيغيگه هم ايلمهدى.
«قاقيمچيلر جن هیده گنى باشقه چپكه-چپكه قيشلاقه كبتديلر» -دببشدى.

(۱۹۸۸-ييل يازيلگن اوشبو حكا به قيته ايشلندی)

۲۰۲۳/۳/۲۷

كانادا، تورانتو

قیمتگه توشگن محبت

قىمىتگە توشىگن مەھبەت

سلىمانگە اونشتىرىلگن نرگس نىنگ تۇيى ھەم يىقىنلىش قالدى. اوزاغى بىلەن ايكى ھفتە ايچىدە تۇي بۇلىپ اۇتىشى رېجەلشتىرىپ قۇيىلگن. بۇلەجك قودەلەر ھەم اۇز ھالىگە يەشە تيارگرلىك كۇرماقدە ابدىلەر. اويى شەرگە يىقىن بۇلگنى اوچون نرگس وقت تاپدىم دېگونچە بىرار كىچىلىگىنى بوت قىلىش اوچون دوكانلرگە باش اورەدى. اويدن شەرگە بارىپ كېلىش نىنگ اۇزى بۇلمەيدى. ھەر قلەى كىمدىر، يانىدە بۇلگنى يىخشى-دە. نرگس كون ايسىمەى، سلقىندە «نيمە قىپىدى، كوپە-كوندوز-كو، شەر تۇلە آدملەر، بىر بارىپ كېلەن-دە» -دېگن اۇي بىلەن چادىرگىنەسىنى باشىگە يايىپ، مىدە-چويدە ساتىپ الگنى شەرگە توشدى.

قىزىگىندىن قىزىپ بارەياتگن ياز كونلرى اېدى. شەر كتە، گوجوملىگىن آدم قىنەيدى. قىش، ياز و كوزلردە لايقە سووى قورىپ، فقط بەھاردە گىنە كىلپ اورىپ،^۱ چلقىب آقەياتگن دريانىنگ ايكى قىرغاغى بۇلىپ سالىنگن دوكانلر رستەلرىدە آدملر تىرىندە، شەرنىنگ باشقە جادەلرىدە ھەم بىر-بىرىگە توتش مغازەلر جايلىشگن.

^۱ كىلپ اورىپ تورگن: تۇلىق، تۇلە بۇلىپ تورگن.

بو تېقىلىنچدە شەرچىلر نىنگ بىر-بىرلىگە اورىلىپ، اوسور يىلىپ حرىكتلىنىشى كۆزگە تىشلەندى. اولكن شەر بۇلگىدىن كېىن تورلى سىبگە كۆرە، هر ياقدىن آدملىر ياپىرىلىپ كېلەۋېرىكن. تىكىسى، رىكشا، كراچى، مۇتر ساىكل، باىسكل، كتە-كتە يوك مۇترلىرى كۆپلىگىدىن پىادەلر زۇرغە اۋزلىرىگە يۇل اچىپ منزىگە يېتىپ آلەدىلر.

كتە-كتە مار كېتلر هم مۇل بو شەردە. يوكچىلر قۇل ارا بەلرىدە بنجارەلرگە رىنگمە-رىنگ گزىلەر تىشىپەدى. بقاللىك، عطارلىك و باشقە مغازەلرگە تىنمە يىن تاۋار^۱ تىشىلر ابدى.

پىشىقچىلىك موسومى. اوستىگە قىزىل، سرىق، ماوى رىنگ پراشوتلر تارتىلگن كۆچمە كراچى دوكانلردە، هۇل-قورىق، مېۋە-چىۋەلردن تارتىپ، پلاستىك شەتكلىر^۲، لېلام قىلىنگن اوست-باش كىيىملرى-يو؛ قوندوزدىن كېلتىرىلگن كۆكىمتىر اسقلانى قاۋونلر و ترسىللىب يارىلەى دېب تورگن تربوزلر تىلىمىل، ساتىلىپ تورىدى. اىنىقسە لېلامى ساتوچىلر نىنگ بازارى قىزىق. اولر تىلىدىن:

«اىب قالىنگ! تېكىن حساىدە!! منە بەھاسى توشىرىلدى، اىب قالىنگ. بىر كونلىك لېلام؛ ساتەن، كېتەن!!» -دېگن قىچقىرىقلر تىنمەى ىنگرەماقدە ابدى. الوۋچىلر شاشىلىپ سودالشاقدەلر.

نىرگس هر گل آنەسى، خالەسى ياكە عمەسى بىلن بىرگەلىكدە بازار قىلگنى شەرگە چىقىشىردى. الدىندە تۇى، مىنگ يورەكنى بىر يورەك قىلىپ بو نوبت يالغىز شەر چىقىشىگە مجبور قالدى. بىر اۋزى زىيە بارىپ كېلماقچى ابدى.

^۱ تاۋار: مال، ساتىلەدىگن نرسە.

^۲ شەتك: چىلى.

بونى شەر دېدىلەر. اېنگ اق سويك بەدولت باي بچەلردن توتيب، شۇدەلر^۱ -و، قۇل -
 آياغى، يوز-باشىنى يره-چقە، گزەك باسيب كېتگن آدمەرگە چە ايشى توشەدى؛
 وقت اۆتكزىش اوچون بارەديگنلەر هم از اېمس. ايسلىقى كىيىنگنلەر، ساچلرىنى كىر
 باسگنلر تىلمچىلىك قىلەدى. ياش قىز-بالەلەرگە چە ايسىرىق توتەتەب، اۆتگن -
 قىتگنلردن «يا بەھاوالدين بلاگردان، بېرىنگ خدا يۇلىگە» -دېيە تىلمچىلىك
 قىلشماقەلەر. بو شەرەدە تازە هوا قىدە دېيسىز؟ اېرتەلب اوينىگىزدن كىيب چىققن
 تازە اوست-باشىنىگىز كېچقورونگە چە سچرتمە لايىرگە بولغەنىب، كىر بۇلىب
 افلاسلىشى هېچ گپ اېمس. سەسىق هيدلر بورونگە انقىب اورەدى. پست-بلند
 تاغلر آرەسىدە جايلىشگە بو شەر دوكانلرى كىر سولر، بلچىق و باتقاق اىچىدە
 چۇكىب، سىنىب ياتگن قەبىقلەر-و، كېمەلەرگە اۇخشىب كېتەدى.

كافە و رستورانلردن آقىب چىقەياتگن بدبۇى چىقىتلر^۲ هيدى كىشىنى اېسىدن
 آزدىرگودەى درجە. قطار فروشگاهلر آلدیدن اۆتیب-قىتیش آسان ايش اېمس.
 شەرگە چىيىن، پشە، يىنگك، قاواق زىبورلەر هجوم كېلتىرگن. شولر بىتمەگىدېك،
 بېزارى بالەلەر هم اۆلجەسىنى پايلەياتگن اۆچىلر كىب مغازەلر اوستىدەگى بالكونلردن
 تورىب، يىبىلگن قاوون، تربوز پۇچاقلرىنى يۇلكلردن يورەياتگن خاتىن-قىزلر اوستىگە
 ايتىشگە چاغلانماقەدە. يۇلاوچى خاتىن بۇلسە: «الھى كۆزىنگى يېگىن! جوانمەرگ
 بۇلگىن» -دېيە قرغەى باردى. ستنگ سۇققەباش^۳ قىشلاقلردن كېلگن يىگىتلر
 چادر اوستىدە بارەياتگن خاتىن-قىزلەرگە تېگەجاغلىق قىلىپ گپ اتماقەدە. قىلگن

^۱ شۇدە: كىمىغل، قشاق، فقير.

^۲ چىقىت: چىقىندى، قالدىق، يراقسىز نرسە.

^۳ سۇققەباش: اولىنمەگن، بالە-چقە قىلمەگن؛ بۇداق.

ايشلردن قەققەھ آتیب شادلنە تورگن يىگىتلەر، اۈزلرىدە تويگن مزە-كېفنى جۇرەلرى بىلن بۇلىش اېدى. ايرىملرى اۋتېب-قېتەياتگن خاتىن-قىزلرگە سوقلىنىپ^۱، سېوگى-محبّت اظهار قىلماقچى هم بۇلىشردى اۈزلرىچە. پىت پايلاشېب، تېگىشەدىلمى-يېپى، ياكە قۇللىرى قەياقەدىر كېتىپ قالرىمدى-يېپى. بو وضعىتدە يالغىز حالده عيال كىشى نىنگ شەرلب كېلىشى جودە-جودە قىين. بىر كونلىك شەرگە كېلىپ-كېتىش هر خىل ماجرالرگە تۇلە بىر عالم داستان. مكتىلر رخصت بۇلگن وقتلردە قىزلرگە گپ آتىشلر يامغىرى ياغىلە باشلەيدى. خودى، ارنى نىنگ اىنى بوزىلگندەى قىزلر بىر-بىرلرىنى سورىشىب، تىقىلىشىب، سورىلىشىب بىرى-بىرىگە اېلكەلشىب، زۇرغە اويلرىگە يېتىپ آلەدىلر.

بىلكلرى شىمىرلىگن، كۇزىگە عىنك تقيب، كۇك كاوباي پتلون كىيگن، ساچ-ساقالى تېكىسلنگن برىستە بىر يىگىت برماقلىرى آرەسىدە قىسىب، سىمىرىب تارتەياتگن سگرىتىنى آخرىگەچە چېكىب بۇلدى. آلىفته قىافەدەگى بو يىگىت نىنگ ايلان دېك آلەزرەك بۇلىب تۇرت تامانگە قرەشى كىشى دقتنى اۈزىگە جلب قىلەدى. اونىنگ يورىش-تورىشى غير طبعى كۇرىنەدىر اېدى. او افتىدن تېزدە بىر نرسەنى قۇلگە توشىرىب، اېرككلىك هاوورىنى چىقوماقچىدەى بىر كىفېتدە. يانېدەگى اۋرتاغى اونى «جاويد احمد!» -دېب چقىرىكن، «اېرتەگە اوچرەشەمىز!» -دېبە برماقلىرىنى هواگە اۋىنەتېب خىرلشىب كېتدى. احمد شەرده بىر اۈزى سنقىي^۲ باشلەدى.

^۱ سوقلنماق: حرص و هوسلنماق؛ يامان كۇز، كىنە.

^۲ سنقىماق: سىندىراقىلب، دەدىدېب بېكار يورماق؛ سىياقلىك قىلماق.

احمد آرقەدە، آلدیدە اېسە، كۆك چادر كېيگن بۇى بلند قىزىمى، خاتىنىمى سېكىن آدىملىق بارماق دە اېدى. عىال نېنگ بلند پاشنەلى كاوشى نېنگ تق-تق قىلىپ تاووش چىقىرىشى احمد نېنگ يورەگىدن آله پىدى. قىز بىر يوموش بىلن قىسى دىر مغازەگە بورر كن، احمد هم آرتىدن قوويب يېتىب آلر و اونگە: «يخشى قىز!! كېلىنگ تىشە يلىك يخشى قىز» - دېگن سۆزلرنى آيتىشكە اولگوردى. قىزدن جواب چىقمس اېكن، احمد نېنگ يورەگى يانىب، اىچى توتاقىب، كېتمە-كېت ياندىرگىچى بىلن سگرىتىنى ياقدى و چېكە باشلەدى. او آلدى-آرقەسىگە بىر قرەب، آچ سرىق رنگ توسلى كۆپلەك توكمەلرىدن اىكئىتەسىنى بېچەدى-دە، يلىك تۇش كۆكسىنى شمالگە بېرىب، بىلكلرنى يلىللىتىب، بىر گېردە بىب قۇيەدى. سېكىن چادرەلى قىزگە يېتىب آلىب، گپ آتە آلمسە-دە، آرقەسىدن بارەبېردى. چىن-چىن بورمە چادر آستىدە بارەياتگن قىز بىرار نرسەنى تېزراق ساتىب آلىش بىلن آوارە. چقان ايشىنى بىتېرىب، اويىگە قىتىشكە شاشىلەياتىر. يىتگىتچە نېنگ عاشقانه، گاه بى ادبانه گپ-سۆزلرىدن قىز نېنگ جانى ھىقىلداغىگە¹ كېلىپ تىرەلىپ تورىدى. بۇغزىدە توگىلە تورگن يىغى كۆزلرىدن دوو-دوو تۆكىلگن بۇلسە باردىر. قىز اطرافدە گىلردن ھدىك سىرەب، بالە نېنگ جواىنى بېرەى دېسە پىت تاپمەيدى. ياپىنچىق آستىدەگى قىز آدملىر آرەسىدە شرمندە بۇلىشدىن قۇرقەدى. او: «باشقەرلەر مېنى بوزوق خاتىن اېكن» - دېب اۋىلمەسىن اوچون، غضبىنى اىچىگە يوتىب كېلەيدى. احمد انچە اوزاقدن بېرى قىز نېنگ آرقەسىدن توشكنگە اۋخشەيدى. نېمە قىلسە هم

¹ ھىقىلداق: بۇيىن نېنگ آلد قسىمى؛ بۇغىز، تاماق.

مقصدىگە يېتەلمەيدى. انىقراغى قىزدىن جواب يۇق. احمد دېگنى محبت بلکہ شهوت اۋتيدە اۋرتب يانماقده اېدى.

چادرە ياپىنگن قىز چقان-چقان بازار-اچارىنى بىتىردى-دە، كېلگن يۇلدىن تىسىرلىب، يەنە ارقەسىگە قىرىلدى. چادرە تگىدەگى قىز قەدىنى كتە-كتە تىشلىب، تىزراق اويىگە يېتىپ ائىش فكىرىدە. شونداققىنە شهوت ائشى كۈزلىرىدىن تاشىب تورگن احمد بو قىزنى نىمە قىلىپ بۇلسە يىم توزاغىگە ايلىنتىرماقچى. او قىروروققە اىنتىلگن موشىكدەى امىدسىزلىك بىلن قىزنى قوويپ بارەدىر اېدى. قۇلىدە چىقماق توتگن احمد چۇنتىگىدىن يەنە بىر قىلى پاپىروسىنى^۱ چىقىرىپ، سگرت توتتىدى. كېتىنى اوزمىدىن زۇر بېرىپ چىكەبېردى. او يۇل-يۇلەكى يوتەياتگن تمەكى^۲ توتونىنى اغزىدىن چىقىرىپ، هوادە قۇنغىراق سمان حلقەلەر حاصل قىلىپ پوفىل بارەدى. احمدنىڭ خىالىدە توتون حلقەلرى اىچىدىن چادرە ائىدەگى قىزىنىڭ جىمالى جلۈلەنەياتگندەى گۇبا. اونىڭ قىزىگە قرەتە:

- «اې قىز! سېنى سېۋەمن، اې قىز!!»، «حالىمگە رحم قىل، بىر قىيا باقمەيسنى؟!»، «قىز دېگنى مونچە ھىم شىداد بۇلرمى؟ مغرور بۇلەدىمى قىز دېگنى مونچە؟»، «بىر كۇرمەسم اۇلەمن، يىخى قىز!»، «دىدارىنگن تۇيمەسم اېندى بوندەى يىشىدىن معنا يۇق» - دېگن سوبوق عاشقانى گپ-سۇزلىرى ائىدىنگىلرىدەگى دېك تىغىن بې جواب قالىدى.

چادرلى عىال دوكان رىستەلرىنى كېچىپ، اۇنگ تاماندىگى كۇچەگە بورىلدى. احمد ھىمان زارىقىپ، تېلەلردېك اىلگىرىگە اىنتىلەدىر. چادرلى قىز ائىدىن كېلەياتگن

^۱ پاپىروس: سگرت نامى.

^۲ تمەكى: تىباكو.

آدملرنى اۇتقىزىپ، آرقەسىگە قىرىلىپ بىر قرەدى. احمد: «مرادىم حاصل بۇلدى»، «دولت قوشى باشىمگە قۇندى»، «وصال ايامى كېلىپ دان تىلش وقتى يقىنلىشىدى» - دېگن خيالده بۇلسە كېرەك تابارە آلغە قرەب اىنتىلدى. قىز چادر آستىدىن يوزىنى كۇرسەتىپ جواب قىلەى دېسە ھلى فرصتى اېمس. بىر آز يورىپ، قىز اچىغى بىلن بىر سىلكىنىپ، باشىدىن چادرنى كۇترىپ، قاشلرىنى توگگنچە احمدگە يوز بوردى:

«بو اخماقلىگىنگ نىمەسى، اويگە كېلمەيسنى، آتە-آنەمگە آيتەمن، - دېدى و چادرىنى يايىپ، تېز-تېز يورىپ كېىنگى بورىلىشده گى كۇك دروازەنى شرتتە آچىپ، اويىگە كىرىپ كېتىدى. احمد ياپىنگن قىزىنگ گىنى يىخسى انگلمەدى چاغى. قەياققە غايب بۇلگىنىنى ھم بىلمەدى. تربوزى قۇلتىغىدىن توشگندەى سلقى-سلقى يورىپ كېلەبېردى. احمد قىزىنگ قەياققە كىرىپ كېتىگىنىنى پىقمەى قالگىنىدىن مغلوبانە اۇكسىندى. كۇچەگە بورىلىشى بىلن اۋىين اۋىنب يورگن بىر بالەگىنە بلند آوازده ايكىنچى قوۋەتدن تورىپ:

«احمد اكە، احمد اكە اوووو!!! نرگس آپم قنىلە؟ آپەمنى كۇرمەدىزىمى، -دېپە قىچقىردى. آسماندىن يېرگە توشگندېك احمد آياق اوستىدە تققە تۇختەدى، تورگن جايىدە ھىكلدېك قاتىپ قالدى. ھمە ياق سوو سېپىگندەى بۇلدى. يېردن سېس چىقدى-يو، احمددىن تاووش چىقمەدى....

(اوشبو حكاىە ۱۹۹۰- يىل شىرغان شەھرىدە يازىلگن بۇلىپ، بىر آز قىتە ايشلاو بېرىلدى)

۲۰۲۳/۹/۴

كانادا، تورانتو

مامانینگ یادگاری

مامانىڭ يادگارى

بىر كېچە-كوندوز تىنمەي ياققن يامغىرنىڭ اېندى گىنە كېتى اوزىلگن اېدى. شوندا هم هوا يگە-يىرىم تامچىلىب تورىدى. قوياش بىر بۇزىردى-دە، يىنە قىلىن بولوتلر آرتىگە بېكىنەدى. كۆپ يامغىر قويىب ياققىدىن بۇلسە كېرەك اۋشە كوني بازارچىلارنىڭ آقىمى انچە سىيرەكلشگن كۆرىنەدى. ھمىشەگى دېك قىزىق-پىشىق بازار بۇلمەي تورىدى. قۇلى قۇلىگە تېگمەي تاوار، نرسەلرىنى جىرەق-جىرەق پۇللەياتگن ساتوۋچىلر كىيك اولەياتگن اۋچىلر كىي خرىدار پايلشەياتگندى.

يۇل، يۇلكلر شىلبا سوو، شىلتىلمە لاي-لوي. اۋنقىر-چۇنقىر يۇلر يامغىر سوويدن كىلپ اورىب، كۇل، حوزلر حاصل قىلگندەي. بىر بازارگە كېلىب كېتىش سېل كم اوست-باشدن اجرەلىشەي بىر گپ. ايلگرىلر شېر راستەلرىدە حرىكلنەياتگن بازارچىلر دوكانلر قرشىسىدە غوچ-غوچ تۇپلەنىشىب، قىزغىن بازار-اۋچارىنى قىلىشىردى. سۇنگى قىتىق يامغىردن كېين بازارنىڭ مزەسى قاچدى. يىكم، دوكم آدمنى حسابگە آلەگندە شېر بۇم-بۇش. اېرىم دوكاندارلر تاملرگە چىقىيب،

چكى^۱ اۋتگن جايلرنى بېل بىلن تپ-تېلتىب قاتىرماقدهلر. يىنە بىراولرى «جۇره اكه يووو! بونى كۇره سىزمى؟ ايككى كوندن بېرى آسمان نىنگ تگى تېشىلدى-ياو!» - دەدى-دە، اۋىلرى پرىشان بىر حالتدە پىستگە توشدى. سۇنگ دوكان اىچىدە، چكى دن سقلنىش اوچون يايىب توتىلگن ملە رنگ ساتندن سىزىب آفە ياتگن سوو ايدىشىنى سېكىن اوشلب اىب ارىققە تۇكە بېردى. دوكان اېشىگى بۇىلب توتىلگن پردە سايە باندىن يىغىلىب قالگن يامغىر سوللرى ھلى تامچىلب تورىدى. يامغىر نىنگ تىنىشى بىلن بازار ھم جانلنە باشلەدى. قۇللرىدە شىشە بۇتل، كاسە-كۇزە، تۇرە-خلتە، تقىر-توقور... كۇترگن بازارچىلر اول-بولنى خرىد قىلىش بىلن بند....

شەرگە كىرە بېرىشە، بىر پىت قوچاغىدە يۇرگك^۲ كۇترگن كىمىر باشىگە مونىسىنى سالىب، بازارچىلر آرسىدىن مۇلەگە^۳ اۇخشىب كۇرىن ب قالدى. كىمىر قۇبىدەگى يۇرگكى اۋە يەلگىچە، آدمىلر آرسىدىن سوغرىلىب، كوچسىز حالتدە اۋزىنى بىر چىتگە آلدى. زۇرغە تېرەنىب، سۇنگ دوكانلر رىستەسىگە قرەب بورىلدى. «اۋزىنگە شكر ىرەتگن اېگم ابى!!» - دىبە اىغرنە-اىغرنە^۴، آرقەسىنى دېوارگە بېرىب، قۇلىدەگى توگونچىگىنى تۇنكەگە^۵ قۇىبىب، موربت گىنە^۶ اۋتىرىب آلدى.

^۱ چكى: چكك، چككە.

^۲ يۇرگك: غوندىك، چقەلاقنى اۋرە بىدىگن كىچىك چاىش، ياپىنچىق.

^۳ مۇلە: اېكىنزارلردە قوشلرنى قاچىرىش اوچون قۇبىلەدىگن آدم سىمان بىر جىسم؛ قراقچى.

^۴ اىغرنە-اىغرنە: نالىش قىلىب، نالىنىب.

^۵ تۇنكە: كېسىب تىلنگن كوندە.

^۶ موربت گىنە: استەگىنە، آرام گىنە.

يۇرگىنى بغيرىگە باسىب الەلەى بېردى. كىمپىر اېسكى گىنە بورونچىگى^۱ اُستىدە اۇرەب اوشلەگن يۇرگىنى تىزەلرى اوستىدە محكم توتىب، «الە بالم الە يا!» -دېيە سېكىن-سېكىن تېبەرەتە بېردى. اۇتگن-قېتىگنلر تانگ قاتىب قرەشر، ياقە اوشلب يۇلىگە بارىشر اېدى.

يقىندىن يىخشى تىكىلىب قرەلسە، ياشى اُلتىمىش بىلن يېتىمىش ارەلرىدە. خوارلىك و عذاب-عقوبت تارتىگىدىن اوازىنى اُلدىرىپ قۇيىگن. نورانى، كۇزلىدە مېر بلقىب تورەدى؛ كۇكرەگى داستانلرگە لىق تۇلە، دنيا كۇرگن بىر كىمپىر. قارەيگن يوزلرىنى اجىرىققە اۇخشىب اُجىن باسگن. توشلەدېك خىرەگىنە كۇزلىرى اىچكىرىگە چۇككن؛ تىشلىرى تۇكىلىب، لىلرى بومرە بىشىگن؛ قلىتېرەب تورگن قۇللىرىدىن كۇكرگن تامىرلىرى بۇرتىب چىققن كۇرىنەدى. اياغىدە لونجلىرى اوزىلىب كېتىگن كلاووش، توتوندىن سرغەيگن اېگىدەگى كېنگ چاپانى ساووقدىن اسرەب تورەدى. كوچىدىن تايگن بوگىنە كىمپىر ھنسىرەب-ھنسىرەب گىيرەياتگىدە سۇزلىرىنى چۇزىب-چۇزىب ايتەدى. ھر گېى ارەسىدە «اۇزىنگگە شكر»، دېب قۇيەدى. كىمپىرنىنگ چىل-چىل سىنگن اىينەدەى يوزلرىدىن كېچىرگن اغير كونلر-و قىغو-المىرىنى بېملال اۇقىب كۇرسە بۇلەدى.

كىمپىر يۇرگىنى توتگنچە دېوارگە سوبەنىب، اۇرنىدىن تورماقچى بۇلدى-يو، بىلى چىنب^۲ اُغرىگىدىن بۇلسە كېرەك، «اە تنگرىم!!»، دېب اوفكەلىب، قىتە اۇتېرىب اُلدى. اېتى سويگىگە يايىشىب كېتىگن كىمپىر قاق كۇزلىرى كاسەلرىدىن سىرىقىب چىقەياتگن ياشنى اۇنگىرى بىلن اُرىتدى-دە، «يا پىرىم اى!»، دېيە بوکچەيگن

^۱ بورونچىك: چادر.

^۲ چىنماق: سىنماق؛ درز كېتماق، يارىلماق.

قەدىنى يەنە ئۈنگەلەنگەندە بۇلىب اورىندى، تەين ئۈتيرىب قالدى. توگونچەسى بىلەن يۇرگەنى قىسىب اوشلەگنچە سېكىن يۇلگە توشدى. يورە تورىب آدمەرگە يوزلنرەن: «ئواب بۇلەدى آغەلرەم، بوگون مېن محتاجمەن، خدا يۇلىگە اتەگىنىگىز بۇسە بېرىنگلر، آچمەن، گدامن»، «مەنە شو بې غبار چقەلاق نىنگ ق... حرمتى» -دېب بىر-ايكى دوكانگە-دە، باش اوردى. ساتووجىلردن بعضىلرى بىر-ايكى تىلشەم نانمى، بىر سىقىم مەيزمى، حلومى، قارە قندمى، «خدا يۇلىگە»، دېب كىمپىرگە توتقۇزىلر. بېش-ئۈن قەدىمە-ئادىمەلە يەنە بىر دۇنگىلىككە بارىب چۇكىدى. شاشە-پىشە يىغلەياتەن ئالتى آيلىك نىبەرەسىنى قۇلىگە آلب، اووتىشگە توتىندى. تىلنچىلىكەن توشگەن ناننى اېزىب، سووگە باتىرىب، شىرەلتىب برماقلىرىنىنگ اوچى بىلەن چقەلاقنى يېدىرەبېردى. شو ارەدە اۈزى ھەم تۇير-تۇيمس، بىر-ايكى تەمشندى. كاسەدەگى سوودن بىر-ايكى ھوپلەدى چمەسى.

ماما^۱ يۇلىگە روانە بۇلرەن، دوكانلردن بىرىگە يەنە يوزلنىب:

- اۈغلىم! سىزگە بالە كېرەك اېمىمى؟ بوگىنەنى آلىنگە فرزندلىككە، ئواب بۇلەدى، خدا يۇلىگە آلىنگە، -دېدى.

ساتووجىلر كىمپىرنىنگ بو تەكلىفىگە پروا ھەم قىلىشمەدى. مامانىنگ صىرى تاشىب، غضبى اشىب «آدملر بونچە تاش بغير بۇلمسە اېدى!» -دېب افسوسلىنىب باش چىقەدى. اېندى كىمپىر، يۇرگەدەگى چقەلاقنى دوچ كېلگەن كىشىگە باقىب آلىش، اسرەب توتىشگە بېرگوچى بۇلىب تورىدى.

^۱ ماما: مامە، كىمپىر.

بو احوال انسان فكر و خيالىنى آغدر-تۇنتر قيلمەى قۇيمەيدى. چوقور اۇيگە تالەسن كىشى. «ينە كيم نينگ اويى بوزيلدى اېكن؟» -دېگن فكرلر بېاختيار ايچينگدن اۇتەبەرەدى. بىر جان نينگ ساپ بۇلىشى، بىر انسان تقدىرى نينگ ويران بۇلىشىگە سببلر كۇپ.

انسان شوندىە يرەلميش. جرلىك نينگ اوچيدە ساچ تالەس يدېك ايلينجنى اوزمەى قۇيمس اېكن. «فرزندلرى يۇلبدە عمرىنى كول قىلگن بو كمپىرنى نيمەلر بو كويگە سالدى اېكن؟» -دېگن فكر وجودينگنى كېميرە باشلەيدى. كمپىرنينگ آغىرىنى يېنگىل قىلە آسم بختيارمېن، -دېگن حسنى كۇنگلىندە توگەسن كىشى. جانيمگە جان، كوچيمگە كوچ قۇشلىب آياققە تورديم و بارە ساليب كمپىرنينگ قۇلتىغىدن اوشلب مجبّت ايلە سلام قىلديم. روحى سينگن، آرزولرى كوز يىراقلىرىدېك تۇكىلىب بۇلگن، ايلنجلرى ذرّە-ذرّە بۇلىب كۇككە ساجىلگن، اېزگو نيتلريگە چە برباد كېتگن بو قرى كمپىر بىلن نرراققە بارىب گېلشيشىگە باتىنديم. بو كۇرگوليك نينگ سببىنى بىلشيشگە-دە قىزىقديم.

- آيتىنگ دردىنگىز بۇلسە ماما جان، -دېمىن و سۇزىمگە دوام اېتەمن.
- قىامتلىك آنم بۇلىنگ ماما جان؛ سۇرەشگە عيب يۇق، كۇنگلىنگىزگە ملال كېلمەسەن تىغىن. قىسى قىشلاقدن كېلگنسىز ماما بو ياغىندە؟ -سۇرەدېم.
- گېنى قى-يېرىدن باشلب، نيمە بىلن توگتيشىمنى بىلمەيمىن بالم. آسمان باشىمگە نورەب توشدى، تنەم ايچىمگە تۇكىلىب توشدى. دردېم آغىر، آه! قىسى سىنى گپىرەى آغم؟ سىز سۇرەمنگ، مېن گپىرمەى بالم، -دېدى قريە.
- نيمە بۇلدى ماماگىنەم؟ -دېدىم ايچ-بغرىم اېزىلىب.

- باشىمگە مصىبت توشدى. يىگىت اۈلگور اۈغلىم مەھ رسول خاتىنىنى بۇغىب، بۇغىزلب اۈلدىرىپ قۇيدى. اۈزى اېرانگە قاچىپ كېتىن جانمىرگ، بىدرىك. بىراونىنگ ايشىگىدە مەھ شو بىرگىنە چقەلاق بىلن تۇكىلىپ قالدىم بالە! -اۈزىنى توتە-الەھى بىغرىكن كىمىر، -يورەگىم وىران! كۇرگىلىگىم قالدىمى مېنى؟ داد بالە نىمەسىنى ايتەيىن؟! ايكى كون دېگندە مەھ شو بىرگە كېلدىم. اېگم رەھم قىلمىكن؟ -دېدى.

- اېندى نىمە قىلماقچىسىز؟ -سۇرەدىم مامان. راستىنى ايتىم قۇشىلىپ بىغلىشگە سەھل قالدى.

- كۇرىپ تورىسىز بالە، سويكلىرىم تېرىمگە تۇكىلەھى دېب تورىدى. بوگون-اېرتەم بارمى، يۇقىمى بىلەيمەن؟ امانتىنى الەھى بىر كون. كۇزىم اچىقلىگىدە شوگىنە گۇدكنى بىراوگە بېرەيىن، وجدان عذابىدن قوتىلەيىن، -دېب كېلىپ اېدىم -دېدى او.

شو تابدە مېن:

- غم بېمەنگ ماما! فرزند داغىدە يورگنلر كۇپ. سىزنى بو احوالە خوار-زار قىلىپ قۇيمەيمىز. بىزدە ھەم يورەك بار. يىخىلىك ھلى اۈلگنى يۇق. يىخىلر بار كە يىخىلىك بار. ارتىق اۈكسىنمىگ، ھىچ نرسەنى اۈيلەمىگ ماما جانىم، -دېدىم و بىر از يانىدە اۈتىرىپ، قلىگە قولاق اۈدىم. دردىنى اۈدىم، كۇنگىلىنى كۇتردىم. اېچى بىر قدر بۇشەگندەھى بۇلدى.

قىشلاغىمىزدە فرزند كۇرمەھى يورگن يىخىگىنە اېر-خاتىنى بىلدىم. درگىنى قىلەھى-چى، -دېدىم-و، كىمىرنى تۇغرى اۈشەلرنىكىگە باشلب باردىم. بارىب

اېشىكىنى تق-تقلتتدېم. اۋچاغىنى قىزىتىپ، اېندى تندىردە نان پىشىرەى دېب تورگن مرجان آى اۋزى آلدېن، اېرى كېتىدن قرشىمىزگە چىقدى. سلاملىشىپ، حال-احوال سۈرەشدىك. اولرگە مېن:

- مە مېمان قوللوق بۇلسېن! آسماندىن سۈرەگن اېدىنگىز، بېردن بېردى يەرەتگن. ماما سىزگە مە شو قىزەلاق نېرەسىنى فرزندلىككە بېرماقچى. آلسىزلىرمى؟ - دېدىم مرجان آى و اېرىگە قرەب جىلمە يگنچە.

- ھە-دە، جانېم بىلن اكە جان! تىرناقلىرىنى كۈزلىمىزگە سورتىپ آلمەمىز، -دېدى مرجان آى يوزلىرىگە كولگى يوگورگن بىر قىافەدە.

- اوندە، مبارك بۇلسېن، بو قىزىنىگ آتە-آنەسى اېندى سىز بۇلەسىز، -دېدىم. ماماسى كۈمەچلەرىنگدن اۋىپ قالەى، جگرېمىنىگ بىر پرچەسى، -دېدى چقەلاقنى مرجان آىگە توتەياتىپ.

- اسمى نېمە اېدى بو عسل قىزەلاقچەنىنگ؟ -سۈرەدى مرجان آى.

- آتى يادگارە، يادگارە جان، -دېدى كمپىر اۋكسىنىپ.

سېوېنگىدىن مرجان آى بۇلسە خورسندلىككە چىقلگن لېلىرىنى چۈچەيتىرىپ، چقەلاقنىنگ يوزلىرىدن چۈلپە-چۈلپە اۋپدى.

- اېندى آتى يادگارە اېمس، سېوگى بۇلەدى قىزىمىزنىنگ، -دېبە قىتە-قىتە اۋىپ، سېوېنگىدىن بىرىگە باسدى چقەلاقنى. چقەلاق اېسە «اىنغە، اىنغە» -قىلىپ چومىشە^۱ بېردى. مرجان آى و اېرى تۇختە مراد: «خى كىرىنگلە اېندى، توز حقى، بىر پس دم آىب كېتىلر» -دېب بىزنى اۋىيگە آىب كىردى. تىنىشىدىك، مېن

^۱ چومىشماق: آياق-قۇلىنى يىغىپ، سىقىلىپ اۋزىنى جمع قىلماق؛ چىرەنىش بىر حالتگە توشماق.

اۋىلەگندىن ھىم مىرجان آى «بىر كۆرگىن قىردان، ايكى كۆرگىن جانە جان» - دېگىندەى قىلىپ كۇنگىل آلىدى. شو پىت زار-زار يىغلەياتگىن كىمپىر، اول چقە لاقنى، كىين مىرجان آينى قوچاقلىق يوزلرىدىن اۋىدى-دە، «دىدار قىامتگە» -دېيە خىرلىشىدى.

مىن اېسىم كىمپىرنى قۇلتىغىدىن اوشلىق مۇترىمگە مىندىرىپ، اوىمىگە آلىپ كېلىدىم. آنە نىنگ جايىنى تۇلدىردى. اوىمى نىنگ تۇرىدىن اۋرىن بېردىم. عمر يۇلداشىم ھىم خوش قرشىلەدى. دراۋ تىل تاپىشىپ كېتىدىك. خاتىنىم موسىچە دەى گىنە آق يويوب، آق ترەب، آنەسى اۋرىنگە قبول قىلدى. اېرتەسى كونى كىمپىرنى دوكتورلرگە آلىپ بارىپ قرەتدىم. او تىرك كىشىنى اېندى كىمپىر دېيىشگە تىلىم بارمە يىدى. تىرك انسانگە: عذر، سىز اېندى مېنگە آنە بۇلدىنگىز، -دېدىم. اۋغىل-قىزلىرىم ھىم مېر قۇيىپ ماماسىنى يىخسى كۇرىپ قالدىلر. قوتلوغ دېمە يىسىلر مى انسانلر؟! او كىشى مېنىنگ آنە بۇلدى...

مىنە آرەدن پىتى يىل اۋتدى. بارىنگىزگە شكر آنە جان، -دېمىن. آنە جانىم اۋز حالىگە كېلدىلر. يىگوليك، اىچكوليكلىرى يىخىلىندى. فقط تىنەسىدىن آغرىقلىرى كۇپ وقتگەچە كېتمەى توردى. ايكى آدم نىنگ حياتىنى سقلىپ قالگىنىمدىن اىچىم يارىشىدى، يىنگىل تارتىپ، روى قووناق چولغىب آلىدى مېنى.

اېندى آنە جانىم اوىمى نىنگ كېكسە دعاگوبى بۇلىپ يىشب تورىدىلر. يادگارە ھىم سېوگى بۇلىپ، كولىپ-اۋىنپ، آنە-آنەسى نىنگ بىرىدە، كۇز اۋنگىدە يىرەب يىشەماقدە. مىنە ھەدېمەى سكىز ياشىگە كىردى. سېلكىللەگىن قىز بۇلىپ قالىدى. سېوگى جان ماماسىنى، بىزنى و آتە-آنەسىنى يىخسى تىنىدى. مامەسى بىلن

اۋىنىشنى كۆپ يىخى كۆرەدى. مەر-شمر حيات؛ تۆكىن-ساچىن دستورخوان، كېلدى-كېتىدىلر، سودا-ساتىق دېگنلرېدىك ھەمەسى اۋز اۋرنىدە، بوندىن آرتىغى بۇلمس.

ھەمەلشىب ھفتەسىدە بىر مرتە مامەسىنىڭ يادگارى بۇلمىش سېوگى جاننى كۆرىشگە بارەمىز. اپرتەگە جمعه كونى سېوگى خان اۋزىنىڭ سېوېكىلى ماماسىنى مەھمانگە چقىرگن. خوشبختلىك كۆرىپ كېلەمىز نصىب بۇلسە.

حكاىەمىز قەرمانلرى عىن كونلردە حياتدىرلر. يادگارە دېيىنمى، سېوگى دېيىنمى بىر ھم چىرايلى قىز بۇلگن كە آلىب قاچگىنىڭىز كېلەدى. زھنى اۋتكىر، مکتىبگە عشقىنى قۇيگن. كمپيوتەر، رياضى و انگلىس تىلىگە كۆپ قىزىقەدى. سېوگى خان آلدىدە ھلى كۆپ يىخى كونلر تورىيدى. بختلى بۇلەدى....

۲۰۲۳/۴/۱۷

كانادا/تورانتو

آمازون

آمازون

ساووقدن بىر هفتهچە اويدن تشقريگە چيقيشگە ايستهگيم بۇلمەدى. يلنگليب قالگن طبعيتنى ايزغيرين چولغهگن كونلر. انسان ذاتيگە حركت سيزلنيب قاليش نينگ اۇزى بىر كتە يوك اېكن. ايچيم قيسيپ تشقريگە هوا الگنى چيقديم. نيمه بۇلسە هم طبعيتگە قاريليب يششگە نيمه ييتسين. انه طبعيتدن ابراق كانكرت اويلردە يشش انساننى كسلمند قيلدى. بىرگە دومەلمەي، چنگ و لايگە بېلنمەي اۇسگن بالەنينگ سويگى مۇرت^۱ بۇليب اولغەيركن؛ تېز-تېز شماللركن. كۇچەلر بۇم-بۇش، آرە-سيره قلين كيينيب الگن بيتە-يريمتە آدملرگە كۇز ايلينەدى. مۇترلر نينگ قتناوى هم سييرهكلشگن كونلر. ألمە خانلر دۇملرني ليككيلتگنچە، درختلر و بلند قوۋەت بنالرگە كۇتريلگن. آسمان تېز-تېز آينيب، اۇزگريب توربيدى. اۋشە كونى هوانينگ خۇمى بوزيلگندى؛ بىر پسە كوجلې بۇران بۇز كۇرستدى، ساوووققە آيلندى. باشيدە سيم-سيم شيبات اېسدى، آرتيندن اېلكدە اون اېلەگندەي سېپيب ياغدى، سھل اۋتمەي، بىرگە

^۱ مۇرت: اېگلمسدىن سينەديگن، سينووچن.

قلىن گىنە قار تۇشەلىپ، تېورەك-اطراف بىردن آپاق كىيىمگە بور كندى. قار كېتىدىن قار، سۈەلب، باسىپ ياققىنى-ياققىن.

تولويونۇدە: «بېرتە گە چە كىندىككە چە قار ياغەدى، يۇلار وقتىنچە يايىلىپ، ترانسپورت قىتتاوى تۇختەدى...» -دېگن بشارت يىنگرەب تورىدى. صناعتلىشگن بىر اۆلكە اوچون ھەر قندەى طبعىت اينجىقلىكلرى ھىمەسىز كېچىرگن. قايىل! ھىچ نىمە بۆلمە گندەى - منە ھەر كونگى تىرىكچىلىك يىنە اۋز ايزىگە توشىپ كېتىدى. ھەر بىر فصل نىنگ اۋز گشتى بار. قىش نىنگ قارىنى سېومەى بۆلەدىمى؟ شونىنگ اوچون بو يېرلردە قار گۈزلىك بېلگىسى؛ اوندن قۇرقىش-ھىدىك سىرەش يۇق. قار طبعىت ساوغەسى، فصل نىنگ كۆرك-جمالى. قار ياغمەسە بىر ھم خودى انسانگە اۋخشىب كسل بۆلەدى، او ھم تىرىك جان-دە. بو يورتلردە قارسىز حىياتدە ھىچ قندەى معنا يۇق.

كېچقورون بۆلەپىدى، تون اۋزى نىنگ قارە پلاسىنى تۇشەى دېب تورىدى. ھەدېمەى، ھمە ياقنى قارانغىلىك قاپلب آلەدى. آلدىندە ھلى اوزاق تون، قىش نىنگ اوزون كېچەلرى خودى آدم باشىگە توشگن آغىر-زىل^۱ يوكدەى گۇيا. شونچەلر آغىر كە اونىنگ زلوارى كىشى اۋى-خىيالىنى بوكىب، بېلىنى قىرسە سىندىرىپ تشلەيدى اېكن. اويقونى كۆزدن تارتىپ آلر، تاتلى تويغولرنى اوشلمس آرزولرگە باغلب تشلر، روحنى قوتغولر گردايىگە اولاقىتىرر، شو اىلس تونلر توشىنگىنى حسرت تخته سىگە مىخلب قۇير و نھىت آدمنى دەيدى فكرلر اىچرە سرسان-سرگردان قىلمسدىن قۇيمس اېكن. چىدەب يشەيسن اېكن. ھەر يىل شو داستان، ھەر يىل شو

^۱ زىل: بىردن اوزىب بۆلمەيدىگن درجەدە آغىر.

سودا. ھەر بىر آدم نىنگ اۈز كېچمىشى، آغرىقلى، عذابلى كونلرى بۇلەدى. سېزىملرى موزلب قالگن آدملر آز اېمس. نفسىدن، قارنىدن اۈزگە دردى يۇق انچە- مونچەلرنىنگ. اىچكى يرەلر تقيميگە تيزىب قۇيسە بۇلەدىگن گپلر مۇل. بونىنگ اوستىگە اۈتمىش گزەكلرنى قۇشىب گپىرسنگ، اېسلەسنگ كىشى نىنگ باشى اىچىگە اۈيىرلىب توشوگندەى بۇلەدى.

ھەر تور آدملرگە دوچ كېلركنسن. شولر آرەسىدە مېن بىلگن، تنىگن بيتە آدم بار. اتى نظر، ياشى اولوغ بۇلگنى اوچون نظر تاغە دېيشەدى. او قىرق اىكى يىلدن بېرى چېت اېلدە، غربت ديارىدە يشب كېلەدى؛ تىنچ زمانلردە تقدىر اونى شو تامانلرگە تارتىب كېلگن. او قەرەتان قىشلردە بىر دردكش تايىب، اىچىنى بۇشەتىشنى اۈلگودەى يىخشى اىستەيدى. «سۈزلىشگنى آدم تاپمەسم، ترسە يارلىب اۈلەمن آغە» - دېدى ھەر بىر سىم قاققىدە. نظر تاغە باشىدن كېچىرگن دۈرلرنى «انقلاب» دن كېنىگى زمانلرگە سالىشتىرىب بىلگىسى كېلەدى. او كۈرگن آدملر كۇپى اۈلىب كېتگن. قىرق ياشگە كىرگنلردن ھىچ كىمنى تنىمەيدى. قىشلاغى نىنگ حازرگى قىافەسى بىلن قىزىقەدى. اويىدە اۈتىرگىسى كېلەمەى، بىر دردلىشگنى قۇشنى نىكىگە بارەدىگن بۇلدى. يقىندە دۈست توتىنگنلر. جانە-جان اۈرتاقدىرلر. دۈستى نىنگ اتى رحىم، اىچىل آدم، اۈتمىش بېش ياشلردە. اىكلەسى بىر شەردە قۇنىم تاپگنلر. سكسان بېش ياشنى قارەلەگن نظر تاغە ھلى بەياو، تېتىك. يورتداشى رحىمگە جىرىنگ-جىرىنگ قىلىب سىم قاقدى:

- سلام رحىم جان، يىخشى مىسىز اوكم؟

¹ بەياو: جرار، بەقوت، كوچلى آدم.

- سلام، رحمت تاغە جان؛ اۋزىنگىزدن سۇرەسم.

- اويدە بۇلەسىزمى بو كېچ رحيم جان؟

- ھە اويمىدە بۇلەمن تاغە.

- بىر دردلىشگنى قاشىزگە اۋتەى، -دېب اېدىم.

- كۈز اوستىگە، كېلىنگ تاغە.

- قارلى تونلردە كۈنگىللەشيشگە نىمە يېتىدى؟!

- آدمىنىگ دردىنى آدم آلەدى؛ آدم-آدمگە غنىمت، -دېدى رحيم باى.

اېشىك تق-تقلەدى. رحيم باى باريب اېشىك آچىب، مېھماننى كوتىب آلدى. ھلى كۈرپەچەگە چۈككەلەمسدن حيم باى تلوزيون تاووشىنى پىسەيتىردى. ايكالولرى قويوق حال-احوال سۇرەشدى. بىر پيالە قرمز چاى اوستىدە صحبت قورە باشلەدىلر. گورىنگلر قىزىگن سرى قىزىب بارر اېدى. نظر تاغە كۈزلرىنى پىر-پىرلىتىب، قاشلرىنى چىمىرگنچە، چىنى پيالەدەگى كۈك چاينى ھوپلرکن، حيم باىگە تىكىلدى و سۇز قاتدى.

- بىلەمن، اۋشە مشئوم اۋتمىشدن سۇز آچىش نەقدر آغىر اىش. مېن انقلابدن آلدىن تشقرىگە چىقىب بوياقلرگە كېلىب قالگنمن. يىخشى اېسلەى آلەسنگىز كېرەك او زمانلرنى. يېتى-سكىز ياشلردە اېدىنگىز. مېن مکتب كىتابدارى اېدىم. آدملرنى خرافات پىرستلىكدن تىنىشىگە چقىردىم. مەناسىنى بىلمەگن نرسەلرنى طوطى قوشدەى سىرەب يورىشدن كۈرە، دىناوى، انىق بىلىملرنى اېگللىنگ، نىسە حلوا اوچون نقد شپەلاقدن اجرەلمنگ، -دېر اېدىم بالەلرگە. تسىيح، آفتابە و عصا بىلن پىرەتگننى تىب بۇلەيدى. علم بىلن گىنە (اگر بار بۇلسە) تنگرىگە قاووشىش،

اېرىشىش مەمكىن، دېب اېدىم اۋىشندە. تېكىنخۇر ماللارگە ياقمەدى گېيىم. دراو پىشانەمگە دەھرى لىك تەمغەسىنى باسە قالدىلر. ھەر قندەى نامنى قۇيىش اولر اوچون آپ-آسان اېكن... شو باعث يورتىمدە سىغمەى قالدېم. منە اۋىشندىن بېرى شو يېردە قۇنىم تاپگىنمىن اوکە.

قۇنىق ايتىگىنلرىنى جان قولاغى بىلن تىنگلرکن، رحىم سۇز رشتەسىنى قۇلگە آلدى، و يوزلرېگە كولگى يوگىرگىن بىر احوالده گېيرە كېتدى.

- كۇنگىلىنىگىز چۇكمەسىن تاغە، سىزنى كۇپچىلىك ھنوز ھم يىخشى نام بىلن اېسلىشەدى. سىز ايتگىن اۋگىتلرگە عمل قىلىنسە شو كونلرگە توشمىدىك؟ چوقور خۇرسىنرکن، نظرتاغە كفىنى اىبەگىگە تىرەب، چوقور اۋېگە تالدى. سۇنگ يورەكدن كۇچىب سۇزېگە دوام بېردى.

- وطن دېگنى بىر درد، تاتلى بىر آغرىق بۇلرکن اوکە. بو درد و آغرىق بارىب- بارىب سېنىگ قانىگگە قۇشلىب، جانىگگە يوغرىلىب كېترکن. يورەكنىنگ بىر تارى وطن دېگن بىر شىرىن تويغوگە آسىغلىق توررکن. شكر، مېن دىنانىنگ اېنگ يىخشى دملرىنى چېت اېلدە اۋتكزدېم. حىاتدن فىض-بركت تاپتېم. اۋغىل-قىز آرتدىردېم. كۇنگىلىنى بىر كتە «دردنامە» دېسەنگىز، بو كىتابنىنگ اېنگ يارقىن و اېنگ اېسدە قالرلى صحىفەسى، فصل و بابى ھم شو وطن اېكن. دىئادىن تاپگىنىم شو بۇلدى اوکە. شونىنگ اوچون وطننىنگ يىخشىسىنى ھم، يامانىنى ھم اېشىتىگىنگ كېلەبېرەدى. وطن يوزىدن گرد، غبارنى آرېتەمن دېسىن-و... نە علاج. - مېنىنگ وطن حقىدەگى تصورىم عموماً باشقەچە تاغە جان. بېزىمىن شو وطندىن. بىزىنىنگ ھم اولوشىمىز بارمى بو يورتدە؟ بىندەگە بىندە بۇلىب يشەسك. اېى اۋرگىلىب

كېتەي، شو يم وطن بۇلدىمى؟ نېمەسىنى گېيرەي سىزگە. اۋلىككە آيتىشدىن اويەلەياتگن وطنىمىز بار. يىنە نېمەسىنى سۇرەيسىز مېندىن، -دېدى رحيم مد نظر تاغەگە قرەب تورىب.

- يۇق رحيم جان اوكم، عيب وطندە اېمس. او سىز و بىزگە اۋخشەگن انسانلرنى واپەگە يېتگىزگن تېرگ توپراق. ھەمەمىزنىنگ بالەلىگىمىز، ياشلىگىمىز، يىخشى-يامان كونلرىمىز اۋشە بېردە مېرلنگن... او بېردە فقط منگو تاپىشىمىز، قۇلىمىزدە اېمس. - قۇيىنگ اې تاغە! شونى اېسلەسم اۋپكم آغزىمگە كېلەدى. يورەگىم آرقەمگە تارتىب كېتەدى، روحىم سىنىب، اىچىمگە تۇكلىب توشەدى، -دېدى رحيم صحبتگە قۇشلىب.

- مىلى، شولر يورەك زىنگىنى آلرکن اوکە. وطندىن گېيرەيلىك، وطندىن سۇيلىنگ رحيم جان. خيال مېنى اۋشە توپراق باسىب ياتگن، كۈچە-كوى، قىشلاق- محله لرىمگە آلىب قاچەدى. بالەلر بىلن تونلرى گوجىم، يىشىن-يىشىن اۋىنەگىم؛ ارىققە اۋمگن تشلب سوو اىچگنلرىم، خىويچلردن تاى يىسب مىنىب يۇرتگنلرىم؛ كۈچە چىنگىتىب تۇپ، چىللك اۋىنەگنلرىم؛ تېنگفورلر بىر بۇلىشىب ساي-ادىرلردن لالە-قىزغىلداقلر تېرگىمىز، جۇرەلشىب بۇيىنگە قۇنغىراق تقيب، «شېر كېلدى» اۋىنەگنلرىم، بىرى-بىرى كۇز اۋنگىمدىن اۋتەبېرەدى. آينىقسە، قىزلر دۆرەسىدە تورىب «يار-يار»، «ناى-ناى» آيتىملرىدىن قولاقلىرىم آرام آلگنى؛ «زىبا جان»، «آچىل قمىش» داستانلرىنى بېرىلىب اېشتىگىم يادىمگە توشەبېرەدى. قىسى تىل بىلن آيتەي اۋشل اينجە تويغولر كېچىملىرىنى؟ انمىنىنگ الەلرى ھمان قولاقلىرىم آستىدە

¹ يۇرتماق: بىرىك قىم بىلن تېز يورماق، يېلماق؛ لۇكىللەماق.

جرنگلەيدى... گېيرىنگ اوكم اۋشە وطندىن سۈزلب بېرىنگ رحىم جان، -دېدى
كۈپدىن بېرى چېت اېللردە ايچى زىل آلىب كېتگن نظر تاغە گېيدە داوم اېتىب.

وطن دېگندە جھلى چىقىب، غىجىنى^۱ كېلەياتگن رحىمىنىگ هيچ هم گېيرگىسى
يۇق. آلمىنى يىنگىلەگىسى كېلمەيدى. بىر بهانە بۇلسە تىلگە كىرىشى هيچ گپ
اېمس. گپنىگ چۇغى يېتمەى تورييدى چمەسى.

- يوره ك بېتلمسە قىين اكە؛ قۇيىنگ سھل يىنگىلراق گېلردن سۈز قاتەيلىك. شولر
بىلن هم دردىنگىزنى آلسە بۇلەدى تاغە جان؛ ايچىنگىز چىللىرى^۲ يېچىلىب، يازىلەسىز
-بىلەمن.

شو پىت رحىم اۋرنىدىن توره سالىب، آشخانەگە باردى. گزەك^۳ قىلىش اوچون
موزلتگىچدن اوچ-تۇرتتە شۇر بادرىنگ، مېو-چېو، بىر بشقاب يېگوليكلرنى، بىر
شىشە آقيدن كۇتريب كېلدى و دستورخوان يايىب عراقدن قىدلرگە قوقولتېب قوبە
باشلەدى. آقات تيار بۇلگونچە آتملشەيلىك^۴، دېدى. قىتە-قىتە آلە باشلەدىلر.

- آلىنگ اوكە يىخسى كونلر اوچون ايچەيلىك. كېلىنگ اچىق دردلرنى اچىق سوو
بىلن كېسەيلىك. توشونسىگىز بو دملر هم غنىمت، -دېدى نظر تاغە. چىق-چىق
اورىشتىرىلدى قىدلر.

- منە بو باشقە گپ. آىتمەيسىز مى آتم، سىرەتەياگنى بار دىب. كۇتردىك بۇمسە
- يىم. آدملىرگە اېزگوليكلر تىلب ايچەيلىك، عالم و آدم باشىدىن تىنچلىك آرىمەسىن، -

^۱ غىجىنى كېلماق: غشى، اچىغى كېلماق، جھلى چىقماق.

^۲ چىل: آزار، رنج، درد.

^۳ گزەك: ۱. يرهنىنگ، شكىستلنگن جاي نىنگ بللىلنگن، بىرىنگ آگن حالتى. ۲. اشتها آچر يىنگىل آوقت.

^۴ آتملشماق: حسرتلشماق، يوره كدەگى درد-المىلرنى اورتاقلشماق.

دېدى رحيم. مد نظر تاغە ھەم شرابى يوتر-يوتمس سۇزلىرى تصدىقلەگن بۇلىب باش ايرغەدى.

خىرە چىراق نورلى آستىدە، روماتىك بىر فضا حەم سورماقدە. تلويزيون اكرانىدە قىسى دىر اۋلكەنىنگ قارلى منظرەلىرى كۇرستىلماقدە ابدى. موزلىرى يارىب بلىق اولەياتىنلر صحنەسى توگب، كېتىدىن ابدى قارلىكلر تىگىدىن ھىيتلى آيىقلر تشقىرگە چىقەياتىگندى. شو آباق آيىق بالەسىنى آچىق ھوا بىغرىدە سىلب، سىپەلب اولرنى محافظت قىلەياتىگنى كۇرستىلدى.

شراب قوبىلگن شىشە قىدلىر ىنە جىرىنگللىتېب اورىشتىرىلدى. صحبت قىزىب كېتسىن اوچون ىنە اوچ-تۇرت قىدح كېتمە-كېت كۇترىلدى. صحبتلر بارگن سىرى قىزىب بارماقدە ابدى. تشقىرىدە قار چۇككن اېسە-دە، خانەدە قووناقلىك حەكران. اوى دېوارلردىن كولىگى ياغىلگندەى ابدى اۋشە دىملردە. عراق شىشەسىنى آخلىتمەى تورىب، اىكاولان بىر از يورەكلشدىلر، تۇيب-تۇيب يىغلىشىدىلر ھەم. آقتىدىن اوزاق چۇزىلەياتىگنگە اۋخشەپىدى صحبت.

- وىطندن گىرىنگ اوکە. اۋشە انقلاب باشىدەگى گورىنگلردن آلىنگ، -دېدى ىنە مد نظر تاغە.

اوزاق سكوئەگە كېتىگن رحيم كرسىللىتېب تىشلەگن شۇر بادىرىنگى يوتدى-دە، برماقلىرى ارەسىدەگى سگرتىنى تارتەياتىب سۇزگە كىردى:

- بۇلمەى كېتسىن ابدى، انقلاب بۇلدى-يو، اېل-يورتنن امانلىك كۇترىلدى. اۋرتەدە ھىچ نرسە يۇق، ھەمە بىر-بىرىنىنگ دشمنىگە آيلندى قالدى. كۇچە-كۇيدە اوچرەتگن آدملىرىنگ خودى، اوگە چىققن مېرگنگە اۋخشىب، «منە اوچ آلىشنىنگ

پىتى يىتدى» -دېگندەي، بىر-بىرىنىڭ آرقەسىدىن توشىن. انقلاب آدملىرىگە ياۋوزلىق اېشىگىنى لىڭ آچىپ تىشلەن بۇلدى. نېچە يوز يىلدىن بېرى گزەك آلىب ياتىن عىلت و يىرەلەرنىڭ اوستى آچىلدى. ايشانەسىزىمى؟ قوياش قىر-آدىرلەر آرتىگە باتىشى بىلەن تونگى ساكنلىك بوزىلدى. موشوك سىچقانى بۇغىزلىب آلىڭدېك، ھەر كىم كۆز آستىگە آلىن آدەمنى كۆرپەسىدىن سوغورىپ، آلىب كېتەبەرگەن زىمانلەر اېدى. اېچىم تۇلە داستان، او ياغىنى سىز سۇرەمىڭ، مېن آىتمەي اكه!

- يىنە نىمەلەر يوز بېردى اۋشە يىللەرى؟ -سۇرەدى مد نظر تاغە.

يوزلەر تىرەنگ تارتىن، شراب كىفى بىرەسىگە تاشىن رىھىم، واقىلەرنى بىر-بىرىگە اولب گىپىرە كېتدى. باشلەن جىملەسىنى اداغلىمەي، بارىب تلوزىوننى آوازىنى غىپە اۋچىردى. تى وى بېتىدە اللە قىسى يورتىنىڭ بې-پايان دلەلەرى، سۇلىم طبعىتى، تورلى-تومەن جىوانات، طرفە قوشلەر، باي و كۆم-كۆك اۋرمانلەر نىمىش قىلىنماقەدە اېدى. رىھىم كۆزلىرىنى تلوزىوندىن اوزر-اوزمىس كېلىن جايىدىن سۇزىنى دوام اېتىدى.

- اۋشە پىتلەر، بىلەسىزىمى تاغە؟ اېرتەلب تانىڭ آتىشى بىلەن مىلە، قىشلاقلىردە ساۋوق خىر، دوو-دوو گىلەر. كۆرىسىز كە، كىمىلەر كۆرگەن توشلەرنىڭ بىرى راست چىققەن بۇلىب تورىدى. كىملىرى آلىب كېتىلگەن، كىملىرى آتىب كېتىلگەن. اۋچىلەر نىشانگە آلىن آدەمنى تاپە آلمىسە، خىرمانىنى كۆيدىرىپ كېتىشگەن؛ مال-ھالى بۇلسە اولەرنى سورىپ كېتىنلەر. شوم خىردىن باشقە نىرسەنى اېشىتمەيسەن كىشى. اۋشە كېزلىرى قىرەب سىز كە، «داد اۋغلىم، داد آتەسى، اېندى قىگە بارەمن!!» -دېب باش-باشىگە اورىپ كۆچەگە چىققەن خاتىن-خىلچىن كۆپ نىرسە يۇق. خىلص، ھەر

تونى كېمىنىڭ دېر تاماغىدىن بۇغىب ئايب كېتەبىرە دىلر. اوشلب ئايب كېتىلگنلر نىنگ كۇپىسى دام-در كسىز يۇق قىلىنردى. باردى، بىرارتەسى نىنگ ايسى چىقىب قالسە، تپە-تپار دىل تاپىب قۇيىشگن اولر. نىمە اېمىش؟ «فلانى كافر اېمىش!».

خدانىنگ نامىدن گېيرەياتگن نادان كىمسە لرگە «بوندەى قىلمنگلر گناە بۇلەدى، بو ايشىنگىز يىخشىلىككە ئايب بارمەيدى» -دېب كۇرىنگ-چى؟ درآو نرىگى دنياگە روانە قىلەدى، قۇيەدى. اۇزى الفگە شرمندە تۇپارى¹ آدم نىنگ فتواسى آتەيىن عرشى اعلى دن توشىرىلگندەى. بو يروقلر بجرىلىشى كېرەك بۇلىب قالگن زمانلر اېدى.

هيجانىدن ھنسىرەب قاپ-قارە تېرگە توشگن رحىم چۇنتىگىدن قۇل رۇمالىنى چىقىرىب يوزىنى آرپتدى-دە، كېلگن جايدىن يىنە سۇزىنى دوام اېتدىردى، گېلرى باشىدن كېچگن كۇرىنەدى.

- چومچوق پىر اېتسە، يورەك شىر اېتەياتگن انلرنى اېسلىشدىن عذابى بۇلمسە كېرەك اكە. آدملر آرەسىدە «ھمە گپ شو باش يلانچلردە؛ گۇرى كويسىن خلقىلر، پرچمىلر - اۇشە ترەكى و كارملنى» -دېگن سۇزلر تېز-تېز قولاقلىرگە اورىلىب تورىدى....

- ايتىشىزدن بو، زامبىر اويەسىنى قۇزغەگن اېكنلر-دە. تىنچ يورگن آدملر شوندەى قىلىب، بىر-بىرى نىنگ جانىگە دارىدى دېنگ. بىلەسىزمى رحىم جان، سوادسىز آدملر سورىك گلەگە اۇخشەيدى. آلدىندە گىلرىدن بىرى جرگە تىشلسە، كېتىدە گىلر ھم آرقەسىدن اۇشە توبسىزلىككە اۇزلرىنى تىشلەى بېرەدى، آتەبېرەدى. آخرىدە

¹ تۇپارى: جاھل، ھىچ نرسەنى بىلمەيدىگن، قىلوپىرلىكنى بىلمەيدىگن.

كۆرىپ سىز كە، بىرى اوچىپ اۋلگن، -دېدى نظر تاغە گورىنگى اېشىتە تورىپ، -
 مىلى او كە! ایتەبەر-چى، سۆزلىرىنگ نىنگ توزوكراق، ياقىملى جايى چىقىپ قالر.
 صحبتداشلىر دقتىنى تلوزيون اۋزىگە قرەتدى. شوندا چىكىسىز اۋرمان اوستىدىن تىك
 اوچر پرواز قىلەپىدى. نق آمازون اۋرمانى اېدى. تېبەدن تورىپ، يىلاولردەگى
 حيوانلر حياتىدىن فلم تۇلدىرىلماقدا اېدى. اۋرمان سلطانى بۇلمىش ارسلان ياووايى
 بوقلەرگە تشلنماقدا. فىللىر، ياووايى ھۆكىزىلر جان ھىمەسىدە اۋزلىرىنى شدت-لە
 آقەياتگن كېنگ درياگە اورر، حالىدىن تايگنلىرى ارسلانگە يېم بۇلماقدا. بې آزار
 كىيىكلرنى اېسە يۇلبرىسلىر، دۆلتلەر^۱ آلدىگە قوويپ سالگنى سالگن. قاچىپ
 قالەلمەگنى خام تلاش بۇلەياتگندى. خلص، حيوانلر اۋرتەسىدە اۋرماندا اۋرمان
 قانونى حكمران. قىسى دىر حيوان اۋزىدىن كمزۇرراغىنى بۇغىزلب يېيىش بىلن آوارە.
 رحىم تىلى بىلن انقلاب زمانىنى حكاىە قىلسە، برماقلىرى بىلن تلوزيون اكرانىدە
 نمايش قىلىنەياتگن قۇرقىنچلى صحنەلەرگە اشاره قىلىپ تورىدى.
 - قالگىنى اېشىتىنگ اكه. مېن گىپىرەياتگن داستان نىنگ ھلى بىرى كېتى
 كۆرىنەياتگن نرسە اېمس. عصرلرنى قرىتەياتگن داستان بولر. مىلى، بىتەسىنى ایتە
 قالەي:

اۋشە كېچەسى آتلىقلر كېلىشىپ، جۇرە اكه نىنگ اۋغلى حق بېردىنى آلىپ
 كېتىشىدى. دام-دركىسىز كېتىدى بالە. آتە-آنەسى نىنگ دادى فللكە چىقىدى...
 بارمەگن، باش اورمەگن اېشىگى قالمەدى. عابىلەدە بىر اۋغىل اېدى-دە اۋزى. فرزند
 داغى يامان بۇلركن، -دېدى او.

^۱ دۆلتە: سىرتلان؛ اۋلىمىتىك بىلن آذىقلەندىگن، بۇنىدە يالى بار، رنگى يشش جايىگە ماسلشەدىگن بىر تىچ سوت اېمىزووچى حيوان.

- تەغىن نىمە بۇلدى، بېيى درك كېتىدىمى؟ ياكە تىرىك بۇلسە، اونى تاپىشگە ھېچ ياردەم بېرمەدىمى؟ - سۇرەدى نەزەر تاغە.
- آخىرى درگى چىقىدى. حق بېردىنى كەتە تاشگە، كىمىتەگە ئالىب كېتىشىگەن ئېكەن.
- جۇرە اكە ئۇشە جايگە بارىپ ھەم كېلدى. لېكەن ئۇغلىدىن خىر تاپمەي قىتدى.
- عقلىدىن آزەي دېب قالدى بېچارەلەر.
- كىمىتەگە آقساقاللىردىن كىمىنى دىر تاپىپ يوبارسە بۇلمىسىمى ئابدى شىفاعەت سۇرەب؟ - دېدى نەزەر تاغە.
- كەتە - كىچىك صەمدى بېجىرنى ايشىگە سالىشىدى، - جەواب قىلدى رەجىم.
- ھە! ئۇشە صەمدى بېجىرنى ئايتەنمى؟
- ھە - دە، ئۇشەنى ئايتەن.
- چىيانگە ئۇخشەب، خەزر بېتىمىشىنى قارەلگەن دىر او چال. ئۇتە چىقان، بەياو، جودە
- ئېچىل، ايلان نىنگ ياغىنى يەلگەن آدم ئېكەن.
- ھە، بىز اونى صەمدى مەزەنگە، دېب چىقىرەر ئابدىك ئۇشە زەمانلرى.
- ھى، ئۇشەنى گېرەپمەن. ئالتمىش ياشىدە يولغوندى¹ يېلىپ، ايشىنى بېجىرەپ قىتدى. بو ياشدە تەكەدېك سىكرەب تورگەن آدمىنى كۆرىپ خىران قالەسىز. راسە چەبىر آدم ئېكەن. او توشمە گور بېتە شىرط بىلەن جۇرە تاغەنىنگ ئۇغىلى حق بېردىنى بارىپ، عىنى كەتە تاشدىن ئالىب قىتدى. او بلانىنگىن بىلاسى ئېكەن. كىمىتەدە گىلەرنى نىمە بىلەن كۆندىرگىنىنى بىلمەدىك.

¹ يولغون: گۈلى مەيدە، آقىش، مەيدە بىرگىلى بوته.

تون يريمىدىن آشدى. شىمال ضرىبىدىن دېرۋە شىشەلرېگە كېلىپ اورىلەياتىگن قار پىرچەلرى جىپە ياپىشىپ قالەياتىر اېدى. تشقىرىدەگى اوىيلگن قارلرېنىگ اُپاق رنگى خانەگە ترەلىپ تورىدى. دېرۋە شىشەلرى موز باغله گن. شو پىت كۈچەلرنى تازەلەياتىگن ماشىنلرېنىگ غىر-غىرلەگن آوازى صحت نىنگ بېلىگە تېپەدى. آمازون اۋرمانلرېدەگى حىوانات عالمى زنگارى اكراندە كۈرىنمەى قالدى. اۋرمان اېتىگىدە، ياوواىى تاووقلر اۋز جۈجەلرى بىلن جوغىرلشىب دان-دون تېرىپ بىيەياتىگندى. شو پىت تىنىق آسمان اوزرە شونقار اۋچى قوش پىدا بۇلە باشلەدى. اۋت-اۋنلر آرەل بىورگن تاووقلر بىردن بىر تۈدەسى خىل-خىل بۇلىشىب، اۋزلرېنى پناەگە آلىشىدى. اۋچى شونقار يوكسكلىكدن تاووقلر تۈدەسىگە تشلندى. اۋلجەسىنى آلەلمەگچ، اۋچى شونقار ىشىن تېزلىگىدە ىنە كۈككە كۈترىلدى. آنە تاووقلر اېسە قوت-قوتلىشىب، بالەلرېنى قناتى آستىگە آلىشىدى. اۋچى شونقار بىر نېچە بار اۋلجەنى چنگلىگە اىلىنتىرماقچى بۇلدى-يو، علاجىنى قىلەلمەدى. سېرگك تارتىگن آنە تاووقلر جۈجەلرېنى اجل قىرغىسىدىن زۇرغە سقلب قالىشگە موفق بۇلدىلر. اۋچى بورگوتلرېنىگ بات-بات اورىنىشلىرى نىتجەسىز قالدى. رحىم نىنگ كۈرگن-كېچىرگنلرى اۋرماندەگى تلە-تۇپلرېگە اۋخشىب كېتەدىر اېدى. رحىم:

- بىر شرط عوضىگە، - دىدى.

او نظر تاغەنىنگ ىنە دقتىنى زنگارى اكرانگە بوردى. نظر تاغە بۇلسە شۇر قمست نىمە بىلن توگىنى بىلماققە آشىقە پىدى.

- شرط دېدىنگىمى او كە؟ نىمە شرط عوضىگە بو اىشنى قىلدى او قارە باتىرلر؟

رحىم بۇلگن واقەنى بىر چېكەدن اېتىب كېتدى:

- جۇره تاغەنينگ بيتە تۇقۇز ياشر قيزىنى خاتىن قىلىپ آلىش حسايىگە ايشنى بجردى، قۇيدى صمد ابجىر. كۇپنينگ آلدېدن اۇتدى، نان سىندىرىلدى، دعا- فاتحه بۇلدى. او سۇزىدە تورىب، حق بېردىنى آتە-آنەسىگە آلىپ كېلىپ تاپشىردى. قىزچەنى خاتىن قىلگىنى اۋزى بىلن آلىپ كېتىدىلر كتە تاش قىشلاغىگە. خودى، بىر موشوك بالەسىنى آلىپ كېتىگندەى قىلىپ.

- موشتوم دېك كىنە قىزچەنى-يە؟ -سۇرەدى نظر تاغە تانگ قاتىپ.

- ايشانەبېرىنگ. قىزىنىگ اسمى آى جمال اېدى. تقدىرگە تن بېرىپ آتە-آنەسى تاپشىرىشگە مجبور بۇلىشىدى. آى جمال آسماننى باشىگە كۇتريب، تاووشىنى بلند چىقرگنچە داد سالىپ يىغلەدى. «بېگانە آدم بىلن كېتمەيمىن. خالەمگە، عمەلرىمگە آيتىنگلر، مېنى آلىپ قالىشىسن! آتە-آنەنينگ ايشىنى قىلەمىن. اېشىگىنى سوپورەمىن. اولرگە چاى-پاى قىلىپ بېرەمىن. مېنى اوپلرېدن ھىدەشمەسىن، آتم-آنمگە آيتىنگلر. مېنى بو ارواحگە، كاپ-كتە آدمگە اوزەتمەسىنلە!!!» -دېيە يالبارىشگە توشدى. قنچە تىرىشىپ يلىنسى ھەم فايده بېرمەدى.

- يۇغ ابى؟ ايشانگىم كېلمەپىدى. تۇقۇز ياشر گۇدكنى-يە؟! نخت آتە-آنە دېگن ذات يورەگى نىنگ بىر بۇلگىنى حيوان صفت بىر آدم آلدىگە تشلسە-يە؟ بو نې كۇرگولېك؟!

- سىز بار پىتىلردە (انقلابدن آلدىن) ھەم سكىز-تۇقۇز ياشلى گۇدكلرنى چىقرىتەتەپ، كېكسە آدملرگە بېرىش حاللرى اوچرەب تورردى. اېسلەسنگىز كېرەك اۋشە كېزلىرنى. انقلاب-كو! قىزلىرنى اۋسگىنى قۇيمىسدىن غۇرە مرگ قىلىپ اېرگە

بېرىب يوبارش اورچىب^۱، اوجىگە چىقدى. فقط جۇرە اكەنىنگ قىزى اېمس، بوندىلردن مىنگلرچەسى بو كىبى شوم تقدىرگە مبتلا قىلىنگنلر. تىنگداشىگە اېمس، كېكسە ادملرگە سكىز، تۇقىز ياشر قىزلرنى ايكىنچى، اوچىنچى حتاكە، تۇرتىنچى خاتىن قىلىپ بېرىش حاللرى هم اوچرەب تورهدى. اوچرەيدى اېمس عادت توسىنى اگندى.

- بو ايشلرنى ناچارلىكدن قىلىشەدى اولر، بۇمسە وجدان عذابى، فرزند داغى انساننى قىينەيدى-كو اخىر! شوندى اېمسمى؟
- بوندى قلتىس ايشلرنى قىلەياتگن ادملرنىنگ قۇلىدە فتواسى بار. يۇق دېب كۇرسىن-چى؟...

- بو ھەمەنىنگ باشىگە كېلگن سودا بۇلسە كېرەك اوكە؟
- يۇق. اوندى دېب بۇلمەيدى. باى-بەدولت نىنگ قىزى قىرققە كىرسە ھم ائەسى نىنگ اوويدە توره وېرەدى. كىمغىل، بېچارە، كس و كۇيبى بۇلمەگن؛ قناتىگە ائەدىگن حمايه چىسى بۇلمەگنلرگىنە، اۋز قىزلرىدن اجرەلىشەدى. ادملر باشىگە كېلگن ھر قندەى بلاگە شو گۇدەك قىزلرىنى كۇندەلنگ توتىب، جان سقلىب ىشىگە مجبورلر... اېشىتگندىرسىز، قدىم زمانلردە طىبعى ائتلر ائىنى ائىش اوچون ادملر اېنگ سېوكلى و سولوو قىزلرىنى خدا نامىگە قربان قىلىشركن، تا كىم بلا- ائتلر تۇختەسىن دېب. تىرىكلەيىن سېلگە آقىزركن. بو دومەلاق يېر تۇپى نىنگ بىر چىتىدە شونداقلر بۇلمەيدىمى دېيسىز؟ اۋتمىشە بۇلگن؛ بوگون ھم بار شو گىلر. ادملرگە بوندى حس-تويغولرنى كىم بېرگن؟ انە شونىسىنى بىلماق مېھم. كىچىك

^۱ اورچىماق: كۇپە يىماق، كۇپل نسل يوزەگە كېلتىرماق.

جانىتنى آدملىر اۋز اختىيارى بىلەنە قىلسە، كتە جىنايتلار عادىتدە تىنگرى اتى ايله عملگە آشىرىلەدى.

امازون اۋرمانى اوزرە اوچى شونقار تىنىمىسىز پروازدە. آنە تاووقلار اېسە جۇجەلرېنى قىناتلرى آستىگە آلىش بىلەن آوارە. اكران بېتىدە بالاردەى كېلەياتىگن كتە بۇغمە ايلان تۇلغەنە يېدى. كۇپ اۋتمەى اېندى توغىلگن كىيىك بالەسىگە تىشلىنىپ، حملە قىلدى ايلان. قورەلەى گىنە كىيىكچەنى غىقىللىتىپ تاماغىدىن آلرگن، بۇغمە ايلان دَب بېرىپ اونىنگ باشىنى غَجىشىگە اۋتدى. سېكىن-سېكىن باشىدىن تىشلىپ، اش-پش دېگونچە يوتىپ يوباردى. بۇغمە ايلان بايەگى ججى گىنە كىيىك بالەسىنى جىغىلدانىگە تارتىپ يوتدى قۇيدى و اۋرمان اېچىگە كىرىپ كېتىدى.

آى جمال خاتىنلىككە آلىپ كېتىلگن بۇلسە، اوندن بېرى كۇپ زىمانلار اۋتىپ كېتىدى. نظر تاغە فاجىئەلى درامەنىنگ تگىگە يېتماقچى بۇلىپ تورر، مىيەسىگە سىغمىس داستاندىن عذابلار اېدى.

- خوش، جۇرە اكەنىنگ قىزىدىن نىمە خبر؟ شو چال بىلەن يشب كېتىدىمى قۇشە قىرىپ آخرگەچە؟

- اۋن بىلەن كېيىن قىشلاققە بارىمى صمد اېجىرنى اوچرەتىپ قالدىم، -دېدى رحىم، -اۋشە سىز بىلگن صمد، ساقالى آقرگن اېسە-دە، دىركىللىپ تورىدى. بۇرتىپ چىققن كورەك دېك آلد تىشلىرى توشگن. يوزلرىگە آجىن تۇرىنى يايگن. اۋشە اۋزىز بىلگن صمد جىرن-دە خالص كلام. اېلىگى قاقىب آلىنگن سويكەدى تىقىردەب تورىدى. هە، ايتماقچى، مېن سۇرەدىم اوندن ايكىنچى خاتىنىنگىز، جۇرە تاغەنىنگ قىزىدىن بالە كۇردىنگىزىمى، بالەلر نېچتە -دېب. ايتىشىچە، صمد اېجىر

حج گە كېتىگندە بېچارە نامراد قىز اۋن ايكى ياشىدە عالمىن اۋتىگن اېكن. ھەمەسىنى ايتىپ بەردى. «سويگى بوت اېمس اېكن، اۋلىب كېتىدى» -دېب جواب قىلدى صمد ابجىر. يوزىدە، ايجىدە اچىنىش، افسوسلىنىش، اۋكىنىش علامىنى ھىچ ھم سېزمەدېم. دۇزخنىنگ كاساوى دېك سېرەيىب يورىيدى حاضرگە چە. آى جمالنىنگ تقدىرى چومچوق بالەسى نىنگ اۋلگنچەلىك ارزىمس واقە اېدى صمد اوچون.

بو واقەنى آخريگە چە اېشىتركن، نظر تاغە كۈزلىرى غىلقە ياشگە تۈلدى. «ايخ، توف اوردىم مونداق جىركنچ حياتگە، بوندەى وحشيانە ايشلرگە قرشى كورەشمەگن انسانلرگە -دە، توف اوردىم. بىز تەين اشرف المخلوقات اېمىش بىز!» -دېدى مۇشتىنى بېرگە سىلتەدى. تاماغى يىغىگە تۈلىب تورگن بىر احوالە رحىمگە قرەب:

- عذر اوکە، وطن حقىدە سۇرەشدىن شرمندەمن آلىنگدە. بو واقەنى اېشىتىب اىچ - بىرېم اېزىلدى، سېنىنگ ھم كۈنگلىنگ بوزىلدى اېسكى واقە گىپرەبىرىب. باشقە موضوعدىن سۇز اچسك بۇلمىمىدى، -دېدى او.

بو حكاىە سۇنگىگە كېلىب، ساووق تونى كونگە اولەگن دردداشلىر اۋزلىرىنى وقتىنچەلىك كىف و صفا قوچاغىگە آتدىلر. بو وقتىنچەلىك چارە اېدى. بىراق، وطنلىرىدە قنچەدن قنچە سان -سانقسىز قىزگىنەلر خزان بۇلماقەدە. بەھاردە تۈكىلگن بو خزان يىراقلىرىنى كىملردىر باسىب، يىنچىب اۋتر، كىملردىر ياقىب ھم يوبارر و ىنە اللە قىسى آدملىر بو لطىف جنسىنى خۇرلىش و بېرگە اورىش اوچون يرەتگندىن «مقدس» حجتلىر كېلتىرىب ايشىنى قىلەبېرر. زمان اېرككلر بو يروغىگە باش اېگىب، اولرنىنگ

ایستک اؤقلى اطرافىگه ایلنىب کبلماقده. چیریگن قدریتلر سینمس، ینگى ارزیشر
شکللنمس اېکن، دقى یونوس دن قالگن توتم^۱ بیلن یشب بؤلمس کبلندی.

(حکایه قیته ایشلندی)

دسمبر، ۲۰۰۶

شیربوروک، کانادا

^۱ توتم: سمبول صفتیده قدرلنه دیگن، عبادت قیلینه دیگن نرسه.

قیزیل داغ

قىزىل داغ

مىنگ تۇقىز يوز سىكسان تۇقىزىنچى يىلى، قىيىناق كۈنلىرىنىڭ ياز پلەسى،
اېرتەسى جىمە دم آلىش كۈنى بۇلردى. توشىقى آوقتىدىن كېيىن غوج-غوج اۇقوۋچىلار
ياتاقخانىلەرنىنى تىرك قىلىشىپ، انستىتوت باغى آرەلب، سلقىن سايەلردەگى يۇلكلرنى
آىلىنىپ؛ بىر يازىلىپ، يىرەب كېلىش مقصدىدە شەرگە تامان آدىملەى باشلەدىلر.
دوداق توكلرى نىش اورگن، ساقالى اۇسىق يىگىتلر-و، بىر ايكى ساقال قىرتىشلەگن
ياشلىرىنىڭ شەرگە تىردىلنىشى آسان كېچىمسدى. شۈنگە قرەمەى، حجتى
بۇلە تورىپ، قۇللىرىدە قورال كۇتىرىپ تىلاشى قىلەيدىرگنلردن قۇرقىپ، پىسىب^۱
اويلرىگە آشىقە ياتگن طلبەلر نلەى گىنە اېدى.

قوياش نىنگ اىسىق تىفتىدىن تۇرقىپ^۲، بىتىگە آچىن تۇرلرى يۈگىرگن اسپالت يۇللر
اوزرە، ويچىرلپ كۇرىنە ياتگن سىراب، خۇدى، تىندىردن كۇتىرلە ياتگن حرارتگە
اۇخشەيدىر. كتە يۇل بۇيىلپ اۇتىپ-قىتە ياتگن تورلى ماشىنەلرنىنگ كوچلى
آقىمى، تۇلقىنلەنە ياتگن سىرابنى بوزىپ يوبارر، غىر-غىرلپ قويۇق توتونلرنى ھواگە

^۱ پىسىماق: اۇزىنى پنەگە آماق؛ بېكىنماق، بىشىرىنماق.

^۲ تۇرقىماق: تۇر آتماق، تۇرگە اۇخشىپ چىقماق.

پوركەگنچە، غوريللب شاوقين سالماقده اېدى. بو آرەدە تۇختاوسيز قتنب تورگن آله-سريق توسدەگى تكسى لرنينگ غيزيللب اۋتيشى كيشى خيالىنى آيب قاچردى. بىر تۇقسان ياشلى بابانينگ: «هلى قىدەسيز؟! انقلاب ينه بالهلهيدى، ينه قاره كونلرنى كۇپ توغەدى؛ كابلده اۋليكلر رقصى اۋلهجك... سيچقان اينى مينگ تنگه بۇلەدى» -دېگن گپلىرى كۇپ نرسەدن درك بېرىپ تورگندەى اېدى اۋشە كېزلىرى. تينچ زمانلردەگى باشكېنتنينگ طعمى قاچگن، اويقوسى آريگندى. كابل شېرى توتون و چنگ-تۇزان آستيدە زۇرغە نفس آلماقده....

يۇللر، كۇچەلر كېسېشگن جايلردە اېلكه لريگه كلشنيكوف آسيب آلگن حزبي لر اۋتگن-قېتىگنلرنى تۇختە تيب، حجت سۇرەشەدى. اسنادى «شېهەلى» كۇرينگنلر اوچرەب قالسە بۇلدى، دراو عسكرى مۇترلرگە باسيب ساله ديلر-دە، خوست، پكتيا، گرديز، هلمند، قندهار اوروش جېهەلريگه، «بارسە - كيلمس» گە تامان سوريب هيدەشردى... يوقايرىدن: «كۇپراق جۇرە قول، تۇرە قول، اېگم قوللرنى توتينگ!» - دېگندن سۇنگ، آتە-آنە، قورەلەى كېلىنلر، باله-چقەسېدن، اوروغ-ايماغيدن اجره لېب، بېدرك كېتگنلر سانى مينگتە.

اياق آستيدن كۇكريب چيققن بلادېك، نيمە بۇلدى-يو، اۋن ايكي نېچى صنفنى اۋقېب تورگن طاھر انه شو تلاشى قىلگووچيلر قۇليگە توشدى قالدى. شولردن بىرى باياقېش ظاھرگە:

- قنى حجتينگ بۇلسە كۇرست، قنى كۇرەيليك-چى! -دېدى ساووق بىر آوازده، -
- طاھر كۇرستگن حجتنى تېتكيلهى كېتدى و تېرگەى باشلەدى:
- قەبېردن بۇلەسن اۋزى؟ -سۇرەدى تېكشېرووچيلردن بىرى.

- آتىم طاھر، اېندى اۋن يېتىگە كىردىم - اۋزى من، مېمنەن بۇلەن. آتم نېنگ
 آتى يامغىر. او كىشى بولتور خوست اوروشلرىدە شھىد بۇلدىلە. اووو منە شو تاغ
 بېتىدەگى اويلردن بىرىدە، -اۋنگ قۇلى بىلن تېبەلىكنى كۇرستە توريب، -آنم،
 اوكلەلرېم، سىنگىللىرىم بىلن، كرا بېرىب يشب توريىمىز. يريم كون مکتب اۋقىيىمىن،
 يريم كونى اويگە تۇرتتە نان كۇتريب بارەى، دېبە ايشلەيىمىن اكلەر، مسافرېمىز.

- ياشىنگىنى اۋن سكىز دېسە ھم بۇلەبەرەدى، يىگىت سىن اېندى! وطنى حمايه
 قىلىشىنگ كېرەك، اېندى سېنى عسكەرلىككە جۇنتەمىز. خۇپمى؟

- يۇغ اكلە. مېنى اوروشگە يوبارمەيلە. اسنادلرېم تۇغرى. اويدەگىلر اچ قالەدى،
 صغىر سىنگىلېم، اوكلەلرېم با، رحم قىلىيلە. آتم نېنگ كۇز ياشلرى ھلى قوريگىنى يۇغ،
 -دېدى طاھر رنگ و قوتى اوچىب، مظلومانە بىر حالتدە.

- آنەنگ بېوھمى؟ امممممم اوندە... بۇل-چى! يور، آلغە، -دۇق قىلىب طاھرنېنگ
 اېلكەسىدن سوريب مۇترگە سالماقچى بۇلدىلر، -گېنى چۇزمسدىن قىمىرلە، سورىل
 توياغىنگىنى شىقىللت قنى!!

- قۇيىب يوبارىنگلر، مېن مکتب اۋقىيىمىن. اې اكلەر! يېتىم بالەن؛ بو آى اوى كرانى
 بېرالەمى، كونىمىز اۋتمەى توريىدى، بىزنى كۇچىرماقچى شوگىنە بىر كتكەدىگىنە
 خانەدن. ھلى تۇلىق اۋن سكىزگە كىرمەدېم. نېمە، اۋزىز چىقرگن قانونغە اۋزلرېز
 نېمەگە رعايه قىلمەيسىزلر؟

- قانون... اووو اوروش ميدانلرىدە بۇلەدى. اۋشە بېرگە بارىب اۋقىيى سىن اېندى؛
 سېنگە قانوننى اۋرگتېشەدى. «حزب» دېب «وطن» -دېب شىرىن جانىدن

ايرىلەياتىڭلاردىن سېن اوستونمىسن! قىزىل عسكرلردىن ھىم سېنىڭ جانىڭ شىرىنمى بالە؟ داد-واى قىلەبېرمە، فايدەسى يۇق بىر-بىر.

- يۇق. قانى تۇكىلىشنى اىستەڭلر بۇلسە تۇكەبېرسىنلە، مېن بو «وطن» يۇلىدە قان تۇكىشنى اىستەيمەن. اۇلىش اوچون توغىلگىنىم يۇق. يشەشىم، اۇقىشىم كېرەك لازم، صغىرلرگە قرەشىم كېرەك.

- ازادلىك درختى ياشلر، يىگىتلرنىڭ قانىدىن قوت آلەدى؛ اوزاق تامىر اتيب يشەيدى، يىراق يايىب مېوە بېرەدى - بىلەسنمى بالە.

- كېچىرەسىزلە، انسان قانىدىن كوچ آلەدىڭن درخت قورىسە، قورىسىن، انسان جانىدىن اوستون ھر قندەى غايە و حتى اېنگ اولوغ توشونچەدن ھىم نىرتلنەن. مېن اوچون جان ھر نرسەدن عزىدېر. اۇقىڭنىم داستان و رومانلردە شونداق جايلرى بار ابدى. «جاندىن سېنى كۇپ سېورمن اې عمر عزىز!...» - دېڭنلە اولوغ بابام. مېنگە شو گىلرى ياققندى، - دېدى.

اېسىنى يىغىب آلگن، ياشلىڭن سېر مطالعە اۇسگن طاھرنىڭ پىشىق گىلرى بالتەگە اۇخشىب سويىكلرنى سىندىردەدى، اتيلىڭن اېسە-دە، بولرگە كار قىلمەيدى، انقلابى روجدە اۇسگن ھر قندەى ياشدە اۇسگن آدمىنىڭ مېيەسى آغدر-تۇنتر بۇلىب قالگن بۇلەدى. بو يورتلرنى شرق دېيدىلر! اىلىڭى دىنى كىفئىتىدىن شىرەلنگنلردىن ھر قندەى خطرلى ايش باش چىكىشى مېمكىن.

- بورنىڭ اۇسىب، عقلىڭ ارقانلب، اۇزىڭن كۇرە اوزونلېدى اوکە. يور قنى، - قۇللردىن تارتىشىدى لەجەسى غلىظ حزبىلردىن اىكئتەسى.

طاھرنىنگ مېيەسىگە: «ۋزى شو قارە باتىر» دغەلر!^۱ قۇلدىن قاجىب پايتختگە كېلىپ اېدىك؛ اېندى قىسى گۇرگە بارەمىز...» - دېگن اۋى-خىيال اۋتدى شېكىللى، اۋكسىنىب، كۇزى ياشگە جىققە تۇلدى و لېرىنى قىمرلىتىب:

- آخىخ..... قۇيىب بېرىنگلر اكەلر. ھىچ بۇمىسە اويگە بارىب آنە جانىمگە خىر قىلەى، -دېدى طاھر قۇرقىنىدىن.

مۇترگە تامان تارتىركنلر، طاھر زۇرغە قىدىنى تىكلەگن بۇلىب، قىرشىلىك قىلدى. حزبىلر كۇزلىرى جۇدىرەب تورگن طاھرنى تۇرت كىشىلىشىپ تالاشىنىنگ مۇترىگە سودرەب، االىب بارىب تىقدىلر. مۇتر جايىدىن قۇزغەلىب، اېندى حرىك قىلەياتگندى ىم كە، طاھر تاغ بېتىدەگى اويلرگە قرەب: «آنە، آنە جان!!! مېنى اوروشگە االىب كېتەياتتىلر! بوگون سىزلرگە نان االىب بارەالمەيمىن. مېنى كېچىرىنگ آنە جان! اگر تىرىك قىتەالمەسم، اق سوتىزگە راضى بۇلىنگ، خىر آنە جان!!! -دېب بار تاووشى بىلن قىچقىردى، -سىنىگىلچە-يو، اوكلەرىنى ھم بىر-بىر ات توتىب:

- «سىزلرنى ھم ساغىنەمن، دعا قىلىنگ آنە جان دىدار قىامتگە قامەسىن» -دېبە تىلك بىلدىرىب، اق ساغىندى.

كۇپ اۋتمەى، تالاشىنىنگ مۇترى كۇزدن غايب بۇلدى. طاھرنى عىسكرلر تۇپلاقلرىدىن تاپىب چىقىرىب االىشنىنگ سىرە امكانى يۇق. علاجى بۇلگن تقدىردە ھم كېچ بۇلگندى. كۇپنىنگ باشىگە كېلگن مصىبت! اونى اۋلىمدن اسرەب قالىشگە جان كويرى ھم يۇق اېدى اصلىدە.

^۱ دغەلر: دغە-دوغە قىلىب يورگنلر؛ پىشتونلر، اوغانلر.

خودى كۈچەدە گيلردن كىمدىر طاھرىنىڭ ئەسىگە بو ساووق خېرنى يېتكۈزگندە؛ ياكە قۇققىسدىن ماجرا شاھدى بۇلگن كېى، تالاشى مۇترلرى تورگن جايگە قرەب كېلەياتىر اېدى. كۈنگلى وىران ئەنە-اۋغىللىرى حىدر و جۇرەنى اويدە يالغىز قالدىرىپ، سراسىمە احوالده آق ياپىنغىچىنى باشىگە سالىب، بىردن كۈچەگە آتلىپ چىقدى. آرتىدن تۇقىز يىش قىزچەسى سېوگىلى ھم اېرگشىب كېلەياتگندى. ئەنەسى نىنگ قىزىگە: «سېن قىت!» -دېگنى فايدە قىلمەدى شېكىللى، قىزچەسى كېتىدن يۇرتمەلب كېلەبېردى. ھلى ماتمدن باش كۇترمەگن ئەنە بىردن: «اېبىى... اوويم كويدى، درىدر بۇلدىم، داد طاھرىمدن آىرىلدىم!» -دېبە چىرىپىرەك اورىب تېبەلىكدىن كتە يۇل ياقەسىگە توشىب كېلەياتىر اېدى. اوچ دىقەقە آلدىنراق كېلگىدە طاھرىنى كۇرىب قالىشى و خىرلەشىب قالىشى مەكەن اېدى.

- كىمنى قىدىرەسىز بو كتە شەردە خالە، -دېدى اۋزىبىكچەلب، اېگىدە چاپان بىر كىشى. يۇل ياقەسىدە تىك تورگن سلەلى شو كىشى، ادەشىب قالەسىز بو كتە شەردە، دېبە دردىنى بىلگىسى كېلدى. طاھرىنىڭ ئەنەسى:

- قىشلاقدە مجاھدىلر، شەردە بۇلسە، حزبىلر كون بېرمسە-يە، قىسى مزارگە باش اورەبىن اكە! بىز اۋزىلرنى باشىمىز، غمخوارىمىز يۇغ اېكن. بۇسە يم بورىنلرىگە سوروغ يېتىشمەيدى اولەنى. طاھرىمنى آلىب كېتتىلر اوروشگە، -دېدى رنگى سامان باياقىش ئەنە.

طاھر كېتىدى؛ ئەنە اېسە اېسىدن آزگنگە اۋخشىب، نىمە قىلرىنى بىلمەى، يۇل نىنگ نرىگى تامانىدە تورگن حربى كىيمدەگى منصبدارگە عرض قىلگنى بارماقچى. اېندى

شاشىلىب، يۇلنى كېسىپ اۋتماقچى بۇلىب تورگندى. انه آدملهى باشلهدى، قىزگىنهسى سېوگىلى هم انهسى نىنگ ارقهسىدن چاپدى. كته يۇل نىنگ نرى ياقىگه اۋتىب آلگن انه، ارقهسىگه بىر تىسرىلىب قرهدى. نې كۇز بىلن كۇرسىن كه، سېوگىلى گىنهسى يۇل اۋرتەسىده قانىگه بېلىب ياتىدى. او كۇككه فغان كۇتريب... جانسىز قىزىنى بغرىگه باسىب، چىرقىره گنچه اۋزىدن، هوشىدن كېتىدى.

اگوست، ۱۹۸۳

تاشكىنت

معجزه

معجزه

- «اوزاغى بىلن يىنە بېش يىل گىنە بو ياروغ عالمده يشەشىنگ مەمکن؛ اما،...!»
قىرق تۇرت ياشلى لوسى بو اۋتە ساووق خبرنى كسلخانەدە جراحلىك تيغى آستيدە،
ايكى مينگ اۋن يېتىنچى يىل نىنگ كوزيدە دوكتورلردن اېشىتىدى. باشيدە لوسىنى
ازانچە قارە تېر باسىب، دىمى ايچىگە اۋرەلدى. سەھل اۋتمەى كيپريكلىرى نەمىقدى.
ھۇل بۇلىب، كۇز ياشلىرى قىپ-قىزىل يىناقلرى اوزرە ايرماقلىنىب كېتىدى. سۇنگ
اوزون نفس آلىب، چوقور اۋكسىنىدى. نظريدە كۇكرەگىنى تۇلديرىب تورگن ھوا
بىردىنگە پولادگە آيلنگندەى تېپەدن باسەبېردى، باسەبېردى. سۇرىب-سۇرىب
چېكەياتگن ھواسى شونچەلر آغىرلشدى كە، كرخت بىر حالتگە توشدى.
گودەسىنى قىمىرلىتىب، اۋزىنى اۋنگلشگە ھم كوچى يېتمەى قالدى.
شوندىن كېين كسل نىنگ ايچكى دنياسى آستىن-اوستون بۇلىب سىندى؛ يورەك
شىشەسىگە چىل-چىل درز كېتىدى. يىغىب بۇلمەگودەى درجەدە تۇكىلىب، تۇزىب
كېتىدى وجودى. بونچەلر كتە روجى تاريقىش كىشىنى نې كۇيلرگە سالمەيدى
دېيسىز.

دراو خيالىدىن: «مونچە شيرين بۇلمسنگ حيات! ھلى سېن بىلن تىرىكلىك آيوانىدە اوزاق جولان اورىب يشەماقچى ابدىم-كو! سېنىنگ تاتلى آنلرىنگدن بەرەلنىب، چقنب، يىرەب يشەماق نىتىم ابدى-كو! عمىرىم يشىل باغىگە اجل قوشىن قۇندىرىب، ھلى توگل آچىلمەگن چېچكلرىم سۇندىرىب، اۋلىم چاغىن دۇندىرىب، ايلىنجلرىم كۇندىرىب، نخت مېنى ترك اېتسنگ حيات! عزيز عمىرىم باغلىرى شوگىنە لذىذ حيات ايلىرىدن اوزىلسە-يە! ايشانگىم كېلمەيپدى. اخىر چىدەب ھضم قىلردەى گپ اېمس-بو!!! شو كېزىلر ئانىە و دىققەلرنى سنب وقت اۋتگىزىش آسان بۇلمسە كېرەك. اۋزىنگگە اۋزىنگ تۈزىم تىلەگىن لوسى. يازىغىنگ^۱ اۋلمەگندىر؛ اۋلىمگە بۇيىن اېگمە، اۋزىنگنى توت! آتە-آنەنگگە، عمر يۇلداشىنگگە، بالەلرىنگگە كېرەك بۇلەسن ھلى! سېندن عرۇلب، يوز اۋگىرگن بخت قوباشى قى بىر ياقلردن بلقىب چىقر بلكىم...» -دېگن اۋىلر اۋتدى.

تېپەسىدە تون-كون حاضر-ناظر بۇلىب كېلەياتگن اىچى ويران آنە فقط اق ساغىنر، ارداغىدن توشىرمىسدى. آنە لوسىنىنگ محزون بېتلرىنى سىلب تورىب، يوزىگە-يوزىنى قۇيدى-دە، جانىنىنگ الە قىسى بورچكلرىدە اوخلب ياتگن سۇنگى مېھرىلىنى-دە، قىزى ھارغىن كۇزلىرىگە تۇكىب سالدى. بو شفقتسىز بىر آغرىق ايكى دردگە ايلندى. بالە بىر كوير، آنە بىر اۋرتەنر. آنە-بالە درد چىنگلىدە يانە-يانە دا بۇلدىلر. ايكى آچىق كۇز ياشلر بىر-بىرىگە قۇشىلىب، اۋتە مونگلىغ منظرە حاصل قىلدى. لوسى آنەسىنى يوپتماقچى بۇلىب، ققشب ياتگن دوداقلرىنى جۇفتلەدى-دە، زۇرغە مأيوسگىنە «پىشانە اېكن، اۋكسىمنىگ آنە جان» -دېدى و بىر پىيالە چاينى

^۱ يازىق: گناھ. بو بېردە قسمت معناسىدە.

ايچىب بۇلگونچەلى وقت ايچىدە يەنە اوزاق اۋىگە تالدى. كسلخانەدە مطلق ساكنلىك حكمران بۇلدى.

كىرىستىنە اۋزىنى قۇلگە اىب، جگرى نىنگ بىر پرچەسى بۇلمىش قىزىگە قرەب سۇز قاتدى: «يخشى سن لوسى، اۋزىنگى قۇلگە آل. بىزدە گى دوكتورلر تۇغرى سۇز بۇلىشەدى. اولر كسلنى اۋلىم نىنگ چنگلىگە اسان گىنە تاپشىرمە يدىلر. ايچىنگى امىدلتىرووچى سۇز بىلن تۇلدىرىب، ايشانتىرەدىلر. بو بىر حقىقت. قرە، علم-فن جودە-جودە ايلگرىلب كېتىدى. بىلەسن، بو پرەك المشتىرىش اوزاق جريان؛ دۇنلرنى^۱ كوتىب يشە ياتگن بىمارلر از اېمس. امىدوار بۇل قىزىم، نصىب بۇلسە ھلى پىشانەنگ يرەقلەيدى» -دېدى دلە بېرووچى، كوچ بىغىشلاووچى بىر اھنگدە. ائەنىنگ اىلىق سۇزلرىدن سۇنگ لوسى نىنگ يوزىگە قان يوگىرگندە بۇلدى....

بو پرەككە زار لوسى كونى كونگە، ھفتەنى ھفتەگە، اىنى اىگە و نھايت بىلنى بىلگە اولب، يشب كېلەدىر اېدى. كون باتر انسانلرى نىنگ فرھنگىدە عمدن بىر كون قالگونچە دنيا كېزىب اېسكى بشرىت تارىخى بىلن يقىندن اشنا بۇلىش؛ خقلر، مدنيتلر، علم و صنعت، موسىقە-يو ادبىيات، اودوم و عادتلرنى كۇرىب، تۇىب يشەماق بار. لوسى ھم شولر سىرەسىگە كىرەدى. نىمە بۇلدى-يو، سناقلى كونلر قالگندە لوسى مصرگە سفىرنى تۇختىدى، ائىقراغى كېىنگە قالدىردى. بىمار لوسى بۇلسە، اينچىق و بولوتلى آسمان اوزرە قوباش چرەقلب چىققن كونلرنىنگ بىرىدە، مىلو - قىز ايتىنى اۋىنە تىب كېلىش نىتى اىلە بىچگە^۲ باردى.

^۱ دۇنر (Donor): بىغىشلاوچى؛ يرەدار و بىمارلرگە قوويش اوچون اوز قانىنى ياكە باشقە بىمار شخسگە كۇچىرىب اۋتكىزىش اوچون بىرار اعضاسىنى بېرووچى كىشى.

^۲ بىچ (Beach): ساحل، دريا قىرغاقى.

لوسی نینگ ایتی میلو - شوخ دېسه شوخ، بیر هم خوش قیلیق، مهربان و سبزگیر اېمسمی، دمینی لیکیلگنچه، قیرغاق بۇیل ب یاستنه کبتگن قوملاق اوزره، سکره ب- سکره ب یوگردی. قویاشده تاولنیش اوچون اغه نب یاتگنلر یعنی، قیپ-یالانچاق قیز-خاتینلر، ییگیت-اېرککلر آرهل چاېدی. اولیم بیلن یاقه لشیب کبله یازگن لوسی دېنگیز قیرغاقلریگه کۆز قیرینی سالیب، ذوق ایله تماشا قیلیب توره بېردی. مه بین و موزدېک کینه اېسنلر^۱ یوز و کۆکره کلرنی سیلب اؤته یېدی. اولکن سوونینگ شاشقین کۆتریلیب، قیرغاققه اوریب، سېلپینیشی تنه نگده گی دردلرینگی سؤریب آلمه ی قۇیمه یدی....

بوياغی اېسیدن آزگوده ی منظره: ییل-ییل تۇنر کوموش بدنلر، انه آياق-آياق بیلکلر، تراش یېگن آلماسده ی ممه لر، منه اوزنه توشگن خییچه^۲ قاملر، کتیب وارگن گۆزهلر و آییمچهلر نیمه دېسیزمی؟ قره ب-قره ب کۆزلر قووانر: لاو-لاو یانر آياقلا-و، بادام-بادام قياقلا، قیناق-قیناق دوداقلر، سرلی-سرلی سقاقلر، رخس آلمه دېک یناقلا، بې باش و سنقی چاغلر وی وی وی... بېلنی دېسیزمی، بۇینمی، انه بۇری، منه بالدير، سانلر و قویروقلا، اووو...! بونی کۆرگن ایمان نینگ بېلی سینمه ی قالمه یدی. ییرلیک آدم لرگه-کو عایدن عادی صحنه بۇلیب قالگن. تراژیدی بیلن گۆزلیک اوچره شه یاتگنلر اېدی بو دم لر.

میلو همان شوملیک قیلیب، چیرایلی قیزلر سری باریب اېرکه لنر، اېت-بېتلرینی یلمه ماچچی بۇله دیر. میلو سۆز اېشیتیر، یوواش بۇلیشگه قره مه ی، بیرینچی بار بونده بین بۇیین باغیدن قاچیب اېدی. میلونینگ اؤیناقلشلیری اوزاققه چۆز یلدی.

^۱ اېسن: شمال، ییل.

^۲ خییچه: اینگیچکه، نازک کینه؛ کبلیشگن.

بو وضعيتدن لوسى بېزاوتەلندى. ايتى نىنگ مستلىقلىرىدىن اويتگە باتىب، آدملىردن كېچىرىم سۇرەشگە توشدى. ايتگە مەر قۇيگن عاشقلردن بۇلمىش كىتى خانىم مىلونى قوچاقلىب، بۇيىن-باشىنى سىلەى كېتىدى، اۇپىشىدىلر هم. لوسى كىتى خانىم نىنگ بو شفقت و مېرپانچىلىگىدىن روھلىنىب، مىتدارچىلىك بىلدىردى. انه، خوش فعل مىلو بىر اېمس، ايكى اېگە تاپگن بۇلدى. كىتى خانىم و لوسى لرانەشو مىلو ارقەلى تىشىب، قلىن دۇست بۇلىشىدىلر. تىشىوونىنگ اىلك انلرى، گپ دراو لوسى نىنگ خستەلىگىگە بارىب تقيلىدى. گپدن خىردار كىتى خانىم ينگى دۇستى لوسى دۇنرلردن بوپرەك سۇرەب مىراجعت قىلگنى خىرىنى اللە قچان مىجازى و حقىقى تىرماقلىردە اۇقىگندى....

كىتى لوسى نىنگ كۇنگلىنى كۇتردى. اونگە اۇز بوپرەگىنى تارتىق قىلىشگە وعدە قىلدى. شوندىن سۇنگ ايكاولان خط يازىشىب، بىر-بىرى بىلن علاققەدە بۇلىب تۇرەبېردىلر.

بىر هفتە اۇتر-اۇتمس كىسلخانەگە بارىشىب دوكتورلر بىلن اوچرەشىشىدى. تىردىلر كۇرىلدى، دوكتورلر كىتى خانىم و لوسىنى ابدان تېكىشىرىب، كىسل بوپرەگى اۇزگە بوپرەكنى قبول قىلىش ياكە قىلمىسلىك اوستىدە علمى تىدقىقات اىلب بارىشىدى. نىتىجەدە لوسىگە دوكتورلر:

«يوزگە يوز موققىتلى كېچەدى، دېب سۇز بىرەالمەيمىز. هر قلهى حياتىنگ اۇقلىرىدىن بىر قىتىم يلىغ جىلمەيسە عىبىمس» -دېيشدى. خانىم كىتى و لوسىلرنىنگ بىر-بىرگە بۇلگن چوقور انسانى مىحبتى توغىلەجك خىرە يالقىنىنى

پارلتیب، النگه لتیب یوباردی. لوسی نینگ جانینگه جان کیردی. وجودیده قووانچلی ییلینچ کورتکله ی باشله دی.

هر احتمالگه قرشی ایکی تامان تیل خطی بېریب، حقوقي بیتیک آستیگه قؤل قویدیلر. ابرته سی شنبه کونی بویره کنی کؤچیریش عملیاتی باشلندی. لوسینی بخت یارله قب، کوتیلگنیدن هم آرتیق درجه ده جراحیک عملیاتی آمان چیقدی، بویره ک کؤچیریش عملیاتی موفقیتلی کبجدی. لوسی عمری نینگ سؤنگگی لحظه لری قالگنده سبوملی حیات قوچاغیگه قیتدی. بو خبر یشین تېزلیگیده مجازی و حقیقی ترماقلده یاییلندی. دوکتورلر نینگ خلاصه قیلیشیچه، بو حادثه چینه کم معجزه اېمیش. اولرگه کوره هر ییگرمه ایکی میلیون کیشیدن بیته سی گینه بو تور عملیاتدن تیریک قالیشی ممکن اېکن....

لوسی ساغه ییب کبتدی. صمیمی دؤستلیک اؤزگه چه معنا- یو مضمون کسب اېته بېردی. کونلردن بیر کونی کیتی، لوسی و ابرکته تای میلو اؤشه اوچره شگن ییلاژگه^۱ هاردیق چیقیریش و کؤنگیل یازیشیب اوچون باریشدی. اېندیلیکده اولر حیاتدن ذوقلنیب، میریقیب یشب کېلماقده لر.

(بو حکایه شو کچه- کوندوزلری یوز بېرگن علمی واقعه دن الهاملنیب قاغذگه توشیریلدی)

۲۰۲۳/۵/۳۰

کانادا، تورانتو

اوشلمه گن آرزو

اوشلمه گن آرزو

انقلاب بۇلدى... كاروان-كاروان مۇترلر تيزيلىشى، شەرلر ارا شوروى نينگ قيزيل عسكرلرينى تشيماقده ابدى. هواده تيك اوچرلر گير-گير ايلنهدى، بمباردمان قيلووچى اوچقيچلر تينمسيز پروازده. یشش اۇز توسىنى يۇقاتگن بير احوالده دوام ايتەياتگندى. اۇشنده كمونىستلر ياشلرنى شورويگه يوباريب اۇقيتيش سياستىگه شدت بېرديلر. مينگ-مينگلر محصللر تحصيل اوچون ساويتلر ديارىگه يۇل آلە باشلەدى. كۇپلر قطارى اجملگه هم شورويگه بارىب اۇقىش نصيب ايتدى. او ايگى هفته بورون قيسى شېرده اۇقىشىنى بىلىب آلدى. ساويت اتفاقى نينگ باشكېنتى اولكن شهر مسكوگه اوچيش آلدیده توريیدی. او مسكوگه اوچهدى، هه مسكوگه... مسكوهنى ايچ-ايچیدن ساغىنيب تورگنى اونينگ كۇزلريدن بىلىنردى. هوشيده هم توشيده هم مسكوه. بو كته شهر اونينگ روحيگه فراغت شبادهلرينى آليپ كيره ياتگندهى گۇيا.

هر كېچه ماسكونى توش كۇردهدى. قرهسه كه، توشيده شهر كۇچهلرى بۇيىب آلىنيب يوريیدی، آياقدن تالگونچه سيلگاهلرنى كېزهدى. چيرايلى طبعيت منظرهلرينى كۇريب، خيالیدن كير نرسهلرنى چيقريب تشلهیدی. قووناق بير كىفیت

بیلن دانگدار اونورسیتتت پارکیده، گوجوم طلبه لر آره سیده کبریلیب تورگن. کیم سن، دېسه اجمل خان. قیزغداق دېک مله ساچ روس قیزلری دوره سیده شمشاد دېک بوی کورسه تیب توریدی. گوزل قیزلر قیقیرلشیب اجمل نی اورتیگه آیشگن. اجمل دراو هم ایچکوی قیلیب، چونتگیدن مالبرو سگرتینی یاقه سالیب چپکه باشله یدی. آلیفته گرچیلیک قیلیب قیزلرگه هم سگرت اولشه دی. قیزلر اېسه خودی، «اجمل جان مېن بیلن کبت، بو کچه مېن بیلن بوله سن، مېن بیلن قاله سن اجمل!» - دېیه یاتگنده ی. او بولسه قیزلرنی بیر-بیر بېلیدن قوچیب بغریگه باسه دی. اجمل دیسکوتیکده، تونگی کونگیل آچر بزم لرنینگ اوجمس چیراغی بولیب توریدی. شیرین خیال لر آغوشیده مست الست. قولىده کان یاک سالینگن قدح یریم یاریتگیچ نورلر آرتیدن شوخ-شوخ تاولنده دی. گلی کېلگنده قدح آلمه شیب، یاش گینه، آق بیلک قیزلرنینگ قولىدن شیمیریب-شیمیریب شراب ایچه دی. یوزلریدن کیفی تاشیب کبتگن بیر کورینیشده. تونلری سېوگی مېیدن توییب-توییب سیقماقده. اؤرس قیزلرنی تاتیب-تاتیب، آخری چرچب-چرچب ناز اویقوگه کپته دی. اویقوسیده، چرچاق تنه سی اوزره اییکدېک مه یین برماق لر اؤرمه له یدی. رانلرنی اوقه لب اوخلته دی قیزلر. بیر یاقدن قیزلرنینگ اویاری^۱ ساچلری قیتیق لب اویغاتسه، باشقه یاقدن، اولرنینگ آلاودېک نفسی اجمل نی مودره تردی... خماری ترقب اؤرنیدن توره دی. بؤینینی ایلان دېک آق بیلکلر قوچیب آلگن. او گاها دریا بؤلریده یاقه لب یورر، چهچه اوریب چوغورله یاتگن سیراقی قوشلرگه قولاق آسه دی. چیق له یاتگن دېنگیز تؤولیقینلری بغرنی آچر، شوواس قویله یاتگن یامغیر

^۱ اویار: اوفار، ایفار، مُشک.

بىلن اۋىنەشر، روس ودكالىرى خمارىدن تۋىمسدى. يىنە اۋزىنى اۋشە اق پىرىلر اۋرتەسىدە تاير ابدى او... توش كېتىدن توش.

سفر تابارە يقىنلشماقدە ابدى. اجمل نىنگ ايچى قوم-قوملەيدى. يورەك اورشى تېزلىشماقدە. سناقلى دىقەلدە ھەمە ايشىنى بىتيرىب، اوچىشگە شى بۇلىب تورگىسى كېلەدى....

شو كونى كابل دوكانلىرىنى ايلنىب، اۋزىگە كېرەك نرسەلرنى ساتىب ادى-دە، بكسىگە جايلىشتىردى. ادىن ساتىب الىب قۇيگن بىر درجن عطر، تۇرتتە ماوي رنگ كاباى پتلوننى ھم چرم بكسىگە زۇرغە تىقدى. قىزلرگە اتەلگن ساوغەلرنى بىر سىدرە كۇزدن كېچىردى. برچە ايشلرى سر انجام. جمعه كونى اوچىشى كېرەك. اېرتەلبدن پايتختدەگى طيارەلر قۇنلغەسىگە يىتىب ادى... محصللر بىرىن-كېتىن يىلە-پايە چىقە باشەيدى. اجمل ھم اوچاققە چىقىب اۋرىندىققە اۋتيرىب ادى. طيارە اوچىشىگە چاغلنەياتگندى. كابلدن كۇرتىلگن ايرىلن^۱ كۇم-كۇك آسمان بغيرىنى سۇتىب بلندلب اوچە باشلەدى....

۲

مسكوه قۇنلغەسىگە بارىب توشركن، اجمل كۇزلرى ائنگ-جئنگ تېورەككە تىكىلەدى. ايچىدە «كۇرگن قارە كونلرىم ارتدە قالگنى راست بۇلسىن اھىم» -دېيە شكرانە ايتدى. تىغىن ايچىدە مسكوه شانىگە اىلىق سۇزلر اظهار ايتدى:

«... مېنگە قوچاغىنگنى اچىب، كېل فرزندىم اجمل جان! دېيە قبول قىلگىنىگ اوچون منتدارمن» -دېدى....

^۱ ايرىلن: تىك اوچر، طيارە.

شو كوني اجمل باريب ياتاقخانه گه جايلىدى. صولت تۇكيب تورگن اۋن سكيىز قىتلى ياتاقخانه اجملنى خوش قرشيلهدى. اۋشه زمانلر كيشيلرنىنگ كۈنگىل قىتىدىن جاي الگن الهپوگه چوھننىنگ^۱ «الى خروس»، ايتالياچە «پىرى چىتە!» اوشولەرى بلند اوازده يىنگرر اېدى. ياتاقخانه تورلى مملكتلردن كېلگن طلبەلردن لىق تۇلە. اجمل تاماشا قىلگنى لىفتدن پىستگە توشدى. ياتاقخانه اېشىگىدە توردى. كىرگن - چىققىگە كۈز قىرى تشلەماقچى بۇلىب، سگرت توتونلرېنى هواگە پوركب، اياق اوستىدە تورىب قالدى. كېچ پىت بۇلدى دېگونچە اۋغىل بالەلر اۋزلرى بىلن اۋرس قىزلرېنى اېرگشتىرىب، خانەلرېگە االىب كىرەدى... هر بىر بالە ايتاويدە^۲ بىر پرى قىزى. ياتاقخانه دە اجمل نىنگ دماغىگە درس - تىلىمدن كۇرە، شۇخلىك، عشق و محبت، اۋىنب قالىش هىدى انقىب اورە باشلەدى. خىالىنى كوموش بدنلرنىنگ شوق و ذوقى، آرامبخش لذتى ضبط اېتىب تورگن. خىالىنى قمچىلىشگە قىتك - قىتك^۳ پىتمەپىدى. تۇغرىراغى، شىطان سووېنى قەبىردن ساتىب االىشنى هلى بىلمەى تورىپىدى.

اېرتەسى تورىب - اق، اۋگە چىقىدى. قىزلرنى اولشگە. قرەسە كە، اۋرس قىزلرنى رام قىلىش اوچون كتە تيارگرلىك، اونچە تىل بىلىش هم كېرەك اېمس. هر درختنى سىلكىتسە قىرقتە قىز تۇكىلەى دېب تورىپىدى خىالىدە. اىچىدە تۇقىگن رېجەلرى «خودى، اول مېنى بجر، اول مېنى بجر، مېندن باشلەى قال بارىنى» دېگندەى اونگە تىن بېرمەپىدى. كۈنگىلدە توكن نىتلرېنى دستلب اىچىشدىن باشلب

^۱ الهپوگە چوھ: شىخ اسىمى.

^۲ ايتاويدە: يانېدە، الدېدە؛ اېرگشتىرىب بورماقەدە.

^۳ قىتك - قىتك: از - ازگىنە، آزاراق.

يوباردى، كېيىن قىزلىرىنى تاتىشىگە اۋتدى. پاليزگە جىرە^۱ دارىگندەى قىزلىرگە اۋچ. قىزسىز كېچەلر او اوچون يات اېدى. قۇشيلە-قۇشيلە، اۋتە خالسىزلىنىب، بۇكىب قالگندىن سۇنگ، سرەلەياتگن بۇلدى قىزلىرىنى. اېنگ آخرى «گۈزل مسكوه، بوتون شوروى» عشق و محبت وطنى اېكن، دېگن خلاصەگە كېلدى او. معيشتىنىنگ چېك و چېگرەسى يۇق. سووسىز ققرەب ياتگن چۇلدەى، اجمل نىنگ ھلى بېرى سېراب بۇلگىسى يۇق. اىچگن سرى اىچگىسى، تاتگن سرى تاتگىسى كېلەدى.

عشق بايىدە اجمل توشىدەگىدىن كۇرە ھم يوكسك راق بىر مرەلرنى قۇلگە كىرىتدى. آرزولرى دىپىرلى اوشلدى. بىر كم دنيا دېگنلىرىدېك، اېنگ گۈزل اۋرس قىزىگە اۋىلىنىش اجمل نىنگ بىردن-بىر آرزوسى بۇلىب تورىدى. كۇرىنىشىدە، شوندىن كېيىن ائىنى سېكىنراق ھىدەماقچى، اراپەنى مورىتراق تارتىشنى كۇنگلىدىن اۋتكزماقچى. آرزولب يورگن، اۋزى اىستەگنى، آنەسى اۋپمەگىدىن تاپدى. شوندا ھم كۇچەلردە اىزغىب او قىلىشدىن تايگنى يۇق.

اجمل قاتمەدىن كېلگن، كۇزلىرى چوقور-چوقور. قولاقلىرى سفردەى كتە-كتە. اېلكەلرى يايىق، اۋسىق قاشلىرى چتىشگن، لىلرى قلىن، كۇكىنى جون باسگن. كۇكىش خالدار كۇپلىگى نىنگ اىكى توكمەسىنى قەدەمەگن. دۇندىققىنە سېر توك يىگىت. چقچەيگن كۇزلىرى تېورەك-اطرافنى كوزەتىشە چرچمەيدى.

اۋقىش نىنگ بېشىنچى يىلى اېدى. اجمل لىنە خاننى تاپدى. او بىلن سېوىشىب تورموش قورىشىدى. گۈزلىرىنىگ گۈزلى لىنەگە يېتەدىگنى يۇق. سوو اىچسە تاماغىدىن كۇرىنەدى... كۇزلىرى ماوي - شىشە رنگ. بۇبى بلند، قىيلىگن قاشلىرى

^۱ جىرە: تېرىسى دوک شكىلى اىگنەلر بىلن قاپلىنگن، كېمىرووچى، سوت اېمىزووچى حيوان.

كەمەلكەدى موزون. نگاھلىرى قارەمتىر كىيىرىكلىرى آرەسىدن كۆككە قەدەلىپ تۇرەدى. معنالى جىلمەيگندە تورقېدىن حيا ياغىلەدى. سوتگە چىقلانن آپاق يوزلىرى بار. تۇلىشگن كۆكرەگىدن ايكى كىوتر كۆككە پرواز قىگودېك بۇلىپ توريىدى. آپاق كۆكسى اوزرە آلتىن زنجىر يلتىللىپ پارلىپ تورگن. سلماقلىنىپ گىيرىگندە تىلىدىن بال تامەدىگن ذات. سېوينگىدىن اجمل نىنگ آغزى قولاغىدە. ابركەلب- ابركەلب تېز-تېز شىرىن گىنە لىلىرىدن چۇللىپىللىتىپ اۋپگنى اۋپگن. قالگىنى خىرە نورلىرى آستىدە كۇرماقچى...

۳

بىر يىل اۋتر-اۋتمس ساويتلر توزومى انقراضگە يوز توتدى، توزوم چاك- چاكىدن سۇكىلە باشلەدى. اتقافداش جمهورىتلر اۋرنىگە مستقل دولتلر قىد كۇتردى. اجمل و لىنەلر قورگن محبّت اويى ھمان كۇركم. بختيار حيات قوچاغىدە تۇفانلردە اېگىلمس چىناردېك، يىرەب، يىشنىب يشەماقدە اېدىلر.

كومونىستلر دورىدەگى اۋلچاو و قدرىتلر اۋز جاذبەسىنى يۇقاتە باردى. شوندىن كېىن اجمل قدرتلى دولت پايتختى بۇلمىش مسكوهگە سىغمەى قالدى. حجتلىرى اۋتمەياتىر. لىنە خان ھم اجمل سىز يشەى آلمەياتگن بۇلىپ قالگن. بىر-بىرىگە وفادار سېويشگنلر ھر قندەى وضعىتدە ھم سوبەشىب، بىر-بىرىگە تىرەشىب يشەماقچى. اجمل مسكوهنى ترك قىلەى دېب تورگن پىتدە، كۇنگلىگە قىل سىغمەى لىنەگە معنادار قرەب دېدى:

- شىرىن و تاتوو حياتىمىز بار شكر. مېنى اېندى مسكوهدىن چىقىرىشەدى. قندەى فكر و مصلحت بېرەآلەسن عزيزى؟!

- سېنىگە تېككىمىدىن خورسىدىمىن. سېنى مېنىگە يۈرەگىمدىن چوقۇر اۋرىن اېگللەگن سەن جانىم. بو تىگلىكىدىن چىقىشىگە بار كوچىمىزنى ايشىگە سالەمىز، دېيە اېرىنىگ كۈنگىلىنى كۈترگن بۇلدى لىنە.

- نىمە قىلىسك اېكن؟ - حسرت بىلەن سۆز اچدى يەنە اجمل.

- مېن سېنىگ قانگە باتىب ياتگن وطنىگە بارىش نىتىم يۇق. حتا، سېنى دە، بارىشىنگىنى خواخلەيمىن.

- مېنىگ ھەم اۋشە ياققە بارەى دېب كۈزلىم اۋچە ياتگنى يۇق. نىمە قىلەسن المىمنى يىنگىلب، بۇلە دىغانىنى ايت لىنە! نىمە قىلىش كېرەك؟

- بىتە يۇلىمىز بار، - لىنە باسقى، ھىجانسىز بىر ھالەتدە گېنى دوام اېتىدىدى، - او ھەم بۇلسە، مسكودەگى بىرلىشكن ملتىر تشكىلاتىنىگ قاچقىنلر ادارەسىگە باش اورشدىر. اولردن باش پناە سۇرەيمىز.

- سۆزلىرىنگدە جان بار، حاضرچە قۇلىمىز اىلىنە ياتگنى انە شو. مىلى سۆزلىرىنگگە قۇشىلەن. شۇندەى قىلەمىز. اېرتەسى - ياق، بارىب مشكىمىزنى اۋرتەگە قۇبەمىز، - دېدى اجمل.

- سېن بوگون ساغلىگىنگىگە قرەتگنى دوكتورگە بارگىن خۇپمى. كون سەيىن سىلەنگ قورىب بارەيىدى. روچىنگ چۇككن كۇرىنەدى، اۋزىنگىنى الدېرىسەن. ساغلىغىنگىنى اۋەيلە. بىلەن، سىزلىرىنگ فرھنگلرىنگىزدە كۇپ نرسەگە اھمىت بېرمەى قۇيىلەدى. بىلىب الدېم، عقلدن كۇرە سىزلىر كۇپراق حسىيات بىلەن يشەيسىز. سېر جھل بۇلەسىزلىر. بونى توشىنەن. سىزلىردە دىردنى درمان قىلىشدىن كۇرە اونگە آخرگى نقتەنى قۇيىش افضل تورەدى. بىرىنچى سۆز اۋرنىدە سىزلىر دايم آخرگى

سۆزنى آيتەسىز. نىسبىت بىلن چىقىشەلمەيسىز. ھەمە نرسەنى مطلق دېب توشىنەسىز. مطلق دېب توريب آلسىز. بو سىزىنىڭ ازلىي طبيعتىنىڭىز و تريبە اصولىنىڭىز.

- شوندى بىر قالاق يورتگە منسوبلىگىمدن عارلنمەيسىنى لىنە؟
- يۇقۇ عزيزىم. روسلر نىڭ مدنى قىلمى كىتە معنوي بايلىك زمىنىدە واپەگە يېتىگن. اولر عموم بشرى قدرىتلرگە سويەنەدى. آتە-آنم مېنگە شوندى تريبە بېرگن. شولر حقىدە كۇپراق اۋىلەيمىز. مېنىڭ سېنگە كۇنگىل قۇيىشىم ھم منە شو نرسەلرگە بارىب تقيلەدى. بىز اۋرسلر سۇنگى سۆزنى اۋز جايىدە آيتەمىز.
- سېن حجتلىرنى تيارلە، مېن اېسە كىسلخانەگە بارەيىن، -خاتىنى نىڭ آغزىدىن بىلرېنى باتىريب اۋپىدى-دە، خىرلىشىپ تشقىرگە چىقىپ كېتىدى اجمل.

۴

بېش آيگە يېتەر-يېتمس اجمل و لىنەلر قاچقىنلىك مقامىگە اېرىشىدىلر. اجملنى مسكودن ھىدەب چىقىرىش قىستاۋى ھم توگەدى. اېر-خاتىن آسايشتەلىك بىلن يشب يورەبېردىلر. اجمل نىڭ اوشلمەگن يىتەگىنە آرزوسى قالگندى. لىنە بىر كۈنى شىرە كىف اجملگە تىكىلىپ:

- تېرىكلەسم مىلىم جانىم؟ -دېدى.
- نىمە بىلن؟ -جواب قىلدى اجمل.
- منە آتە بۇلدىنڭ عزيزىم، -الماسدېك برماقلىرى بىلن قارنىنى سىلەي بېردى، -
تېرىكلەيمىن اولوغ بخت بىلن.
- قىزىمى، اۋغىل؟

- خدانىنگ بېرگنى-دە.

- مېن اۋغىل بۇلىشنى ايستەيمىن، -دېدى ساووق آوازده.

- اېككىنىنگى اۋرەسن اجمل جانىم، -دېدى لىنە.

لىنە قۇلىگە ايدىش تۇلە سوونى آلەتورىب توبكده گى گىللىرنى سوغاره باشلەدى.

۵

آرەدن تۇرت آى اۋدى چمەسى. لىنە قىز كۇرەياتگىنىنى اجمل گە اىتمەى

يورەبېردى. اېرى قىستەى بېرگىچ، آخرى لىنە:

- بارىب دوكتورگە تېكشىرتىردىم.

- خوش، نىمە دەدى دوكتور؟ -سۇرەدى اجمل.

- قىز، -دېدى لىنە لىلرېدە تېسّم ارەلش.

- پېشانەم شۇر اېكن، -دېدى اجمل.

- نىمە گە؟

- نىمە گە اېدى، قىز...

- اجمل جان عزيزىم، اويت بۇلەدى، يورتىنگدن آرقلەب كېلگن قالاق فكرلر بىلن

يشب يورەبېرەسنىمى؟ يىگىرمە بىرىنچى عصرده بونداغ اۋىلمەيدىلر. بالەنى اجرەتىش

يخشىلىك اېمس. سېن خرافاتدن واز كېچگن انسان اېدىنگ-كو، -مونگلى تاووش

ايله دەدى لىنە اجمل گە.

اجمل انترنيت ترماقلىرگە كىرىپ، دلېدە گى سۇراقلىرگە جواب ايزلەى باشلەدى.

كۇپ نرسەلرگە دوچ كېلدى. «آخرى خاتىن اېرككدن توبن تورەدى»، «خاتىنلرنىنگ

ساچى اوزون، عقلى كلتە»، -دېگن خلاصە گە كېلدى و خاتىن-قىزلىرنى جزالاوچى

صحنه‌لەر، قاتىب قالگن دىنىي تعصبّ اجمل نىنگ روحيگه بمبه بۇلىب كىرگن. شوندىن باشلې، او نماز اۇقىي باشلەدى. يۇقاتگن نرسەلرېنى انه اعتقاددن تاپگندەي بۇلدى... قىزنى ادىرماقچى بۇلىب كۆردى. بىراق، بونگە لىنە تىش-تىرناغى بىلن قرشېلىك كۆرستدى.

۶

نېمە قىلسە ھم اجمل زرتاب نىنگ ائەسى اېكىنىي تن ايشگە مجبور اېدى. چقەلاققە بو اسمنى لىنە اۇلىب تاپگن. قۇغىرچاقدېك قىزەلاق ائەنىنگ قوچاغىنى تۇلدېرىب، اويىگە فىض بېغىشلب تورېدى. چقەلاق بىر ياشگە كىرگندە اجمل و لىنەلر مەھاجرلىك مقامى بىلن كاناداگە قىبول قىلىندى. بىر ايدن سۇنگ جى گىنە عايلە مسكوهنى ترك قىلىب، ايكىنچى اېدى وطنىگە يۇل ايشلرى كېرەك اېدى. اولر بختيار حيات اغوشىگە قىتەياتگىدىن خورسند. ادىلرېگە امكانىتلر اېشىگى لنگ اچىلگن. اولردن فقۇگىنە قانوننى حرمت قىلىب ىشش گىنە طلب قىلىنەدى. قالگنىگە اۇزىلرى خان، اۇزلىرى بېك...

سفرگە اتلنىش ادىدىن اېر-خاتىن تيارگرلىك كۆرە باشلەدىلر. لىنە چقەلاغىنى ساغ-امان كاناداگە االىب بارىشنى اۇيلەيدى... ۲۴- اگوست كونى اېرتەلب اوچىشلىرى كېرەك...

مسكوه ھواسىنى قويوق تومن چولغب الگن. سەھل اۋتمەي شە بىيران يامغىر قويىب بېردى. كېتىدىن بابا قوياش زرىن نورلرېنى ساچە باشلەدى. اتە-ائە و كىچكىنە زرتاب طيارەگە چىقىب اۋرىنلشدىلر. يىگىرمە دىققەدن سۇنگ طيارە آسمانگە كۆترىلدى. كۇپ اۋتمەي بەھىيت كېمە فېروزە بۇشلىق بىرىگە شونىغىب

كېتىدى. طياره قىلىن-قىلىن قاره بولوتلارنى يارىب، پرواز اېتىماقده اېدى. اوچاۋولان اجره تېلىگن اوچتە اۋرىندىققە جايلىشىدۇلر. سفرده بحثلشيش فكرىدە اېمىدى. لىنە، وقت اۋتېشىنى كۈزلب اېرى اجملنى گېگە توتدى:

- بېلەسنى اجمل؟ انسان اۋزى اىستەگن تقدىرگە تن بېرىشگە مجبور اېكن. آدم ذاتى ازلدن مھاجر بۇلىب توغىلگنگە اۋخشەيدى. بىر زمانلر انسان بالەسى ات، اېشك، تويەلردە اوزون منزل باسىب، اۋزىگە آسايشتە مكان ايزلب يۇلگە چىققىلر. منە حاضر بۇلسە، انسانلر عقل تفكرى بىلن، جانسىز تېمىرقنات كېمەلردە اۋتېرىب قىسقە وقت اىچىدە كۈزلەگن يېرلرگە يېتىب آلەدىلر. اىكلەسىدە ھم بىر قاعدە حكمران اېكن اۋىلب قرەسم. اۋز فكرىگە اېگە بۇلىب، اۋزى اىستەگن طرزە يشىنى خواخلەگنى اوچون انسان يورتىدە سىغمەي، غربت ديارىگە قرەب يوز بورىشگە مجبور بۇلركن. بىراونىنگ ايتگىنى، بىروغىنى بجرمەگىنىگ اوچون آنە يورتدن قوۋىلىشگە محكوم بۇلركن آدم. سېن و بىزنىنگ تقدىرىمىز ھم بىر تاماندن شو نرسەلرگە باغلىق. يىخشىم كە بو ياروق عالمده، انسانىتنى اۋىلەياتگن آدملر بار.

- بو نرسەلرنگ خدانىنگ آلدەدە چىپك^۱. كتەراق نرسەلر حقىدە باش قاتىر لىنە. تىمىز-تقدىر، عالم-پالىملرنگى يىغىشتىر. تېپەدەلىگىمىزنى ھىچ قچان اونوتمە...

- گېنى چوۋەلشتىرمەي ايتەدىگن بۇلسم، بو دنيادە سېن و بىز، بوتون بشرىت بىر نېچە انساننىنگ عقل مېۋەلرېنى يېب كون كۇرىب كېلەمىز. اولر يرەتگن امكانىتلر حسايىگە يشب كېلەياتىمىز. بىز استعمالچى آدملر شولرگە شكر قىلمىسدىن اۋزىمىزگە مەمما، جنجل توغدىرىب يششگە اۋرگىنىب قالگىمىز. عالملىرىنگ، دانا آدملىرىنگ

^۱ چىپك: بېھودە، ضايغ؛ يۇققە، پوچگە كېتماق.

قورالى سۇز و فكر؛ بىزنىڭ قوراللىمىز اېسە زۇرەوانلىك. اگر دنياده فقط عالمىر، اۇقىمىشلى لىر يشەگندە اېدى، بېر يوزىده تىنچلىك حكمران بۇلمىدى؟ افسوس بوندهى اېمس-ده، -دېدى لىنە بىر پىالە ساووق سونى اىچە توريب.

اجملىنى قارانغى كېلەجك، ناتىش تقدير، اېرىشىب بۇلمس موھوم اميدلر اۇز شكنجەسىگە آلگن. انترنىتدە كۆرگنلىرى اونىڭ بۇيىنىدن بۇغىب آلگندېك. غىرى دىنلرگە قرشى جنگ قىلىش، شهادت بېلباغىنى بېلىگە باغلب آلىش كى اۇىلر اجملىنىڭ مىيەسىنى بند اېتىب توريىدى. طيارە دېرەلرېدن پستگە نظر تشلەگن لىنە، طرفە اۇلكەلر، يورتلر، خلقلر، تاغ- تاشلر، دريا-يو، دېنگىزلرنى عجبىب بىر منظرە بىلن تماشا اېتماقده اېدى.

۷

طيارە نرى-بېرى اۇن سكىز ساعت دېگندە كانادە خلق ارا قۇنلغەلرېدن بىرىگە يقىلىنشدى. بىر پىسدىن كېىن قىيەلب اوچەياتگن طيارە بېرگە قۇنەدى. استيورديس^۱ عىال طيارەنىڭ قەبېرگە اوچىب كېلگنى، بلندلىگى، حرارت درجەسى، وقت و ھوا باسىمىنى اعلان قىلدى. بىر ازدن سۇنگ طيارە بېرگە بارىب قۇندى...

تېگىشلى تشكىلاتلر خادملرى اجمل عابىلەسىنى اعزابل، مېھمانخانەگە آلىب بارىب جايلاشتىردىلر. بىر ھفتە اۇتىب دولت اولرگە بلند قىتلى بنالردن اوى بېردى. جان باشىگە نقد پول، تېكىن طبي خدمت، برچە قولەيلىكلر حاضر و ناظر. كۆرگن يامان نرسەلرى آرتدە قالىب، اېزگولېك و يىخشىلىكلرنى اۇىلب، اولرگە اىنتىلىب ىشش توريىدى آلدېندە.

^۱ استيورديس (Stewardess): طيارەدە مسافرلر اوچون خدمت قىلۇوچى عىال.

لېنە اجمل نېنگ اېچىدە جدى اۋزگىزىشلر صادر بۇلەياتگىنى سېزىب تورر، اونده غير طبعىي بىر حركتلر نمايان بۇلەياتگىنى پىقب بارر، بىر نرسە قىلىب قۇيىشىدن خبردار اېدى. بولرگە، لېنە مهاجرلىكدە يوز بېرەياتگن فرهنگي تفاوت صفتيدە قرەب كېلدى. حيات ينە اۋز ايزىگە، اۋز اۋزەنىگە توشىب كېتىشىدن اميدار اېدى...

كونلردن بىر كونى لېنە اويىنى يىغىشتىرركن، تۇشكنىنگ استىدن بىر جلد پاسپورت تاپىب آلدى. ورقلب باقسە، نې كۈز بىلن كۇرسىن كە پاسپورتدە زرتاب بىلن اجمل نېنگ عكسى يايشتىرىلىب قۇيىلگن. سناقلى كونلردن سۇنگ اوچىب كېتىلەدى. آفتىدن آتە قىزىنى سفرگە تيارلش ترددىگە توشگن. آنەسىدن يىشىرىب قىزىنى قەياقەدەر آلىب كېتماقچى. بوندىن خبردار آنەنىنگ كۇنگلىگە وهىمە توشدى. اولىگە بىر حقيقت تىگىگە يېتماقچى بۇلدى. اجمل كېلگندن كېين ھەم نرسە آچىق-آيدىن بۇلەدى.

آقشام قارانغى توشگچ، سراسىمە بىر احوالده اجمل اويىگە كىرىب كېلدى. لېنە سېر بېرمىسدىن آچىق پېشانە بىلن اېرىنى كوتىب آلدى. اجمل:

- عذر لېنە مچىتدە اېدىم، شونىنگ اوچون كېچىكىب كېلدىم. خورسندىمى سن اۋزى؟ زرتابدىن نىمە خبر؟ آلتى ياش بۇلەلى دېب قالدى قىزچە. مكتىگە قۇيىش نىتىنىگ بار اېدى. اول-بول نرسە خرىد قىلدىنىگمى؟

- ھە، ھەمەسى يىخشى... بىلەسن مېن نھايتدە باسقى عىالمن. يورەك- بغيرىم كېنىگ. سېندىن بۇلك اۋىلەياتگن نرسەنىنگ اۋزى يۇق مېن اوچون. ساغ بۇلسنىگ بۇلدى. مېنگە ھر دايم يورەك سىرىنگىنى آچىب تشلەگىنىگ اوچون سېنگە رحمتلر

آيتەمن، سېندىن اۋلە-اۋلگونچە متتارمن. مېندىن يشىرىر سېرىنگ يۇق دېب اۋىلەيمىن. راستىنى آيت كېنىكى كونلر بىر ياققە كېتەياتگندەى ايشتەرابلب قالدېنگ. تېنچلىكىمى؟ سېنى بېزوتە كۇرەيپمىن!

- تېنچلىكىمى اۋزى؟ دايم بې معنى خياللرگە بارەسن-دە لېنە. لېكن، حقيقتى بېلگىنىدىن كېين اۋزىنگگە كېلەسن. شو تامانىنگ مېنگە ياقەدى. مېنىنگ سېندىن سېر توتگن نرسەم يۇق، -دېدى اجمل.

- بو نېمەسى، -ھلى آھارى كېتمەگن يې-ىنگى پاسپورتنى قۇلىگە توتىب، -بو سېر اېمس نېمە؟

- نى ي ي م م م م؟ -دېگنچە جايدە قاتىب قالدى اجمل.

- نېمە اوچون قىزىمگە پاسپورت اَلگىنىكى توشىتتىرىب بېرەسن اېندى، -دېب تورىب اَلدى لېنە.

- اۋزىنگى باس، منە توشىتتىرەمن. سېنگە غلطى تويىلمەسېن دېب آيتەمى كېلەياتگندىم. اۋن ايكى يىل بۇلدى سېن يىلن يشب كېلەياتىرمن. راستمى، يالغانمى سېن مېنىنگ دىنىمگە كىردىنگ. بىرچە آيتگنلرىمنى بىرىب كېلماقدەسن. بعضى بىر اودوملرېمىز بارلىگىدىن سېنىنگ خېرىنگ يۇق. اولرنى اېندى آيتەمسەم بۇلمس. قىزىنگگە پاسپورت اَلشدىن مقصدىم:

كېچىكتىرمسدىن سنتنى بجا قىلىشىمىز ضرور. يۇقسە، آخرتدە جزاگە تارتىلەمىز. -مىلى، اېشىتەمن، -دېدى لېنە.

- راضى بۇلسىنگ ھم بۇلمەسىنگ ھم بو قىزنى اَلىب كېتىب، اۋز يورتىمدە «ختنە!» قىلدىرماقچىمىن. اۋزى قىز بالەنى بېش ياشدە ختنە قىلىش كېرەك اېدى. منە

وقتىدىن بىر يىل اۋتدى. قرەب تورىشگە حاجت يۇق دېب اۋىلە يىمن. لىنە ايكى
قۇلىنى كۇكسىگە قۇيب:

- نى ي م م م، -دېدى-يو، قاپ-قارە تېرگە باتىب، قۇل-اياغى سسەيب
اۋزىدن كېتىب يىقىلدى.

بىر پىت قۇغىرچاقلرى بىلن نرىگى خانەدە اۋىنب تورگن زرتاب چاپىب كېلىب
آنەسىنىڭ قوچاغىگە اۋزىنى اۋتدى. آنەسى نىڭ كۇزلىرىدە جاودىرەب آقەياتگن كۇز
ياشلىرىنى بىنگى بىلن اۋرىتىب، بار تاووشى ایلە تکرار-تکرار «آنە جان!!!» -دېب
بقىردى. زرتاب آنەسى نىڭ كۇزلىرىدن اۋپگنچە زار-زار يىغلر اېدى.

كۇپ اۋتمەى اېشىك تق-تقلەدى. يىغلەياتگن زرتاب «دوكتور جان! دوكتور جان!
آنمى قوتقريب بېرىنگلر التماس!!!» -دېبە زارلىنىب يالبارە كېتدى. پولیس هم تېز
طېبى خذمت خادملرى بىلن اويگە كىردى. اولر اجمل نى سۇراققە توتە باشلەدىلر...

۲۰۰۶ - كانادا

نجات ایزلب

نجات ايزلب

حكاية قيله ياتگنيميز موضوع حياتي بۇليب، بو واقعه گه كۇپ يىللر بۇلدى. اۇشه پيتلىرى شفاخانه دېگن نرسه بيريگينه ولايت مركزىده بۇلر اېدى. بيزنينگ شهرىمىزگه هلى زمانوي اېملىش¹ يېتىپ كېلمه گن. اوستيگه اوستك قيشلاغىمىز هم شهردن بېش چقىرىمچه ليك اوزاقده جايلىشگن. شولرگه قره مهى، خامه يۇللر اۇشه شهرلر ارا كته-كېچىك يوك ماشينه لرى قتنب توره دى. آدملر اۇز ايش-يوموشلر ينى قۇلده دير، آياق بيلن دير، اولاده دير بجريپ يوريشگه اۇرگىب قاليشگن. قيشى لاي، كوندوزى چنگ-تۇزانگه بېلىنپ بۇلسه هم كيشيلر تيريكچىلىكلر ينى انه شو يۇسىنده تېبره تيشگه مجبور اېدىلر اۇشنده. خودى، حاضرگينه يوز بېرگنده انيق اېسىمده تورىدى - اۇشه واقعه. بو بيريىنچىسى اېمس، سۇنگىسى هم اېمسدى. بو نرسه اۇشه يېرلرده، و ينه قيسى دير يورتلرده حاضر هم بۇله ياتگندير احتمال. اعتقاد لايىگه ايلدىز آنگن علتلر تېز-تېز قىتھلىنپ توره دى-ده برى بير.

¹ اېملىش: طبي خدمت؛ معالجه قىلىش.

جمعه كۈنى بۇلدى دېگونچە، اوزاق-يىقىنلردن اق چادر ياپىنگن خاتىن-خلىچ يەياومى ياكە اېشكده مى كسل-بىمارلرېنى اېتكىلب، قېدهسن «مُله تۇره» -دېبه يۇلگه چىقىشردى. بىراو اېرىدن تىنمەگن، بىراو كۈنداشىدن نالىيدى؛ يىنە كىمدىر تىرناققە زار - باله كۇرىش اىلىنجىده. بولر آرهسىده اجىنه¹ چلىب كېتگن، كۇك يۇتلگه يۇلىققن، چىپقان چىققن، كۇزى آغرىگن، يوك توشگن، قولاغىدن اېرىنگ كېلەدىگن، سۈخلنگن، بالهسىگە چېچك-قىزەمىق چىققن، اىچ كېتىدى، تىش آغرىق، بالهسى تورمەگن، توماولهگن، ايت قاپگن، قولونجلى، سرىقلمە، خلىص، مىنگ بىر كسللىك بىلن آغرىگنلر بار بولر اىچىده. مُله تۇره نىنگ حاولىسى سېل كم بىر كسلخانەنى اېسلتەدى. انه شو حاولىده بىمارلر تىرىند. نوبتىنى پاىلب تورىشردى. آدملر مُلە نىنگ حقىنى بېرىب، دعاسىنى آلىب كېتىشسە بس، قالگنى بىلن اىشى يۇق.

قېرى قىق اېرىدن رىخت آله آلمەى يورگن زىيده خاله هم شىللىنگنى بىللىنگ قىلىب، يوزلرى سرغىب تۇشكده مىخلىب، آغىر نفس آلهياتگن اىكى ياشر بالهسىنى كۇترىب، يۇرتمە اۇغلىنى اېرگشتىرىب يۇلگە چىقىدى. چىقىشدىن آلدىن تاووقلرى نىنگ كىتىگە قۇل تىقىب، «يا بېھوالدىن بلاگردان» -بېتىتەچە تخمنى آلدى-دە، چىنگىنى آرتىب، بىر توگونچەگە توگدى. زىيده خاله بالهسىنى بىرگە باسىب، يازدە سووى كېسكىن كەمىب آقەياتگن درىانى كېچىب، مُله تۇره نىنگ اويىگە زۇرغە يېتىب آلدى. بالهسى بېتابلىگىنى پېش قىلىب، اورىلىب-سورىلىب بۇلسە-دە، اىچكىرىگە كىردى. بىر ساعت اۇتر-اۇتمس زىيده خالهگە نوبت يېتىدى. او

¹ اجىنه: جن. اجىنه چىلماق؛ چن تېگماق، عقلدن آزدىرماق.

بالاخانەگە كۈتۈرلۈرگەن، لېلىرى كۈكرگەن بالەگىنەسىنى قوچاقلەگنچە، شاشە-پېشە مە تۇرەنىنگ قارشىسىگە بارىب اۋتېردى و سلام قىلدى. مە تۇرە تخمىن مە بوندە كۈرۈنىش بېرەدى: ائتمىش ياشلر تېورەگىدە، اوزون آپاق ساقاللى، قېرە بورون، بۇنىنىنگ اۈنگ تامانىد چىگىتدە خالى بار. شو سېدن بۇلسە كېرەك اونى آدملىر خالدار مە هم دېگىچ اېدى. كۈزلىدە كۈزلىك، سەسىنىنگ پېچىنى اېلكەسىگە بوكىب تشلەيدى. اق كېىنگەن آدم، يلىتېرەب تورگەن پېشانەسىنى آرە-چورە ياغلىق قۇلىنىنگ كفى بىلن بىر-بىر سىيرىب قۇيەدى. دعاسىگە كېلگنلر اونى قىسقىچە «مە اكە» -دېب هم اتەشەدى. مە اكە قىزىل كۈرپەچە اوستىدە اۋتېرگەن، يانىدە ناس قۇتىسى، قارشىسىدە تونىكە توفدان، اۈنگ تامانىدە ياستىقەدى-ياستىقەدى سىرىق اوراقلى تاشباشمە كتابلر قەلنگەن. برماقلى آرەسىدە يوزدانەلى تىسىحى شىقىللب بارىب كېلەدى. گاهەدە ياغ باسگەن ساقالىگە غراودېك^۱ يۇغان-يۇغان برماقلىرىنى يوكىرتىرىب «استغفرالله» -دېب هم قۇيەدى. او كۈزلىگىنى قىيشەيتىرىب تاقەدى. دېواردە بۇلسە، قارە توسلى قمچى اسىغلىق تورردى.

اوزاق تاماغىنى قىرگەن مە تۇرە زىدە خالەنىنگ سلامىنى علىك آلرگەن، خالەگە يوز بورىب: -هو، قخو، هو!! خۇب، سىز ضعيفەدە نىمە گپ، نىمە دردېنگىز بار؟ اىسىغىدە ايتە قالىنگ! -دېدى مە اېنەغەن بىر قىافەدە.

- بالم اوچ هفتەدن بېرى اىسىتمەلب، قان قوسىب، باش كۈترمە ياتىدى. اتەسىدن يشىرىب، يوكورگىلب قاشىنگىزگە كېلدىم جگر بندىمنى كۈترىب. بوگوندىن

^۱ غراو: پاھەسى قىتىق و بۇغىم-بۇغىم، اچى كاوك، قىشىگە اۋخشش اۋسىملىك؛ بمبوك.

بىلرى كۇكرىب، كۇزلىرى كىرتەيىب، نىس آلىشى ھم آغىرلىشىب بارماقده. شو آرەدە بىر-يىكى زىارتگە آلىب ھم باردىم، اوليا آتە توپراغىدىن يېدىردىم. بىر بار خضر خلىفەگە آلىب بارىب تال آچدىردىم، كۇچىرتىردىم، قاقىتىردىم. بىرى فايدە بېرمەدى. نىمە قىلىسم ھم كۇزى آچىلمەيپدى بالىنىنگ.

- وای، وای، وای ى ى گۇدكى كېچىكتىرىب آلىب كېلىبسىز-دە! -قۇلىنى بېمار بالەنىنگ يوزىگە قۇيىب، -بالە شىطان اورگن كۇرىنەدى. جىنىنى چىقرمسە بۇلمەيدى، -دېدى مۇلە اكە.

- نىمە قىلىسنىگىز ھم شو بالىنى تۇزەتىب قۇلىمگە بېرىنگ جان مۇلە اكە، اۇرگىلەيىن سىزدن، الھى ايسىق نىسنىگىز بالىمگە تاتسىن، -دېدى زىيدە خالە. - اوندە اتەگىنىگىز بۇلسە مۇلە بۇبەنگىزنى كۇنگىلىنى آلىنگ. الله يۇلىدە قۇلىنى اوشلىنگ، خدا اجرىنىگىزنى بېرەدى. انشالله مېنىنگ آلاودېك نىسسىم اجىنەلرنى قوۋەدى البتە!

- منە بو بېتتەگىنە اتلگن غلەلرنى سىزگە آلىب كېلدىم مۇلە جان، -دېيە بىر مىقدار پول بىلن تاۋوق تىخلىرىنى مۇلە اكەنىنگ آلدىگە قۇيدى. مۇلە تۇرە چىچەيگن كۇزلىرىنى آچىب-يۇموب، باشىدە كىسل بالەگە اوچ خىل اېملىش قىلەياتگىنىنى توشونتىردى:

بىرىنچىسى، دېدى مۇلە، -بالەنى يىچاق بىلن كېسىب-كېسىب اۇقىيىمن، «كوف»، «چوف» لىرىم اجىنەلرنى اينىدىن قۇزغەيدى، جن-اجىنەلر گلە-گلە بۇلىشىب بالەنگىزنى ترك اېتىشەدى. توشوندىگىزىمى؟ -دېب يىكى-اوچ قتلە تاكىلەدى.

ايكىنچىسى، -گۇدك نىنگ تاماغى نىنگ تۇرىگە، بۇغزىگە «شيطانگە ھى! شيطانگە ھى!» -دېب توف آتەمن و كوفلەيمەن. توفوگىم دۇرەچەلرى كسل نىنگ بار وجودىنى ايلنىب چىقەدى. اولرنى بىرمە-بىر تېرىب اۇلدېرەدى. انە شوندىن سۇنگ بالەنىنگ يوزىگە قان يورىب كېتەدى. يىخشىلب توشونىب آينىگ خالە!

اوپونچىسى، -مەنشو كۇك چاينكىنگىزنى مېنگە بېرەسىز-دە، مېن اونگە «دم سالەمن»، شو دەمنى آلىب بارىب، سىز اوچ كون بالەنگىزگە اىچىرەسىز، ھىچ نرسە كۇرمەگندېك توزەلىب كېتەدى اۇغىلچە، خوشمى؟ -دېدى مەلە اكە.

بوندەى اېملىش بالەنى توزەتەياگندەى گۇيا. گېلر زىدە خالەگە معقول توشدى. مەلە اكە اولىگە بىر آتيم ناسنى آغزىگە تىلب، كىفى ترقب توگەگونچە خيالگە چۇمدى. كېين اچىق تەمەكى توتونىنى اۇپكەسىگە جايلىش نىتى اىلە اوستىدىن قورىللىتىب چىلمنى شىمىب-شىمىب تارتدى. مەلە تۇرە قۇلىگە تىبىحىنى آلىب «كررر، كپە كپە كپە!» قىلىب بالەنى اۇقىشگە توتىندى. «اجىنەلرنى قوويب ھىدەگندىن كېين» آخون تىغىن بىر آتيم ناس چىكتى. قالگن دەالرنى آغزىدە ناس بىر حالتدە اۇقىب توگتدى.

اېملىش نىنگ ايكىنچى باسقىچىدە، ملا تۇرە اۋزى نىنگ «تېرک توفوكلىرىدىن» اوچ مرتە بالەنىنگ آغزىنى اچىب توفلەدى. قارە تېرگە باتگن گۇدك مەلەنىنگ كۇز اۇنگىدە مىق اېتمىدىن ياتردى. توغىلگىدىن بېرى تازەلمەگن مەلە اكەنىنگ تىشلىرى آرەسىدىن قىت-قىت بۇلىب ياتگن كىرلر-و، قىغسىگن ھىدلر بورقىب، اوى ھواسىنى خىرەلشتىرگندەى چمەسى.

اېملىش نىنگ اوچىنچى باسقىچىدە، مۇئەككە كۆك چاينىككە ھەم «سحرلى» نىسلىرى
 ايله دم سالىدى. زىيدە خالە مۇئەننىگ «قوتلوق دىمى» ھوالمەسىن، دىبە چاينىگىنى
 تىخەم توگىب كېلگن گل شىفتالو رۇمالگە اۇەىلب اۇرەدى. اوىيگە قىتىشىگە چاغلندى.
 علحىدە اخلاص بىلن رىھى كېلگىندىن مۇئەككە بىر چىمدىم كولىنى برماقلىرى
 اوچىگە قىسىب تورىب، اۇە و بالەننىگ كۆزلىرىگە پوفلب، پوركب ھەم قۇيدى.
 شوندى قىلىب، بىر كونلىك عذاب عوضىگە زىيدە خالە بىتاب ياتگن بالەسىنى
 «آتش نىس» مۇئەككە اېملىتگن بۇلدى. بالەننىگ تۇزەلىب كېتىشىگە امىد باغلهگن
 زىيدە خالە، كسل بالەسىنىگ اطرافىدە گرد-كېلك. بىر ھفتەگە بىتمەى بالە
 سۇنگى نىسلىرىنى چىقىرىشىگە شاشىلردى. جمە كونى كېچقورون زىيدە خالە
 كىچكىنە قىرچە اوستىدە يوم-يوم كۆز ياشى قىلىب اۇتيرردى. شوندى ھەم مۇئەككە
 تۇرەگە اۇقتىب كېلە ياتگنلرنىنگ كېتى اوزىلمىدى. شولرگە قۇشلىب ىنە مۇئەككە
 بارەى دېسە، قۇىنى بالەدن بۇشب قالگن. مۇئەككە شېھە قىلىشىگە اعتقادى اذن
 بېرمىس. «بىرى بىر، اجدلن اۇچىمنى اۇەمن» -دېگن اۇىلر بىلن اۇز ماتمىخانەسىگە
 قىتىشىگە مېجور بۇلدى خالە.

ینگلیش منظره

تورگن پلاو يوقىنى ثواب بېلىشىپ و تبرگ سَنب، ساقللريگه سورتدېلر. «رحمتلى
يخسى آدم اېدى» -دېيشىپ قَيْتە-قَيْتە آمىن لشدېلر. چىغاي، رۇزغارى ابتر
كېمغللر هم جنازه بهانه اشدن تۇيىب-تۇيىب بېدىلر. ينه شو ثواب اشدن
كرسانلرگه ساليب، اوپلريگه آلب قَيْتگنلر هم بۇلىشىدى. كتە-كېچىك رحمتلر
ايتىشىپ، مرحوم نېنگ جايىنى جتندن سۇره شدى. حاجى دانيار روحيگه تكرر و
تكرر دعالر ياغىلدى.

۲

مونى قره ننگ؛ حاجى اته قىلىشدىن آلدن، ملالرنى چقىرتىرىپ، شيره لى كينه
وصيتنامه هم يازىپ قالدېرگن اېكن. اۋشه وصيتنامه ده جمله دن شونده ي دېب
يازىلگن اېدى: «تنگرى نېنگ بنده سى مېن توپراق - دانيار حاجى فلان و
يىستە كانچىلر حضورىده شولرنى وصيت قىلە من كه تېگىرمان كتە اولوم^۱
خدا يارنىكى بۇلسىن؛ ده يمه پېرلر مەرحىم نىكى؛ سوروك قۇيلر اۋرتە ده؛ كتە باغ
اۋپلنمە گن اۋغلىم مد نظرگه، دولتىمدن قىزلر يم-يريم اولوش االشىسىن؛
آنە سىگه سكىزدن بېر؛ قرىلر اېسە آدم لردن اۋندىرىلسىن؛ نقد پولدن ملە، قارى،
امام، خطىب، خواجه، سىدلرگه بۇلسە عليحده-عليحده سرپا، ينگى كىيم باش
اينسىن و مبلغ نېنگ قالگنى شو عالي ذاتلر نېنگ يېيش-اچىشىگه صرفلنسىن.
اكتىن، كوموش، تنگه، غجهرى لريم^۲ خيراتىمگه ايشلە تىلسىن و ابل آشى بېرىلىپ،
يىلىم شېرنېنگ كتە جامع مچىتىده سىندىرىلسىن....» قاغاز نېنگ تگىده مۇر،
شاهدلر و باش برماق ايزلرى.

^۱ اولوم: اۋغلىم.

^۲ غجهرى: قاجارىبه دولتى دۆرىده ايشلې چىرىلگن كوموش تىقنىچاقلر.

وصيت بجا كېلتىرىلىپ، شام آشى، اوچى، يېتىسى، يىگىرمەسى، قىرقى، آلدېنمە- كېين اۆتكزىلە باردى. شو مدتە حاجى نىنگ قبرى اوستىدن قارى لرنىنگ آوازى آرىمە توردى. تون-كون قارى لر چقىرىلىپ، قبر اوستىدە تالوتلر يىنگرەب توردى. قىشلاقچەسىگە قىلىپ، عزا و باشقە مراسملر كۈنگىلدەگىدېك قىلىپ بجرىلدى. دانيار حاجى نىنگ يىللىگى ھم يقىنلشەى دېب قالدى. اېندى مونىسىگە ابدان تيارگرلىك كۈرىلە باشلەگن پىتلر.

۳

حاجى دانيار يىللىگىنى اۆتكزىش خبرى يايىنلدى. رادىو و تلويزون ارقەلى آدملر خىراتگە دعوت قىلىندى. طىبعى كە مراسملرنى شەردە اۆتكزىش قىشلاقچەگىسىگە قرەگندە سېر خىراتق بۇلەدى. ھر قلەى بايلىك، مىراث كۆتۈرۈن بوندەى چىقىملرنى. اولكن جامع مچىتنىنگ تام ارقەسىدە كتە-كتە قازانلر آسىلدى. اوستە بكاووللر حاضر بۇلىشىدى. قطار-قطار قازانلردە پلاو خان تۇرە دىلندى. دستورخانلر يايىلدى. قۇلى-قۇلىگە تېگمەى آشپزلرنىنگ كىگىرلىرى قازان نىنگ قولايىگە جىرنگ-جىرنگ تېگەدى. غۇرىلرگە آش سوزە باشلەنە بېردى. سلە پىچىنى باشىگە قىستىرگن آياق يىلنگ جىرلرلر دستورخان اوستىدە يۇرغلەياتىب، «اوپاۋرە آىنگلر» -دېب تاواقلرنى تىرقتماقچە اېدىلر. تالوت و خىرات صحنەلرى فلمگە آىندى. شەرگە آلىب بارىلىپ تلويزىوندن قۇيىلىشى كېرەك بۇلدى.

مىركەدە قۇل قاوشتىرىپ تورگن آىدىنلى بىر كىشى نېگەدىر كۈنگلى غىشلىنىپ: «دستورخان اېنگ تازە و تېرک نرسە-كو! ھمە يورتدە بو دستورخان تازە قىدرىت حسابلەندى. كىر آياقلرىنگىز بىلن دستورخان اوستىدە اۋىناقلب آش تىرقتىشىنگىز

يخسى ايش اېمس يىگىتلر. اوقتنى قۇلمە-قۇل قىلسنگيز ايش اسان كېچەدى، قۇناقلر هم بېزاوتەلنمەيدى. يۇقسە ناننى خوار قىلگن بۇلەسىزلر؛ بو ايشلرېنگيز بىلن اېلگە كولگى بۇلەسىز. باشقەلر سىزنى «بولر مدنيت سىز، ياووايى آدملر اېكن، دېب اۇپلشەدى. تۇغرىسىنى آيتەى، اوشبو صحنەنى كۇرىشدىن اوپەلىب كېتەيىمن. بو جىركىچ علتنى كىم آلدىنى آلدەدى؟ ضيالى سىز خىراتخۇر طايفەنىنگ احوالى شو بۇلركن-دە، وادىغ!!» -دېب اىچىدەگى بار دردىنى تۇكىب سالدى.

شەر نورگە تۇلگندەى ساكن. همە آخرتنى اۇپلېب، يورەگى اېرىب، يوشەگن كون بۇلدى... خىراتخۇرلر ترقەلىشىدى؛ كون اۇرتە بۇلېب قالگندى. قوياش قىزىگن بىر پلە. مچىتدە مرحومنىنگ يقىنلرى مللەر، خۇجە و سىدلر، حاجى-يو آبرولى كىشلر قالىشىدى، خلاص. جامعە آواز كۇترگىچلر واسطەسىدە پېشىن نمازى هم اۇقىلدى. خىراتدن كېىن ھلىگى آدملر يىغىلىشىب، دانيار حاجى نىنگ شەرەدەگى اويىگە قىتىب كېلىشىدى. كتە حاويلدە تۇپلنىشىدلر. اوستە يىگىتچە كمرەنى كىمپوترخانەگە آلىب كېلىب قۇيدى. يىگىتچە خىرات و مراسم صحنەلرىنى اېسدەلىك اوچون كىمپوتردە يوكلىشى كېرەك اېدى.

اۇتيرگنلر اوستە يىگىتدن فاتحە، مراسم صحنەلرىنى تلوزيوندىن قۇيىب بېرىشىنى التماس قىلىشىدى. بروقت بجرىلىشى كېرەك. آدملر تلوزيون پردەسىدە اودومنى كۇرىشگە چاغلنەياتگندى. سەھل اۇتمەى، تعزىە و خىراتلر مراسمى تلوزيوندىن قۇيىلە كېتىدى. نىمە بۇلدى-يو، بىر آز اۇتىب كۇرستە تورگن زنگارى شىشە پردەسى قارەيىب لىپ-لىپلەدى، قارەيىب، اقريب اۇچىب قالدى. نې سۇز بىلن آيتەى كە بىردن تلوزيون اكرانىدە ھىجانلى تاووشلر، آخ-واخلر بۇلىب قالدى. كېتىدن اېركك

و عيال اۋرتەسىدە بۇلەياتگن اېنگ نازك مناسبتلر، يالانغاچ و اويتلى صحنه لر باشلنىب كېتدى.

«يا توبه! يا توبه! استغفرالله!!!» - دېيىشلر، تلوزيون اكرانيدن ينگرهياتگن ھنسىره شلر، ناليش و ايغره نيشلر آستيدە قاليب كېتدى. بىردن آقساقال لر اوستە يىگىتكە قرەتە: «اۋچىر، اۋچىرررر، تېزراق اۋچىر بولرنى» - دېگن تاووشلر آتيلدى. ينگلىشگن اوستە يىگىتچە افسوس كە اۋشە ساتى اۋز جاييدە اېمس اېدى...

بارسه کلمس

بارسە كېلمس

انقلابدىن ايككى يىل اۋتېب اېدى. شەھردە گى بېتە-يو، كتە مەكتەپ ياندىرىلدى. بار كېچىك مەكتەپلەرنىڭ ھەم كولى كۆككە ساۋرىلدى. بىرچە قىزلەر، بالەلەرنىڭ يوزىگە اۋقىش اېشىكلەرى تەقە-تەقە يايىلدى. بو كۈنلەردىن قاچىگىلەر قاچىدى؛ قاچە-ئەلمەگىلەر تۈبەلەر قىلىشىپ، مەسجىدلەردىن اۋزلىرىگە باش پناە ايزلشلىرىگە تۇغرى كېلدى. شۈندىن كېيىن مەجھۇلەر تامانىدىن تېرگاۋ، سۇراق-جۈۋاب كۈنلەرى باشلىنىپ، قىپ-قىزىل قىيامەت قۇپىدى شەھرىمىزدە. اولەر مەكتەپ اۋقىگىنلەردىن اۋشلەگىلەرنىنى آتە-آنەلەرنىنىڭ بىرىدىن سوغۇرىپ آلىپ، گۇمداق قىلەبېرىدىلەر. قىز بالەلەر اۋز اوپلەرىدە قەمب قۇيىلدى. ھە! چىندىن ھەم قىيامەت! مەكتەپ كۆرگىلەر اېندى اولەر آلدەيدە حساب بېرىشلىرى شەرت. اۋقىگىنلىك كېچىرىلمەس گىناھگە تېنىگ بۇلىپ قالدى. آتە-آنەلەرنىنىڭ آلدە، يۈپتەشلىرىگە قەرمەي، مەكتەپ بالەلەرى كېچەلەرى قۇرقىندىن آخسىرەپ، بىقىرىپ، الجىرەيلىپ چىقەياتىگىن كۈنلەر اېدى. قەيىردەگى بلا اېدى بو! اېندى ھەم قارە مەھكەمە بورياسىدە تىز چۆكىپ، بېر تىشلىپ، تال بىرگى دېك تىنىمىسىز تىترەياتىگىن

أنلر. بىر ياقده سۇيىل^۱، دېوار بېتىدە اېسە تېمىر تنگەلر سالىنگن شلاقلر اسيغلىق تورييدى. باشقە ياقده قىن-پانە، زنجىر-زولانە ساووق و اۋتە قۇرقىنچلى حالت كۈزگە تىشلەندى. اولر نىنگ توتقىنىدە توريش سەھل كەم اولىم دېمكىدەر. برچە نىنگ اۋى-اندېشە سىدە شونەدى خياللر حكمران. انسان بالەسى توشىدە كۈرگنلر نى اۋزىگە ايشانقىرەمەى، «كېچەلر كۈرگنلر كاشكى توش بۇلسەىدى» -دېب چىقەدى. هۇل و قوروق انسان تقدىرى سىرپەىگن اق و قارە ساقلر قۇلىدە...

«اولر يرەتگندىن بوىروق كېلتىرگن؛ پروردگار يالغىز انە اۋشەلر نى يارلقە گندېك گۇيا. تنگرى اۋز حكمنى هەمگە بىردەى عيان قىلگىدە آدمزادنىنگ تشوېشى ازراق بۇلمىدى! هەمە عىب اۋزىدە» -دېدى المى قۇزىب، غضبى تاشگن كۇپچىلىك سادە ادملر.

اۋقىشى چلە قالىب كېتگن جۇرە قول اۋشەلر نىنگ قۇلىدىن زۇرغە قوتىلىب ادى. مچىتگە تېز-تېز بارىب توريشى جانىگە ارە كىردى شېكىللى، عمل-تقل قىلىب بۇلسىن اۋز قىشلاغىدە، بوياغى يشب كېتىشىگە كۇزى يېتىدى. حىيات معناسى اريب، تاتى كېتگن اېسە-دە، شو كونگە مجبوراً كۇنگن بۇلدى او.

جۇرە قول ايكى هفتەدىن كېىن اۋن تۇقىزگە كىرەدى. ايشچن گىنە بالە، چىقەى، قارە مغىز، بۇيى ناوچەدىن كېلگن؛ لبلر نى اېندى قارە مەيىن توكلر باسە باشلەگن، بىراق، يوزلر يگە ھلى اوسترە^۲ تېگمەگن. اۋازى يۇغانلىشىب، كېكىرتكى بۇرتىب چىققن يىگىتچە؛ كۇزلرى شىشەدېك تىنىق، قوبوق قىنە ساچلر يگە كۇچە چنگلر نى انچە گىنە ارەلەگن. مكتبەدىگى تازەلىك و ازادەلىك اونى بوتونلەى ترك اېتىدى.

^۱ سۇيىل: اوزون يۇغان كلتك، تىاق.

^۲ اوسترە: ساچ-ساقالنى قىرىش اوچون ايشلەتيلەدىگن اۋتكىر تىغلى، دستەلى اسباب؛ ساقال ماشىنى.

اۋزى ايستمەگن بولغاق حياتگە تن بېرشگە ناچار. بېش وقت مچىتدە كۆرىنسە بۇلدى؛ بو دنيادە باشقە آرتىقچە تشويشى قالمەگندېك. اېگىلىب، بو كىلىب، منگلەيىنى بېرگە اورسە بۇلدى؛ شونىنگ اۋزى كتە «كمالات» اېكىنى شوندا توشونىب يېتدى. بو نرسەلر اللهگە نيمە اوچون كېرەكلىگىگە عقلى يېتمىدى. «توبىلىكە هم فضيلت بار» - دېگن «حكمت» دن بېخبر اېدى جۇرە قول.

هر كون كۆزى آلدیدە دنيا بېر خيل، تکرارى و بېمعنا بۇلىب كۆرىنەدى. اوزاق-يقىنگە جيلەيىن دېسە قۇلى هم، كۆزى هم يېتمەيدى. قىشلاغىدە ايسىز قازىققە باغلىق او.

جۇرە قول يشب تورگن قىشلاغىدەگى كتە يۇل ياقەسىدە، بېش-آلتى ياشر يم-يشيل توت درختى كۆرك سالىب تورردى. بېر كتە صفەنى ياپگودېك كۆلنكەسى بار بو درخت نىنگ. جۇرە قول بۇش وقتلريدە انه شو درختگە كېلىب، نودەلرى آستيدە، اۋيگە تالەدى. عمرى نىنگ اۋتەياتگن لحظه لىرىنى سر حساب قىلىشگە كىرىشەدى. تۇغرى، درخت اونچەلىك كېكسە و دنيا كۆرگن اېمس؛ هر قلەى اۋزىگە تېنگداس بېر درخت-دە. انه شو توت درخت بىلن سىرلشيب تورهدى او. قرەسە كە شوگىنە درخت جۇرە قول نىنگ دېگنلىرىنى اېشىتىب، دردنى آلەيىدى. جۇرە قول هم اونگە بار مېرىنى قۇيگن. درختگە آيتگنلىرى گۇيا آلتىن دفتردە يازىب قۇيىلگنگە اۋخشب تويىلەدى نظريدە.

بېر پىت قۇققىسدن خيالى آغىب، درخت بىراقلىرىنى سەنەياتگندەى كۆزلى تېپەگە تىكىلىب قالدى. قرەسە كە درخت نىنگ شاخەلريدن آيرىم-آيرىم برگلىرى آرە-سىرە سرغەيە باشلەگن. هر كونى قوياش باتىشدىن آلدىن شو بېرگە كېلىب، بېر قارەسىنى

كۈرستەدى. كون اۋتېب بارگن سرى درخت نىنگ سرغە يگن يىراقلىرى آرتىب بارە ياتىر اېدى. اۋىلشگە توشدى جۇرە قول اۋزىچە:

- ياپىرىم اېى! كوز اېمس-كو، نېگە بو درخت نىنگ برگلرى سرغە يىب توشە باشلە يىدى؟ نېمە دن اېكن بو سرغە يىشلر؟ ياكە مېنىنگ باشىمگە توشگن سودالر اونىنگ هم ياقە سىدن آلگنمى اېكن؟ - دېدى آسمانگە قرەب.

هر بىر اوزىلىب توشە ياتگن يىراق قارە كۈز صنفداشلىرىدن بىرىنى اېسىگە سالەدى. بىر كون بارىب بوتون درخت سرغە يىب، قاجىرەب، قورىب تۈكىلسە بارمى؟! او انه شو كوندن اۋتە اضطرابده اېدى.

جۇرە قول اويىگە بارىب كۈپدن بېرى قاتىب ياتگن قوروق مېشچەنى سووگە ايويتىب قۇيدى. اېرتەسى بىر كۈزە سوو آلە ياتگن چرم مېشچەسىنى قۇلتىقلىب، بولاق باشىگە باردى. و قىنب تورگن بولاق قىرغاغىدە قىمىرلە ياتگن اوچ-تۇرتتە شولوكنى^۱ هاووچىگە آلىب، قوم اوستىگە ايرغىتىب آتدى. كرەوات^۲ مېشچەنى سوودن تۇلدىردىب، تۇغرى آلىب كېلىب توت درخت تنەسىگە قويدى، «آب حياتدن يىخىلىب، تۇيىب، سىمىرىب اىچ جانىم! سېن ھلى يىشىنىنگ كېرەك؛ اۋزىم ھالاكتدن قوتقرەمەن سېنى» - دېدى توت درختگە قرەب.

^۱ شولوك: زولوك؛ چوچوك سوو حوزلىرىدە يىشاوچى، بىر تقيچ ياكە پرازىت حالده كون كېچىرووچى حلقەلى چوولچىنگلر وكېلى.

^۲ كرەوات: اوستىدە كۈپچىلىك بولۇپ اۋتېرىش اوچون مخصوص ايشلىگن، ياز كونلرى حاولى، چايخانه و شو كېى جابلرگە قۇيىلەدىگن مخصوص قوربلمە؛ سۇرى، چىركت. كرەوات مېش: كتە مېش، صفەگە اۋخشەگن كتە مېشچە.

جۇرە قول بېتاب درختگە قرەتە: «ھلى سېنىنگ شىرمان^۱ توتىنگدن كۇپلېب آدملىر تاتىگەي؛ سلقىن سايەنگدن راختلر آلگەي؛ حتاكە، قورت-قومروسقە لىر، قوشلرگە-دە مېۋەنگدن يېگۈلىك بېرگەيسن، رزق اولشگەيسن» -دېگن گېلرىنى ايجىدە ايتگن بۇلدى. و درختگە سوو بېرىشدىن تالمەي، ايشىگە دوام بېرەۋېردى. شوندىن كېيىن توت درختگە جان كىرىپ، يىراقلىر يوزىگە سوو يۈگۈرە باشلەدى. توت درختدىن طراوت و يىشلىلىك تۇكىلىپ تورگودەي ابدى. جۇرە قول بىر خىرلى ايش قىلگىنىدىن يېنىگىل تارتىپ، روھى تازەلندى.

۲

جۇرە قول كېچەلىرى آتە-آنەسى نىنگ بغيردە، عايلەدە تىن آردى. بىرى-بىرىگە قوت و باش پناھ بۇلىپ تورىدى عايلە اعضالىرى. لېكىن، اوى باشىدىن قۇرقوۋ و قوتتو اريگىنچە يۇق. اولر بىر كار-حال بۇلىپ قالىشىدىن دايم خواطرده يشب كېلدى. شو تاپدە آسمانده تۇلىن آي ياغدو ترەتر، سما يوزلدوزلىرى آيسى-آيسلردن ايتىللىب كۇرىنەدى. چېكىسىز كاينات كېمەسىدە بوتون جانزادلىر سفرگە چىققندېك. مجال بېرىشە تون نىنگ آسايشتەلىگىدىن مىرىقىب، دم آيشگە نىمە بېتسىن. تون آدمنى شاعر ياكە فىلسوفگە ايلنتىرىپ قۇيرىكن. تونلىرى تازە اۋى و چوقور مشاهدەلر مېيەگە اورىلركن. عادتدە كېچەدە فضىلت كۇپ. اېركك-عيال تونلىرى جفتلشيشگە، بىر-بىرى نىنگ قۇيىدىن راحت-فراغت آيشگە ايتىلىشەدى. حاولىدە چىراق ياقىشىگە احتىياج يۇق. ساعت اۋن ايكىگە يقىنلشماقدە ابدى. بىردن ايت نىنگ ھكىللىب، غىشىب ھورشى باشلندى. بۇيىدىن بايلنگن ايت، قندەي دىر يات

^۱ شىرمان: تىدىردە ابدى گىنە پىشىپ، يلتىللىب تورگن نان. بو يېردە شىرەلى، شىرىن، يلتىراق معناسىدە.

تاووشلرنى سېزىپ، كوچلىراق ھورىشگە توشدى. اونگەچە ابلكەسىدە كلاشنيكوف
 آسىب آلكن ايكي آدم حاوليگە تۇغرى كىرىپ كېلىشىدى. تويقوسدن طوطى عمە و
 يىخسى باى اكه بېزاوتەلنىپ اۋرىنلردىن توريشدى و قۇرقو ارەلش:
 - يا توبە! كىم بو؟ نىمە ايشلرئز بار ابدى يريم كېچەسى؟ -دېب سۇرەشدى تونگى
 مھمانلردن.

- بىز، -دېدى تاماغىنى سېكىن گىنە قاققن تونگى آدملردن بىرى، -خىرىت-خىرىت،
 قۇرقمنگلر، بىز بىرىنچىدن سىزلردن خبر آلگنى كېلدىك. ايكىنچىدن اۋغلىنگىز
 جۇرە قول گە آیتەدىغان گىمىز بار ابدى.

- نىمە ايشىز بار ابدى تۇرەم؟ -طوطى عمە باشىدەگى قرسىنى پېشانەسىگە
 تارتدى، -اوخلەيپدى بالم. كوندوزى كېلسەيلر بومسىمدى؟ مکتب اۋقىگن بۇسە يم
 كافر بۇلگنى يۇق بالم. عقللى، اېسلى بالە گىنە. ھىچ كىم اوندىن آزار كۇرمەگن.
 - سىز آیتگندەى قىلسك ھم بۇلردى-يو، خالە گىمىز مھم، خلوتدە گېلىشىپ
 آلگىمىز يىخسىراق دېب اۋىلەدىك، -دېدى آغزىنى قارە سلە بىلن اۋرەب آلگن
 تونگى چقىرىلمەگن مھمانلردن بىرى.

طوطى عمە بارە سالىب اۋغلى جۇرە قولنى سېكىن تەتەلب اويغاتدى. جۇرە قول
 اويقوسىرەب، جايىدىن سكرەب توردى. آنەسىنىگ بۇيىنىدن قوچاقلىب آلىب، ينە
 كۇرپەسىگە كىردى. آنەسى عزيز اۋغلىنى قۇلتىقلىب، شو چارلنمەگن تونگى مھمانلر
 آلدىگە آلىب كېلدى. جۇرە قول كۇزلىرى تۇلە اويقو بىر حالدە تونگى مھمانلرگە:
 - سلام، -دېدى و چۇكەلە توشدى.

تونگى مھمانلر ھم احتراس ايله آيت و حدىثلر اۋقىب، دعا و صلوات آيتىشىدى. و
 بىردن مقصدگە كۇچدىلر:

- بیز اللە نینگ امرینی بجا قیلیشگە درگاھینگیزگە کەلدىك یخشی باى اكه؛
 علمالريمیز جهاد و اوروشلرده هلاک بۇلیب بارماقده لر. اولر نینگ ایزداش لرینی تیارلش
 بیز اوچون هم فرض، هم قرض. نصیب ایتسه الله عنایتی ایله اۇغلینگیز جۇره قول
 یقین وقتلرده کتە دین عالمی-مولوی بۇلیب، اۇز قیشلاغیگە قیتە جکدیر.
 - یوق، یوق! مېن بالمنى اۇز قۇینیمدن، یانیمدن نریگە جیلیشگە رخصت بېرمە یمن،
 -دېدی طوطی عمە. مھمانلر نینگ بو گپیگە آتەسی هم قرشیلیک قیلدی. کۇزی
 اچیلمه گن بۇز بالهنی^۱ قندە قیلیب یریم کېچەسی مېن ناتئیش آدم لرگە
 تاپشیره من، انصاف قیلیب بیر اویلب کۇرینگ قنى تۇغرى ایش میکن شو قیلەدیگن
 ایشلریز؟

- داد و وایلرینگ فایده قیلەیدی. مسلمان بئدهسی الله یۇلیده هر نرسەگە تیار
 بۇلماغی کپرهک. بیز نینگ بو یروغیمیزدن بۇیین تاولش عین شرک، الله گە قرشی
 چیقیش و بیر یوزیده فساد قیلیش بیلن تېنگدیر.
 تونگی مھمانلر جۇره قول نینگ قۇللریدن اوشلب، یۇلگە باشلەدی.

بو وضعیتدن چیغە-بییران بۇلگن طوطی عمە جۇره قول نینگ بۇینیدن قوچگنچە،
 بغریگە باسیب، ییغلب-ییغلب یوز و کۇزیدن اۇپیشگە توشدی. تقدیرینگ شولر
 قۇلیده اېکن «آی باریب، امان قیت بالم!» -دېیه اۇغلیگە ایلشیب، دروازەگە چە
 باردی و بۇینیدهگی بۇری آشیغینی یېجیب اونینگ بۇینیگە آسدى. شو بۇری
 آشیغینی طوطی عمە جۇره قول توغیلگنیده سوخدن، یامان کۇزلردن اسرەسین
 معناسیده اۇغلی نینگ چقەلاقلیک پیتیده بېشىگىگە آسیب قۇیگندى. منزلگە یېتیب

^۱ بۇز باله: اېندى گېنە کوچگە تۇلیب کېلە یانگن، تورموش اچیق-چوچوگېنى تاتمه گن، تورموش تجربه سیگە اېگە
 بۇلمه گن، خام باله، اۇسمیر.

الگندن كېين جۇرە قول انە شو بۇرى آشيغىنى «مېن تيريكمەن» رمزي معناسيده
 انەسىگە قىتیب يوباريشى كېرەك. عين پىتدە بۇرى آشيغى انە اوچون منگو
 ساغىنچ بېلگىسى هم دىر. جۇرە قول انەسى نىنگ كۇكسىگە باشىنى قۇيىب، «آق
 سوتىنگىزگە راضى بۇلىنگ انە جان!» -دېب شو جايدە خىرلشگە اولگوردى.

۳

جۇرە قول بىلن اوچاولان يۇل يورسە هم مۇل يورىب، آيتىلگن منزلگە يېتىب آلدىلر.
 اولر يېتىب بارىش كېرەك بۇلگن بىر، اصليدە پاكستاندەگى مجاهد تيارلەياتگن
 مكان اېدى. اوزون آق كۇيلىك كىيگن بالەلر، ملالر آلديدە تىز چۇكيىب، باشلرىنى
 يۇقارى-قويى سىلكىتىگنچە درس اۇقماقدە اېدىلر. عربچە سۇزلرنى بىدىرلشىب،
 اۇقىياتگندىلر. جۇرە قول هم اېسكى طلبەلر آرسىگە بارىب چۇكىدى.

- قەبىردن كېلدىنكىز يىنگى مېھمان؟ -دېب سۇرەدى طلبەلردن بىرى.

- اۇز حالىمگە قۇيىشمەي، مېنى توركىستاندىن آلىب كېلىشىدى، -جواب قىلدى جۇرە
 قول خفە بىر كۇرىنىشىدە.

مدرسردن بىرى جۇرە قول نىنگ قۇلىدن اوشلب، طلبە بالەلر يانيدن بىر صفدە
 بېرلشتىردى. درس خانەگە كتە آخوند كىرىب كېلرکن، طلبەلر بىر آوازىن صلوات
 آيتىشىدى. ماش-گوروچ ساقاللى بىر آخوند اۇقووچىلر حضوريدە جۇرە قولنى
 تۇختە تىب تىنىشتىردى:

- بو بالە بو گوندىن باشلب، الله يۇلىدە جهاد قىلگىنى سىزىنىنگ قطارىنگىزگە
 قۇشىلدى. جۇرە قول اېندى قرانگە آنت اىچىب، شهادت بېلباغىنى كمرىگە باغلىشگە

تيار. قاره بېلباغنى بېلىگە باغلىدى انىاللاھ و كفارگە قرشى جھاد قىلەدى! -دېدى
او سۇزى نىنگ سۇنگىدە.

جۇرە قول يورتى نىنگ رسم و رسومىنى بجا كېلتىرگن بۇلىب، انەسى بۇنىگە آسگن
ايىك ايىلى بۇرى آشىغىنى كۇزىگە سورتىب بىر اۋىب قۇيدى. جۇرە قول نىنگ بو
حركتىدە جۇدى ناراضىلىك آھنگى ياتگندى. بونى عربلر، آخوندلر حسابگە آلمەى،
سۇزلرىدە دوام بېردىلر.

ايكنىچى مدرس اېسە جھاد فضىلتلرى بايىدە نطق سۇزلەدى:

- عزيز مجاهدلر! سىز شھادت بېلباغىنى ايتىلگن تىرىدە باغلىنگىز. علاجى بارىچە
اياقلىرىنگىز آرەسىدە محافظت اوچون تېمىر قلغان باغلب آيشىگىز واجب دىر. شھىد
كېتىسنگىز، بھشتدە سىزنى حور و غلمانلر خوش قرشىلەگە يىلر. باكەرە قىزلر آغوشىدە
سىز كۇنىگىل مرادىگە يېتب، عشق شىرىتىدە سېراب بۇلگە يىسىز يا نصىب! بو اللە نىنگ
سىز و بىزگە بېرگن وعدە سىدىر.

شو يىردە دىنى سباق و عملى اوروشلر جۇرە قولگە هم اۋرگىتە باشلىدى. اونگە
جھاددە ھۇل و قوروق بېردەى يانىشى اللە نىنگ حكىمى، -دېبە اوقتىرىلدى. شونەدى
تقدىرگە گرفتار قىلىنگن جۇرە قول ناچار اوروشلرگە تونگى عملياتلرگە تارتىلە
باشلىدى. بو ايشلرگە عربلر و قۇشنى مسلمان يورتلردن كېلگن مجاهدلر باش-قاش
بۇلىشىپ تورىدى. بو جىرئانده وايەگە يېتمەگن بالەلر هم اوزاق-يىقىنلردن آلىب
كېلىنە ياتگندى. مدرسە اېشىگىدە «اۋلسنگىز شھىد، اۋلدىرسنگىز غازى!» -دېگن
عرب تىلىدەگى يازوو آسىغلىق تورردى. اوروش و پارتلىتىشلر قىلىپ اۋلىب كېتگن

يېڭىتلىر، بالەلر اۋرنى يىنگى-يىنگى مجاھدلر حسايىگە تۇلدۇرىلماقدە اېدى. جەھاد شەت ايله دوام اېتىدىرىلماقدە...

۴

جۇرە قول يۇلىدە اداى تمام بۇلگن طوطى عمە تىنمەيىن كۇز ياشى قىلر: «بالم نىنگ ھىدىنى اىب كېلگندىرسن شمال» -دېب ھوانى تۇيىب-تۇيىب ھىدلر اېدى. اۇغلى نىنگ يۇلىدە كۇزلرى قورىب قالگن بېچارە آنە، بالەگىنەسى نىنگ كىملىرىنى پىسلىب توننى كونگە اولب چىقەدى. آخرى چال و كىمىر جۇرە قول نىنگ درگىنى ايزلب يۇلگە چىقەياتگن بۇلىشىدى. طوطى عمە اۇغلىگە بىر جۇرە كىم باش و اىكۋىتەگىنە پتير قىلىب: «قىدەسن جگرىم بىر بۇلگى» -دېبە يۇل باشلىشىدى. آتە- آنە ايتىلگن منزلگە يېتىب اىلدىلر. طوطى عمە و يىخسى باى اكه مدرسه اېشىگىدە توريب:

- «جۇرە قول»، -دېب تاووشى يېتگنچە قىچقىردى.

ھىچ كىمدن اواز چىقمس اېكن، اطرافدەگى طالبلردن اۇغلىنى سۇرەشگە توشدى. ھىچ كىم جواب قىلمەدى. آخرى كىمدور مدرسەدن تشقىرىگە چىقىب، بې پروالىك بىلن اولرگە اۇغلىدن «جۇرە قول الله يۇلىدە شھىد كېتىدى» -دېگن خبرنى كېلتىرىشىدى. جۇرە قول نىنگ سباقداشى بۇلمىش طلبە سىقىمىدە اوشلب تورگن بۇرى آشىغىنى قۇلىگە اىركن، طوطى عمە اۇغلىدن قالگن اېسدەلىكنى يولقىب اىلدى و ھۇنگ-ھۇنگ يىغلب گۇزلرىگە سورتىب ھوشىدن كېتىدى و شو بېردە جان بېردى.

۲۰۰۷ - كوز فصلى

كانادا، شىروروك

آتسيز چقه لاق

آتسىز چقە لاق

كېلىن-كويونىنگ تورموش قورگىنگە اېندى بىر يىل بۇلەى دېب قالگندى. كوموش خان اۋزىنى اۋوتىش اوچون مغازەدن بىر شىشە ايدىشده كىچكىنە بلىقچە ساتىب آلدى و اونى اوه يىلب اويىگە آلىب كېلدى. تىنىق سووده اۋىناقلب سوزەياتگن بلىقچە، كۈزنى قووانتيرهياتگن درجەده چىرايلى و مېتى گىنە كۈرىنىشلى اېدى. سىرتى آلتىن رنگ قىزغىش توسدە؛ اۋمگنى بۇىلب، زغىردەى-زغىردەى تۇرىق¹ خالچەلر آرەلب كېتگن. شوگىنە مستانە سوزىب تورگن اۋىناقى بلىقچە شىشە آستىدەگى بىر تېكىس حكرمان سكوئدن بېزاوتەلنگندېك، بىر قلقىب سوو يوزىگە چىقەدى-دە، نېگەدېر قىتىب يىنە شىشە توبىگە قرەب شونغىب كېتەدى. معنالى، كۈرگودەى صحنە. يالغىز قالگن پىتلرىدە كوموش خان انە شو بلىقچەگە تىكىلىب، قۇشىقلر تۇقىر، پس آوازده اشولەلر آىتر، او بىلن درد و حال قىلر و آخرى چرچب-چرچب، بلىقچەنى

¹ تۇرىق: قارە قىزىل، تۇق جىيران.

اوقتلتىرەدى، سۇنگ مېزغىب كۇزى اويقوگە ايلېنەدى. بلىقچە، يىنگى تورموش قورگن يالغىز، مسافر بىر عيال اوچون يىخسى گىنە اېرمك^۱ بۇلىب قالىدى. هر كونى ايشدن قىتېب كېلگن كويابو تۇرە، بو نرسە ياقمە گىندىنى، كوموش نىنگ بو قىلمىشىدن اېنسەسى توشىب، قانى قىنب كېتەدى. كېتى كۇرىنمس كېلىشماوچىلىكلر باشلىنىب كېتەدى. خاتىنىگە نىبتا نىرتى تاشە باشلەيدى. بىر كونى كوموش خان بلىقچەنى اېرىنىنگ ائىدە تۇستىن «اېركە گىنەم» -دېب ياقىمتاى، مەيىن تاووشدە نوازشلەدى. بلىقچەگە اېركە جان، دېب مارجعت قىلەدىگن بۇلدى. چىندن هم اېركەلە گودېك غايت گۇزل بلىقچە اېدى. او هم خودى تىب ائگندەى كوموش خانگە اىنتىلىب، برماقلىرىنى يىلب-يىلب راحتلىردى؛ كوموش خانگە خوب مەر قۇيگن اېدى. اىكلەسى نىنگ ارەسىدەگى ملاقات، سۇزلىشىشلر اويدە تشوېش و غم گزەگىنى بىر قدر اىتېب، عايلەگە تاتوولىك اىلب كېلەياتگندەى گۇيا.

بو مناسبتلردن اېرى عبدالله نىنگ غشى كېلەدى. بلىقچەنى كۇرگىنى كۇزى يۇق. اۇزىچە بلىقچەنى گۇدان قىلىشنى مۇللجلەگن. هلى وقت و ساعتى يېتمەگندى. طبعىتى تىرىق عبدالله خاتىنىگە قرەب:

- اوىلمەيسنىمى خاتىن؟ بو نىمەسى؟ او سېنگە آدمى مونچە نازىنقىرەب اېركەلەگىنىگ اېركەلەگن؟ -دېبە دۇنغىللەدى.

^۱ اېرمك: وقتى كۇنگىل چاغلېك بىلن ياكە زېرىكمەى اۆتكىزىش اوچون خىدمت قىلەدىگن نرسە، مشغولات، اوونچاق، بوپنچىق.

- ھە! بو ھم تىرىك جانزادا! اوندە ھم ھس-تويغو بار؛ اويىمىزدە بۇلەياتگن نرسەلرنى بىلىپ تورەدى جانوار. او ھم مەرگە تشنە؛ انسان نىنگ قىناق سېوگى-
 مھبتىدن تاتگىسى كېلەدى؛ شونقە گپلر تۇرەم، -دېدى كوموش خان.
 - بلىققە اپرگە دېب ات قۇيىسن، بالەنگگە خدا بىلسىن قنقە آتلرنى تۇقىب
 تشلە گندىرسن اۋزىنگچە؟! -بىدىلب، -قاشلرنى قويوق قىلىپ آسىلتىرگن عبدالله
 ايلماقلى گپلردن آتدى.
 - ھە! او يورەگىم نىنگ بىر بۇلگى-دە. تۇقىز آى قارنىمدە كۇترىب يورگن بالمگە
 مناسب ات تاپىپ قۇيسم ارزىمە يدىمى؟
 - اونى سېن اېمس مېن، يعنى آتە حل قىلەدى. كىتابلردە شونقە دىيىلگن. مونچە
 منجەلەقى^۱ بۇلمەسنگ-چى. بىز الحمدالله مسلمان بىز.
 - آتە دېگنى تيار آشگە بكاوول دېگنى اېكن-دە! -جواب قىلدى كوموش خان، -
 آنەنىنگ ھىچ ھم رۇلى بۇلمەيدىمى بو اۋرىندە؟ -نیمەلر دىيەپسىز اۋزى؟
 عدالتسىزلىك-كو انساني مناسبتلر مسئلەسىدە. بوندەى قرەش يرەمەيدى؛
 يىغىشتىرىنگ بو ياووايى فكلرلىنگىزنى.
 - رۇلى بۇلەدى، -دېدى عبدالله قاشلرنى چىمىرىپ، جھل ارەلش بىر كۇرىنىشە، -
 آنەنىنگ ايشى بالەنى يوويش، ترەش، بىدىرىش-اچىرىش و اوخلەتیش تمام!
 - دۇر اھورىلدى، اوندەى زمانلردە يشمە يىمىز شېكىللى؟ -دېدى كوموش خان
 اپرىگە نالىگن بىر آواز دە.

^۱ منجەلەقى: ھىچ كىمگە سۇز بېرمەيدىگن، جنجلكش، شلەقى.

- اېسىنگ بارمى؟ نېمە بىز آسماندا، آيدە، مېرخدە يىشمىدىك؟ نېمە مونچە سفسطە قىلەسن؟!

- قەبېردە يىشەسك ھەم آدم بۇلىپ يىشەيلىك، دېيىمەن-دە. اېسكىلىك سرقىتلىرىگە^۱ آغزىمىز سۇلگى^۲ آقېب يورسە يىخشى اېمس دېماقچىمەن.

- بالەم اۇغىل بۇلسە اونگە مېن آت قۇيەمەن البتە. مېن آتەمەن دېدېمەن-كو.

- خوش قىندەسى اسم قۇيەسىز؟ -سۇرەدى كوموش.

- نېمە قۇيىسم ھەم بالەم نېنگ اسمى مسلمانچە بۇلەدى. بىلدىنگىمى؟ چونكە، مسلمانچە اسم آلگن بالە ايمانلى اۇسىب، تۇغرى جىتتە توشەدى. بالەمنى قارى قىلىپ تېرىيەلەيمەن؛ قرآنى ياد آلدىرەمەن خدا خواھلسە. باشقە مىلتلر اسمىنى بالەمگە قۇيىپ اونى دۇزخى بۇلىشىنى اىستەيمەن زىھار! اللە نېنگ قەرىدن قۇرقەمەن. بو مسئەلەدە مېنىنگ قرارىم قىطعى.

- مېنگە قالسە اۇز مىتىم خاص، اولوغ اجدادلىرىم قۇيگن اسملردن قۇيەمەن بالەمگە. مېن عربچە-مسلمانچە اسمنى اۇغىلچىمگە ھىچ قچان قۇيمەين. بىزىنىنگ اۇزىبىكچە آتلىرىمىزنى نېگە مسلمان عربلر فرزندلىرىگە قۇيىشمەيدى؟ تېورەگ-تاشىمىزەدە عربچە اسملر قىنىپ ياتىدى. اۇز اصلىمىزگە قىتسك يامان بۇلمس آتە جانىسى. اچىقدن توشىنگ؛ اۇزىزگە كېلىنگ. عادتدە بالە نېنگ اسمى اېمس، آلگن تېرىيەسى، اۇقېب اۇرگىنگن علمى، كېنگ دنيا قرەشى بىلەن حسابلىشەلەدى حاضرگى زماندە. خارجدە يىشەيىمىز اخىر؛ بوگونگى كوندە مسلمانچە اسملردن آدملر قۇرقەدىگن بۇلىپ

^۱ سرقىت: بىراودن قالگن طعام، قالگن اوقت؛ اۇتمىشدىن مىراق بۇلىپ كېلەياتگن، بعضاً زمانە روحيگە تۇغرى

كېلەيدىگن عادت، رسم-رسوم، ترتيب و شو كېيلر.

^۲ سۇلك: آغىز سووى.

قالگن؛ شولرنى ھم اۋيلەسنگيز يامان بۇلمس. اپرتە بالەمىزىنىڭ اولغەيىشى بار؛ چېت ابللرگە كىرىپ-چىقىشى بار. حاضردن اونگە تشوئش توغدىرمەيلىك آتەسى، -دېدى كوموش خان اپرىگە مراسا^۱ آھنگىدە.

اقتىدن بو يىنگى عايلەدە بالەگە اسم قۇيىش مسئلەسى حل قىلىپ بۇلمس بىر مەمگە اىلىنىپ بارماقدە اېدى. بىر-بىرنى توشونىش، كېلىشوو، مراسا-مدارادن نشانە يۇق عايلەدە. اپر دۇق-پۇيىسە، اوروش، سۇكىش حسابىگە بۇلسە ھم اۋز حكىمىنى اۋتكىزىش فكردە. قۇل كۈترەى دېسە قانون الدیدە جوابگرلىك بار. اپر-خاتىن قانون الدیدە تېنگ. بىرى-بىرىدن اوستون اېمس بو بىرلردە.

اويدە بۇلىپ اۋتەياتگن ھر كونلىك خفەگرچىلىك خانە ھواسىنى بۇغىب بارر؛ اوى دېوارلردىن زردابگە اۋخشەگن غضب، عداوت ياغىلىپ تورىدى. كوموش خان نىنگ قارىدەگى بالە قندەى توغىلىشىنى بايەگى شىشەدەگى بلىقچە احوالىدن بىلىپ السە بۇلردى. نېچوكدىر، بلىقچە سىرتىدەگى اولگى قىزغىش، شۇخ آلتىن رنگلر قارەيىب كېتگن. اونىنگ قارىدەگى چىرايلى گىنە خال-خال تنگەچەلر اىچىگە چۇككن. اۋشە چىرايلى تنگەچەلرنىنگ تگىدن اىگنەدەى-اىگنەدەى تېشىكچە اچىلىپ، او بىردن بلىقچە نىنگ سىرتىگە اپرىنگ، فساد اقبى تورگندەى. شىشەدەگى سوو ھم انچە بىن اۋز توسىنى يۇقاتىپ، خىرەلشگن كۈرىنەدى. آلتىن بلىقچە اپر-خاتىن نىنگ مناسبتىدن خىردار؛ اولر بىلن قۇشىلىپ نفس الماقدە اېدى. آلتىن بلىقچە كوموش خاننى كۈرگندە رنگى تازەلىنىپ، بىرەب كېتر؛ عكسىنچە غضبى يوزلردىن تاشىب تورگن عبداللهنى كۈرسە، رنگى سۇنىقىب، سۇلە باشلردى. عبداللهنى كۈرگن

^۱ مَراسا: اۋز ارا كېلىشوو مناسبت؛ كېلىشوو، كېلىشووچىلىك.

شىشەدەگى ئلتىن بلىقچە، خودى جىلادنى كۆرگندەى نفسى اىچىگە توگىلىب، جىمىب كېتردى.

عايلەدە ناخوش وضعيت همان حكمران. ئلتىن بلىقچە كىى دېرزه آلدیده تېرىب قۇيىلگن توبكلردەگى گللىر هم بو وضعيتدن تائىرلىنىب، سۇلىى باشلەگن. گللىرىنىگ تلهى سرغىش يىراقلىرى هم پستگە توشىب ياتردى. اوى نىنگ هواسىنى تازەلب تورگن شمال اېندى كىرمەى تورىدى. چىراقلىر يارىنى هم اوينى يارىتىشگە يېتمە ياتگندەى. همە ياقده كوموش خان نىنگ كۆز ياشلىرى عكس اېتىب تورردى. آنە نىنگ كۆنگلىدە جۇش اورىب تورگن محبتنى حسابگە ألمەگندە، دنياگە كېلە ياتگن نىنگى مېماننى خوش قرشىلاووجى كىمسە يۇق... چقەلاق نىنگ آى كونى يقىنلىشىدى. قارىندەگى بالە هم تۇقىز آى اېزىلىب تمام بۇلگنگە اۇخشەيدى.

كوموش خاننى تۇلغاق توتدى. اېردن درك يۇق. توغروق آلدیدن حالسىزلنەبېردى. بوتون وجودىنى درد آلىب بېلى ققشەى كېتدى. جان هاووچلەگنچە دېوارگە سويەنىب بارىب، اۇرىندىققە اۇتىردى-دە، بىردن كىسلخانەگە قۇنغىراق قىلە باشلەدى... آرەدن اوچ دىققە اۇتر-اۇتمس اق كىيىملى بىر عيال، ايكى اېركك كوموش خاننى تېز طىبى خدمت ماشىنەسىگە سالىب كىسلخانەگە آلىب كېتدى. بىر يىم ساعت اۇتمسدىن اېرى تېنتىرەكلىب يورگن گرگى عبداللە تايىلىب قالدى. او هم خوش-ناخوش كىسلخانەگە يۇل آلدى. كۆز يارىش آلدیدن كويوا تۇره ھنسىرەگن بىر وضعيتدە توغروقخانەگە يېتىب كېلدى. كۆزلىرى آنگ-جىلنگ بۇلىب تورىدى نىمە قىلرىنى بىلمەى. بالە نىنگ اينغ-اينغللەگن تاووشى دەھلىزنى تۇلدىرىب تورەدى. ھمىشېرە چقەلاقنى آنە نىنگ قوچاغىگە تشلب، التفات ايلە انگلىس تىلىدە ايلق

تېرىك سۆزلىرى آيتدى. عبدالله نىنگ قاوجىرەب قورىگن لىلرى دوكتور و
ھمىشرەلرگە انگلىسچەلب رحمت دېيىشگە بارمەدى.

آرەدن بىر ساعت اۋتر-اۋتمس يوزلرئدە كولگى موج اورىب تورگن كسلخانەنىنگ
سكرترى چقەلاق نىنگ اسمىنى حجتلشتيرىش مقصدىدە خانەگە كىرىب كېلدى.

- آيت-چى، ابرككىمى، عيال؟ - سۇرەدى عبدالله اېسنىكەرەگن بىر كۆرىنىشە.

- بىزدە اونىنگ اهمىتى يۇق. كىم بۇلسە ھم انسان نىنگ دردنى آلسىن، بىمارگە
ياردم قىلسىن، - دېدى دوكتور عيال.

چقەلاق نىنگ قۇلچەسىگە كودلشتيرىلگن پلاستك تسمە باغلنگن. بالەنىنگ
آغىرلىگىنى تۇرت يريم كىلو، - دېدى ھمىشرە لىلرى كولگىگە تۇلىب.

- خوش، چقەلاققە نىمە اسم قۇيەمىز؟ - سۇرەدى دفتر كۇترىب تورگن سكرتر
خانم.

آتە ھم، آنە ھم اۋز دلئدە توگىب يورگن ناملرىنى بىرىن-كېتىن آيتە كېتىلر. شو
زمان قۇللرىنى كورەگدېك پخسە توتگن عبدالله نىنگ غضبلى آوازی دۇرىللەدى.

كوموش خان اېسە، مېن بو اسمگە قرشىمن! - دېپە توريب آلدى. كسلخانەدە
جىنجل، قىي-چوو آواز كۇترىلدى. وضعيت جدى توس آلە باشلەدى. تۇق پۇيىسھلر

ملىتىق اۋقىدەى، اطرافگە ناتىنچلىك توغدىردى. شىغىللەگن شاقىن اوجىگە مىنگن
پلە. قۇرققىدىن سكرتر خوفسىزلىك چارەلرىنى كۇرىش مقصدىدە چقانلىك بىلن

[۹۱۱]گە سىم قاتدى. بىر پىسە پولىسلر توغروقخانەگە بېتىب كېلىدىلر. آتە-آنەنى
چقەلاقدىن اجرەتىشىدى. اونى كېرەكلى تشكىلاتلر آتەلىققە آلىشىدى. چقەلاق نىنگ

آتىنى ھىچ كىم بىلمەدى. اېندى اونى آتە-آنە يا كۇرگەى يا كۇرمەگەى.

آلتين بليقچه نينگ احوالى قندهى كېچركن؟ شيشه ده گى طعمىنى يوقاتگن سه سيق سووده قنچه يشركن؟ كوموش خان نينگ دردنى آليشگه يرمىكن؟ اوزى نينگ حياتى قيلگه آسليگن بولسه-چى! بو عايله ده او هم روحاً مجروح و خسته لنگن، درمانگه محتاج. چقه لاق-كو، بو يورتلرده ساغلام اوسيب، دولت حمايه سيده بختيار يشب كېته دى، قراوسيز آلتين بليقچه نى قوتقزيشگه هيچ كيم يوق. آلتين بليقچه اېندى كوموش خان نينگ اېركه، دېب چقيريشگه زار؛ اونى اينتقليك بيلن كوتيشگه مجبور. اما بوزيلگن او يده حيات اېپكىنلىرى¹ اوريلرمىكن؟ جاننى تازه لاوچى ملايم اېسپن اوز اېپارنى ينه بير باره تره ترمىكن؟

۲۰۰۸/۶/۲۵

شيربوروك، كانادا

¹ اېپكىن: شمال، سوو و شو كيبلى نينگ آقیمی، شو آقیمده گى تأثيرى، اورينيشى.